

韩国独立运动之血史

韓國獨立運動史序

巴枯寧曰自由代價惟淚與血觀于三韓之近事也信然前年夏居申遇白巖先生貽我以韓國痛史讀一過曰此淚也佗日將化爲血今年先生聞予復來申枉訪以筆語曰予自西伯利亞奔走歸來不辭以老病之軀修成韓國獨立運動史已脫稿較痛史爲長子盍爲予序之予覩史名卽覺二年以來三韓舉國之男女老幼爲故國謀獨立爲同胞爭自由徒手革命視死如歸前僵後起始終不懈之奮鬪之犧牲之壯烈之悲慘種種狀況如懸目睫焉因慨然曰痛史淚也獨立運動史血也前日之淚已化爲兩年來革命之血而此日之血又博得滿世界同情之淚試觀近日各國之抱人道主義者對于韓國獨立之壯舉言論上事實上皆予相當之扶助則轉瞬間獨立戰史又將已鐵血鑄成矣直至完全獨立之日三韓之人痛定思痛必共傾滿腔熱淚一洗痛史運動史模糊之血痕斯時也

得以極端之自由爲完全之自治東亞問題立爲解決世界和平指顧可待則韓人將挾其聰明才力一發揮其五千年固有之文明以供獻于世
界人類復以血汗染成韓國新史先生猶及秉筆直書之其愉快又當何
如此予對於韓國獨立最後之希望也于血史終篇一覘之庚申安邑景
定成序

序

太白狂奴以所著韓國痛史授余
讀之且言曰吾著韓國獨立運動
史已成子其為我序余既見其人
聞其言讀其書如之悲喜不能自
已悲者何悲韓國之有痛史也

喜者何喜韓國之有獨立運動
史也夫人類所以能生存以苦能
奮發有為也而苦所以能奮發
有為以苦能感所遭遇之痛苦
也改感痛苦則為思所以去之且
為自為以務去之惟去之故乃能

捷進而不已然則敗國亡而不知痛

者則必無痛史則亦為無識有

獨立運動史今韓國既有痛史

矣則其必有獨立運動史可知也

既有獨立運動史矣則其必有

獨立成功史可知也此余之所

為改悲且喜而喜深於悲也
抑余猛有言者近世紀以來中
國之義極熾於歐洲而漸及於東
亞持軍國主義以荼毒東亞者為
日本受軍國主義之荼毒以亂以
亡者為韓國而中國亦岌岌然將

踵其後彼持軍國主義以荼毒人
類者不惟世界受其厄而以和平
為特性之東亞民族尤蒙其羞
固有罪矣然坐視軍國主義之
橫行而不敢阻遏一以於東亞
民族之保障則中韓兩國之

人民亦必能為無罪凡敗辱
之國民以其所遇之酷烈仇復之念
蓄之至深狂之鄰和平為根賤而
視強權為神聖此歷史所常見
也然余以為崇拜強權何如抵
抗強權蓋以年國主義代軍國

主義者謂之以暴易暴以人道之
義代軍國主義者謂之以仁易暴
前者不過軍國主義之易地沒
者乃如軍國主義之絕迹也
今日以前人類之歷史不出於鞭
撻相斫今日以後發揮和平之固

有性翕受人道主義之新思潮
中韓兩國之人民實負其責深
過去之積垢開未來之曙光於
是乎在寒歲韓國之獨立運動
余旅居巴黎以未獲親見為憾
然讀韓國獨立宣言油然而起人

類大同之感想偶獲與共國運
初獨立之人士相見共志趣皆先
明而他深有慘怛之意而不流於
厲有剛毅之節而不毗於暴信乎
終實踐共宣言者韓國之獨立運
動史若有所異於今日以前之種々

獨立運動史已卒，以此則他日

之獨立成功史必為人類歷史開

一新紀元，立法言者此真可傳為

韓國喜^且因為東亞喜為世界喜

者也，以方勢而論真理終勝暴


力終敗，余信韓國獨立之必成。

功猛長夜，必有平旦太白狂
如雖皤然老矣，其將有韓國獨
主，以功史之，所以健痛史，其獨立
遂初史之後，欲願與東亞親愛，
同胞歡呼而迎之。

韓海

中華民國九年六月


數千韓人在公園廣場宣佈獨立熱叫韓國獨立萬歲的景況






三月一日
韓人宣布
獨立以後
日人對手
無寸鐵之
韓人亂行
虐殺這個
人亦被日
軍刺死者


數千名韓人在京城美國領事館前
獨立呼萬歲進行的街上的
慶祝





六千
多的
韓國
人在
宮門
前廣
場舉
手向
天叫
呼韓
國獨
立萬
歲的
景况

日本軍人在公園門口阻止韓人集合景况






日軍虐殺
華水里百姓
又燒了
他們的房
子留下的
是破的瓦
片碎的器
具
(四月十
一日早上
人家在屋
裏睡着之
時日兵一
隊來即放
火民家以
後守在各
小路有人
出來就開
鎗殺害男
女老幼在
火燭裏徬
徨有抱其
子女有老
親跑到村
外這殘暴
的日軍又
開鎗殺他
或捉去)

狀慘里水華的燬燒軍日經





日軍燒
燬後的
華水里
慘景
（一位
女人生
了三個
兒子一
個兒子
被日兵
刺死兩
個兄弟
在他屍
邊哭他
們的父
親亦被
日兵打
死）



水原| 戴| 慶| 里| 三十| 九家| 村莊| 被暴| 虐野| 蠻的| 日兵| 燒了| 連禮| 拜堂| 三十| 一家




了放日刀人門五打外軍進講教他多人耶地載日十一景哭盛坐位子聽
教火日兵刺叉口跑六殺開在內他堂進名三蘇方嚴兵五四的在中在女的天
堂燒叉殺用日到個有鎗門日們聽去教千教叫里到號月慘號灰人兩喪



叫呼萬歲而日軍用刺刀傷眼睛




女學生奉命幹部的命向水原地方去中路遇暴虐野蠻的日兵開鎗打殺



爲自由呼聲萬歲被暴虐的日軍截斷了腳




女士被日警捉去獄裏三天後放他出來他受暴虐野蠻的毒刑出來就死



儀 葬 行 舉 者 殺 虐 之 人 口 被

吉 林 韓 僑 獨 立 運 動 之 會 議






傷 斷 脚 歲 高 呼 叫

爲祖國呼萬歲 野蠻無道 倭兵開肚了





惡魔一樣的日本軍各駐屯要路防止韓人動連威示

FROM THE JAPANESE DOMINATION



CHICHENGO, IN SHI
The International Film Co. a few minutes after the execution by the Japanese

殺刺刀用上架字十在人細兵日的道無底茶




兩位夫人家人呼叫萬歲日被警捉去入獄




手執國旗高呼萬歲日兵斷其手更以他手轉呼連呼萬歲日兵斷其手拿着祖國旗國高呼韓國獨立萬歲

又 宏 空



現 再 旗 極 太 門 立 獨 國 韓



大韓民國臨時政府職員一員同
(大韓民國二年一月一日在現)



昌勳 龍九	世鐘 明錫	吳李 李申	鎮煥 伯洙	宋龍 甸春	權羅 梁鄭	麟圭 植完	完洪 東	崔金 申朴	熙兆 模英	秉基 聖華	孫洪 崔吳
----------	----------	----------	----------	----------	----------	----------	---------	----------	----------	----------	----------



羅朴李林
仁熙弼
協道柱圭


李李金安
鍾昇昌世
一薰俊桓

樞朴李白
秉準甲龍
憲承成城

林洪吉韓
禮秉善龍
煥箕宙雲



益大禹容	乘如鎮憲	韓劉宋虛	梁壁永浩	李金成朴	元台寅	允德善泰	相基南道	玄康崔金	温煥煥奎	魯世智弘	鄒金金金
------	------	------	------	------	-----	------	------	------	------	------	------



大韓民國臨時政府臨時政廳

大韓民國臨時政府首腦



勞勳總辦安昌浩



內務總長李東寧



國務總理李東輝



軍務總長盧伯麟



大總統李承晚



財政總長李始榮



交通總長南亨祐



法務總長申圭植



學務總長金奎植

韓國獨立運動之血史上編目錄

緒言

第一章	民族之略歷	一
第二章	甲申獨立黨之革命失敗	三
第三章	甲午東學黨之大風雲	六
第四章	日人弑我國母儒林舉義	七
第五章	獨立協會之運動	八
第六章	日人之侵奪利權及勒締六條	九
第七章	國民大哭於保護勒約	一一
第八章	萬國平和會之密使	一三
第九章	伊藤逼帝禪位勒締七條協約	一五
第十章	伊藤盡汰軍隊參領朴勝煥自殺	一六
第十一章	各地義兵之略歷	一七
第十二章	伊藤廢陸軍司法兩部	一五

第十三章 震動世界之義俠聲……………二六

第十四章 國併後之殉節諸人及志士團……………二九

第十五章 百二十人之謀殺寺內案……………三一

第十六章 總督之貪暴行政……………三二

一 行政機關之裁減

二 職員任用及制限之不文法

三 地方行政及官吏之權限

四 參事會及協議會

第十七章 司法制度之非法……………三六

一 關於政治之不法裁判

二 關於經濟之不法裁判

三 獄囚之差別與虐待

四 對外國人之視察而假飾者

第十八章 憲警機關之擴大……………四〇

第十九章 憲警之蠻暴不法……………四一

第二十章 各官署之排斥韓人……………四四

鐵道郵電之事務員

官廳供物營業之不許韓人

第二十一章 東洋拓殖會社……………四五

第二十二章 抑壓韓人之企業……………四七

第二十三章 監視韓人之私有財產……………四九

第二十四章 教育之同化政策……………五〇

第二十五章 撲滅各宗教之政策……………五三

一 對於大倭教

二 對於基督教

三 對於佛教

四 對於天道教

韓國獨立運動之血史下編目錄

第一章 韓日國民性之冰炭……………一

韓族對日本族之輕蔑

韓族對日本族之怨恨

韓族對日本族之不信任

第二章 改造世界之新文化促我獨立運動……………五

第三章 京城獨立運動之本部及內外學生團……………六

第四章 太皇之犧牲於獨立運動……………七

第五章 在外韓人之活動……………九

宣言書

第六章 獨立本部之示威運動……………一四

宣言書

第七章 獨立運動一覽表……………二六

第八章 義州平壤晉州之運動狀況……………四三

第九章 美國宣教師之被誣遭難……………四九

一 牧師之身被毆打

二 牧師家宅之大搜索

三 牟義理之入獄

四 驅逐之惡意

第十章 在外韓人之宣佈獨立……………五一

老人同盟團致日本政府書

第十一章 上海之臨時政府議政院及各機關……………五六

第十二章 日人虐蠻之殺戮……………五八

一個月間死傷者

水原定州孟山江西大邱密陽咸安陝川南原天安京城義州江界郭山朔州昌城

渭原各處之虐殺

第十三章 日人惡刑之蠻行……………六八

一 對於婦女之蠻行

二 對於老弱之蠻行

三	掠奪金錢之蠻行	
四	對於獄囚之蠻行	
五	投毒害人之確證	
六	上海西報所記之日人蠻行	
七	平壤宣教師會所報之日人蠻行	
八	日人對獨立軍之蠻行通例	
九	日人在監獄之蠻行常例	
第十四章	日人諱惡之巧譎	八〇
第十五章	我代表在巴黎和會之請願	八四
第十六章	各方面之呼籲聲	九一

儒教徒呈巴黎和會書

女學生呈巴黎和會書

元老大臣金允植李容植致長谷川書

趙衡均文一平等致長谷川書

僧侶聯合大會宣言書

韓國耶穌教代表告中國耶穌教會書

第十七章 各國人之同意……………一〇二

中國人之請認我獨立

爲韓國近事正告國人

各界聯合會援助韓人通電全國

孫中山唐少川之外交主張

美國人之大韓獨立後援會

美國宣教師致威總統書

美國宗教界及教育界之同情

美領夏威夷農主等之同意

俄國民黨之聲言援我獨立

英國議員之韓國友人公會

法京人權會之韓國問題

韓國獨立運動之血史 目錄

捷克勇將卡耳大之爲韓宣傳

萬國社會黨之認我獨立

第十八章 婦女及兒童之愛國熱……………一一八

青年外交團與愛國婦人會

第十九章 姜老俠爆擊齋藤……………一二五

第二十章 義親王與大同團……………一二七

第二十一章 北韓義兵團之活動……………

第二十二章 呂運亨之渡日宣傳……………一三二

第二十三章 日兵虐殺俄領韓僑……………一四二

第二十四章 聯通制之大讞案……………一四六

第二十五章 大韓光復軍之猛烈行動……………一四八

大韓青年團聯合會

大韓獨立團

大韓光復軍總營

各處暗殺團

第二十六章 徐相漢金榮哲朴在赫三烈士……………一五六

第二十七章 美議員來韓時之光景……………一五八

第二十八章 日本藉故瓊春劫案派兵強佔……………一六〇

第二十九章 我義軍四戰四捷之奇功……………一六四

第三十章 倭賊虐殺我良民之大慘禍……………一六五

西北間島各地倭賊蠻行及我人慘狀調查表與各報公傳

第三十一章 西報對於韓日戰爭及日軍罪惡之評論……………一八四

附世界輿論

論日人之侵略暴虐及韓國上下之反抗……………一八八

韓國之自由戰爭(英人字林報)……………一九二

美國上院之韓國事情報告書……………一九三

臨時政府法律顧問透兒波之報告……………二一四

世界上酷受壓制之韓人 上海西報……………二一五

又有一白耳義乎……………一二七

朝鮮之獨立運動 紐育報……………一二八

韓國之真相 上海美人大陸報記者……………一二〇

論中國有設中韓親友會之必要……………恨人

結論……………恨人

韓國獨立運動之血史上編

白巖朴 敬植撰

緒言

往余修痛史也有同志之舉觴而祝者曰願先生老而益壯燦爛之墨莊嚴之筆不止此痛史而俾吾輩得見光復史之更煩先生也余固自信吾國必有光復之日亦有以算日本將來之必敗者故雖顛沛流離飢寒病苦之中而未嘗無一種樂觀但時期之遲早未可知也而歲月蹉跎吾衰益甚豈意今日獨立運動史之繼吾痛史而作乎然而以余自信者言之何以信吾國必有光復之日也蓋國競之世弱併乎強數見不鮮而若其人種之資格相等宗教歷史言文風俗有國魂之不滅者存焉則縱被併於一時而終乃分離獨立者亦世界國史之多見者也夫吾族以檀祖神聖之胄宅左海名勝之區人才之產出文物之製作實具優秀資格過于他族者也吾國歷史有四千三百年之統緒忠義道德之根基深厚宗教文學早已昌明餘波沾溉日本而我居先進之位矣言吾大韓之言俗吾大韓之俗歌吾歌禮吾禮衣食吾衣食均吾國性之別於他族者也綜此諸種生成我國魂強固我國魂決非他族所能同化而彼日人者世爲我仇千百年來積不相能一薰一蕕萬無調和之理且彼之取我專以詐力蔑棄信誓縱得幸逞於一時而颯風驟雨決不能久天道好還剝往復來相彼草卉野火燒不盡春風吹又生而我二千萬之國魂獨無是耶此吾所以信吾國必有光復之日也何以算日本將來之必敗也觀夫

歐米列強之富盛文明皆積數百年無量數之人智人力而致之者矣日本僻處極東島中見聞素陋漆齒文身魚鱉與處飲食衣服宮室器用不過自我而得之者一朝頓見西勢東漸非急圖自強則不能以自存非銳意進取則不能以發展也爰驅國民於突進一塗鍊武修械疲神竭力國勢蹙蹙如裂火暴騰軍國主義大陸政策着着得手遂戰中露兩大國而勝之國威大振霸業日隆可謂沛然莫禦者然以武人專制而輿情不平以驚外太驟而民力已疲矣彼其圖吾國也蔑視我民意而惟利用少數奸黨逞其無厭對於中露而施之者亦惟此術也故雖取得其利權者多而積失民意加以軍民驕橫施虐于人多無狀故彼一進而與我二千萬爲仇再進而與中國四萬萬爲仇三進而與露國二萬萬爲仇彼雖強武乎而爲世界民意之公仇能保無敗乎且歐美列強對彼侵略行事舉懷忿嫉欲乘機而制之者亦復不少彼於國際孤立又如此吾所以算日本將來之必敗者也余據此兩種觀念竊自擬於移山愚叟之經營以吾光復事業期之子子孫無盡之傳而若蒙帝佑者速吾身而親見其成亦非虛望也乃於己未三月一日我太極國旗突然颺空與日月爭輝獨立萬歲之聲震動天地我男女老幼之流血載塗而勇益奮氣益壯薄海內外窮巷遐陬無不同聲疾呼爭先効死而皆忠信甲冑手無寸鐵者耳彼乃大發軍警恣行殺戮槍射劍擊若刈草菅焚燬村落及教堂積骨爲燼比屋成灰前後死傷者數萬投獄受刑者六萬有餘天日暗澹草木悲泣而吾族之義血毫無少沮各國之輿論一致激昂彼之蠻暴大彰于世界於是長谷川撒旗而走齋藤更遭爆擊狼狽失據倉皇罔措其氣已奪矣且彼社會之言論頗改前調訂明同化之不可能而攻其政府之失策有以自治爲言者有倡許我獨立者自其政府亦改武斷爲軟化而我之絕對

主張者惟一獨立而已。他何可問哉。惟持此堅忍。繼此猛進。多方以誤之。全力以排之。使彼窮於對付。大悔前非。則完全獨立亦早晏間事。即認此運動史爲吾光復史亦可也。

第一章 民族之畧歷

我大韓亞洲東部之舊國粵自神人降于太白。建邦啓土。遂荒大東。子孫繼繩。本支繁衍。爲朝鮮。爲扶餘。爲肅慎。爲辰國。爲辰韓。馬韓。弁韓。駕洛。爲高句麗。百濟。新羅。高麗。渤海。珠里。珠申。諸族。統緒。遠聲。赫濯。有四千三百餘年之歷史矣。間以外族之侵入言之。漢人置四郡於北韓。而旋爲高句麗所逐。唐人乘我內亂。得滅百濟。高句麗。而百濟則爲新羅所併。高句麗則爲渤海所復。蒙古以征服亞歐之威。與高麗交戰。數十年。卒不能取我國土。而相與婚媾。而修好。彼三島殊種。亦嘗屢肆寇鈔。而未有不覆敗而歸者。至若乙支文德。以數千精騎。覆隋兵百萬於薩水。楊萬春。以安市一城。却唐師十萬。姜邯瓚。以卒一萬。破遼兵十萬。完顏太祖。以二千五百。摧遼七十萬。衆李舜臣。以龜船九隻。破倭艦數百。此其強武之風。謂東方之雅典亦可也。豈可專以右文好禮之國爲吾族之徽號哉。李朝之末。浸入虛弱。猝逢狡寇。遂隳於亡國。劣種之階級。此爲吾族有史以來未有之奇恥。大辱。尙可忍言哉。然而我獨立之精神。未嘗因是而虧壞。彼之壓力。適以激成我反動。固結於腦髓。則豈其無大爆發大活動之一日乎。且吾族之獨立運動。在最近三十年間。未嘗間斷。亦我歷史上精神之動力也。故余之述是編也。以甲申獨立黨之運動爲其起點焉。

第二章 甲申獨立黨之革命失敗

先是我韓在鎖國時代修文偃武閉關自守民至老死不見外事紀元四千一百九十九年丙寅（一八六六）俄艦來元山要通商而我即拒之是年十月佛艦陷江華我軍擊却之四二〇五年辛未米艦來江華意在修約通商而我又發兵拒之此即大院君攝政十年力持排外主義之時代也至丙子二月始與日本締修好通商之條款以同等之權相待清國亦認我自主併勸與歐美列國通商締約以爲牽制日本之圖而我猶堅執不從矣壬午以後金弘集金允植魚允、中洪英植諸人以遊覽外國而灼知鎖國不適時宜乃與英米法德俄奧義比等國先後締約均有使節之往來而清國以壬午軍變遣吳長慶馬建忠袁世凱等領兵來駐日本亦置公館衛兵此清日衝突之所由起也時金玉均朴泳孝洪英植徐光範徐載弼等俱以英年銳氣感觸於海外新潮欲改革舊政新建獨立帝國而爲舊黨所沮乃欲一舉而汰之日人又利我內訌有派送軍艦之僞約於是四二一七年甲申十月之變作焉十月十七日郵政局落成洪英植以該局總辦設宴請各大官及各國公使領事而日使竹添進一郎稱病不赴書記島村替行以同日下午六時開宴而玉均等預伏士官生徒於王宮門前及景祐宮又伏刺客於郵政局前溝中以放火爲號欲盡戮舊黨大官至十時忽見牆外火起時月明如晝火光衝天閱泳翊爲救火先起甫出門被刺客劍擊入而仆焉德人穆麟德救而送之賓客皆大驚相失於是玉均泳孝光範等徑奔闕內直入寢殿奏曰清兵作亂火燄滿城屠戮大臣請急移駕以避之併請召日使入衛上不許玉均等泣請不已而中官柳在賢被殺上乃倉皇出殿趙太后洪太后王后太子以下皆徒步以從至永肅門忽有砲聲玉均等急呼曰外兵大至復請召日使入衛上又不許玉均等出懷中鉛筆洋紙寫日使來衛四字送致日使館矣駕至

景祐宮日兵已充斥廊宇日譯淺山顯藏迎謁竹添繼至上御東廂而革黨與日使併處廳事少頃士官生徒十
二人入而環擁日兵圍繞宮門而革黨居中制命十八日晨左營使李祖淵後營使尹泰駿前營使韓圭稷密謀
通知於清營玉均等疑之使生徒殺之因矯旨召輔國閔台鎬趙寧夏海防總管閔泳穆入內殺之八時又移御
于桂洞宮把守尤嚴非有革黨及日人之票信者不得出入玉均等遂矯命組織政府李載元爲左議政洪英植
爲右議政李載完爲兵曹判書沈舜澤爲吏曹判書金玉均爲戶曹判書尹洪淵爲禮曹判書李允應爲刑曹判
書洪鍾軒爲工曹判書金弘集爲外衙門督辦朴泳孝爲前後兩營使兼左右捕將漢城判尹徐光範爲左右兩
營使兼協判交涉事務徐載弼爲前營正領官以日本留學生徒組成一隊然百官無入參者令莫之施且清兵
在下都監探聞變故泳孝恐事敗欲遷據江華以圖再舉而日使以爲不可玉均亦從之日晡復擁還昌德宮御
觀物軒衛守加密內外隔絕人心洶洶而泳孝等亦有焦燥之狀蓋以日艦之違約故也於是李鳳九等奔告清
營刻請入衛十九日袁世凱吳兆有等領兵入闕我左右兩營兵應之與日兵交戰互有殺傷而日兵不支玉均
等擁駕入後苑演慶堂入夜我兵更進與日兵鬪上轉避玉流泉後北牆門武藝衛士及別抄軍始得入衛奉駕
而出竹添見事不利遁回其館玉均泳孝光範載弼等皆從日兵去洪英植朴泳孝及生徒七人從駕至北關廟
袁世凱遣兵往衛英植等挽御衣阻之衆軍力爭遂殺英植泳孝及生徒七人駕次宣仁門外吳兆有軍中翌日
復移御于下都監袁世凱軍中時我民皆讎視日人誓不俱生逢輒格鬥致多殺傷清兵亦夜襲日館殺三十九
名劫其婦女燬其房屋竹添遂下旗率兵出西門去陸軍大尉磯林眞三爲我民所殺玉均泳孝光範載弼等雜

髮洋服由領事館藏身木櫃中出仁川乘日船逃入日本蓋甲申革黨諸人急激下手作事無漸不得國民之同意且爲日人所給獨立運動欲藉他力而爲之故敗

第三章 甲午東學黨之大風雲

自甲申革黨之敗也新進之談時務者併被退黜而頑固之勢益張十年以來稅政日甚權貴之家視官場爲金穴地方之吏取民膏爲貨泉小民失產愁冤滔天乃挺而走險聚黨逐吏所在蜂起於是東學黨因民不堪而舉革命旗幟因以惹起東亞之大風雲矣

東學者慶州人崔濟愚所創也自標對待西教而名之曰東學其旨曰混合儒佛仙三教也其呪曰侍天主造化定永世不忘萬事知十三字也執筆降神舞劍騰空其徒夜必奉明水以祈輔國安民每朝夕炊飯計其人口各減米一匙名以誠米貯爲供奉教主之資不數十年而普及全國再傳於崔時亨三傳於孫秉熙而爲天道教矣紀元四二二七年甲午春黨魁全琿準孫化中等發難於湖南之古阜以貪吏之激成也一呼萬應營壘相望以除貪污救民瘼之意宣布檄文兩湖列郡無不響應不旬日而蔓延於京畿江原黃海慶尙諸道氣燄所及有如燎毛及其攻陷全州聲言北上京師掃除君側之惡朝廷大震當局者乃請援於清而袁世凱素持干預政權之想認此爲機會電請派兵而日本以對韓問題素蓄憾於清欲一決戰者久矣至是詰清出兵之故清廷答照有朝鮮屬邦字樣日廷大加詰駁遂出師而敗清日使大島圭介脅我政府改革政治爲攻守同盟至乙未五月兩國罷兵締馬關條約而認吾國爲完全無缺之獨立聲明于各國矣

東學黨以組擾棘矜奮起隴畝與我官軍及日兵交戰至九個月乃罷死者三十餘萬流血之慘亘古未有蓋其動力激於兩班之壓制官吏之貪虐而發焉則吾國平民之革命也惟其徒黨多愚蠢無識其舉動亦多亂暴無紀改革政治非其所能而破壞舊慣則有餘矣使其無外人之干涉而更有能者出於其間因其破壞而建一新鮮之獨立國未始不可也無如強鄰乘此而干涉所謂獨立非我自力而得之終乃被他壞了是豈吾民革命之本意哉此所以今日天道教復演此血而活動者也

第四章 日人弑我國母儒林舉義

紀元四二二八年乙未八月二十日日人弑我明成王后先是自我宮中有聯俄排日之說日人怒欲除之日使井上馨以七月遞歸入闕陛見奉獻寶物於兩陛下奏以確保皇室安全權力統一談至六時忱溢於辭兩陛下信其爲誠心保護而無他慮也既而三浦梧樓承任來京與杉村濬岡本柳之助等密謀弑我王后于時我訓練營之軍隊爲日本士官之教習而禹範善李斗瓊李周會等爲其隊長自宮廷欲解散之範善等聞而忿甚欲一決鬥三浦乃與杉村岡本等決議糾結範善等爲內應又派兵往孔德里逼大院君入內八月二十日晨日兵放砲入光化門我衛兵拒之略有殺傷而莫之搪阻聯隊長洪啟薰叱之卽被殺日兵遂攔入殿中而日本士官指揮整列把守各門爲刺客之助刺客數十名持刀登殿跳踉咆喝或犯御體之肩臂而擲引之或向御體之側而放短砲或摔曳宮人於御前而亂打之宮內大臣李耕植在御前被殺太子被執至於掉頭髮脫冠屢擬刃迫問王后所在時外國人士巴津爲護衛在殿庭被屢次詰問而終不指示幾危其命矣刺客等遍搜各房終乃刺王

后而弑之裹以緞衾置諸松板自殿庭移厝鹿園樹林中架柴灌油以燒之既而三浦入內陸見而刺客及日兵退出闕外於是各國公使均有嘖言日廷不得已逮三浦等至廣島開讞而乃謂犯罪實行併無確據三浦以下刺客等均皆放免矣

嗚呼春秋之義君弑而賊未討則不書葬者謂其無臣民焉耳今我國母被弑於外賊而無復讎之舉則豈可謂國有臣民乎於是忠清道堤川郡儒生柳麟錫與李麟榮李康_卒等倡義討賊傳檄四方砥平郡人孟英在金伯善亦起兵應之與日兵交鬥數月互有殺傷儒生許薦起於善山丞旨李僕金福漢起於洪州儒生奇宇萬起於長城李秉採起於興陽竿旗木兵功雖未就而其討賊復讎之義實有足以扶植民彝者矣

第五章 獨立協會之運動

紀元四二三〇年丁酉正月上御貞洞慶運宮卽皇帝位改國號曰大韓改元曰光武築園丘壇以祀上帝衾黃色改定宮府官制分地方爲十三道而列國均認以獨立帝國矣先是徐載弼自米洲還國欲葦我獨立之基倡建獨立門獨立館發行獨立新聞純用國文募集人士組織獨立協會種種施設實現吾國社會之曙光矣然其時當路如尹容善南廷哲趙秉式等均以守舊大臣爲上所信任盡反甲午更張之制以復君權剝下媚上政以賄成而載弼以甲申革黨亡命渡米修學爲博士薰染米風已經十年及其歸國而爲外部顧問也直以打破階級實行平等爲開進之先務與本國舊慣多有齟齬且以報筆鼓發民氣攻擊官僚由是當路嫉之迫令去國赴米而其所倡平等思想已有下種於社會者矣

徐載弼既去國而李商在尹致昊南宮億李承晚安昌浩及培材學堂諸生繼之發言籲衆誓死扶獨立而皇城報爲其機關一時有志翕然而應時俄人欲借我絕影島爲貯炭所以供太平洋艦隊之用外部大臣閱種默許之獨立黨極力反對俄人遂疑其議于是該黨大集于闕外聯名抗疏請去大臣之不協人望者遂與政府大起軋轢軍部大臣閱泳綺尤深忌而欲滅之吉永洙洪鍾宇輩募集賤流名曰皇極協會以敵對之持槌搏擊血流闕外惟內部大臣閱泳煥意重民權稍袒獨立黨乃被泳綺所攻而遞職政府各大臣又多方以壞之或以官職餌黨員之劣者撓其中堅繼以兵力脅迫多衆于時日人亦不利我民權之發達而陰受政府密意設法妨害遂使獨立黨陷於失敗自此輿論消沉官僚鴟張十年之間國步日趨於險惡矣

第六章 日人之侵奪利權及勒締六條

日人以確保我獨立屢行聲明于世界而乃包藏禍心陰圖吞併自林權助任公使以來侵奪利權日甚一日沿海各地之漁業及捕鯨權稷山水原之金礦開城之蔘圃鬱島之森林月尾島之農庄溫陽之溫泉智島孤下島之桑畝長古島之破船賠金京釜之鐵路線皆認以無主肆行奪取至若第一銀行券不用於彼國者而勒行於吾國我民起而反對彼乃脅我政府至以派遣兵艦爲嚇其他日人橫行各地擅奪民產者至以武器行其剽劫而莫之伸理故英人報紙曰日人盜采韓國價重之蔘根又其內地行商甚多不法韓民呼冤不已而日人聽若不聞反罪韓民日本此等政策將其會所自倡之韓國獨立而顯行破棄云矣

迨日俄開戰而日人更挾其兵威侵奪我利灌殺害我人民尤無忌憚三千里山河盡入於破碎矣日本兩師團

入城卽日林權助脅我政府勸締議定六條

第一條 韓日兩國爲保持恒久不易之親交確立東洋和平大韓帝國確信日本之關於施政改善容其忠告事

第二條 大日本政府擔保大韓國皇室之確實親誼安全康寧事

第三條 大日本政府確保大韓國獨立及領土保全事

第四條 由第三國之侵害或因內亂而大韓國皇室之安寧保全有危險之境遇則大日本政府可速行臨機必要之措置而大韓政府爲大日本政府之行動容易與以十分便利大日本爲成就前項目的得軍略上必要地點之隨宜收用事

第五條 不經大韓國政府大日本政府之互相問議承認而後來之違反於協定趣意者於第三國不得證立事

第六條 關聯於本協約之未悉細條大日本代表者與大韓國外部大臣間臨機協定事

由此協約而我之主權全失國家運命遂懸於日人手矣英國泰晤士報曰韓國以此條約之故遂永爲日本之附庸今後韓國之在日本其猶埃及之在英安南之在法也其權能同其効力同其性質亦同質而言之則韓國之獨立卽形式上獨立而非實際上獨立也日本所謂忠告權者是蒙一薄紙之命令權也云云此時輿論大起反對衆民集會演說樞院諸紳上章劾李址鎔具完喜等賣國之罪請繳消該約有人欲募死士鎗擊李具日使

偵之多派巡警衛李具私第而夜有砲聲發於李第又有投炸彈於具第者而併無傷害或有爲巡警捕獲者於是日人佔我電郵通信機關日本之船舶自由航行於國內河川日人要求各處之荒地開墾採伐森林建築砲臺奪取庖肆徵收西北各郡之稅金驅逐官吏置其私人日憲兵代理我警察禁止我集會廣佔鐵路及軍用地責徵軍需軍用役夫遍置顧問於各部管轄海關稅及度支財政減我兵額奪我人民私有田土我民或有不應其徵索者誣以俄人間謀或拘囚而加酷刑甚或斬殺而其殺男子也樹十字架懸首其上索繫其足而馳走又或縛其四肢於十字架放砲殺之而一發不卽斃者痛苦不堪哀呼不已婦女則係其頸而懸之路上誘示于衆此米國新聞記者視察吾國而寫真其狀供人玩覽者也

第七章 國民大哭於保護勒約

日本既控俄國以我紀元四二二八年（一九〇五）乙巳九月兩國全權委員會同于米國苦孜瑪士締結和約而俄國承認日本在韓國政治軍事經濟均有特別之權矣於是伊藤博文以特派大使十一月十日從京釜鐵路入京翌日陛見呈日皇親書退往仁川經宿十五日入漱玉軒陛見提呈保護條約上嚴辭峻斥曰朕寧以身殉國決不可認也伊藤嚇以兵力從事而終不獲允十七日令其憲兵巡查逼我各大臣入闕開御前會議伊藤與公使林權助大將長谷川好道等率兵入闕槍砲刃劍森列殿陛因與諸大臣協議參政韓圭高極力反對誓以身殉伊藤令其憲兵拘置別室外部大臣朴齊純反對數次終乃默然伊藤請以可否決之度支大臣閔泳綺法部大臣李夏榮曰否學部大臣李完用請改訂句語軍部大臣李根澤內部大臣李址鎔農工商部大臣權重

顯與完用一樣口吻伊藤曰參政雖否決而諸大臣以改訂爲可則此案決矣即命日館通譯前問恭作外部補佐員沼野等帶兵奪外部印即將該約簽字

第一條 日本國政府由東京外務省今後對韓國關係及事務可監理指揮日本國外交代表者及領事團保護在外國之韓國臣民及利益

第二條 日本國政府當任韓國與他國間現存條約之實行完全韓國政府今後不由日本國之仲介不得爲國際的性質上條約及約束

第三條 日本國政府使其代表者在韓國皇帝陛下之闕下置統監一名而統監專爲管理外交攸關之事項駐在京城有內謁皇帝陛下之權利日本國政府於韓國各開港場及其他認以必要之地有置理事官之權利而理事官在統監指揮之下執行前在韓國日本領事之職權併掌理本協約條款之完全實行及必要的一切事務

第四條 日本國及韓國間現存之條約及約束除抵觸本協約條款者外總其繼續効力

第五條 日本國政府保訂其維持皇室之安寧尊嚴

於是皇城報直書其強勒締約之真相而廣佈之又揭論文曰是日也放聲大哭而哀告國民社長張志淵被逮入警廳該館被封日墜虞淵象黑闇而有韓每日申報忽放光明即梁起鐸與英人裴說開辦而吾執編輯之役將其締約顛末纖悉記載攻擊伊藤激發輿憤讀者血湧學生閉校痛哭教徒籲天悲泣商賈撤市狂呼儒

生投章叫闖元老大臣抗爭累日而日人或以兵劫之或拘而辱之於是侍從武官長閔泳煥拔刀自刎原任議政大臣趙秉世經筵官宋秉璿參判洪萬植學部主事李相哲軍人金奉學併飲藥自殺殉于獨立農民金台根在水原停車場投石擊伊藤不中奇山度李種大金錫恒等十一人謀刺朴齊鈍李址鎔李根澤李完用權重顯五賊事洩被逮李建爽嘔血死獄中

蓋以韓日前後盟約觀之紀元四二〇九年（一八七五）日本與我定修好條規其第一條曰朝鮮爲自主之邦與日本國有平等之權兩國以彼此同等之禮相待不可毫有侵越猶嫌四二二七年（一八九四）日本謂清國之舉動有妨於朝鮮之獨立而執言開仗同年締韓日同盟條約其第一條曰鞏固朝鮮之獨立翌年清日馬關條約第一條曰確認朝鮮爲完全無缺獨立自主之國四三二一年（一八九八）俄日協約第一條曰俄日兩帝國確認朝鮮之主權及其完全之獨立四三三五年（一九〇二）英日同盟條約第一條曰既已承認中國及韓國之獨立則對於兩國全無侵略的意向四三三七年（一九〇四）俄日開戰日皇宣詔曰韓國獨立爲我帝國完全無缺之要圖韓日議定書亦曰日本政府確保大韓國獨立及領土保全彼以國際上金石之盟約屢次聲明于世界者自行破棄逞其挾詐盜國之野心縱不重視我二千萬之民意而獨不重世界公理公法之終不可滅耶彼其國交竟陷於孤立之危者也

第八章 萬國平和會之密使

紀元四二四〇年（一九〇七）六月五日萬國平和會開設於和蘭海牙府各國委員之會同者四十七人和蘭

外部大臣陳拜祝之忱米國大統領羅斯福演世界和平主義致讚頌之詞各國委員提出議案付之公決而時有韓國密使之突現即前議政府參贊李相高平理院檢事李儔駐俄公使書記官李瑋鍾三人也

蓋日人干涉我內政攫奪我主權束縛我自由內則各部顧問主管政務細大不遺外則憲兵巡查布列各地羅織甚密至於皇室監制尤嚴大小臣僚宦官宮妾非有其票信者不得出入伊藤又教宋秉峻陰結妃嬪偵知帝之言動毫無遺漏調查皇室所有金銀田土盡行奪取則吾君爲囚吾民爲奴矣嗚呼斯世只有強權而無所謂公理公法者平和之內容爲競爭保護之實相爲吞併今日所稱平和會者亦烏有所謂恤小制暴興滅繼絕確據正義實行公法者乎然而病劇垂死之人禱於神祇以冀不可幸之幸亦由痛苦迫切之不得已此所以對於平和會而有密使之往訴者也

李相高李儔受帝密勅以四月二十日發京城至俄領海參威乘西伯利火車抵俄京彼得堡見李瑋鍾與之偕行至海牙府時俄國委員鼎利圖厚伯爵爲平和會議長三人訪之而俄政府方以韓國密使事有訓電故得以接見然該會之認受與否非議長權限所及也相高等遂歷訪英佛米各國委員及和蘭大臣懇求參會說明乙已保護條約之無韓皇允準日本無奪取韓國外交之理由又聯合各國新聞團開國際協會李瑋鍾登壇演說痛駁日人之強勒締約虐待韓人之事狀滔滔數千言聲淚俱下聽者莫不悲之

七月一日相高等提呈控詞於平和會其概曰

吾等祇承皇命泣告於 貴總統代表向者我韓以千八百四十八年自主獨立而 貴各國公認與之修好

乃千九百五年十一月十七日以後日人以兵威逼我韓國強奪各國國際交涉之權利今將日人對韓國破壞一切法律政權等事特別三條謹呈一、一切政事不待韓皇承諾擅恣施行二、日人仗陸海軍勢力壓迫韓國三、日人破壞韓國一切法律風俗 貴總統據公理處斷可見日人之違背公法韓國既處自主之位奈何使日人干預我國際交涉致令敵國皇命之全權使節不得參列於斯會乎望 貴總統特施扶弱濟危之助力使敵使等參列於萬國平和會容收一切伸訴幸甚

於是該會委員電我皇室問有派使之事而無如通信機關已爲日人所佔伊藤即將此電入闕迫問大肆威喝上憲甚不知所以爲對伊藤乃以無遣使之事覆電海牙李儁遂憤劇自殺以謝各國委員相高等收葬訖仍渡米國

第九章 伊藤逼帝禪位勒締七條協約

伊藤遂藉密使問題決行廢帝使李完用宋秉峻等聲言開戰或言長谷川擬開砲攻闕或請御駕渡日謝罪又日本外務大臣林董爲助伊藤刻日來京十七日夜完用等奏請禪位帝拍案怒叱而斥之翌日更入迫請不已帝沉吟欲自裁完用等猶以禍及宗社爲言至夜有皇太子代理之命伊藤更使完用等決定實行讓位且與林董密議要求條件於是韓人愛國黨知事已急號召同志齊集大漢門前者數千人大呼陛下毋聽賊臣言遽行讓位又曰內閣諸賊甘心賣國我等誓誅此賊乃已然以兵巡緊把闕門警戒嚴密之故莫諦內間真相遂無急激行動夜深乃散十九日晨讓位詔遽下人心愈激狂奔疾呼雲集闕外日警欲驅逐之人民亂投瓦石擊傷數

名日兵乃開砲殺退又有人民數千聚集鍾路演說激昂遂攻破日警交番所擊傷日人十餘名同友會員姜泰鉉宋榮根等組織決死隊焚完用家襲擊日人警察署又擊壞軍部大臣李秉武家伊藤派兵鎮壓歷數日乃止時宮內大臣朴泳孝與副領魚潭參領李甲林在德等密謀將以讓位舉行之日率其所部侍衛隊入宮殺諸大臣以保皇位而完用等偵知其謀乞兵於伊藤以備之既行讓位遂逮朴泳孝謂妨害治安竄濟州島李甲魚潭林在德等皆下獄經三月乃釋伊藤既令完用等逼帝讓位乃謂此舉由韓廷大臣之意不足以謝日本也十八日與林董議決七條要求二十四日令完用等謁新帝陳奏後兩國委員在統監府簽署該約

第一條 韓國政府關於施政改善受統監指揮事

第二條 韓國政府於法令製定及重要行政上處分預經統監承認事

第三條 韓國司法事務及普通行政事務各其區別事

第四條 韓國高等官吏任免以統監同意行之事

第五條 韓國政府以統監推薦之日本人任命韓國官吏事

第六條 韓國政府非有統監之同意則不得僱聘各國人爲官吏事

第七條 明治三十七年八月二十五日調印之日韓協約第一項廢止事(度支財政顧問廢止)

第十章 伊藤盡汰軍隊參領朴勝煥自殺

先是長谷川藉托節省經費刷新軍制而業行減我軍額故參將以下各軍官之在京者不過三百三十六人

卒九千六百四十餘人各地方鎮衛隊將卒四千二百七十餘人至是以皇位廢立之故而軍情不穩伊藤恐其爲患乃與完用等密議解散七月三十日長谷川及完用秉武等逼降皇勅命繳納槍械彈丸稱以恩金頒給而下士八十圓兵役一年以上者五十元未滿一年者二十五元仍令自由解散士卒皆揮涕號泣或放聲大哭或扯賜幣而擲之地仍走地方而爲義兵者亦多

侍衛第一聯第一大隊長朴勝煥自乙未國母被弑以後常懷報仇之志而乃日本益以侵略爲事國亡族滅迫在呼吸勝煥慷慨涕泣惟有一死報國而已當伊藤廢帝之日欲於宮中舉事恐禍及皇躬而止八月一日長谷川召集各隊長而勝煥稱疾不赴及聞解散軍隊忿劇若發狂大聲痛叫遂引短槍自斃於是該隊將卒一時忿激直破彈藥庫取出藥丸欲一決鬪而死第二聯第一隊亦應之日本司令長官急聚軍數千馳若風雨圍而攻之我兵從營內窗隙發射殺大尉梶原及其卒百餘名日人更據南大門城壁發機關砲轟擊而商民及勞動者女子等皆持武器來助聲勢小尉太田將爆藥投營內我兵遂脫營突出與日兵接戰互有殺傷竟以彈盡潰走日兵遂奪據該營搜索傍近民家輒肆殺戮我兵死者百餘人負傷者數百人被俘者五百餘人

第十一章 各地義兵之畧歷

義兵者民軍也國家有急直以義起不待朝令之徵發而從軍敵愾者也吾族素敦忠義自三國時代對於外患而義兵之樹立最爲卓著在李朝宣祖時被倭寇之蹂躪者八年而若儒林若鄉紳若僧侶之屬皆奮起草野毫無所藉於乘賦什伍之出而徒以忠義激勵烏合決死敢戰前仆後繼迄於敵退乃已殊勳卓節炳耀日月扶植

綱常恢復疆土大有賴焉則義兵者吾族之國粹也乃承平日久流於文弱恬嬉媮惰達於極點而猝被長蛇封豕之薦食至有束手就縛延頸受刃之慘狀寧不悲哉然忠義之血爲其國性者存焉故數十年間起義討賊項背相望雖章甫之徒不講於戰術隴畝之民絕乏於器械而其志決殉國空拳冒刃骨暴原野腦膏鋒鏑而少無悔意此非歷代培養忠義之效乎日本舉兩師團之力爲七八年之戰者以有義兵之抵抗也微斯人者吾其歎矣惟其行事難得其詳茲據最著者而述之如左蓋自保護勸約以後除四五賊臣及一進亂黨外國國民皆決死反抗義兵爲最烈而多儒林學派及解散軍人也

前議政府贊政崔益鉉國家元老儒林泰斗也保護約成乃決舉義殉國發檄告全國士民沉痛激切覽者雪涕與其門人林秉瓚等糾合同志召募義旅日人偵之派兵圍攻砲丸如雨益鉉神色自若挺身而出曰汝等之欲得而甘心者我也不必亂射以傷多人遂與其徒數十人被執至對馬島日人餉之拒曰我豈食爾粟者哉遂餓而死日人亦義之有弔以詩文者喪還我民男女迎哭千里不絕日人相謂曰崔某死吾無憚於韓國儒林矣門人盧應奎謂其當死於國仇師讐也密糾同志謀舉義爲日人所偵被擒而死

李麟榮京圻道驪州儒生也乙未與柳麟錫李康年等爲國母復讐舉義旣而退隱嶺南之間慶山中保護條約以後李殷贊李載求等倡義關東推麟榮爲大將傳檄四方響應者衆於是李殷贊李載求率關東兵六千李康年率湖西兵五百許齋率京圻兵二千權重植率海西兵五百方仁寬率關西兵一百鄭鳳俊率關北兵一百文泰洙率湖南兵一百約以齊進四二四〇年十二月進據楊州麟榮爲十三道義兵總大將許齋爲軍師長閔肯

鑄爲關東倡義大將李康年爲湖西倡義大將朴正斌爲嶺南倡義大將權義熙爲京圻黃海倡義大將方仁寬爲關西倡義大將鄭鳳俊爲關北倡義大將向京城進發期一舉而擊破統監府繳消保護條約潛派心腹人于各國領事館密陳其爲愛國血團請以國際公法承認交戰團體求正義之聲援於是軍師長約各路諸軍以某月某日齊會於東大門外身率敢死兵三百進薄門外三十里之地伺諸軍俱會而日人先已偵知乘我軍未集馳來掩擊我軍遂退于時麟榮聞父喪南向痛哭乃以軍事委軍師長戴星南下諸軍亦敗散麟榮挈其老母及二子潛移黃澗之金溪被日人搜捕解京入獄辭氣嚴正痛罵不已日人亦敬其忠義而竟乃縲殺之

閔肯鎬原州鎮衛隊正校也伊藤博文逼廢光武帝勅散各軍隊肯鎬痛哭舉義轉戰原州堤川忠州之境多斃日兵師行有紀甚得民心江原道觀察使黃鐵日黨也諭以禍福勸其歸順肯鎬答曰今皇帝傳位由帝意乎君父被脅而失位同胞受殃而魚肉國土屬於他人而臣民敢惜死乎此某等所以倡起義旅決死報國者烏得曰興師無名乎今村落之燒燼人民之離散皆無道日人之所爲而反咎我兵乎且義兵朝散則國家夕滅我民能不受困於日人而享太平乎君以宣諭而來乎則從單騎可也乃托庇外兵示威我等義兵豈有殺害宣諭之理君之愚怯如此而欲誘陷我等耶遂至忠州方飯被日兵襲擊中丸而死日人亦歎之題其墓曰朝鮮義士閔將軍之墓

李殷贊京圻道楊根郡儒生也首舉關東義旗而以李麟榮素負輿望推爲大將而聯合數萬義旅分排二十四陣進攻京城皆其策劃也各軍將領如李球采鄭鳳俊元在德辛良集蔡相俊金會洙金善宇柳海鵬丁大武等

皆其擇任也東門之役我軍敗退殷贊決意再舉爲探敵情率其心腹數人潛入京城乃爲日人所探獲入龍山日警署且哭且言曰余當國家危急之秋不勝憤慨舉義報國乃不幸至此誠無顏以對我同胞矣余卽死而歸天惟有靈魂佑我國民而已辭義慷慨賊亦義之及其受讞也凜然厲聲曰余大小四十餘戰斬殺日兵四百七十有餘爾等惟速殺我可也又曰余之舉義非但爲韓國而爲東洋平和也今當此境豈有念及於自身榮辱者乎在獄有詩曰一枝李樹作爲船欲濟蒼生泊海邊寸功未就身先溺誰算東洋樂萬年竟以四二四二年五月十日從容就刑時年三十三

許爲慶尙道善山人父以貧儉起家歲收租千石以其半爲教育之資設塾藏書以待四方之士給其衣食課其學業爲與其兄兼早劬於學爲嶺南之望乙未黨與李秉琛等舉義討賊既又入京屢疏陳復讐之義甲辰春蒙上特簡爲議政府參贊未幾被日人所嫉而遞焉聯八方多士發檄討日人侵奪國權迫害民生之事被逮受辱者屢矣乙巳保護約成李麟榮李殷贊等舉義推薦爲軍師長約各路諸軍齊進京城欲一舉而破統監府徵消勒約黨以兵三百先至東門外被日兵突擊諸軍敗退黨遂被擒入獄抗辯不屈而死

李康年慶尙道聞慶人柳麟錫之徒也乙未從師舉義乙巳保護條約以後爲湖西倡義大將與李麟榮許黨等謀入京城攻統監府東門之役我軍不利李許諸人被擒康年志不少挫更聯各地義旅轉戰聞慶永春原州等地大小數十戰殺敵甚多竟以勢孤力絀被敵所俘雍容就刑國人憫之

池弘允江華鎮衛隊副校也勇而有謀甚得軍心而屈於下位未能展其才也丁未七月三十日伊藤勒散我軍

隊弘允以八月二日舉義擊滅日兵一中隊於甲申同僚延基羽出戰於德物浦屢獲勝捷日人乃益兵攻陷江華金東秀死之弘允率部下走海西密募民軍以圖再舉日人購以重賞竟乃被擒而死至今國人稱其才勇痛惜不已

孫在奎原州鎮衛隊參尉也聞軍隊解散令下卽與部下謀舉義取武庫之槍彈予其兵士若在邑中開戰則恐致無辜人民之殺傷乃領軍而出依山結陣敵自門幕馳來在奎交戰數時殺數十人獲其砲彈敵退走忠州乃與朴汝成合攻麟蹄賊破之軍律整齊戰略奇妙爲關東義兵之最有威望者部下金雲仙勇敢善射殺敵甚多朴汝成江原道平康人舉義時年三十四與清風郡人趙東教黃大成趙東奎方必成朴德峻等募兵得千餘人四二四〇年八月十五日與敵將末安等戰於堤川大獲勝利翌日聞敵兵更來據險設伏遂激戰五時敵敗退汝成亦陽示退却之狀向寧越是夜敵兵宿沿道民家汝成卽回旗襲擊伏兵出而應之敵腹背受攻勢不能支乃冒死突圍遁入山谷死傷不少自後末安等聞汝成之名懼形于色矣

全海山全羅道任實郡儒生也溫古深博行己廉直與近衛步兵參尉李初來舉義屢戰全羅北部之地敗於榮山浦爲日兵所俘而豪放自若以死爲快獄中有詩曰書生誤着戰征衣太息空囚素志違痛哭朝廷臣作孽忍論海外賊侵圍白日吞聲江水逝青天咽淚雨絲飛從今別却榮山路化作啼鶯帶血歸

沈南一全羅道咸平郡人玉貌丰姿才華穎拔機智縱橫募得義兵七百餘人屢以奇計殺敵威望甚著乃敗於長興郡之東峙與義將姜武景同死

姜基東長湍古浪浦補助員也時義兵之爲囚者衆基東破獄而出之聯絡各地義兵聞李殷贊被擒大憤與姜元浩南鶴西吳壽泳任明達等決奮討賊與延基羽爲犄角襲擊各地日兵至抱川郡敗而被俘不屈而死

李光烈乙未舉義至是再舉率義兵千餘人自開慶至咸昌諸郡屢襲敵兵而戮之

申亨錫慶尙道益德人驍勇如飛匹馬單槍殺敵無數日人百計擒之而不得乃購以重賞亨錫爲部下所陷而死

崔在亨咸鏡道慶源人九歲移住俄領之烟秋爲人沈毅勇壯冒險敢爲通俄文達俄情得俄官之信任而爲吾族之勞動者庇護甚多再赴俄京彼得堡謁俄皇受勳章以烟秋都憲之職受年俸三千元貯置銀行取其利息歲送學生一人于俄京吾族學生之多出於俄者皆其力也雖早歲流離係于俄籍而瞻念祖國爲見朴泳孝有日本之行紀元四二四二年李範允謀舉義推在亨爲大將駐俄公使李範晉交金三萬元以資之於是安重根張鳳翰崔丙俊姜晚菊曹恒植白圭三吳河泳等分擔軍務同年七月領軍渡江戰於慶源之新牙山得捷進至會寧之永山大戰以衆寡不敵而敗回俄領久之爲郡自治會副會長長子雲鶴爲俄軍將領至四二五一年三月吾國民有獨立運動開臨時政府而在亨爲財務總長辭而不就翌年四月日兵與俄新黨戰襲破雙城亂捕吾族之無辜多人而在亨與金理直黃景燮嚴柱弼等俱被槍斃

洪範圖平安道陽德人移寓咸鏡道甲山爲獵戶軀幹長大志氣軒昂雖不學書而義俠由天性急於救人故人多附之四二四〇年冬與軍道先相風許瑾諸人舉義戰於北青之厚致嶺讖滅日將宮部之中隊轉至黃水

院三水等地有大小交戰，竟以力絀敗歸江北，以射獵爲生。至四二五年，吾族有獨立運動，而範圍與其同志再舉義旗，有鳳梧洞之大捷。

金秀敏、京圻道長湍人，多力善射，百發百中，自製彈藥以用之。爲十三道總都督率義兵二千，據長湍、德陰、洞積、聚軍糧，募負商爲偵隊，布列遠近，與敵交戰，屢獲勝利。敵以大隊攻之，兵潰身遁，乃擬再舉，潛入京城爲車夫，以探敵情，竟爲日偵所獲，以四二四年十二月十七日而死。

金汝錫，平安道順川人，柳麟錫之徒也。組織庶民會，至數百人，激厲排日，思想誓以死國，遂舉義。據德川、孟山等地，屢有激戰。

延基，羽江華鎮衛隊副校也。在德物浦舉義，率部下六十人，轉鬪積城、朔寧等地，智勇過人，敵甚憚之。師行有紀，其得民心所至，爭以箪壺迎之。

李鎮龍，黃海道平山人，柳麟錫之徒也。素性質直，膂力過人，起義於平山，與申俊彬、申貞熙、韓貞萬等分爲五隊，與日兵戰於京義線鷄井等地，及禮成江沿岸，屢獲勝捷，爲海西義將之著名者。竟以力絀，衆散，遁入中領，與趙孟善、李鍾協等往來各地，糾合同志以圖再舉。一日投宿寬甸縣旅店，卒被日兵搜捕，至平壤受刑。

高元直，黃海道金川人，伊藤勒締七條協約解散軍隊，元直聞而痛哭，舉義苦鬪者二年，終乃被擒。日人誘降，高端而不屈而死。

奇三衍，全羅道長城人，與金有璽、李大克、柳化國、安樂三、明致三等，召募義旅，據湖南一帶，屢有戰績，人多稱之。

黃重玉率兵三千根據智異山而屢戰於茂朱龍潭等地蓋以各道義兵言之全羅道爲最多而今未能得其詳也且有待於後日焉

金錫夏京圻道義兵大將朴來乘之參謀也來乘戰死錫夏繼領其衆戰術精妙屢獲勝利故日人憚而稱之曰魁將軍終乃戰於麟蹄郡生來洞而死之

盧熙泰以解隊之軍人走到咸鏡道永興郡募集義兵數百與敵交鬪多有殺傷而尋戰死金國善金明鳳玄學述等繼之有大小戰事而明鳳勇力過人射藝超等故敵畏之

尹東燮亦以解隊之軍人走到咸鏡道高原郡募集義兵數百以同郡市日假裝村民突入市中醫破日人守備隊其戰術膽力人多稱之

徐相烈柳麟錫之部將也與李鍾協募義兵一千餘人戰於黃海道兔山金川等地亦義兵界之錚錚有聲者蔡應彥平安道慈山郡人始爲李鎮龍之部將鎮龍敗獨率一隊往來咸鏡平安之間襲殺敵兵迄于七八年而未已終乃被擒至平壤而死

白三圭字賢復號温堂平安北道泰川人始學於朴雲庵文一師沒從柳毅庵麟錫爲高弟國亡移寓奉天省寬甸縣小雅河與子鎮澥仁澥晝耕夜讀陰結同志以圖光復至是爲獨立團副總裁與朴章浩趙孟善等糾集義勇以爲進取之計紀元四二五三年五月十六日倭賊坂本率兵數十襲擊我青年會之在香港溝者三圭聞警行至青山溝賊已潛入伺之三圭與弟子金德新及韓僑五六人被捕至太平哨賊誘以自服三圭罵曰吾年今

七十矣矢志復國乃至於此有死而已豈自服於仇虜者哉吾雖死而繼吾志者將幾千萬人不患不遂死何足惜因顧謂諸人曰君等母從我徒死也金德新獨曰師旣殉國我忍獨全亦不屈遂被押至桓仁縣沙鎮子北三十里樹林中遇害德新中三丸血湧如泉匍匐走入華人保會口不能語索紙筆書示白溫堂遇害我昌城金德新也從師爲賊所害我所着白笠爲國服勿脫也遂氣絕而死三圭長子鎮澣不發喪謂弟仁澣曰汝且營喪葬我不復讐不還家也德新年二十有三

右記爲概略而其餘多人不能盡錄也蓋以義兵之抵抗而日人之武力壓迫加焉因彼之武力壓迫而我人之反動烈焉則義兵者獨立運動之導線也若以成敗論之則淺之爲知矣

第十一章 伊藤廢陸軍司法兩部

伊藤之爲統監也以曾彌荒之助爲副罷各部顧問改稱各部協判爲次官均以日人叙任十三道事務官盡置日人加其俸額汰韓人巡查二百五十名而以日人代之伊藤以太子太師之職將皇太子李垺渡東京遂舉曾彌自代伊藤旋復來韓招完用等協議撤陸軍司法兩部以待衛步兵一隊之餘存者歸日軍司令部節制司法權歸日人管理由統監署設立法官令韓國臣民遵守日本刑律韓國舊律悉行廢止全國裁判官吏盡用日人而其司法引渡之條約如左

- 第一條 韓國司法及監獄事務完備以前韓國政府以司法及監獄事務委托日本國政府事
- 第二條 日本政府以日本人及韓國人有一定資格者在韓國日本裁判及監獄官吏任用事

第三條 在韓國日本裁判所之協約及法令特別之規定對外國韓國臣民韓國法規適用事

第四條 韓國地方官廳及公吏應於各其職務就司法及監獄事務受在韓國日本官廳之指揮命令及輔

助事

第十三章 震動世界之義俠聲

義俠者摧強振弱維持公理之第一健將也吾族歷史義俠一流特放異彩者自古有之滄海力士椎擊秦皇而天下震動新羅于老之妻燒殺倭使以報夫仇黃昌郎以八歲幼童釃刺濟王以雪國恥高句麗之紐由刃殺魏將以復國家高句麗卒（史失其名）弩射隋帝冀紓國難是也今日吾族蒙前古未有之恥辱而不有義俠諸公作而振之者尙得以人類抗顏于世界耶於是張仁煥田明雲安重根李在明金貞益安明根姜燦九七烈士出焉

張仁煥平壤人田明雲京城人俱以勞動渡米有年矣四二三年六月日本政府以米人須知分任吾國外交顧問而伊藤之締保護條約也須知分極力斡旋效忠於日食韓之祿而以滅韓爲事者也逮其解職歸國也受伊藤密囑携帶書類至桑港謄諸報紙有曰韓國宮內之失德太甚頑固黨掠奪人民財產人民愚昧無獨立資格若不歸於日本則被奪於俄國又曰伊藤治韓有益於韓國故韓人無反對云云韓人鄭在寬等聞而忿怒訪須知分於旅館詰其誣揭報紙之故須知分乃盛言伊藤政策有益於韓在寬等大罵投椅擊之翌日須知分將向華盛頓出玉蘭市停車場突有韓人田明雲以拳槍射之而丸不發須知分大驚且怒與田明雲相搏忽有二

九從後而來一中明雲一中須知分即張仁煥與明雲同意而初不相謀偶值於此故明雲被其誤中也自當地警察署送須知分田明雲於病院明雲即瘞而須知分創甚而死自米庭開公判謂仁煥以愛國而殺人者故特減死處十五年役明雲即放免

安重根海州人幼穎悟讀書通大義兼習武藝年十五值東徒之亂父秦勳起義討之重根從軍殺賊甚多甲辰日俄開戰重根以此戰之結局爲吾國存亡之危機乃入中國遊歷烟台上海等地意欲訪天下英俊共謀維持大局而惜無所遇也乙巳十月聞父喪還國而保護條約成矣重根悲憤益烈對衆演說慷慨涕泣捐貲設校以倡教育令二弟定根恭根遊學京塾交結有志同盟死國丁未七月伊藤逼帝禪位解散軍隊重根欲舉義兵決一死戰而民間武器盡被搜括寸鐵無存警察如林鐵網遍地徒手搏虎無濟於事遂赴俄領西北利募集義勇得三百餘人已酉六月遂舉義旗渡豆滿江入慶興郡襲殺日人五十名進襲日營於會寧郡日人急電各地駐兵厚集其力炮擊甚猛重根突前激戰半日衆以彈盡潰散而重根遂還俄領而不食者七日意氣自若人服其勇也已酉十月伊藤視察滿洲將與俄國度支大臣會見蓋欲協定滿蒙權利且與各國秘使會商中國問題而自任中國之財政統監其所內定者也於是重根投袂而起老賊來此耶天假機會也直走哈爾濱驛俄兵警衛者數千各國領事團及觀光者林立軍樂迭奏花炮競發伊藤與俄大臣握手受軍隊敬禮徐步向各國領事團重根立俄軍之背後相距直十步舉槍一發中伊藤胸而花砲亂之各軍不覺再發中肋軍警及歡迎團始覺而恟走三發中腹伊藤仆地更射日官三名而倒之數千軍隊皆散走莫敢近旣而彈盡無砲聲各軍乃集奪重根

槍付憲兵重根倒其槍而予之以拉丁語三呼大韓獨立萬歲被縛重根拊掌大笑曰我豈逃者哉我欲逃我不入死地矣伊藤不逾十分即死於是全球震動人皆吐舌曰韓國有人重根被拘於旅順獄日人欲取其誣服滯囚二百餘日之間威脅利誘加以萬端而拒之甚峻及其公判重根舉伊藤之十三大罪痛駁數時雄辯滔滔目光如電傍聽者莫不色動日人竟處極刑以四二四三年庚戌陽歷三月二十六日上午十時重根立刑塲欣然而言曰余爲大韓獨立而死爲東洋平和而死何恨焉遂改着韓服從容就刑年三十有二

李在明金貞益平壤人四二四三年隆熙四年（一九一〇）庚戌七月曾彌荒之助病死陸軍大臣寺內正毅將以統監來韓而合併之說先騰報紙國人益憂懼不知所出李在明金貞益相議曰事急矣我輩不死可乎前此日人之勒締條約而容易得手者以有賣國黨之爲僥也吾輩先發制人急除此賊黨則彼之勒約或可阻止救得國命於萬一之幸而政府之李完用一進會之李容九賊魁也殺此兩賊則餘賊亦皆知危不敢附和締約救急之策惟此而已乃各懷利刃入京察兩賊動靜適李完用以天主教會之速賓赴鍾嶼教堂在明聞之扮裝賣栗商燒栗教堂門外而待之見完用出遮車抽刃而家奴捍之刺奴即斃完用墮地在明乘而刺之深入腹日警急救送致醫院在明被捕入獄完用治數月得不死在明以殺人律處絞貞益欲刺李容九日伺其便而在明事發被搜捕出其刀擲之曰吾欲以此殺賊救國而成天也以謀殺律處終身役

安明根重根之從弟也寺內正毅既行合併直以鎗劍壓之羅織嚴密道路以目莫敢偶語我人之名爲愛國黨者將殄滅之無遺育而自哈爾濱事發重根一家尤被鍛鍊兵巡日至盤詰百端明根不以此少挫密辦武器欲

於火車要路襲擊寺內計劃已定而乃事洩被逮以謀殺未遂處終身役日人遂藉此案株連其衆海西一道之名門才士無一能免者

姜燦九事在下編

第十四章 國併後之殉節諸人及志士團

紀元四二四三年七月五日寺內正毅來韓先奪警察權置警務總監增派憲兵二千排置各道要地且添多數偵隊以助之又以軍艦數十隻遊弋仁川釜山之間耀其兵威勒鎮各報館解散各團體凡紳士之稍有人望者皆拘置警察署憲兵巡查皆荷鎗實彈排列街巷日夜戒嚴以八月二十九日勒締合併條約而宣布之降太皇帝爲德壽宮太王皇帝爲昌德宮王改統監府爲朝鮮總督府寺內正毅爲總督山縣伊三郎爲政務總監有吉忠一爲總務部長荒井賢太郎爲度支部長倉富勇三郎爲司法部長木內重四郎爲農商工部長宇佐川勝美爲內務部長石塚英藏爲取調局長官倭遜一爲土地調查局副總裁池田十三郎爲通信局長嗚呼半萬年文明舊國夷爲島寇殖民之區域此吾族萬世刻骨之痛史也

此時國人之慷慨殉節者衆矣而各報既廢偶語有禁莫得以彰且彼日警聞有死者輒脅其家人俾不得發洩嗚呼死者亦受此壓迫而況生者乎其所傳聞僅得若而人

錦山郡守洪範植駐俄公使李範晉承旨李晚燾進士黃玆宦官潘學榮承旨李載允承旨宋鍾奎判書金鎮鎮參判鄭某(金溝人)議官白某(興德人)議官宋益勉正言鄭在樞監役金智洙監察李某(報恩人)英陽儒生

金道賢同福宋完命叅仁金天述金永世益山鄭東植善山許某文義李某忠州朴某公州趙章夏連山李學純全義吳剛杓叅仁金永相洪州李根周等二十八人而其餘死者亦有所傳而並失其姓名者有之蓋此諸人或自經或刎腹或投水或餓死或飲藥而其罔僕于殊族潔身以自靖者噉如也則無愧其生爲大韓人死爲大韓鬼者矣嗚呼八月二十九日卽我國恥紀念之日而國內人民壓於彼威不得爲形式之發表而惟吞聲飲恨而已在外僑民均以是日舉行國恥紀念而至若俄領之同胞皆於是日禁火闕炊耐寒忍飢以勵薪膽之志矣昔元好問有云一脈存不可謂之絕一目張不可謂之亂一夫有立志不可謂之士崩我半萬年國家縱被併於敵之一時暴力而二千萬衆之精神自在豈可謂之滅乎是在內則有新民會青年學友會起自中央達於各方在外則米俄兩領有國民會青年會與士團勸業會中領上海有同濟社通化縣有扶民團延吉縣有墾民教育會俱以愛國黨組織而準備獨立之機關者也至若最近光復團發生於內地機關甚密行動尤烈出於彼所不意此吾族之獨立精神磅礴乎各團者也以一般民意言之表面固帖然若無事者而委巷之謳吟暗室之涕淚無一非祖國思想耘者揮鋤曰何日除彼倭奴如除草乎樵者弄斧曰何日刈彼倭奴如刈薪乎泝澗之婦女曰吾以何日椎擊倭奴乎彈雀之兒童曰吾以何日射獲倭奴乎禱祀之巫卜曰神以何日降罰于無道之倭乎此皆人民之獨立精神固結於腦自然流露者而彼乃侈談同化乎

第十五章 百二十人之謀殺寺內案

寺內正毅以武斷爲政而警務總監明石圓二郎又殘忍嗜殺彼以新民會爲運動獨立者於是有所謂謀殺寺

內案者出焉柳東說尹致昊梁起鐸安泰國李昇薰李東輝林崑正玉觀彬吉鎮亨吳周燄李裕弼梁甸伯李龍燄柳昌根金龜韓弼鎬金道熙金鴻亮李承吉朱辰洙曹成煥等一百二十餘人被逮入總監部留置塲備受惡刑韓弼鎬卽死其惡刑之實況有英國泰晤士報記者麥墾西之探悉記載者略曰以謀刺寺內之嫌疑犯先由警官嚴訊迫令供認謀刺之事而以不知爲答則輒加刑訊其法約有五種一將犯人納入狹小之箱內犯人在箱中不能直立又不能動止能蜷曲其中如是者歷三十六時之久二枷犯人之頭並高懸之使其足不能着地僅大足指着地三縛犯人大拇指高懸於空中四反折其臂及腿而緊縛之使筋肉受異常之痛苦五反曳其臂力使向後人置於地其頭向上更用一機置下頤緊壓其頸向後而以水漸漸滴入鼻孔中川流不息以上五法打至半死幾絕無知覺氣塞不能言僅強答一字曰諾卽執此爲供詞云云又上海華人報紙曰日本政府近來輸入朝鮮之文明幸福厥有一種最巧妙最新式之肉刑犯人腹向地臥兩臂直伸出頂臂關節及腿關節均縛以繩臀部袒露執刑者右手握鞭左手垂身側右腿前腓以取猛勢於是取鞭直擊犯人之體其皮肉未有不應手破爛者施此項刑罰定例在食後一點鐘用刑時倘犯人精神不支則許給以一勺之水云

然則所謂謀殺寺內案者出於彼之捏造鍛鍊以滅我愛國黨之毒計也新民會爲安昌浩之倡起而極選篤志者組織緻密精神確固數至八百餘人若梁起鐸李甲安泰國全德基崔光玉等均以幹部要人力圖發展既而全崔病死金根溼被逮刑死安昌浩李甲李東寧李東輝曹成煥李鍾浩等竄中俄領及米洲等地而日人忌之忒甚恒欲乘機滅之至是特假此案爲一網打盡之計至若吳熙源無該會關係而以會捐助大成學校而同禍

安秉瓚亦非會員而彼乃誣稱該會顧問併行逮捕杖流智島郡大成學校亦係安昌浩設立而爲國中教育之最良者故其受禍與新民會同

第十六章 總督之貪暴行政

日本併韓後所謂總督政治卽專制暴虐之君主也其決定統治之日自彼政府授以權限如左

- 一 總督直隸于皇帝而由其委任之範圍統率陸海軍掌朝鮮之防備要務
- 二 總轄諸般政務經內閣總理大臣上奏而受其裁可
- 三 在朝鮮而要法律之事項經勅裁以命令規定
- 四 依職權及特別委任發朝鮮總督府命令而得附一年以下懲役及禁錮拘留二百圓以下之罰金及科料之罰則

- 五 所轄官廳之命令及處分認其爲害於公益違反制規及犯權限之時停止其命令及處分併得取消
- 六 總督所部官吏與奏任文官之任免經內閣總理大臣上奏判任文官之任免以自斷爲之

右皆總督權限之重要部分而彼之統治但受日本皇帝之部分的監督而已則可知其爲總督一人之專制也

一 行政機關之裁減

總督官房及內務部度支部農商工部司法部警務總監部爲行政上重要機關而鐵道局遞信局中樞院爲統治之補助機關中樞院者稱以總督諮詢機關而合併之日填以韓人大官之屈膝爲虜者十年之間絕無一次

諮詢直不過一種養老院也

彼認我之五千年文化之國爲土番未開之地統治方略一以施諸台灣者施之故其行政機關專爲殖民事業而設也至若韓人之趨向於新文化則絕對不許遂將原有之教育機關盡行廢止矣

且彼併合之日財政爲最難問題蓋彼經中露之兩大戰役國債已達十數億圓則對韓施設之負擔實屬困難故當時日本之一部人士有反對併合者則彼之財政實有不能統治我國之能力矣彼乃裁減行政機關多汰韓人專以日本官吏組織統治機關而日本官吏之俸額多韓人官吏三倍以上故日人俸額以一千六百萬圓計而韓人不過一百萬則以行政機關奪吾韓人生活以養日人者也據昨年度總督府預算如左

一 歲出入額七千七百五十一萬圓

二 歲出額中重要部分如左

一 總督府及地方廳長一千八百萬圓

二 國債整理金六百三萬圓

三 警務費憲兵補助員費合五百十萬圓

四 裁判及監督費三百五十萬圓

五 官營費(營林費及平壤礦業所費)四百萬圓

六 產業費(關於殖產之費同合算)五十七萬圓

韓國獨立運動之血史 上編

上項國債整理基本金不出乎彼之事業費及負擔韓國外債之償還準備金也教育費初不置於費額而警務費爲巨額則其政策注重於利己及武斷而已

警務總監在總督指揮之下監督一切政務且置各部長官掌理部務爲總督行政上最高機關而文官行政員不過爲補助機關惟順從於武官之橫暴者也

二 職員任用及制限之不文法

彼總督府官制之實施也所謂舊韓國政府官吏全部解散而其一部分韓人之被任者僅二百八十七人而於總督府行政機關無一人預者惟李王職員中樞院及經學院職員地方廳長官郡守與所屬官署員下級官吏書記通譯生等而已然此二百七十八人並非有智識之修養與科學之技能者而但取其爲順奴之資格者也其依於不文法而制限如左

- 一 可及的韓人官吏不要登用
- 二 因不得已之事情有任用韓人之境遇則其有科學技能者必行排除
- 三 韓人官吏勿予以重要地位
- 四 韓人高等官之俸給止一百圓而判任官之履歷達於三十圓則必令退職
- 五 裁判所檢事勿任用韓人

地方十三道長官之用韓人者僅五人而郡守及面長下級地方官始則多用韓人既而日人之爲郡守面長者

亦多日人官吏之俸額原多韓人三倍以上而值物價昂貴而有增俸之境遇則日人官吏之原俸年額爲九百圓以下者加百分之二十五未滿九百圓者加百分之四十月俸二十圓以上者加九圓五十步而韓人官吏之月俸二十圓者加七圓月俸十圓者加一圓也

三 地方行政及韓人官吏之權限

舊韓國地方制度有十三道一牧三府三百四十一郡四千三百二十二面日人改爲十三道二百十八郡二島廳二千九百八面而日人之爲道長官者八人二島及十二府全置日人各郡及面亦間以日人置之蓋其關於東洋拓殖會社之移民分配地與商業繁暢之區則郡守面長必用日人諸般施設惟予彼民以移住之便利故我韓族自被其迫害莫保生活根據也

道長官部屬日人爲部長掌理地方行政及學務勸業會計稅務等而韓人之爲長官者無何等裁決之權限而聽命於部下日官之監督而已地方警察之制度置警務部長於道長官之下掌理事務而地方警務直隸京城警務總監部故道長官無何等指揮之權限關於警察衛生及其他必要事項惟有命令或處分之要求而警務部長乃有干涉一切之權限郡守亦在日人書記監督之下無何等職務之權限也至於島廳爲特別行政之區域以其爲日人移住與漁業地有特別保護之必要故除行政制度外有司法警察權之附與者我原住之民被他移民之橫暴島司之強迫而被逐流離無異戰時之避亂者也面長由郡守島司而任免者居下級行政之區域關於租稅徵收及道路橋梁之保存修築與日語普及日人移住生活之便宜供其一切使役而無自治團之

機能者也

府置日人府尹一人而由總督任免其行政區域爲日人地方自治機關居留團體及各國人居留地市街經營地故一切施設專爲便利日人而侵害韓人經濟由是韓人失其商業根據而漂泊四方者多矣

觀此地方制度全國總面積爲一萬四千三百方哩人口爲二千萬而以現在郡與面而比例之則大約六百五十方哩置一郡五十七方哩置一面而一面人口七千九百五十八也彼其廢置分合爲節略行政經費而擴張憲兵警察之職務權限惟求束縛人民而不予以生活上便宜者也

四 參事會及協議會

道置道參事二人郡置郡參事二人皆選於地方有力之人經總督府裁可而任免爲道長官與郡守之諮問機關每年一回開參事會有行政方針與事項之議決而不過一種形式也對於各方施設而無建議及研究之權限惟督促地方租稅及贊成總督之不法政治而已府有協議會亦協議市政之一種機關而其會員由府尹選定總以日人爲之或有一二韓人之爲會員者不得不附從於多數日人之意見而不容自己提議者也

第十七章 司法制度之非法

韓國司法制度有大審院控訴院地方裁判所區裁判所而用三審制度自中央及地方置大審院一控訴院三地方裁判所八區裁判所百有十三矣被併後日人以施諸台灣者施之改大審院爲高等法院控訴院爲覆審法院地方裁判所爲地方法院而廢區裁判所以其職務合於地方法院及憲兵隊警察署現置高等法院一覆

審法院三地方法院八地方法院支廳五十五出張所一百五十九自地方法院支廳處理地方法院事務自地方法院出張所處理登記及公證事務而地方法院惟判事獨行裁判而至於訴訟物價格千圓以上之民事及破產事件與一年以上之懲役禁錮等案組織三人判事行合議裁判覆審院以三人判事高等法院以五人判事組織行合議裁判韓國舊制有大審院七人控訴院五人而乃各減其二人地方法院判事之獨行裁判已爲非法制度而況憲兵警察均乏法律知識者而濫行司法裁判荼毒人民容有其極乎

裁判所判事檢事局檢事爲二百六十六人而韓人判事不過十人檢事無一人書記及通譯爲六百十四人而韓人約三分之一也韓人判事之職務權限止於韓人被告之境遇而在會議裁判不過廁於陪席而已

一 關於政治之不法裁判

我韓人或有以政治關係而被檢者彼乃不問其事實有無而期以酷刑取其認服至其親戚朋友亦要一網打盡亂行逮捕處之死刑及無期徵役且社會人士或有言及於官吏橫暴社會改造生產業之改良者必藉治安法而施以惡刑終乃處之長期懲役及徒刑

二 關於經濟之不法裁判

關於一般經濟及產業而韓日人間有提起訴訟其物價格至千圓以上者自裁判所必先報告于總督待其訓令而審判兩方之曲直如何勿論而惟以尊重日人之身分及名譽犧牲韓人之財產及一切權利爲歸決所謂三審制直空文耳故彼之行法十年未有一次公平判決者舉其一例而言之韓國時代自政府圖農業之發展

以半官半民組織農工銀行置京城平壤公州太田江景五處其資爲五十萬圓而分配各所均置日人支配者爲共通營業者也併合後自總督府直轄其營業全部不出四年平壤之農工銀行歸日人支配者之掌握各銀行之直轄於總督府者與總督府事務官藤原等謀竊取一百三十萬圓連五銀行之全部資金此大贓案之被檢也僅以日人支配者二名處短期懲役蓋其案關聯於總督府各大官而藤原以責任者免職且當拿引藤原乃恐喝總督府各大官曰余若當裁判所之拿引者余當舉總督府各大官之諸般犯罪與其他受賄等不法行爲而悉暴露之於是總督府及裁判所懼而寢之蓋農工銀行純以韓人資金而設立者彼乃奪取全部逞其強盜行爲若以公平用法則總督府各大官必不免囹圄生活而總督亦當有引責矣而乃如是處斷則遑論其他乎

三 獄囚之差別與虐待

監獄置典獄分監長而分監長以看守長充之合各監獄典獄九人看守長技手通譯生百人監獄醫十七人教誨師十二人教師六人藥劑士十人看守千百四十九人女監取締四十六人而韓人只看守長四人通譯生九人典獄分監長及其他職員盡用日人而韓人不過爲其隸屬補助者俸給之差別懸甚日人看守月俸十五圓至五十圓加俸十分之八宿舍料十圓女監取締月俸十圓至三十五圓宿舍料十圓而韓人看守月俸十圓至十八圓女監取締八圓至十五圓則日人俸給多韓人四倍以上矣

監獄有懲役監禁鋼監勞役場拘留監四種而有男女監之區別對於刑期未滿二個月者未滿二十五歲者及

初犯者有獨居拘監之制除初犯及累犯者外無拘監之別而雜處之勞役場亦有受刑者之同處一房又有雜處工場者蓋監房之制容積一坪置囚五人者而乃自十五人至五十人併置一房則坐臥不得皆起立以度日夜若渴甚而要飲料水者必被看守之責罰彼以人類視之寧有此乎食料以白米十分之四麥十分之六爲飯人給一日三回而每回飯三合以下菜五錢以下二種而此但給日人囚徒者對於韓人只以小米及大豆飯與之亦有所謂減食處分者稱囚徒之違反規則而其食料減三分之一或三分之二雖有遵守規則勤實作業者而每月未有不當三四次減食之罰者也沐浴七日一回運動時間一日三十分而非實行也囚徒之罹疾病者雖急且重而醫士之診察與藥物大不易得但依其健康者(未滿十八歲者)診察期限三十日一回其他三月一回刑期二年以上者雜居拘留者六個月一回而始得施療也囚徒作業勿論老幼病弱及平時職業種類技能之如何而只有藁繩草鞋等最下工作而惟長期在囚者有煉瓦工場之作業多數囚徒因此各種虐待而死亡者恒居十之一矣現監獄有九分監有十三而其二則置日囚而餘皆置韓囚者也併合以來逐年囚徒增加十分之一豈非彼之惡法多陷我良民故耶

四 對外國人之視察而假飾者

外國人有請求視察監獄者須要總督之許可而非經過多日則不可得也總督對其請求不能拒絕則謂調查其參觀目的而整理獄內之作業工場而使囚徒沐浴換著衣服掃除監房人員之配置如其定數以既決囚置之未決以無病者處之病監假裝美觀許其視察因是而監獄之職員廢務囚徒撤業專力於假飾者故其不法

虐待悽慘酷毒之實相有非外人之所能察得者矣

第十八章 憲警機關之擴大

方日露國交之絕也日人即以憲兵隊駐我京城迨韓日協約成而卽置軍司令部擴張憲兵隊奪我警察之主權矣及其軍之北進也藉稱保護電信鐵道布置憲兵警察於全國之內軍事警察行政警察司法警察惟意所爲誅戮我民數十萬掠奪財產強奸婦女恣其蠻行而至丁未六月募我民之無賴四千名爲憲兵補助員配置各隊使之服役於警察及偵探等事因奪我警權合於彼之機關置警務總監部於京城益加憲警二千於各道要地此併合以前之狀況也及其併合也尤加大改革大擴張統一全國警務而警務總監部爲獨立機關隸總督直轄之下以憲兵隊司令官兼任警務總監以各道憲兵隊長兼任警務部長擔全國警備之任警察機關之配置于各道府郡島者合計爲一千六百二十四個所警官爲一萬六千八百四十人而警視三十五人警部三百二十三人巡查二千三百二十一 人巡查補三千十九人憲兵將校(警視兼務)九十六人下士準士官(警部兼務)七百七十三人憲兵上等兵二千五百二十五人憲兵補助員四千七百四十九人偵探三千人而巡查補及憲兵補助員皆用韓人偵探參用韓日人韓人之爲警視者一人爲警部者百人爲巡查者百人而俱無事務處理與權限執行而只服役於日人者也

第十九章 憲警之蠻暴不法

彼之統治方針專以憲兵警察爲其樞軸諸般行政運用及行政事務之立案審議悉要憲兵警察之干涉憲兵

司令官兼警務總監以日皇勅令關於三日以下懲役禁錮拘留百圓以下罰金及科料之罰則均與以命令之權限至於民事爭訟調停亦以法令發之警察署長憲兵隊長分遣所長皆決民事裁判關於國稅徵收殖產等事務併許干涉執行彼輩不惟無法律專門及司法裁判之常識而以其蠻種習慣強施於吾族社會瀆亂倫理者亦多民有母子二人同居而無他家屬者彼以夫婦同居錄于民籍其子母二人聞而大驚訴求改正則彼乃曰既爲夫婦不能以母子更證非提出離婚申告書抹銷夫婦關係則不可許也彼所謂民籍法有如此蔑倫悖常之極怪極醜凡人類世界除禽獸之國寧或有此乎嘗聞彼國之俗有母子之爲夫婦者吾甚驚怪以爲彼亦人類寧有是事今觀於此可知若輩習於其俗認此爲常故對於吾族亦以此待之耳在某郡發令各人均置捕蠅器一具更有憲兵巡查出張各里巡視各家而民有一家五口者卽其父母兩人孩兒三名而一兒生才十朔矣乃其捕蠅器只有四個而十朔乳兒未及準備彼卽以此爲違反法令而罪之然則彼之一切行政盡以強制壓迫雖極不道至不情之事必使之服從乃已此豈吾人之所能堪受者耶以民事訴訟案觀之千九百十五年處理事件爲一萬三千二百三十六至上半期爲七千五百五十八同六年上半年期爲五千六百五十七同七年上半年期爲三千九百七十九同八年上半年期爲三千八百七十七蓋以我民對彼不法處理而有不信而抗拒者故有此逐年減數也且以處理事件而比較之憲兵警察之處理民事多二倍以上則其職務權限之擴張強制處分之敏速尤可驚也關於一般工業工作物商業商行爲資產信用社交勞動娛樂道路等有取締犯窺即決例二條八十七項而均屬於警察犯處罰令者也國稅徵收亦在警官之手或有納稅者適不在家或有要納

稅之延期者輒搜其釜鼎食器什物等自意評價而拍賣之此皆使吾韓族不留一毫生機者也關於警察犯處罰令舉其一項而證之

- 一 無一定之住所及生業而徘徊各方者
- 二 無故強請面會及強談威脅之行爲者
- 三 乞食者又使乞食者
- 四 強請加入團體者
- 五 無故干涉他人金錢去來及勸誘教唆訴訟爭議者
- 六 集合多衆請願官公署又擅行陳情者
- 七 爲不穩之演說爲不穩之文書圖畫詩歌揭示頒布朗讀又放吟者
- 八 無故不應官公憲之召喚者
- 九 關於警察官署之特別揭示命令事項而違反者
- 十 向他人身邊而擅行立遮及追隨者
- 十一 擅嚇犬及他獸類又使之驚逸者
- 十二 鬥狗與鬥鷄者
- 十三 毀損溝渠下水路又受官署之督促而怠慢於修繕及浚深者

十四 受官署之督促而怠慢於烟突之改造修繕及掃除者

十五 擅自通行他人田圃又縱牛馬侵入者

此卽八十七項之一也此等法令實爲驅迫我人之陰譎毒計而非爲防遏於未然而制定者也舉其一例而論之在五年前自京城及各都市有所謂浮浪者取締令逮捕良民處之三週日以上三個月之懲役施以惡刑者達於十萬以上此卽依處罰令第一項而處之也而其被逮者果浮浪者乎乃學生之有新智識者及財產家之篤志公共事業者紳士之稍有思想者對總督政治而懷不平者舊韓時代之出入政界者又財產家之不應官廳之強要捐金者盡入於浮浪取締之網矣且我人受彼強奪失其產業而挈其父母妻子求業四方彷徨道路者均以犯罪置之監獄處以懲役則彼之憲兵警察舉吾族全體而納諸罪案期逞其驅逐撲滅之毒計者也以彼逮捕監禁證據搜查訊問其他卽決之狀況而論之凡警察之目以犯罪者則不由司法而直行逮捕又不限於一人而株連其親屬知友不問事實有無與輕重開訊之先輒施惡刑令其昏暈不省人事監禁累日始行開訊亦以惡刑強要自白無何等證據而惟以自白成罪素行調查亦必周內而置諸重科搜查證據均以強制處分而至於證人鑑定人等亦以強迫拷問俾證其犯罪事實物品押收家宅搜索不要所有者之承諾與立會雖其物品與犯罪事實絕無關係者而亦行押收至若刑事被告人以二十種以上之刑具酷施拷問誣以自白偽造罪案絕不許其明冤雖非卽決例之事件而必行卽決處分或有不服於不法處分而求司法裁判者尤加惡刑監禁累日故使逾越其住定期間待卽決處分之確定後執行刑事此等暴虐不法有不勝枚舉者矣

第二十章 各官署之排斥韓人

韓人之官階限於歸化日本者而學術技能反見排斥總督府官廳只有韓人書記一二人地方府廳道廳亦然各郡廳庶務財務等主任書記皆日人而韓人書記只通譯耳各都會之多日民移殖者均以日人爲郡守及面長故日民之移殖日增而日人之郡守面長從以增多韓人之爲道長官及郡守者皆聽命於部下日人官屬者也

鐵道郵電之事務員

併合後韓國鐵道係總督直轄矣更以韓滿鐵道統一政策而該鐵道管理移屬於南滿鐵道株式會社吏員全部皆日人而韓人之爲雇員者二人驛夫掃除夫用韓人而監督工事者皆日人也廢舊韓代之鐵道學校更無教授韓人之機關至郵電技術亦然郵便局長郵使所長電信技手爲替貯金課等皆日人而但賣票付印等下級役夫有一二韓人不惟官廳則然而若郵船株式會社事務員與船員亦無韓人朝鮮銀行殖產銀行人蔘專賣局等均由政府管理而用韓人甚少

日本法學博士吉野作造在黎明會講演曰今觀韓人官吏之俸額判任官十三圓至三十五圓奏任官四十圓至一百圓勅任官(道長官五人)最高級一百八十圓也日本最下級判任官五十圓憲兵巡查最低額三十圓韓人之爲憲兵補助員及巡查補者九圓至十三圓也日本札幌農林學校教諭李某冒日籍始受百三十餘圓之月俸乃以原係韓產之綻露而減至二十五圓也

官廳供物營業之不許韓人

凡係官廳之需用物品自商店供給者（名曰用達）消耗國費之大部分也全國大小官廳與各普通學校所在地所謂用達盡日商之獨占而不許韓人

慶尙道梁山郡有韓人之消費組合而各種以廉價售之日人商店不售將撤於是郡廳之庶務主任日人書記憲兵分遣所長及公立普通學校校長等飭其部屬禁止其購用於韓人組合者

平壤龍山羅南大邱等地爲軍隊駐屯監獄所在故凡軍糧馬草洗濯等作業盡爲日人所占而不許韓人

鐵道沿線之旅館及乘客食品盡爲日人營業至車中食堂之使役與官廳之關者各都會之郵便配達夫亦盡日人也

第二十一章 東洋拓殖會社

東洋拓殖會社者日人併吞韓滿之最大機關也故其勢力居總督府以上名曰會社而實彼之拓殖政府也紀元四二四一年日本總理桂太郎創此會社令資本團募集株金一千萬圓而自政府歲出三百萬圓助其進行募民移殖而不憚以詐欺及暴力手段侵奪韓民耕地以予之該社勢力所及之地韓人日以被逐故有東拓來韓人退之謠因復推廣於滿洲而大著成績則華人亦安得不蹈其轍乎據最近調查韓國全面積合大小數千島嶼約十二萬八千八百零八方里而人口爲一千六百九十六萬九千餘平均一平方里爲百三十二之比例以列國人口分布律較之不及於白耳義和蘭等國略同於法國印度希臘等國而較中國美國俄國則有倍疑

之稠密也況以挽近七八年間增加律而見之平均人口約加三十二分之一雖無日民之移植而專以韓族增加至百數十年則人口稠密爲世界無類之分布律也乃日本置此會社每年募移民千戶以上分配各地無田土家屋之自辦力者予以貸付之便宜故募集戶數超過三倍既又改正該社規則置第二種移民條土地金貸付等特從輕減對移民之有良績者予以特別保護且授褒狀及賞品以獎勵之

韓國農產國也全人口約七割七分爲農業者而農業者中約四分之三爲小作以耕地之不足故小作人之所收恒乏於食賣其餘力於勞動而補其不足矣乃以韓人二三戶耕地爲日人一戶之專有逐年人口之彼增我減實屬可驚也

舊韓時代多國有地有驛土屯土宮土等而驛土爲戰馬驛馬驛吏驛卒之畜養也屯土爲歷代之養兵而置之宮土爲各宮內需之供者故此三種爲最上腴壤而許民耕作收租甚輕有爲數十代世襲耕作者以其小作權自相賣買則實半官半民之所有也彼乃脅我政府應募拓社株金六萬圓因復強令以全國驛屯宮土代其株券佔爲彼民耕作之地於是我民幾十萬一朝失其累百年土着農業而流爲乞丐漂泊於中俄領地矣黃海道載寧郡之南湖里全部皆宮土而第一膏沃之米產地也人民有其小作權者累百年只納稅於宮而私相賣買無異民有矣乃歸拓社以後日農千餘戶來住於此奪韓人小作權而至耶穌教天道教徒直以明令不許其小作也

以彼拓殖於滿洲者言之彼管安奉吉長鐵路以後設警察駐軍隊奪礦山佔農林惟意爲之彼以滿洲三省爲

生命根據之地始設滿洲中央試驗所地質研究所後又設染織釀酒廠運米廠製糖廠伐木廠融礦廠次又開採撫順烟台炸子窰石碑嶺陶家屯五處之煤礦又於大石橋遼陽奉天鐵嶺公主嶺長春本溪湖安東八處設置農業場均皆著有成效據彼大正二年關東都督府報告稱滿洲各處農墾貿易利益額共獲一萬萬四千七百餘萬元矣彼乘歐戰之際威脅中國政府訂立二十一條勒約時便設滿洲拓殖會社荒田曠地恣意奪取毫無顧忌以爲行使條件之効凡有日民之來滿者該社即給以每人資本金三百元田地二十畝獎其從事於拓殖查日人創辦該會社其基本不過九百萬元而已不數年統獲利益達至八千四百萬元之鉅現又增加資本爲四千萬元矣戊午春該會社特派農林專家三十人分爲五隊調查東三省地利及產物量數據其最近報告謂東三省之荒地若開墾爲水田每年種植稻麥可能產至七千萬石每石可獲利銀六元若是則每年可生利四萬萬二千萬元至所獲之米稻除供給其國人外更可操縱歐亞各國之生命故該會社更力謀發展欲將各處曠地盡力吸收同年五月間又已加買地段二萬四千七百八十晌而日人之居留滿洲者亦由二十一萬而加至三十二萬長此增加彼以一會社之力囊括全滿而有餘矣

第二十二章 抑壓韓人之企業

年來韓人之企業漸形勃興組織會社經營事業者項背相望而乃自總督府陰施制限發會社令勵行干涉稍有違犯者輒施體刑及金刑以抑壓韓人之企業者矣

尹顯振慶尙道梁山郡人留學日本入明治大學研究法律歸國後與二三同志圖產業發展期成消費組合經

議於該郡主任書記西田（日人）及憲兵所長岡田（日人）得其贊成不旬日而醴集一萬二千金社員爲三百人當地居留日商等大忌之囑岡田使之撤廢岡田屢請顯振勸以改營他業否則移他處開店而顯振不應乃日商等斥顯振爲排日派大肆簧鼓岡田又請顯振勸其賣渡日人而顯振據法堅持竟得開店因此組合而顯振被招於憲兵所者三十日間至四十七次矣

礦業認可特予日人以優先權而對於韓人加以沮害者甚矣韓國由來礦業認可由中央政府或地方官廳而隨便爲之者自統監施政以後令農商工部發礦業法令聘日人爲官吏下令各道曰有測量礦地之廣狹大小而請願者予以認可於是韓人互相爭先發見礦地提出請願則日人官吏卽往當地審其良否經二三年終靳認可韓人之發見請願者日以逕至於是日人坐悉全國之礦形乃擇其良者以予日人而韓人所得爲極劣者故所採不償所費而敗產者多除舊韓時代外人所得者外年產金額達於十萬元以上者盡日人所有而韓人不得染指焉

養蠶最適於吾國風土而年來蠶業漸進蠶繭收額逐年增加達至七萬一千九百二十一石乃自總督府稱予以販賣便利令各地方官廳收集當地所產之蠶繭評斷其價格與品質以供日商之貿易何其執勞之過也彼其漁利亦甚鄙劣矣

鴉片爲致斃中國之毒藥故世界各國認其爲人道之蝨賊遂行公共之禁矣乃日人占台灣以後令民廣種置專賣局輸入中國取鉅大之利又併韓以後自總督府置專賣局予鉅商三井以專賣特權令我民廣種我民妄

認有利傾資以種之及其成熟自官廳多派巡警奪其所作沒入于官因是而民之破產者多噫彼之罔民攫利大抵皆強盜之術也

賣淫女爲彼輸出之巨額故勿論何國彼人所到無往不有賣淫市之開張而在吾國尤甚宜其淫風壞我禮俗毒我人命者罔有紀極矣

第二十三章 監視韓人之私有財產

彼對於舊韓皇室而置李王職之官廳以韓舊臣爲其長官而有日人事務官握其實權處理財產自皇族及貴族之有五十萬元以上之財產者自總督府特派執事而管理之凡百出入非其承諾則不得也至富豪諸家亦以強迫置日人執事掌其財產若京城之李鳳來晉州之金基邨慶州之崔浚皆受其財產監視者也又日人巡查二人與韓人巡查補一人往往突入韓人家庭無何等說明而直索其財產文簿而調查之韓人有貯預金於銀行者要千元以上之提回必陳述其用途而自銀行報告警察署得其許可後與之若韓人有一時巨額之收入者自警察署必呼其人詰其用途也

全國寺刹總一千四百十二而富饒者居三分之一至若三十本山有百萬以上之財產者也乃自總督府發寺刹令置諸監視之下各教會及學校之有義捐及寄附者必行嚴厲取締非有警察之許可則不得也或教人與學生募集義捐者必罰其職員上年一月天道教人有二十萬元之被奪者矣自旅行券實施以後韓人有行渡鴨綠江者必嚴查其身體有百元以上之盤資者必行拘留而押收之自警察署探問於出發地查其用途方許

還給若有攜帶巨額之金者勿論押收而必投其人於獄中矣

第二十四章 教育之同化政策

自總督府發韓人教育令凡私立普通實業高等普通女子高等普通及專門教育一依總督府規定而不得加他教科及課程也教科圖書用總督府編纂及檢定者教師限於日語通達之試驗合格又畢業於總督府之指定學校者或有違命令及規定者必命閉館全國私立學校之日人教師占三分之二稱以程度不等而不許韓人小學之用日人小學修身歷史等教科不置大學於韓國不許韓人之入日本大學不許政治經濟文學哲學美術音樂等專門機關之設立對留學日本者亦不許此種學科之選擇而只許其爲低級技術也對我歷史國語國文厲行禁止某校教師崔昌植私著國史藏之巾衍未嘗資以教授而乃爲日人所偵被拘受刑禁錮一年至若各國之革命史獨立史偉人歷史盡爲大禁而如華人梁啟超所著飲水室及吾所撰陽明學說亦入於火吾友崔南善所刊少年青春赤衫等雜誌均主張學理略無涉及於政治者而盡被禁止其他閭巷歌謠稗官小說或有歷史意味者輒以明令禁之置警察於各校而教師言論有稍涉國性者必拘而刑之

彼所謂教育令關於韓日兩族迥有區別日人所居村邑有學齡兒童之十名者必置學校組合自總督府歲有六百元之補助而其組合總數爲三百四十八故其補助年額爲二十萬八千八百元而不許韓人之加入日人組合及其自設組合且不許韓人兒童之入日校及設立同一程度之學校也

所謂修身教科純以日文爲之而日人教師授之故韓人兒童絕無聞知其祖先時代之偉大事業與嘉言善行

至種族系統亦敢誣稱吾族始祖爲彼始祖之弟又曰彼之天照大神爲韓人始祖噫我之開國紀元四千二百五十年而彼不過二千六百年也而乃敢造此謊言以亂之此吾國婦女兒童皆冷笑不置者故其他千言萬語盡屬虛僞不入吾族之腦矣

且彼之教日本兒童專以武勇愛國奮鬥復讎等精神而韓人兒童只以漁遊服從節制安分感謝日皇恩德者教之各教科之卷首均揭日皇勅語矣

歷史教科取我韓族古來偉大光榮之實蹟盡行抹殺惟誇張彼之皇靈國威人物文化之歷史欲買其崇拜思想外國歷史若美國之獨立意大利之建國希臘之獨立法國之革命史等極其疎略不過數行者亦一言以蔽之曰輕舉妄動也十八世紀之以自由主義民權思想而動搖歐洲者一筆勾斷曰政治紛爭也教科書之插畫只學童之向巡查而鞠躬者向日人教師而鞠躬聽訓者向朝日而學四方者兒童告別父母而行日本武者及日本古蹟素盞鳴尊之斬蛇神武天皇之討伐龍族巴提便之斬虎日本武尊之斬賊平壤之日清戰台灣之生番伊勢之神宮桃山之明治陵日本海之海戰日軍之入奉天等光景也唱歌取日本兒童之唱歌二十九種而不許以韓語唱歌也

彼之同化政策最力於日語普及故總督府教育令第一章第五條曰普通教育授以普通之知識技能而特爲涵養國民之性格以國語普及爲目的私立學校規則第十條曰教員以通達國語者爲最重要之資格不具此資格者不得爲教員云稱日語爲國語韓語爲朝鮮語普通學校及高等普通學校諸書除朝鮮語及漢文讀本

一種外專用日語韓日教員在教室中間話必用日語學徒亦然而若韓人教員與學徒偶發韓語則必被譴責校內各器具及博物標本校庭花草樹木題以日文不用漢字各種物名亦皆以日語資兒童之記憶也普通學校教授之時間每週二十六而日語占十時高等普通學校教授之時每週三十而日語占八時日文讀本會話書取均爲日語學課故雖韓人教員不得譯以韓語教員說明及生徒質問皆專用日語普通學校之韓語學習每週不過二時至高等普通學校益復減少一年不過七時每週一回之作文及日記純用日文生徒之討論會亦皆日語在校外時亦獎勵日語以韓語爲釜京城某私立學校聘日人教員而開歡迎會韓人職員以韓語談話日教員乃責曰諸君不知使用韓語之爲羞乎余受總督府之委托者勿論教室與學校事務室及集會席必用國語而勿韓語也因此而起衝突有學務局仲裁之事十餘年來此等波瀾無處不起致日官之干涉則斥以不逞之徒加以懲罰不得更就公職且有憲兵尾行而監視之各種專門學校教員亦皆日人間或有韓人教員而禁其韓語各種論文及試驗問答其他各用純以日語則其言語同化之策亦已密矣數學教授亦有差別代數學之因數分解以上及立體幾何學三角法併不授韓人體育尤多制限日人在普通學校及高等普通學校有每週三時之體操而韓人限於高等普通學校略有柔軟體操而已日人在中學校第二學年以上有實彈射擊之課而韓人若徒手兵式教練及運動野球蹴球競技之類一切不許也

專門教育有專修學校醫學工業農林專門學校之設立而其程度低劣不得與日本各專門同科畢業者之開業限於韓國內而已韓人勿論何種學術務使落於低級而間有以超卓之才勤勉之力畢業於日本之專門及

大學者彼乃斥爲不良學生監視拘囚殆無虛日致失其生命自由也我青年之遊學歐米者勿論被禁而留學日本者亦多制限除總督府派遣者外有以私費留學者必由地方長官之報告總督府得其許可而所謂朝鮮留學生監督部皆休職憲兵將校也韓人學生非有監督之推薦書及保證書者不得入學雖已入學而彼若認其有思想者卽令該校黜之且通知于學生本籍地之憲兵隊脇其父兄而召還之

先是吾國官立小學中學師範學校有一百二十餘教會設校有四百餘私立初等中等專門學校有二千三百餘而且有西北學會關東學會畿湖學會湖南學會嶠南學會均爲教育機關發行學報以鼓勵之前于後顧烝烝日上若假以數十年之長進者其發展殆未可量而無如霹靂暴落萬象摧敗各學會學報學校盡墮火炭地獄矣彼以強制奪我私立各校之財產屬于公立普通學校憲兵警察迫各校生徒而驅入之有新私立之請願者輒叱退之矣

第二十五章 撲滅各宗教之政策

夫滅人之國者必先滅其歷史爲斷絕其國性也日人對於吾族不止滅吾歷史而欲舉言語書籍禮儀文物倫理風俗而一切殄滅至各宗教尤不遺餘力然吾族之反動發生於教界者最大且烈矣

一 對於大宗教

大宗教者信念我三神始祖爲最古之教古史云檀君爲弘益人間自天降世且吾俗以男女子生產爲三神所命而報祀之五事五戒爲歷代之傳守今其信徒約三十萬而多社會紳士及青年學生且其信條保持其族性

國性者故彼於併合之日議欲解散之而適日人所刊太陽雜誌論大倭教處置之方法曰彼教提倡己國古教其衆雖多皆手無寸鐵設有軌外行動不難撲滅不必及今強制解散先招干涉宗教之怨謗云故其議遂止然警吏偵卒跟隨教職者無時或輟而亦多無故被拿者不許布教自由及教堂建設而都司教羅喆屢被壓迫北竄南走終不得免乃入九月山三聖祠以丙辰八月十五日誓告神祖以身殉教而日人詰其故而檢之親知之祭文亦被檢視教徒之受其注目者日甚

二 對於基督教

基督教入吾國而非常發展自西歷千九百四年至六年信徒驟增數十萬此世界教會之所共驚歎者也日人指此爲排日派隱若一敵始以懷柔政策欲購西洋教師之懽心得韓人信徒之同化且置日人教師之傳道機關欲使韓人脫離西洋教師歸于日人教會而併歸無效則加以虐待強壓期於撲滅矣

彼以謀殺寺內案逮捕一百二十人而奇刑酷罰致斃多人卽爲撲滅教會而捏造僞案以陷之者然教徒之信仰毫不爲沮而愈形其進彼乃悟虐殺之無益而改爲持久摧殘之計自總督府制定布教規則置管理教會者教會堂說教所講義所非受許可則不得設立自教會爲傳道事業及教堂建築而有請願者故意延拖經歲不許對於傳道會查經會復興會祈禱會禮拜及宣講會必派警卒而監視之或其祈禱宣講之詞有信仰自由精神自由摧破魔權等句語則自警署必行招訊曰汝之願自由自立非願韓國之自由獨立者耶杖而囚之累日乃放教職之稍有聲譽者無日不被刑事之跟探矣

京城長老會開傳道會于禮拜堂美人教師元杜尤爲主管請邀美人教師尹山溫宣講於是京城青年每夜會集以聽者千餘人有教會復興之望乃自總督府謂其宣講有關涉政治者勒令尹山溫出京宜川郡長老教會開地方教會聯合查經會會員至者千八百餘人而總督府機關新聞乃誇大其事謂出席者一萬餘名而其內幕爲獨立運動云而多派警卒嚴詰會員檢其身搜其家加以凌辱平壤長老教會開查經會有一教人歎教會之不振因祈禱而涕泣日警卽指此爲愛國淚拘而詰之監禁累日嗚呼韓人嬉笑哭泣併無自由矣

彼對於教會之教育而制裁尤甚蓋學校資金專藉教人及學父兄之捐助而自總督府發寄附金取締致其力絀而倒者往往有之教科書非總督府之編纂者不得爲用至聖經及讚美等書併被禁止教師選擇亦須總督府之許可而勸其聘用日人至校監校長等職亦然不惟專管校務而兼行偵探平壤女學校教師金禹錫以金五圓寄贈布哇韓人小學校卽被遞職自教會有設校請願者必被斥退又對於教會學校而發學則實行猶豫令不許聖經教授及禮拜等事俾失宗教學校之面目京城做新學校爲苦學生之工作資生擬置手工部屢提請願輒被詰責竟不得施日人官吏勸以基督教學校爲總督府指定學校一爲聘用日人教師也二爲禁止聖經讚美等宗教書類之教授也三爲教授言詞純用日語也教會學校以財政不贍難支日人厚俸之故有不肯者彼乃加以百方沮害不得已畏其威逼爲指定學校者有之開城韓英書院南監理教會之高等校也教師鄭士仁因學生之懇求將已被禁止之愛國歌印以謄寫板授之事乃發洩教師與學生均被重罪彼又藉此而威脇各校曰無日人教師之監視者事多類此若不肯爲指定學校者必行閉鎖云故不得不從也

彼又迫教會學校之生徒轉學于公立普通學校。宣川郡有基督教崇信學校。置高等普通兩科。男女學徒百餘人。一日該郡公立普通學校日人校長森棟二及教員二人荷槍來校。迫勸校長曰：「有力家子弟十歲以上盡令轉學于公立學校。總督府爲日語普及有此命意也。又該地駐在之警吏來喝學父兄曰：「爲國民者分當令其子女入于公立。亟令轉學也。」學父兄曰：「此校受總督府之認許而有一定之課程者。何必使年幼子女轉學于數十里外耶？」彼乃勒脅父兄捺印曰：「有敢不遵者當以排日派重刑之衆乃不得已而從焉。」又以私立之高等班學生置公立之一學年則皆優遊度日而已。

彼乃以擴張公立學校廢止教會學校爲政治之成績而多者予以獎勵。少者加以譴責矣。碧潼郡有教會之新明學校而設立者李稼殷也。彼以稼殷之父爲郡參事而命曰：「以郡參事之子孫學於私立學校是妨害總督政治鼓吹排日思想者。」如是威脇至三週日。旣而郡守李昌龍與日人來校迫令學徒轉學公立而有一兒（參事之孫）不受教而泣。日人校長詰其故。兒曰：「我師多年教育之愛情及同窗諸友之情誼固結於心不能斷絕。」如是爾威從郡有基督教四光學校。一日普通學校長日人小村清一郎及憲兵所長小川安吉來校招致學父兄。脇使學徒轉學于普通學校。或有不應者杖而囚之。致令該校廢止。彼對於義州各私立學校屢發廢止之令。每年六月末憲兵及各面書記調查生徒之年齡及財產矣。一日公立學校日人校長帶同憲兵及補助員迫令學父兄捺印於公立學校入學請願書。若有不肯者輒以排日者罪之。由是私立學校日見封閉矣。被又以防遏學生之知識爲務。各校學生設文學會要交換知識而被必派刑事聆其言論。學生有能演說者必

自警署拿致施以酷刑監禁旬日或數月勒供誓約以更不演說乃許放免平壤崇實學校學徒將演說起草就正于教師會絕無政治意味得其許可乃敢講演而自警署拿致杖而囚之歷數十日乃釋且彼之待遇學徒迥有差別基督教徒雖有學力之充分者入於公立學校必低落其級儼若嫡庶之別矣

京城基督教青年會請培材學堂教師姜邁演說以自覺問題翌日自鍾路警察署招姜詰之曰汝之演說自覺非鼓吹青年之自覺自己義務排斥日本回復自國之意耶若更有此等演說者當重治之自是各教會之演說並被禁止且其在教堂之外不許十人會集又不許教會之設立財團矣

彼對於教會沮害萬端而復有合併運動日人基督教青年會幹事丹羽清次郎渡瀨常吉與韓人青年會幹事金麟輩運動合併黜美人幹事吉利泰于中國舊韓時代以先帝之軫念及度支顧問英人栢卓安之周旋就海關稅額之中有每年一萬元之寄付者欲奪此而屬之日人組合教會以輿論之不許而不果乃以此含憾指青年會爲排日黨欲陷之罪而奪之種種設計而幸無奇禍美人賀利斯監督親日者也欲以韓人監理教會併於日人監理教會而不得焉又對於長老教會而日人官吏之信者與韓人教役者運動合併以金錢及土地之貸付而誘之韓人李源兢以京城廟洞長老教會之設立者歸併於日人教會于時日人各報極端贊揚而攻駁英美教師矣

彼所謂組合教會者亦合併教會之變稱也韓人信徒之無識者被其拐誘或威臨而從之雖有覺其詐僞求回車復路而不可得也

若夫青年男子之篤實信仰者彼必斥爲排日派而憲兵警察日以跟探而苦之故爲假裝不信者流於酒色而暴棄者多官吏之信者尤被脅迫而斷絕教會關係者亦多有之

三 對於佛教

吾國佛教有二千餘年之歷史在羅麗時代可謂純然佛教國而彼日本之佛法亦自我波及者也李朝五百年間儒旺佛衰然高僧繼作法脈不絕加以皇室之護法人民之崇奉而寺刹所有之森林土地占巨大之富力且有古物美術品之爲國寶者多矣乃自總督府發寺刹令以寺有財產爲半官的所有置官吏顧問於僧侶學校以拘束之任持選舉亦行干涉有當選者之報告則總督密囑當地官廳調查其人若其有時代觀念祖國思想者及爲將來社會之向上事業者必行斥退以庸愚無識之僧充之如白龍城韓龍雲之徒現爲佛教界之錚錚者故受彼非常之注目行動不得自由矣

四 對於天道教

天道教吾國新教也甲午之歲以東學黨起革命風雲以日人之干涉而蹶焉教主孫秉熙亡命寓日本東京者十有三年丙午歸國置中央總部於京城分置教區於各地其書有東經大典天道經典主張博愛平等含有共產主義且勸教育廣設學校及講習所于國中信徒日增以三百萬計其發展之迅速殆古今教界之所未有也自總督府忌其多衆欲解散之而基督教尤彼之所忌也若解散天道教則必轉入於基督教增長其勢力故遂不敢以明令解散而陰爲束縛制遏之計否認宗教團體日派警察監視中央總部及各地教區令以每月報告

其財務計簿吹毛覓疵多行懲罰教會之主要者日被其偵察束縛地方教徒尋常出入亦被拘檢直以奴隸家畜待之教人與非教人有訴訟不問事理曲直必置教人於敗訴該教之侍日卽禮拜日也有會集講演必先報告于官廳有憲兵巡查之監視雖其講演無關涉政治者而動擣句語拘而訊之且以其三世教主受道之日有每年三度之紀念式報告總督府輒有警官之多數出張教經出版月報發行及講習所盡被禁止該教有宗理會之組織以每週土曜講究教理而直以明令解散之

噫彼對於各教而勒施其束縛壓迫也豈不曰吾已制他死命無復顧慮者乎亦不曰不如是則不可以帖服韓族歸于靜謐耶然吾族之精神不以是少縮而益以激進至于己未三月而竟有震動全球之大活動不但彼之三十年經營歸於水泡而其掇拾歐米之糟粕粧綴皮相之文明頗爲各國所稱許者一朝以虐殺吾族而彰其野蠻之本色排日排日之聲轟於四圍勢不可遏而彼猶不悟怙強桀逆益干天怒不亦冥頑之甚乎嗚呼自古以來憑恃強武不修文德欲以力征經營天下者其終局未有不陷於敗亡故曰恃德者昌恃力者亡而況今日全球人類之思想視強權如猛獸愛公理如生命不許侵略主義之保留殘喘加以彼之人民亦有此共同思想而軍閥之末路亦已迫近乎此吾族之奮鬪蔑有不勝者也



韓國獨立運動之血史下編

白巖朴殷植撰

第一章 韓日國民性之氷炭

凡世界民族勿論其衆寡強弱而有歷史上國民性之固結者未有同化於他族者矣韓族以二千萬之衆有半萬年歷史之國民性而與日本族有絕對不合之性質雖屈於一時強力而畢竟分離各立者理所必然也美國教師元杜尤寓韓三十年熟諳韓日情形而論兩族之國民性如左

亞細亞民族大概有共通性蒙古族一時從事於侵略而一旦受佛教感化柔順如羊印度族漢族扶餘族均有平和性質而其中固守侵略性而儒教佛教俱不能破壞者日本族也二千年來犯中國及韓土之沿海地方以侵掠殺戮爲事者惟日本族也故兩國歷史上外患大抵多倭寇也且以亞細亞民族之大戰爭歷史觀之其大部爲日本之主動若壬辰役日清及日俄役與夫今日韓國內虐殺最其彰著者也日本指武人曰士韓人指文人曰士日本古來尙武之國韓國右文之國今次獨立運動也韓人以文字言語求正義理論之解決而日本恃其武力耳

韓族對於日本不啻不認其爲同一血族而惟認其爲加害壓迫而發生之先天的仇讐也韓族固無與日本族親愛之記憶而亦無要求親愛之希望者也現今韓人與日人決不要有好感而韓人思想莫不曰幾日乎幾日

乎者皆其抱切齒之痛者對如此民族心理而無視可乎

韓族對日本族之輕蔑

韓族恒稱日人曰倭奴倭奴者由來習性也韓族觀日本族之裸體賣淫男女之紊亂而又嘲笑之且大而國家小而個人財產皆以狡猾手段詐欺強奪亦多經驗且彼等草昧如禽獸之時代以我各種文化教導者恒所記憶也又韓族與亞細亞第一強大之漢族角其文化之時日本爲海島中一蠻族而天下無注意者亦所記憶也日本人要留學於唐而不能直接交涉要新羅介紹故東三省有新羅院卽新羅外交官兼攝日本外交者亦所記憶也

以最近狀況觀之韓族固認日本自五十年來輸入西洋文化有一日之長者然而日本尙不及於泰西諸民族者遠矣韓族若以自由爲二十年之努力者可及日本文化富強之程度固所確信也韓族於文化有吸收消化與創造力較諸日本而有優勝點者亦所自信也日本人在韓土之內其機關紙與官吏之口恒言自己爲世界第一等國而日本族較韓族爲優秀之指導者銜其自矜之態韓族當此境遇尤有不可抑制之不快反抗其侮辱之感想曰倭奴倭奴爾以強制自處以毋國人耶幾日乎幾日乎吾當見之此其切齒之愈往愈甚者也韓族對日本族以其淺薄輕躁而輕蔑之以其無將來性而憐憫之韓族雖今日被日本族之抑壓而自己之優秀於日本者亦所自信也韓族對日本族而恐怖者惟武器而已現三十萬日人散在全韓各地韓人以密接直觸而看破日本族之處身無禮而愈增其輕蔑之想矣

牧師梁旬伯以一千九百十年合併之日視察日本歸告其國人曰森林三十年生大學三十年生會社銀行三十年生鐵道輪船二十年生英語之百年事業日本以三十年而譯之則日本語之三十年事業韓人不能以十年譯之乎此實韓族之自信者也

以此證之韓族對日本族決無少毫尊敬之態而反抱輕蔑之念故在日人極甚強壓之下往往有此感情之發露矣

韓族對日本族之怨恨

日本族在東洋史上以倭寇之名稱侵掠韓族自新羅南解次次雄（方言君主之稱）時代距今約十八世紀前也自是以來倭寇侵入韓土沿海掠奪財物燒焚城邑村落虐殺人民所過人烟斷絕所以千五百年間數百萬韓族之生命均以無辜斃於日人之手此與漢族共受倭患者也

一六一年豐臣秀吉無名爲寇血戰八年韓族之被殺戮者三百萬都市村落被其焚掠者太平平和之事業與文化被其破壞者不可勝紀此時韓族之大損失卽其致命之傷故爾來三百年間韓族大疲弊之原因實在於此大抵被殺戮者三百萬而其十之九則非戰鬥員也當時朝鮮全國之常備兵未滿五萬矣至今韓人孰非與當時被殺者有血緣之關係者乎

一八九四年有清日戰役而日本在武備缺乏之朝鮮國內自由橫行徵索糧草強要勞役無辜人民被其殺戮者殆以萬計至俄日戰役尤爲倍屨占據官衙侮辱官吏京義鐵道之敷設軍備之運搬勒索土地徵發農時人

民軍兵役夫橫行村閭劫奸婦女勒索金銀鷄畜鷄卵等加以捕縛韓國臣民恣行砲殺自京城西至義州北至會寧延長三千里間韓族之受其損害死傷侮辱者思之亦可切齒也

一九六〇年日本藉戰勝之餘威以詐欺強迫手段勒置韓國於保護長谷川軍司令部掌握殺活之全權於是愛國志士蜂起全國表示其否認保護條約之意長谷川派其軍隊期盡剿滅而武裝之義兵被其殺戮者十餘萬無辜村民之當虐殺者非獨立之後則不可求其統計也

今年三月韓族以平和手段主張獨立而日本加以捕縛惡刑者十萬殺戮者二萬村落及教堂學校婦女兒童之被燒者甚衆過去冤憤已徹骨髓而今日暴虐尤極野蠻則韓族與日本萬不能同居一國之內矣

韓族對日本族之不信任

日本自丙子修好以來十餘次金石之誓約無非保全韓國之獨立而盟血未乾公行破棄矣關於韓國統治專以武力彈壓而對於世界則誣稱韓人之悅服吸收韓族之富力供給日人之生活而以虛飾的統計數字誇張韓族產業之發達凡韓族社會之信仰以指導者推許以良士者必加迫害而殲除之排斥以無賴輩憎視以惡人者必予推獎而收用之其人格高潔名望最多者必得不良鮮人之指目加以強盜殺人等罪名而治之則韓族與日本族關於道德正義之標準呈此正反對之奇現象也

日本人之來任韓土者勿論商人教師官吏宗教派皆韓人之不信任者也彼警務總監部其他警察官吏等惟以欺罔誘惑之手段捏造韓人之罪案商人以騙詐行爲奪取韓人之財產所謂耶穌教傳道者牧師等亦皆假

裝親近韓人之表面而實皆警務總監部之密偵也

第二章 改造世界之新文化促我獨立運動

嗚呼過去時代之文明者人類競爭之利用而非人道平和之事業也是以物競天擇適者生存之論爲惟一法門優勝劣敗爲天演強食弱肉爲公例軍國主義侵略政策爲生存之目的所謂文明人族竭其心思智力務極神巧者惟殺人之利器盜國之謫計也始則強與弱鬪而弱者盡矣旋又強與強鬪而兩虎俱傷矣殺人之弟人亦殺其弟殺人之子人亦殺其子全球人類惟以相殺爲報則不惟弱者被滅而強者亦不免矣天道好還物極必反固無長此不變之理而亦豈無仁人志士之惻然思有以救之者哉所以世界大同人類共存之義稍稍發現於學者之理論而猶未見實行之機會也乃者歐洲大戰演開關以來未有之慘劇爲全世界之大劫運勿論其勝者敗者而伏尸流血糜費金穀等於恒河沙數此所謂文明之賜耶於是俄國革黨首舉紅旗推翻專制宣佈廣義許各族以自由自治向之極端侵略主義者一變而爲極端共和此改造世界之最先動機也德國亦以極端侵略者欲以強兵利器征服世界於是聯盟諸國合而制之血戰五年終乃寡不敵衆德人力竭乃悟專制武力之不可以久也於是社會黨起而逐帝改建共和主張和平而與人亦隨之向之鷹揚四海者忽焉蟻伏而標榜正義人道者方鳴得勝此改造世界之曙光也美國大總統要締國際聯盟而提出民族自決主義雖以強權之掣肘未卽實行而已爲多衆之歡迎者則最後結果必占勝利矣于時歐洲之弱國寡民得以脫主羈絆而復其獨立之光榮者次第相望此改造世界之進步也彼日本亦極端侵略者不惟爲吾族之仇而爲世界人道

之敵則決不能容於新時代也我以二千萬聰慧之族酷被暴蠻無比之壓制積厲薪膽日夜禱天求自由之福音者春雷一震龍蛇起陸吾亦可以活躍猛進矣

第三章 京城獨立運動之本部及內外學生團

紀元四千二百五十一年戊午十月我獨立運動之本部誕生于中央之京城蓋以我半萬年歷史之精神順應乎世界之正義人道合唱其民族自決主義者而其主動之機由吾學友崔南善玄相允宋鎮禹崔麟諸人爲之秘密研究因與天道教之孫秉熙權東鎮吳世昌耶穌教之李昇薰朴熙道咸台永佛教之韓龍雲白龍城等協商方略置獨立運動之本部于京城分置各機關于內外要地爲舉國一致活動之準備公推孫秉熙爲盟主而其大規模多孫之劃定也於是運動之各種經費悉由天道教擔任獨立宣言書及通告日本書係崔南善手筆而自天道教印出數萬餘部以備運動日之廣佈于時留日學生團及本國各校學生團均聯絡爲一結集二百萬之團員矣

十二月二十八日在日本之留學生一團會集東京開雄辯會演自治論而有五百餘人之反駁矣翌日再會開議有日警四十餘名突入加以叱辱毆打縛十二人拘留警廳尋釋之於是留學生團派遣代表于京城及海外各地訪各界要人而密商之京城十八學校學生之優秀者均有此想而自地方留學者不以冬期放假而歸家滯留旅館密訪同志托以忘年會及迎新會而叩其意向吐其肝膽選日會集或於料理店或於大觀園或於禮拜堂或於北岳山頂綢繆密勿講究方針聯絡各教團體分担其責各女學校學生亦皆踴躍約以一致行動職

集愛國金以爲運動之準備乃與日本留學生及地方各校之學生爲互相聯絡之計且自中國上海及西北墾島有代表之來京協議者

第四章 太皇之犧牲於獨立運動

我光武帝自明成后被弑於日人恨彼已深而躬遭廢置國被合併痛尤罔極雖處幽禁之中而未嘗無乘機報復之念故彼認帝爲排日之魁思有以除之久矣至是歐戰告終列國開平和會議于巴黎美國大統領提民族自決主義吾族亦躍躍欲動先是日本以英親王結婚于日本芳子女王將以己未一月二十五日行婚禮後托新婚旅行之名漫遊歐洲趁巴黎和會之期表示韓日同化之證且造韓日合併爲兩國協意之文字嗾尹德榮及賣國諸賊屢逼帝押御璽而終被峻拒乃作同樣文字要各貴族及全國各面長之署名捺印由此人心恟恟猝聞帝以一月二十二日上午三時暴崩宮屬已傳洩于外而日人乃欲秘之只以新聞號外揭布病急自二十二日至翌日午刻日本政府與總督府以此事有數十回電報之往復韓人商民探知其故者爲國喪準備有買布通電之頻數而併被押收此由諱其弑逆亦英王婚禮後發表計也無如人心激昂巷說沸騰彼乃不得已至二十三日始佈之曰今日上午三時以腦溢血猝然崩逝云然其真相終乃暴露確係日人令賊臣韓相鶴置毒於食醞而進之不逾時而大漸帝叫曰吾食何物而如是耶俄而暴崩兩眼皆赤遍體紅斑而腐爛侍女二人暴死以參觀故也又光化門前專修學校之牆壁有揭書字曰彼恐歐和藥弑我皇云此時半島江山疑雲彌漫冤氣漲天矣於是我獨立黨諸人相議曰今以國恤而人心如此因山之日必有各地人民之多數來京者迨此機

會而宣布獨立行一大示威運動表示吾族真意于世界且選適才赴巴黎提請于國際聯盟可也宣言書之署名當以內外著望之士而示威運動以京城學生爲中心聯絡各地方學生以因山之日合全國各都市同日同時舉行爲妙以彼殘虐必有抑壓之舉而在闕內魂殿咫尺豈遽發砲乎吾等馳入大漢門建太極旗高呼萬歲對彼抑壓足可抗拒而抗拒不得則繼之以死可也

日人既宣帝崩而偵知人心之不平特許一週日之望哭于是京中男女老少皆衣麻席藁呼天哭泣人山人海七日不絕各地方人民一齊望哭亦多身自來京而奔哭者或有殉死者至於華人之居留者過大漢門亦無不吊哭而日人獨否而反嘲笑之故外人多譏其性質之劣惡也

日人慮有不虞多派日人巡查韓人巡查補等對望哭人民嚴密警戒韓人巡查補持敬虔之態禁止行人之吸烟及不敬等事而日人悍然不顧恣其粗暴故惹起韓人之惡感矣彼雖許望哭乎而內實忌之以望哭者爲排日派或加威嚇在地方有禁其會哭者尤憎白衣冠而壓迫之一般官公署及各學校無一日休業至演劇場亦不禁其歌曲日人之爲劇場業者反利用望哭人之多數來往益張其歌舞宴樂各國人之居留者均揭吊旗而日人所幹之朝鮮銀行獨不揭焉一日日人四五名過大漢門觀望哭而曰可笑衆大怒曰彼可殺也羣棒齊起勢甚危急賴日巡之救而得脫走

此時各校之日人職員不許休業而反加圍束學生等乃以自意舉哀男學生用黑布纏左臂女學生係皂色檀戒(方言處女首飾)同盟休學者三日先是各校之體操口令禁韓語而用日語至是學生自以韓語口令赴大

漢門前行最上敬禮以表吊意故與日人職員衝突多矣總督府所管女子高等普通學校學生聞帝崩而卽斷其裙端爲喪表靜坐講室以表謹慎日教師執鞭入講室而學生恬不起動而若無覩焉日教師恠而問故學生對曰往年日皇之崩也曰謹慎曰諒闇戒飭甚壯今我皇之崩也絕無一言何故是以我等自相協議定行三日謹慎而宜在講室而持靜肅表吊意故如是耳教師曰謹慎須在家爲之何乃登校而不上學乎學生曰我等以個人行禮不若齊集講室而行之也教師乃曰然則我等齊出運動場向大漢門行吊禮而上學不亦宜乎學生等如其言而行之更入講室靜坐如故拒絕上學教師乃怒曰謹慎者歸而謹慎上學者卽上學也學生曰此我等之所願也齊起而出日人事務員等懇切留之學生等復入講室靜坐如故彼乃不得已而聽其三日休學

有人以太皇被弒之事密書于隆熙帝帝卽大疑命英親王核之日人乃將英親王不日渡東京

第五章 在外韓人之活動

二月一日新大韓青年黨呂連亨金澈金奎植鮮于焮韓鎮教張德秀趙東祐徐丙浩等集于中國之上海協議光復大事決派代表于巴黎平和會而金奎植當選赴法張德秀渡日本訪留學生團金澈鮮于焮徐丙浩入內地呂連亨赴俄領而均訪各社會之要人商確進行方法

二月八日在日學生六百餘名會于韓人青年會館崔八鋪登壇演說慷慨激昂聲淚俱下朗讀宣言書及決議文因以指血寫獨立要求書將提出于日本議會而日警八十餘名突來要縛署名諸人學生等據理詰責日警

乃拔劍斫之流血滿堂六十餘人被拘入於西神田警察署搜索學生之宿舍各人均有刑事一人之監視學生等發憤益烈以十二日上午更會于青年會館以要求釋放及貫徹目的開議而日警三十餘名破戶亂入捕縛二十五人八日開讞以六十餘人處出版法違反律崔八鏞徐椿禁錮一年餘人九個月而學生等爲繼續運動派送李光洙于上海

宣言書

朝鮮青年獨立黨代表我二千萬民族據正義自由期成我獨立宣言于世界萬國夫吾族有四千三百年長久之歷史而爲世界最高民族之一者雖有時乎奉支那之正朔而此不過兩國皇室之形式的外交關係也而朝鮮常爲吾族之朝鮮未嘗有一次之失其統一國家而受異族之實質的支配者也

日本謂與朝鮮有唇齒關係以一八九五年清日戰爭之結果率先承認韓國之獨立而英美法德俄奧意等諸國亦皆承認併爲保全獨立而有約束焉韓國亦感其恩義銳意於諸般改革期圖完實其國力者矣當時俄國以南下之勢力有威脇東洋之平和韓國之安寧者日本乃與韓國締結攻守同盟開俄日之戰爭而維持東洋之平和韓國之獨立即此同盟之主旨也於是韓國愈感其好意雖無陸海軍作戰上之援助而至於犧牲我主權之威嚴而凡係可能之義務無不盡力者實追究乎東洋平和韓國獨立之兩大目的也及其戰爭之終結也米國大統領故羅斯福氏以仲裁開講和會議而日本不許同盟韓國之參加俄日之代表以對韓之宗主權任意議定日本恃其優越之兵力違反韓國獨立保全之舊約威脅韓國皇帝及政府欺罔以韓

國國力之充實爲定得獨立之時期。勒施條件奪韓國之外交權爲日本之保護國使韓國對於世界各國斷其直接交涉之道因而借相當時期之條件奪司法警察權借徵兵令實施之條件解散軍隊押收民間武器以日本軍隊與憲兵警察遍置各道甚至於皇宮之警備亦用日人之警察如此進行遂使韓國作爲全無抵抗者然後放逐我明哲之光武皇帝擁立皇太子利其精神之發達尙未充分也所謂內閣盡以日本之走狗組織竟以秘密與武力締結合併條約於是韓國犧牲於日本之軍閥的野心政策以如此詐欺之作爲有如此偉大之成功與世界興亡史上未曾有之奇事人類之大恥辱也

夫締保護條約也除賊臣外皇帝與諸大臣均極力反對及其發表也我全國人民皆以赤手反抗至司法警察權之被奪與軍隊解散之日亦然乃至合併也雖手無寸鐵而爲極力反抗之運動犧牲於日本武器之下者不知其數爾來十年間以回復獨立之運動犧牲其生者亦數十萬雖彼憲兵政治極其苛酷手足與口舌無不受其箝制者而獨立運動未嘗間斷觀此可知韓日合併非韓國民族之意思而吾族之運命乃在日本軍國主義的野心家詐欺暴力之下矣值此正義人道改造世界之日而求其匡正亦有當然之權利且爲改造世界之主人者若米若英對保護與合併而爲率先承認者至於今日亦有追贖舊惡之義務矣

且自合併以來以日本之統治政策觀之被合併之宣言者所謂增進吾族之幸福利益盡屬欺人之言而惟以征服者對於被征服者襲用古代非人道的政策對於吾族而參政權集會結社之自由言論出版之自由等一切不許甚至於信教企業之自由亦加拘束行政司法警察等諸機關無有不侵害朝鮮民族之私權者

公私上吾族與日人間優劣之差別懸殊施吾族以劣等之教育永使吾族爲日本人之使役者而已改造歷史破壞我神聖之傳統與威嚴加以凌侮除少數官吏外政府之各機關與交通通信籌備等各機關之全部或大部分盡用日本人使吾族凡可以得國家生活之智能與經濟者永無機會之可得吾族在如此武斷專制不正不平之政治下決不能享受其生存發展也不寧惟是彼在人口過剩之韓土獎勵無限之移民使吾土着之族不免於流離海外且政府之各機關亦盡用日本人一使吾國人民失其職業一使吾國富源流出日本至商工各業必予以人以特殊之便益使吾族失其產業發興之機會據各方面之吾族與日人間諸般利害互相背馳而受其害者吾族也故吾族之主張獨立爲生存之權利者也

以最後東洋和平之見地言之彼最大威脅者若俄國既拋棄其軍事的野心而基於正義與自由從事於新國家之建設中華民國亦然兼此後國際聯盟之實現也必無敢行軍國主義的侵略之強國矣然則韓國合併之最大理由既已消滅而從此朝鮮民族若起革命之亂者日本之合併韓國實爲擾亂東洋和平之禍源矣吾族惟一正當之方法追究吾族之自由而若不能以此成功則吾族爲生存權利取自由行動至最後一人必爲自由而灑其熱血詎非東洋和平之禍源耶吾族以兵力乎則雖無抵抗日本之實力然日本若不應吾族之正當要求者不得不對於日本宣佈永遠血戰而已

吾族有高等之文化者久遠而且有半萬年國家生活之經驗者雖以多年專制政治之害毒致有今日之不幸而今從正義自由民主主義先進國之範而建設新國家則以我建國以來之文化愛好正義和平之吾族

必能對於世界平和人類文化而有所貢獻者矣

今茲吾族對於日本及世界各國要求自決之機會而如其不然者吾族爲其生存取自由行動期成吾族之獨立茲庸宣言

朝鮮青年獨立團代表崔八鏞尹昌錫金度演李琮根李光洙宋繼白金喜壽崔謹愚白寬洙金尙德徐椿

決議文

一 本團以韓日合併非出於吾族之意思而威脅吾族之生存發展且爲擾亂東洋平和之原因故吾族主張獨立

二 本團召集朝鮮民族大會以該會決議對於日本議會及政府要求決定吾族之運命

三 本團據萬國平和會議之民族自決主義請求吾族之適用且爲達其目的對於駐在日本之各國大使

公使要求傳達本團之意思於各其政府同時派遣委員二人于萬國平和會議與吾族全體之派遣委員

取一致行動

四 以上諸項要求不幸失敗則吾族惟有對於日本爲永遠血戰以此而有慘禍之發生者吾族不負其責我韓僑之移住美領桑港及布哇其他各地者殆近萬人均以勞動資生亦有志士及學生之先後往者爲之指導組織團體聯絡聲氣發行報紙鼓吹思想爲祖國之貢獻而國民會爲統一機關桑港有中央總會各地有支會至是會長安昌浩在桑港集會員謀獨立議派代表三人于巴黎平和會而李承晚閔瓚鎬鄭翰景三人當選

乃以旅行券之爲障也不克赴法而在華盛頓及各地宣傳吾族獨立主旨求列國之同意

第六章 獨立本部之示威運動

紀元四千二百五十二年三月一日卽我二十萬韓族舉正義人道之旗幟以忠信爲甲冑以赤血代礮火開創前古未有之徒手革命特佔世界活舞臺之日也然其謀始也自本部極主慎密故其舉行之定期與集會之位置惟爲各團首領及各校代表之決定者而併未告及於多數學生及一切團員矣至二月二十八日之夜始派學生兩人爲之臨機通知約以一日午刻齊集于塔洞公園舉行示威運動及其至也學生之不期而會者已千餘人於是九年間渺無形影之太極旗突現於漢城中央飄颺天空有天道教一員挺身登壇朗讀獨立宣言書讀未畢萬歲之聲轟如雷霆無數宣言書及小國旗如靈山會之天花雨下爭擲首帽於空中狂喜踊躍于時城中及地方人民合助聲勢者數十萬前擠後擁足不履地乃分兩派逶迤前進一派由鍾路普信閣之前向南大門一派沿每日申報館之側向大漢門閨中婦女亦皆喜躍爭持茶水以饋之西洋各國人素輕吾族謂無獨立資格者均以是日觀我示威運動之勇敢壯烈整齊穩健而讚嘆不已曰我輩確信韓族有獨立資格云彼日人官吏對此光景罔知攸措其市民多望而恟走者乃總督府多派憲兵馳馬揮劍以拒獨立團之赴大漢門者衆皆冒刃直前勢如怒濤日憲兵慌恟不覺手劍墜地衆乃大呼進抵大漢門先導諸人詣德壽宮太皇魂殿行三鞠躬禮連呼萬歲仍由西小門回旋以入過日本町至美國領事館有一學生高揭國旗以指血寫大韓獨立四字而前導之美領事開門歡迎深表同意我辯士一人痛演獨立主旨聲淚俱烈至鍾路又開演說日憲兵騎兵

等揮劍欲逐之而衆皆自若毫無退步至六點鐘乃罷此日我民族代表三十餘人在太和館齊舉祝盃仍以電話通知于警務總監部曰我獨立團代表諸人在此於是總監部即派憲警以自動車載代表諸人疾驅以去獨立團沿路匪擁呼獨立萬歲代表諸人均將宣言書投與羣衆翌日自總督府大發軍警搜捕獨立團投獄者萬餘人同月五日在東大門外更演一大示威運動儒生慶賢洙慶愚顯(父子)柳濬根金振宇諸人爲之主謀是日爲太皇之因山也故諸人以舉行望哭聚集人民數十萬另組力士數隊伏于清涼里道傍以待之爲備日警之妨害也因山禮畢自隆熙帝及兩親王以下各官僚宮屬回至清涼里於是讀疏聲呼哭聲萬歲聲一時爆發震動天地衆遂擁駕還宮城中人民亦應之聲勢益壯日馬兵巡查多數馳來捕慶愚顯以下諸人入警察署棒打槍擊血流載塗此日有一官人乘車從駕其車夫叱之曰爾獨不能呼萬歲耶我雖下等車夫而亦人類之一寧載狗豚而不載若輩也官人乃不得已從之云于時韓人巡查之退職者四十餘人巡查鄭浩錫高陽郡人三月一日視此運動而即回家發誓曰吾爲國捨生也直以軍刀斷指其母奪刀止之乃以齒嚼斷鮮血淋漓將洋布二幅一畫太極旗一書獨立萬歲四字高揭長竿馳往該里學校與其職員及學生八十餘名齊呼萬歲至西小門被日警捉去日警又搜其本第索其斷指而鄭妻叱而却之於是全國民之運動日以熾烈總督長谷川好道決計發兵剿滅而司令官宇都宮太郎抗言曰韓族有半萬年歷史之精神者決不可以威壓而服之吾不能發兵云而長谷川乃電請該國政府派新兵渡韓恣行虐殺而彼之蠻暴遂大彰于世界輿論之公誅日以激騰長谷川遂敗歸矣

蓋吾族此舉予彼日人以大驚慌大恐怖者不一而足彼對吾族所以箝制之束縛之者極其嚴密苛酷街路不許三人集會家庭偶語動被偵察廣張鐵網於三千里之內外吾族皆惴惴慄慄罔不懼于非辜不敢露絲毫不平之色則彼固確認以帖服我同化我而肆然無忌傲然自足矣乃數十萬衆之活動突發於總督府柴戟之前抗彼槍劍視若無物此豈彼之意料所及哉彼對於普通學校之兒童專授日語誇張日本威力日夜誨之以類我類我者而乃該校學徒之參加運動者尤居多數則彼安得不落膽失望乎彼以吾國爲貴族政治之國故吾族社會之最有勢力者貴族大官耳以爲服得此輩爲其順僕則國民皆風靡也遂以金錢爵祿餌貴族元老等致其稽顙屈膝矣乃至今回運動而元老金允植李容植等以貴族代表提出文字要求獨立欲捐軀追贖前愆皇子義親王李堉素縱於酒色遺落世故彼即認以全無思想者乃於今日投身於大同團決計爲報仇復國之運動此俱出於彼之意外者也彼閉鎖我各報檢束我印物十餘年來未有一紙之自由發行者乃自三月一日以後有獨立新聞自由晨鐘半島木鐸革新公報大同新報國民新報等或以騰寫或以印刷日傳萬紙不知其從何落來此彼之驚懼不已者也被以不可形言之各種惡刑施於吾族以戕害人命爲其快樂今回我獨立團諸人之投獄者尤被酷毒氣絕而殞者往往有之而乃以每夜獨立萬歲之聲發於獄中前呼後應震動全城則可知彼之虐威毫無所損於吾族之精神也是舉也自京城以至開城平壤鎮南浦宣川安州義州咸興元山大邱黃州谷山遂安及各市場均以同日同時舉行此尤出於彼之不可思議者也嗚呼吾族有若是之自覺力而甘爲異族之奴耶

宣言書

吾等茲宣言我朝鮮之爲獨立國朝鮮人之爲自由民以此告於世界萬邦而闡明人類平等之大義以此語於子孫萬代而永有民族自存之正權

使我半萬年歷史之權威以宣言焉合我二十萬民衆之誠忠以布明焉爲我民族恒久如一之發展而主張焉基於人類良心之發露而爲順應並進乎世界改造之大機運而提起焉是天之明命也時代之大勢也全人類共存同生之權之正當發動也天下何物能阻止此抑制此耶

乃犧牲於舊時代遺物侵略主義強權主義之下備嘗有史以來累千年未有之異族箝制之痛苦者已十年矣凡剝奪我生存權者幾何障礙我心靈上發展者幾何毀損我民族的尊榮者幾何我以新銳獨創而得世界文化大潮流之寄與補裨之機者被其遺失幾何

噫欲宣暢我舊來之抑鬱擺脫我時下之苦痛豈除我將來之脅威與奮伸張我民族的良心國家的廉義之壓縮消殘者遂我各個人人格之正當發達不以苦恥的財產遺與我可憐之子弟導迎我子子孫孫永久完全之慶福者惟確實我民族的獨立爲最大急務二十萬各個人懷方寸之刃以人類通性及時代良心之正義軍與人道之干戈爲其護援今日吾人進而取之何強不挫退而作之何志不展

丙子修好條規以來時時種種食金石之盟約日本之無信固可罪也學者於講壇政治家於實際視我祖宗世業以殖民地遇我文化民族以土味人徒快征服者之貪慾而已無視我久遠之社會基礎卓越之民族心

理，日本之無義固可責也，而吾人方急於策勵自己，奚暇怨尤他人，急於綢繆現在，奚暇懲辦宿昔。今日吾人之任，但有自己之建設，而決不在於破壞他人也。以良心上嚴肅之命令，開拓自家之新運命，而決非以舊怨與一時感情，嫉逐他，排斥他也。彼羈縻於舊思想舊勢力之日本，為政家為功名的犧牲，而有不自然，不合理之錯誤者，使之改善匡正，歸還於自然與合理之正經大原也。當初兩國併合，非出於民族的要求者，故畢竟併合之結果，以姑息的威壓與差別的不平，而統計數字上虛飾之下，利害相反之兩民族間，永遠不和，怨溝益深，乃今日之實績也。誠能以勇明果敢，廓正舊誤，基於真正理解之同情，打開友好之新局面，詎非彼此間遠禍召福之捷徑乎。且對二千萬含憤蓄怨之民，專以威力拘束者，非止障礙東洋永久之和平而已。因此而為東洋安危主軸之四萬萬中華人，對於日本而危懼猶疑，去益濃厚，其結果必致東洋全局共倒，同亡之悲運也。明矣。今日吾人之謀獨立，使朝鮮人獲遂正當之尊榮也，並使日本人救出於邪路，全其支持東亞者之責也，使中華人脫免於夢寐不安之恐怖也。且世界和平和人類幸福，以東洋平和為重要一部，則朝鮮獨立為必要之階段。豈區區感情上問題已哉。嗚呼，新天地展開於眼前矣。威力時代已去，而道義時代斯屆矣。過去全世紀之所鍊磨長養之人道的精神，方投射新文明之曙光於人類歷史上矣。新春已來於大界，催萬物之回蘇，閉蟄呼吸於凍冰寒雪者，彼一時也。振舒氣脈於和風暖陽者，此一時也。吾人際天地之復運，乘世界之變潮，固無所躊躇忌憚也。護全我固有之自由權，飽享我生旺之樂，發揮我自足之獨創力，結紐我民族之精華可也。

吾等今茲奮起矣，良心與我同存，真理與我並進。無論男女老幼，皆活發奮起於陰鬱之古巢，與萬彙羣象得遂欣快之復活，千百世祖靈佑我於冥冥，全世界氣運爲我外護，着手即成功也。第向前頭之光明而驀進也哉。

公約

- 一、吾人今日此舉爲正義人道生存尊榮之民族的要求，須要發揮自由之精神，決毋逸走於排他之感情。
- 一、以最後一人最後一刻爲限，快快發表我民族之正當意思。
- 一、一切行動務要尊重秩序，使吾人主張之態度一出於光明正大，貫徹始終。

朝鮮民族代表，孫秉熙、吉善甫、梁甸伯、李昇薰、梁漢默、金昌俊、李鍾一、申錫九、韓龍雲、李弼柱、白龍城、金完圭、金秉祚、權東鎮、權秉惠、羅龍煥、羅仁協、劉如大、李甲成、李明龍、李鍾勳、林禮煥、朴準承、朴熙道、朴東完、申洪植、吳世昌、吳華英、鄭春洙、崔聖模、崔麟、洪秉箕、洪基兆等三十三人同時併以運動主謀被逮者有，白相奎、安世桓、林圭、金智煥、崔兩善、咸台永、宋鎮禹、鄭魯湜、玄相允、李景燮、韓秉益、金弘奎、金道泰、朴寅浩、盧憲容、金世煥、康基德、金元璧等十八人。

通告日本書

積有年所之世界慘禍方見止戡，天時人事共迎新春，實四海之所同慶也。究竟勝利終歸於標榜正義人道之聯合國方面，以全人類之完全幸福爲其標的者，試行有史以來世界之大改造也。使犧牲於威力之下者

付與無限之希望及勇氣也道義替代強暴理想符合實行今後世界決不許一切暴戾之壓制苟且存在也彼因習的政治家以功利野心驅東亞兩民族入於誤路爲不自然不合理之狀態者今已根本的改善時機到來矣內則將撤互相日深之怨溝外則順應過住不得之世界大勢實乃時代之歸趨不可免之事實也

至于今日穿鑿昔日兩國合併真動機之如何誠無益之事只就兩國皇帝之詔書與廟堂之宣言表現其併合目的而論之十年間實績與今日大勢不過確證其併合之無意義無道理而已確保國內之秩序掃除民心之危懼以維持韓國之靜謐增進韓民之幸福云者乃併合時最先標榜語也然而自併合前數年韓國內地之安甯秩序幾陷於不可收拾之境實基因於保護制度之施設爲民族的不安也至若被誣於暴徒之名稱者大概山林讀書之士之激起也解散軍隊之系統的行動也

於古有歷史的怨嫌在今受現實的恥辱以勢則無對抗之實力而依義則爲力抗之舉者對於國家及主權之良心正當發露也故韓人毫無負其騷擾動亂之責任者且使韓人言之則惟有擁護其瀕危之國權外無他何等尊重秩序也乃以併合而除此者反招添油消火之結果理所當然也姑不論兩國併合之根據有無而以強制欺瞞之一片空文一朝搶奪五千年歷史之權威二千萬民族之生榮則以韓人窮天之痛徹骨之恨欲打破現狀恢復政權者尤秉彝所在恒久不可渝者故其結果擾亂日人所謂秩序靜謐者自然之勢也於是乎武斷政治生焉濫用苛酷之警察制度以權力爲主則韓人之鬱忿益著積危險愈滋長激成不平反加於日人抑壓之高度以此現狀烏能釋疑懼之念而有幸福之可感者乎設使日人對於韓國自初確守信

義新政方針措置得當而以累千年來自主的政治生活之吾人決不自己生活與運命委託他人之手者明矣况以兩國關係實際發展見之自一八七六年韓日修好條約日清宣戰書暫定合同條款日英協約日露宣戰書韓日議定書及其他多數公私文書日本每有機會輒以保全其獨立與領土之大義誇張於世界如有德色於韓人一旦得勢棄前約如弊履加之併合以後所謂新政徹上徹下只有威壓差別統計上虛飾殖民地利用而已如有多少問可見之成績此即自然的文化過程與連年豐稔爲經濟之緩和故耳至於根本的治安與吾人前途所希望滿足之生存及自尊心毫無供給然而急於功利之爲政治家無前後之考慮若非心想於永不合理之同化即妄斷實力不及之財政獨立而已至於完全基礎永久福利毫無留念則是豈半萬年歷史民族所能忍受者乎併合之未成也日本上下以友好之盟邦爲俎上之肉肆言無忌併合之既成也公然祝賀其征服之愉快吾人之良心對此恥辱寧無感憤哉且其新政施設視吾疆土以殖民地遇我同胞以土昧民觀於彼之學者講說政治家施措一般民衆態度可以一例證明也使吾韓人陷於被征服者之屈辱動輒危懼然吾人之神經對此脅威未嘗頑鈍也嗚呼吾人以歷代世守之肥沃疆土無償而提供以尊嚴國家之主權供其犧牲而所得只此專橫與痛苦而已則對於新形勢不能安身立命亦理所當然也日本動輒以吾人對於現代文明而有能力之差異者強爲蹂躪吾人正當權利之口實然此非但地理上有關而亦於時勢有關焉則專責於民志失之甚酷也且吾韓人撤數千年以來之重閉帳幃而以新思想新希望欲並駕於世界文明之大風潮方進門外一步地而猝以暗電落下使吾神魂驚飛者非

日本耶若是乎外來風化日益急激吾人正欲淬勵發展而日人之加以障害阻滯者多矣彼爲政家之只營姑息的治安者或現於教育之畸形或現於信仰之威脅內則妨害心靈之發展外則對於世界的交涉之一切機能盡力斷絕則吾人之發揮靈能向上進步殆俟河之清也

嗚呼對此排出一切之韓人而更求犧牲者何耶對一切被拘束之韓人勿論何事之可能努力而但以無限之順從與忍耐責之者極其不合理不自然不公義之狀態而欲使吾人認其爲幸福而感謝之乎認其爲貴重之產業而遺與子孫乎此等威脅之下一向安住爲吾人倫理的義務乎如此錯誤之永久繼續足可爲併合之價值乎如此違反民族心理之兩國併合不惟永不能爲韓人幸福而且於日本之所期待者決不能服爲過去實績之明白看破者也且十年間新政果出於日本之誠意而其結果如此則併合之無意尤可以自證也兩國併合主要目的在於東洋平和云而所謂東洋平和之爲物也果要韓人之國家的犧牲與民族的不幸者耶斷絕韓人之國家的生命果爲東洋平和之永久肥料乎蓋真正之東洋平和確以公義建立於共存主義之基礎者也決非以一國慾望與一時勢力恣其吞噬而成立者也世豈有以爆藥奠其基礎而建築安固者乎故兩國併合只爲東洋平和之不幸而已以此謬論斷行此併合可明證其思慮之不賢明也不寧惟是現露國已崩壞獨逸已驅逐侵略主義軍國主義既爲歷史上古物而東洋平和之脅威亦全然除去之日也則併合意義尤歸於一層虛無者而對於今後之韓人強其以自己生存權永久賣却者何故其理由之不合者不得不令人苦惱矣且兩國之併合關於東洋平和而爲最有害之大禍因者中華民國人之於對日

本而心理的變遷卽最有力之證據也

自日清戰爭得國際上新經驗之中國至日露之役告終而對於日本只有猜疑而無他念矣

日本對於韓國食金石之盟約徒以威力強行併合故中國人尤覺其陰謀益懷疑懼殆成中韓之共同確信矣蓋最近十年間中日之種種交涉缺於圓滿而入於齟齬者實併合爲其教訓也且中日親善之聲日盛形諸公私文書者多然中國人反動之熾熱正爲反比例者以其戒心在於韓國之覆轍也寧一轉而聯於歐美決不與日本提携故今雖有何等大政治家與何等大經綸而決難挽回中國人之心理也假令日本永得韓國而其利難償乎全失中華之害矣又日本對於滿蒙有莫大之期望者而因併韓而有絕大恐怖之念者尤明確之事也

嗚呼以併韓之故而東洋全局因以缺裂互相反目畢竟共倒於白閥橫暴之下者日本實任其咎矣且內則對於含憤蓄怨見機思離之民族而加以軍隊警吏威壓而已外則使中國之四萬萬人抱永久危懼之念上下一致厲行排斥則東洋之共存原則永無到達之餘地鑒此恐懼之情勢匡正兩國之新運命卽目下最大緊事也今日吾人一步之得失卽係日本之支柱東洋平和破壞者也亦使韓國爲東洋平和之安全瓣與噴火口也豈非戒慎者乎專以日本自衛上觀之併合對於日本國體而帶深重之危險者達識之士容易看得者也蓋韓人有長久政治上經驗者而同時民族的自覺益益熾烈則雖加以何等抑壓箝制而難以閉閉吾人之本能矣又加以何等掩蔽防遏而於新世界思潮之薰染感受則末如之何吾人運命以自力處理只不

過時日問題而已若不幸而爲暴力所制不得達其理性則惟有現出其不平不好之形式而無他道也因此而韓人自然趨於極端以過激思想爲其巢窟以危險行動爲其職業直接間接對於日本而貽多大之脅威者亦可想像矣且對於自己之地位與歷史之運命而有正確自覺之韓人以其穩當方法行其意志而終陷於不得之境遇則爲其生存與尊榮而何等手段不擇而爲之亦當然之歸勢也且國際聯盟之成立也則人類歷史上正義之進行益強其步調矣日本若以皮相爲大勢和同之變裝內容則以侵略的大陸發展主義爲其主張墨守軍閥派之惡習併韓之實績不力於矯匡舊誤當此世界改新之日獨持舊式帝國主義則全世界疑念悉集矢於日本矣然則以此孤立獨性對於世界的地位足可爲光榮乎且日本之將來不止於大陸行動而進於太平洋方面則目前有二千萬異族之懷怨者背後有四萬萬比鄰之憎惡者日本自衛上之不安莫此爲大也誠欲篤鄰誼而得其後援乎抑欲結怨敵而不釋後慮乎此其利害之切於兩國關係者也蓋併合後之政策曰同化而日本之多數政治家固具此可能之信念者然而求精神的融和之同化較威力成就之併合尤覺其難五千年歷史之觀念豈一朝所能銷滅二千萬之民族性豈一朝所能喪絕也或者以日語普及之速度斷言同化之不遠然今韓人之僅解普通日語者大約十萬而自日清戰役後二十年及併合後十年間費了長久歲月始有此言語普及而非速率之所能及且最近習俗改化之激甚者實因世界風潮之趨勢也則不可以言同化策之奏效矣且就不可能之方面反覆考察殆指不勝屈以德性言之韓人有大陸性日人有島國性以社會基素言之韓國本於儒教日本本於佛教以歷史言之韓國上下五千年日

本則不過幾千年以言語論之音韻變化之豐約懸隔以文學論之表現範圍之廣狹迥異韓人有世界的容量日本有地方的貧弱至以衣服飲食言之韓國文化之高級與日本實質價值之低劣元有定評者也至於新文化之過程雖我韓少有落後云而表現原值已高數等之韓人豈肯同化於日本不誠實之方法耶此只可口言而實不可能之事也蓋兩國歷史之性既有數千年繼續之宿怨而對於現在及未來不僅經濟上利害之衝突而已併合政策全然侮蔑我民族意志而以一種市僧的猾智而成之者也至於政教專以威壓的差別的貽我恥辱貽此苦痛實不能以威力而折滅以歲月而磨溜者也豈感激於若干殘飯的小惠而願効忠順乎雖世代交易而不能容易致之况自一方由全世界之所驅進而十八世紀以來一切解放運動之結實迫於目前者乎設謂日本之對韓同化策及於一二世紀可收滿足之效果云而奈世界大勢促成韓國獨立出於迫近何哉且對彼速夢同化者而加一大痛棒者夫以五千年歷史之國而遽爾滅亡於他人以二千萬文化民族而容易同化於異族者果有實例之現於歷史者乎此在社會之原則民族心理而確固不動之事也同化韓族在日本固爲要緊之事而其奈太陽不爲日本而西出何哉

要之天下事惟勢而已昔年併合昔年之勢今日獨立今日之勢至于今日日本焦慮於同化者雖曰今日之勢而吾人之宣言獨立亦今日之勢也在於昔日而吾人於日本之併合誠莫之何在今日而日本於吾人之獨立豈能遏住哉今茲吾人此聚合於世界新運應於時代新勢期欲得享生命發展尊榮之正當權利而決非出於排他與一時之感情也捨此而外更無他意日本由來多明達之士今又一世俊英當於要路亦能認

得今日大勢日趨於己之四圍矣自由思想與民族主義之世界大思潮以懷襄之勢風靡一世則雖無美總統所提倡國際聯盟之保障而從此世界歷史之面目一新於此原則之下者亦無他道矣且天下大勢之變轉既不能防遏者至為明瞭雖無今日吾人之要求而兩國奮來之錯誤不可不急為改善者亦不待他人之言明也然則理義兩者之的確明瞭既如此更用架壘難免迂冗之識矣今吾人體我二千萬全民族之期望合我二百萬大集團之誠忠為祖國與復首揭義旗對於日本朝野不可不持續過去現在未來之友誼則披瀝吾人本意乃為正當故敢撫撫辭以促明斷莫謂我孤十六億良心皆後援也莫謂我弱二千萬心力盡武器也嗚呼世界方趨於正義人道上而欲遂其一大復活則韓國及韓人今也對於生存尊榮有徹底之自覺不必重言時代則已改化矣韓人則已自覺矣

第七章 獨立運動一覽表

今回獨立運動因彼之嚴密防範難得其詳確調查而況在海外但據新聞通信及個人口報者乎其地名集會死傷被囚及教堂學校民戶之燒毀者必多遺漏覽者諒之

京畿道 (自元年三月一日至同年五月末日間之狀況以下亦同)

府郡名	會集回數	會集人數	死亡人數	被傷人數	被囚人數	毀燒教堂	毀燒學校	毀燒民戶
京城	五七	五七〇、〇〇〇	五	六九二	一一、〇〇〇			

漣川	振威	利川	龍仁	仁川	抱川	始興	富平	江華	加平	平澤	高陽	廣州	開城
三	八	七	一三	八	四	六	六	二	二八	七	一九	二一	二八
一、二〇〇	五、〇〇〇	二、三〇〇	一三、二〇〇	九、〇〇〇	一、〇〇〇	一、九五〇	九五〇	四〇〇	三、二〇〇	八〇〇	二、五〇〇	七、五〇〇	三、八〇〇
一二		八〇	三五					七	二三	六四	三		
四八	七四	八七	一三九				五二	五一	五〇	一〇〇			一四〇
	二五〇	六二	五〇〇	一五		三七	九八		二五	七	一五八		七六

楊平	四	一、九〇〇	二一	七六	五〇			
驪州	二	一、〇〇〇	二六	一二五				
水原	二七	一一、二〇〇	九九六	八八九	一、三六五	一五		
竹山	六	三、〇〇〇	二五	一六〇				
長湍	二	七〇〇						
安城	一三	一、八〇〇	五一	五〇	三〇〇			
金浦	一二	一五、〇〇〇		一二〇	二〇〇			
坡州	七	五、〇〇〇		七一	二二二			
陽城	七	三、五〇〇	一二四	二〇〇	一二五			

黃海道

遂安	一一	三、五〇〇	八〇	三三二	一五			
兎山	三	五六〇			五			
金川	二	二六〇			八			
黃州	七	二、〇〇〇		二二	五〇			

義州	三三八	六〇、〇〇〇	三二	三五〇	一、三八五	四	三八
鳳山	三	九〇〇			七		
信川	五	一、五五〇	一七	九〇	一八		
兼二浦	八	一、〇〇〇	一五	三〇	九	一	
海州	一五	一七、三〇〇	二二		三、八四九		
谷山	三	七〇〇		五	八		
松禾	九	一、五〇〇	二二	四五			
安岳	一六	二五、〇〇〇	四七	六二	五二		
載寧	一七	二五、〇〇〇	七	三二			
長淵	一〇	一〇、〇〇〇		四五	一五二		
瑞興	二	一、二〇〇			四五		
平山	三	一、五〇〇	二七	五二			
文化	一	七〇〇					

平安道

順川	五	五、〇〇〇		二五	一一五		
成川	七	五二、〇〇〇	三六	六〇	五三五		
龍川	二八	二七、六〇〇	二	二七	五五四		
新義州	三	五、三〇〇	五	二五	九五四		
陽德	一	五〇〇	二〇	五七	四		
咸從	九	一三、七六〇	三	二七	二五五		
江西	三	五、〇〇〇	五八	一一〇	二九		
安州	一七	二四、〇〇〇	五九	三〇二	三二八		
中和	三	二、五〇〇		四五	五〇		
祥原	二	六五〇			四五		
大同	四	二、五八〇		四〇	二二八		三二三
鎮南浦	八	二五、〇〇〇		二四	二三八		
平壤	一二	三〇、〇〇〇	六五六	六三六	四、六八〇	一五	三二三
宣川	一七	三五、〇〇〇	三	五五	四五〇		

昌城	寧遠	定州	朔州	郭山	龜城	寧邊	肅川	平原	鐵山	龍岡	順安	孟山	德川
三	七	一八	一七	一二	一七	八	一	二	一七	七	六	五	二
三、〇〇〇	一、二五〇	五五、〇〇〇	三、五〇〇	五、五〇〇	一六、五〇〇	一九、〇〇〇	五〇〇	一、三〇〇	四〇、〇〇〇	七、三〇〇	一、五八〇	一、五〇〇	六〇〇
一〇〇	七	一二〇	三〇〇		二〇	五三			二〇	一		二五三	
五〇	五四	五二五		九	四八	八五			五五	二七		二五〇	
	八二	五六七	四七	一一一	三八	三八	三		五二一	四三	一五七		五四
		六	一										
		二											

北青	七	一、六〇〇	三六	一四〇					
城津	三	二、三〇〇							
豐山	二	九〇〇							
德源	七	一、八五〇							
長箭	七	二、五〇〇	八	七二					
鏡城	一一	五、〇〇〇							
清津	一	二五〇		一五	二二				
穩城	一〇	一、二〇〇							
洪原	六	一、〇〇〇							
甲山	四	五〇〇		三八	五〇				

江原道

鐵原	七	七〇、〇〇〇	一二	二〇	九三七				
江陵	二	八、〇〇〇		八二	五七				
通川	四	五、七〇〇	五二	二三二					

平康	二	一、五〇〇	一五	四〇				
伊川	二	三、〇〇〇	三	一〇	一二〇			
華川	三	七五〇			三			
蔚珍	二	六〇〇	七	一五	三六			
朔寧	七	二、五〇〇	一二	一一〇	一五〇		一五	
旌善	六	一、二〇〇		一二				
襄陽	八	二、〇〇〇	三〇	七六				
麟蹄	八	二、五六〇						
杆城	四	一、二〇〇	一三	四八	五七			
金化	二	五〇〇						

忠清道

咸悅	二	三〇〇						
槐山	六	六、〇〇〇						
清州	七	五、〇〇〇			二〇			

全義	三	一、〇〇〇	二五						
沃川	七	四、七〇〇	四〇	九二	四八				
太田	七	三、〇〇〇	三八	八二	四〇				
天安	一一	六、四〇〇	八二	七〇	一八九				
牙山	二三	二二、八〇〇	四〇	二九	五〇				
永同	二	一、〇〇〇	二五	四七					
公州	一二	一四、〇〇〇	四二	八〇	四、〇二〇				
鎮川	三	九〇〇							
烏致院	七	二、八〇〇	七	五二					
禮山	六	三、〇〇〇	四六	一六七	五五〇				
青陽	五	三、四〇〇	一九	三六	六五				
洪城	一〇	三、二〇〇	二九	一四八	六五				
燕歧	五	一、二〇〇	二二	五六					
瑞山	一七	二〇、〇〇〇	八	二二	二五				

堤川	七	二、九〇〇	一六	二五	四一		
陰城	六	二、〇〇〇	六	一〇			
忠州	六	三、二五〇	一二	三六	四八		
論山	三	五、〇〇〇	三一	一五二	二二		
扶餘	四	三、〇〇〇					
保寧	七	六、〇〇〇	二	一三	五〇		

全羅道

任實	四	三、〇〇〇	四	五〇			
靈光	一〇	七、六〇〇	六	五〇	二七		
高敞	三	二、〇〇〇		五	二五		
井邑	二三	一八、〇〇〇	一	二〇	三〇		
錦山	七	一五、〇〇〇					
務安	二	三〇〇					
木浦	二	六一、五〇〇	二〇〇	四七	四〇		

羣山	二一	二五、八〇〇	二一	三七	一四五		
沃溝	七	五、七〇〇	三二	三五	五〇		
南原	一九	五〇、〇〇〇	三四	一四二	五六		
光州	二一	一二、〇〇〇	二八	一七五	一、八三一		
濟州	七	四、四五〇			六〇		
金堤	六	二、〇〇〇					
益山	四	五、〇〇〇	一六	五〇	八〇		
全州	二一	五〇、〇〇〇		一五	四三四		
麗水	八	四、〇〇〇					
咸平	三	一、五〇〇					
順天	六	一、五〇〇	八	三二			
寶城	三	六〇〇					
扶安	八	五、〇〇〇		四二	三二		
潭陽	六	一、八五〇	一五	三一			

慶尙道

巨濟	六	二、五〇〇								
珍島	四	二、〇〇〇								
海南	三	一、〇〇〇					五二			
康津	七	二、五〇〇					二〇			
淳昌	八	五、〇〇〇								
茂州	七	三、五〇〇				三一	一八			
長城	六	一、五〇〇		一九		一五				

大邱	四	二、三、〇〇〇	二二二	八七〇	三、二七〇					
慶山	八	三、〇〇〇		五〇	三〇					
義城	二二	七、四〇〇	二三〇	二九五	二五〇					
漆谷	二	五〇〇	三七		二三					
固城	三	一、五〇〇	三〇	二〇	一〇					
金泉	二	五〇〇		二〇	五六					

奉化	醴泉	延日	尙州	晉州	山淸	居昌	馬山	慶州	達城	安東	高靈	宜寧	昌原
二	三	七	四	一七	四	七	四	三	二	九	七	五	四
三〇〇	一、七〇〇	二、四〇〇	二、三〇〇	二八、〇〇〇	二、〇〇〇	一、八〇〇	一、三〇〇	一、七〇〇	五〇〇	五、四〇〇	三、八〇〇	二、〇二〇	二、五〇〇
	五八	四〇	一七	四二	三〇	二〇	二九		七	三三五	五〇	二〇	三二〇
三四	一九〇	三三〇	二二三	一五〇	一〇	一二〇	一二〇	六七	四六	六一〇	一二六	三〇	一二〇
二四	五七	二八〇	三九六	二四二	五〇	二〇〇	八〇	八〇	二六	三四〇	四〇	二〇	一二〇
				一						一			
										一六			

東萊	蔚山	盈德	昌寧	密陽	聞慶	清道	清河	梁山	善山	金海	南海	泗川	星州
四	七	二	四	三	二	二	二	四	二	六	三	四	二
一、二〇〇	五、〇〇〇	一、〇〇〇	一、〇〇〇	一、三五〇	一、三〇〇	一、五〇〇	五〇〇	一、二五〇	七七八	八、八〇〇	一、二〇〇	三、〇〇〇	一、四〇〇
九	三八	一二		一〇五	三	一二〇			三三三		一九	一二〇	
七〇	二二八			一五	三三三	一二〇	五〇		一四三	五二		三八〇	一〇
九				六五	五〇	三〇	四〇		三四				三〇
	一												

西北間島及樺太島

韓國獨立運動之血史 下編

釜山	二、〇〇〇	二四			三、八二四				
機張	一、五〇〇								
河東	一一、〇〇〇	一七			九五		五〇		
咸陽	一、二〇〇	三			一二		二〇		
陝川	四、八〇〇	一六〇			五一八		二九〇		
咸安	二、〇〇〇	二二七			九〇				
合川	三、〇〇〇	一二			一七		三三		
永川	一、八〇〇	四			一二		一七		
盈海	一、二〇〇	一九							
禮安	一、七〇〇	二九			五七				
統營	一、二〇〇	二一			三六				
草溪	一、二〇〇	一二			二一				
安義	不明	六			一五				

懷仁	一三	七、〇〇〇		四七				
龍井	一七	三〇、〇〇〇	二〇	二三				
樺太島	二	七〇〇		四七				
哈爾濱	二	一、〇〇〇						
琿春	四	五、〇〇〇						
連物縣	五	五、〇〇〇	一四	四〇				
通化縣	八	不明			一五			

總計表

一	府郡數	二一一
二	會集回数	一、五四二
三	會集人數	二〇二三、〇九八
四	死亡人數	七、五〇九
五	被傷者數	一五、九六一
六	被囚者數	四六、九四八

七	毀燒教堂數	四七
八	毀燒學校數	二
九	毀燒民戶數	七一五

第八章 義州平壤晉州之運動狀況

全國各地之運動狀況未有一一報道而亦難一一輯錄也惟義州平壤晉州之狀況載於某雜誌者頗為詳悉故為之摭述如左讀者推此而可悉其餘矣

義州

商民撤市 職工罷業 學生罷課 村民禁運柴糧 官吏退職

義州人士以三月一日午后二時集于養實學院運動場舉行獨立宣言由耶穌教人為主謀李元益安碩應金昌洙等將宣言書送遞各官署通知日官又青年數十人散佈于市街間巷子時會者三千餘人各持太極旗唱獨立歌劉如大以三十三代表之一主席讀宣言書黃大關繼以演說學生隊為先列進行市中日警馳來強要解散而會衆增至萬餘勢如潮湧日警不敢制止但在傍警戒而已是夜更自幹部議決其續行方法

翌日在南門前廣場續開運動愈形盛大由天道教人為中堅而崔東昨崔安國等說明獨立宣言之主旨農民市民之會者數萬戶戶太極旗口口萬歲聲於是日人厲行干涉招訊天道教之要人憲兵馬兵多數馳來蹂躪

會場而衆乃益奮不辨生死，懽呼踴躍，彼則不脫武裝，徹夜警戒矣。

粵三日舉行太皇之奉悼式，因此機會復演一大運動，彼乃欲以武力強壓，以槍刀亂刺，以鐵鉤亂擊，而輿憤愈激，抵死奮鬥。一隊進行市中，熱唱獨立一隊赴倭憲兵署，迫請解禁，進入道廳，要求刻即撤歸，時公立農業普通兩校訓導，張起鉉、李河泳等率諸學生舉行獨立宣言于校庭，威儀莊肅，氣象活潑，所謂日人校長訓導等皆戰慄不敢發一語，既而學生等叱日人職員曰：爾等若不速去，則吾儕決不上學，遂一齊罷課，彼遂以強制不許四五人之會集，而且以機關砲据置統軍亭之高地，多派軍隊扼守街路，禁止行人，而我人愈往愈憤，爲抵抗之計，商民撤市職工罷業，學生罷課，村民禁絕柴糧之道，彼甚驚懼，多發告諭，力勸開店，於是韓人之爲官吏者，議同盟退職，又將發文于各面里，一齊閉務，未幾事洩，主謀者李裕弼、高一清、張起鉉、李河泳、曹鳳吉退職，赴滬，李明學朴承謙被捕受刑，於是日兵橫行各處，殺害老幼，強奸婦女，掠奪貨物，燒燬教堂，民戶及其牛馬雞犬罔有紀極矣。

平壤

三月一日平壤將臺峴耶穌教堂之午鐘初鳴於時，主謀諸人先以太皇帝奉悼式舉行爲之廣告，男女教人及其他識者齊集，乃設式場于崇德學校之庭，會者數千，而西洋教師馬布來參賓席，亦有私服刑事之探者，於是譟誦祈禱，虔行奉悼禮，畢突有太極旗聳於臺上，衆皆驚喜，異常視線集中，都寅權宣佈獨立主旨，姜奎燦繼以演說，丁一善朗讀宣言書，一時輿情皆血湧肉躍，而黃贊永、尹愿三等將無數太極旗投與羣衆，萬歲之聲

轟震如雷未幾倭警署長率巡查數十名馳到錄主謀諸人之姓名命其解散會衆先已馳出大市街慍呼踴躍市中人民一齊和應彼日人管理教授之普通學校生徒皆奮迅而出齊呼萬歲日教師嘆曰我輩養鳧兒而放諸水矣十年努力一朝歸虛云同時南山峴教堂及薛巖里天道教區均取同一行動而與之合勢於是倭憲兵巡查等全部馳至逮捕獨立團員數百名囚之警察署而間多官立學校學生及女學生亦有閭巷婦女之參加者其被逮也皆受亂打殆氣絕矣

此時獨立團員至南門外分爲三團一團至警察署門前呼獨立萬歲一團出新市街經道廳及裁判所至停車場一團經監獄署詣西門外更會警察署之前合爲一團氣勢益壯乃包圍該署而叱警吏要放團員之拘禁者否則併囚我等全體也警吏等乃募消防隊令以唧筒向衆噴水且令日人假着韓服混入獨立團中投石警署破琉璃窗彼乃藉此而發砲數十次衆多負傷

當夜倭兵把守各要路而警察署尤加戒嚴禁遏行人使消防隊持鐵鉤亂刺人民加以殺害日暮學生等在西門外組織軍樂隊奏樂行進叫呼萬歲又一派之在南門外者與之呼應倭軍及消防隊前驅後趕決鬥不已有一婦人過南門外受彼亂打昏倒氣絕

翌日下午一時彼乃多發憲警而捕一人必派十餘輩或越牆或破門而入故鄰近爲之驚動是夜被逮者金善斗姜奎燦周基元李一永金利濟丁一善朴錫勳金燦興郭權膺宋養默朴仁寬金基漕諸人而陸續被逮者衆併搜其家宅苟以法律乎則搜人家宅自日出限於日沒而彼則乘夜爲之矣

三月三日再舉示威運動約以會集西門外體操場矣倭兵先已把守各城門要路禁止通行有普通女學校生約六七十名將出西門被倭截住體操場亦不許會集乃以體操場爲中心而分列四方爲散陣之勢倭兵東衝則西呼南擊則北唱彼左衝右突之不暇而萬歲之聲轟於四面於是團員多被捕及傷於槍劍鉤棒者至下午二時有一團員爲激勵衆心大呼曰自總督府許我等之言論自由而自西洋人家有通信矣衆乃齊應曰然則我等入城中大街開演說會可也於是衆步齊進呼聲如雷馳入西門之內倭兵之把守城門者見其勢大不可遏止且莫知其故只得觀望聽其通過市中人民亦皆狂喜舞蹈目無倭警於是先驅直抵鐘路首尾聯絡填溢街巷乃倭兵恣行射擊而衆猶抵抗格鬥良久鮮血迸地終乃空拳不敵武器咸昌善等六七人被縛而衆亦解散

大同郡古平面面長趙翼俊耶穌教信者聞城中人士宣佈獨立乃以三月三日上午聚集多衆開示威運動而當地曾以倭官之勒令有所謂合併紀念碑者是日擊而踏之於是面長先導衆民隨之向平壤城進發上午十點至普通之野衆至數萬倭兵望之卽派騎兵及鈎夫一隊馳突射擊衆多負傷橫仆田畝投沒冰灘者甚衆有西洋人之拓影者面長以下多被逮入獄倭官以面長爲自己所任用而有此運動爲有損於面子乃呼而諭之曰若自服前過捺印於改過狀者卽放免趙乃峻拒而滯獄中

三月三日有白雉來翔于普通學校之庭日人校長指此爲瑞集學徒而語之曰昔我日本神武天皇出師禦敵之日有金鳥來坐弓上眩亂敵眼故天皇擊而克之今白雉之來此者爲我日本之大慶汝等切勿妄預於獨立

運動也學生曰今茲白雉以我國獨立運動之日而來此我獨立成功之吉兆也

又一日校長對學徒諭之曰韓日兄弟也兄弟而不親睦則無福而有禍我等宜益敦親睦也有一學徒昂然而對曰敢問人之先生者爲兄乎後生者爲兄乎校長曰勿論先生者爲兄也學徒曰我韓國之生也四千二百五十餘年而日本之生也二千七百餘年則我韓國之爲兄爲宗家於名爲正於理爲順必如此而后親睦可言也校長默然有慚色

此時學界商界之青年以通信文字之秘密印刷而被捕者衆朴淳瓚之母夫人出金四十元助光成學校學生之出版事乃發覺被捕受刑

倭於此際凶計百出一日突自警察署稱以人口調查警憲兩隊及守備隊全部出動全城各里一時舉行突入人家廚戶房門盡令洞開而把守各要路若有爲彼等眼中之殊常人者及爲崇實大學之學生者悉行捕縛加以惡刑拘囚多日

一日又稱以清潔檢查憲警等突入人家檢查物品而家主或露不快之色則輒以毒鞭猛打有一年老婦人初無可詰之故而無數毒打破傷頭腦氣絕復甦

晉州

學生獨立團 教人獨立團 農民獨立團 市民獨立團 勞動獨立團
乞人獨立團 妓女獨立團

晉州人士以三月二十五日爲獨立示威運動之定期先以十五日特派代表于京城總本部議取一致進行又派數人于鄰近各地聯絡多人以爲前仆後繼之圖自本團分爲六隊以一日三回運動爲約束以預定之日決定實行

此時全國民氣一致激昂三千里江山盡爲噴火之口爆發之勢無處不有故彼亦大加警戒甚勵抑壓而今晉人之籌備運動也彼已偵知故先期命各校休學以日人教師兼任臨時刑事自他郡來學者道長官給其盤費使各歸家招當地學生諭以切勿妄動又以當日爲市日故多派警吏戒嚴市場乃是日平明我獨立團令數百義士潛伏三處以禮拜堂之鐘聲爲號於是學生團爲先鋒而老少男女一齊踴躍集于裁判所之前者數千學生等出其懷中之國旗分子羣衆李康雨登壇宣告靜肅後朗讀宣言書大呼獨立萬歲羣衆和之震動全城宣言書及太極旗散落無數旣而幹部幾人以自意隨倭警入警察署而大隊復合徇城一回市民全部及各地人士之不期而突出者衆倭官乃募消防隊各持木棒及唧筒亂行打擊故衆多負傷逾四五時暫行解散至夜更舉而分置各隊於要地至七時突有勞動獨立團出而示威歷二點鐘復有乞人獨立團揚旗奮呼曰我輩之爲流乞非倭奴奪我生利故耶吾國不得獨立則我輩勿論而二十萬同胞皆填于溝壑矣是夜被逮者四百餘人于是我獨立團更以二十二日續行運動而昨日各處之觀市而歸者一時傳誦故面面村村山山樹樹皆被太極旗之光彩男女老少莫不蹈舞於萬歲聲中而耶穌教青年團率數千之衆以音樂隊爲先導國歌喇叭嘹亮流暢秩序齊整氣象勃發於是倭之守備隊馳馬揮劍橫行亂擊加以消防隊之凶暴無狀刺人之眼割人之耳

斷人之臂墮人之鼻者不知其數而忽有農民獨立團數萬持槌揮斧奮勇決鬥彼乃不支而退於是倭長官佐佐木亟命消防隊解散農民團遂以平和步調唱萬歲而凱旋

二十三日有妓女獨立團唱歌呼萬歲沿南江而來倭警數十名趕到欲拔劍擊之有一妓叫曰我死而得國家獨立死無恨矣衆妓皆岸然前進少無懼色

二十四日決計爲最大示威運動而或傳倭人以砲待之我獨立團聞而益怒欲以武器決一死戰殺氣滿城而指導者諸人極力止之遂以平和步調齊集江邊熱唱萬歲倭兵以槍劍衝突左右而甲隊當散則乙隊復集前者被驅則後者繼起如是終日敵亦憊矣於時我團員李陸錫被砲殺而三十餘人入獄受刑處之懲役

第九章 美國宣教師之被誣遭難

彼日人認耶穌教會爲一大政敵以壓迫爲事以撲滅爲志對韓人信徒動輒捏造罪案加以虐待慘殺罔有紀極而至于今日對美國教師而亦復勒加罪名拘之辱之恣其不法矣彼對於吾國各教派加以壓迫均有其故大宗教則以其信念國祖保守族性也佛教則以吾國古來僧侶歷史多捨身救國者而且有各寺之財源也天道教則以信徒最盛而含有革命性質也至於耶穌教會尤加最大注意濫施不法制限何故一則以該教輸入西洋文化有裨吾人之新思潮也一則以該教信徒多曉時勢而富於愛國也一則以彼之不法虐政爲西人之觀察評判而不無拘礙也然而此猶關係之細者耳使宣教師非美國人而爲英佛及中國印度之人者彼不特無毫髮注意而反與之以獎勵矣惟其爲美國人也故憎嫉壓迫無所不至蓋日本與美國有太平洋及遠東權

利之問題彼之社會言論主張對美戰爭種種發表則彼其認美人教師爲將來戰時之敵人審矣苟有可以藉口則搆捏成案擠陷驅逐卽甘心爲之者故以今回吾族之獨立運動而指美人教師爲煽動者暗助者而陷之罪網矣

一 牧師之身被毆打

三月三日平壤人民開示威運動被倭兵之射擊西洋婦人以慈悲之心爲保護女學生投入其中西洋牧師等爲印其真狀携寫真機奔走各方此乃彼之目爲煽動者也有一牧師以嫌疑被捕而倭兵拳打足踢前拿後驅入警察署受其嚴訊以無事實而得免

二 牧師家宅之大搜索

四月四日下午三時平壤倭道長官裁判所檢事警察署長警部刑事通譯書記及憲兵巡查約百名一隊馳過西門有隨處理伏之狀若追一大敵然乃美國牧師馬布及其他四五人家併被閉鎖斷絕家人之通行憲兵巡查等突入其室要行搜索馬布拒之曰非有美國領事之認憑者不可許也署長檢事等喝曰雖無美國領事之認憑而以我職權行之乃着手搜索有韓人青年金叅述李謙浩兩人被捕當場亂打殆至死境其他書類別無發見者

同時美國牧師牟義理及韓人牧師三人之家宅併被搜索而金輔植李仁善及保母二人被捕而有謄寫版之押收者于是馬牟兩牧師被拘入警察署受訊而馬布得釋牟義理入獄而韓人及婦人等拘之留置場

三 牟義理之入獄及裁判

牟義理以美國教會之命來韓宣教担平壤崇實大學之教授者七年盡心教育性情溫和與人交話愛情甚摯對韓人學徒不以師自居而以友比肩伴遊平壤學界之音樂與技術之進步皆其成績也以此之故大爲日人所忌嫉且西洋人罕與東洋人同飯同寢而牟氏恒邀韓人青年與共寢食今回亦有學生數人留宿於家彼乃認此爲奇變遂搆陷於罪而投之獄中加以虐待朝夕以大豆飯鹽饌與之歷多日以親友之周旋有寢具食物入之者及其裁判也我人之要傍聽者雲集而亦有美國副領事西洋教師及婦人數十名新聞記者之參觀者倭裁判長訊曰今回韓人之宣言獨立也爾非煽動者耶金輔植李謙浩爲犯罪者而匿置於家饋以食物寢具何也牟氏曰我爲彼等誠有迎接及食物寢具之饋者然此爲主人之接待來客而先生之子弟子以便宜者決非藏匿犯人之意則絕對否認其爲犯罪也彼乃宣告懲役六個月而牟氏不服控訴于平壤覆審法院而彼又宣告懲役四個月二年間執行猶豫而牟又不服決定上告矣

四 驅逐之惡意

此時美國教師之在京城者亦多被拿問及搜索家宅矣齋藤實男之繼任總督也乃欲使美國教師絕跡於韓國擬發驅逐令其辭揭佈於總督府機關每日申報矣

第十章 在外韓人之宣佈獨立

中領之奉吉黑三省俄領之西北利實與吾國之獨立有絕大關係蓋此兩領與吾國接壤而其土地之廣遼物

產之豐富十倍日本使日本得據此而遂其發展則將有十倍於現時日本者出於東亞抵制歐米而有餘吾族在其懷抱之內豈有活動之餘地乎若使吾族尙拘於舊日越境之禁而不能投江北一步則至于今日安有數百萬韓族之宣布獨立於海外者乎此實天佑吾族以七八十年之歲月得天然之移殖準備今日獨立之後援者也蓋吾族毫無所藉於政府之保護而能以赤身披荆斬棘墾荒作業勤苦忍耐漸致發展縱橫數萬里無往不有韓人村落此兩領之開拓大抵多吾族之力也數十年來吾黨之士亦認此爲活動之地杖策渡江項背相望提倡教育鼓發祖國思想教堂學塾在在設立蒸蒸日上進矣今日日本乘中之弱俄之亂大逞野心先收三省置之掌握而劍履且及於西比利與俄人結不可解之仇怨而亦彼之軍國政策與俄之廣義主旨決其勝敗之會也惟吾族之着根於此兩領者至數百萬亦有不可侮之勢力吾國之獨立尤當有賴於此也

三月六日吾族在奉天省桓仁縣舉行獨立運動而會者七千二百十餘人

三月十三日在吉林省延吉縣開獨立祝賀會衆至三萬餘人

三月十七日在俄領之國民議會開會于海參威宣布獨立將宣言書投各國領事館美法兩領事均表同意而俄民全體尤表歡迎曰我等不料韓人有如此毅力彼手無寸鐵而決死求獨立我等猶有槍砲之力而乃讓國權于他人乎由是俄民之排日思想愈勃勃焉同時吾族之在雙城蘇城八息浦秋風多田永安坪其他各地者均宣布獨立

于時老人同盟團發生於海參威蓋以青年子弟皆踐血於獨立而老者獨不能爾耶發言同盟響應者數千金

致甫爲團長特派代表李發鄭致允尹余玉車大韓安泰純五人入京城投獨立要求書于倭總督府在鍾路普信閣之前對衆演說呼獨立萬歲倭警欲捕之李發義不受辱引刀自刎鮮血淋漓倭警奮刀救之擁至大韓醫院而治療之乃憫李發鄭致允之衰癯令其兵巡護還于俄領本第而尹車安三人入獄處役一年有半同年八月該團代表姜燦九入京城投彈擊倭總督齋藤於南門外義聲大振翌年三月宋元實又以代表入京手揭太極旗宣布痛告文對衆揮涕誓不與敵俱生遂被捕入獄

老人同盟團致日本政府書

竊以鄙等喪國餘喘淪落異域衰朽癘疾分甘填壑矣屬茲敵邦人民血爭獨立大演慘劇之日殊邦各族亦皆爲之驚心怵目而況鄙等係父老親屬忍令我青年子弟獨就死地而佻倜傍觀乎哉所以同盟宣誓期表區區分義而顧念敵邦青年甘冒白刃而出此者豈專以死爲快哉惟其血誠實爲謀國民之幸福者故鄙等亦不以徒死爲榮而爲兩國之利害關係粗有研究者茲敢冒昧仰陳伏惟垂察焉蓋貴國素熱心主張於敵邦之獨立履行聲明于天下竟乃破壞而爲合併也豈不曰維持東洋平和增進人民之幸福而今乃適得其反則政策之得失亦合有更商者矣貴國以戰勝清露之威獨霸東亞合併敵邦沛然無礙則貴政府固放心揚言曰我已帖服韓人同化韓人而詎意其內情之有不然者乎夫以強大吞併弱小何國蔑有而若其人種之資格相等宗教歷史語言文字各有國性之傳守者則縱能強合於一時而終乃分離獨立者各國之慣例也以敵邦言之當貴國政治維新教育發達舉國人民大有振作之日乃謬守舊習自取積弱則優勝劣敗勢所必至烏得免乎哉然

人種之資格也歷史之根基也宗教之勢力也文學之普及也勞農之發展也大局之關係也時勢之動機也均有不可合併之原因請試陳之以言乎人種之資格則敵邦人種決非劣於他族者也貴國一千年前文物悉出于敵邦略言其概則百濟王仁之文學日羅之兵學觀勒之天文地理歷法高句麗慧灌之佛經毛治之醫學新羅天日槍之物品李朝李滉之道學俱爲貴國人民之至今紀念者至若李舜臣之創造龜船爲世界鐵艦之鼻祖貴國將家誦之不置以若是之人種豈其終甘於爲人奴隸者乎此不可合併者一也以言乎歷史之根基則敵邦有四千二百餘年之歷史徵諸山海經及禹穴碑可據其爲世界之古國矣人文夙闡倫理修明忠義道德之植本已固發源已長言語風俗皆含有其精神山川草木盡衣被其聲光凡有血氣均賦國性有不依文字而立者貴政府雖假借教育欲以燬棄舊籍改造新本爲變易民腦之方針而決難爲功大抵國體雖毀而國魂不滅則必有復活之日此不可合併者二也宗教則大徭教創自古代信念國祖儒佛二教有千五百年之歷史而篤於保守天道教發生於近代性喜冒險輕生樂死有革命之性質基督教來自米洲宣佈米化而華盛頓之獨立歷史深印於信徒之腦髓且年來敵邦人士無政治社會之可以翱翔者故胥趨教會而周旋無論何教均有政治思想而日新月盛甚形發達非貴國教力之所能征服此不可合併者三也文學則敵邦文學極爲簡便國民之識字者殆占全數國文書籍人人能讀苟加以新式之教育者一變至道與世界文明之族聯武併駕指日可期獨立思想自然普及此不可合併者四也以勞農之發展言之敵邦農業國也工商程度遠遜於他國故逐利敏活發明物質則遽乎不及而勤儉質朴保守國性則有餘而況現世勞農之力大有不可侮者乎蓋昔者勞

農社會無政治思想故居上流地位者謂其馴良易使也世運愈進民智愈開而勞農以最多數之衆居最不平之位政治思想漸入其腦因以釀出革命風潮直有開拓新世界之狀況矣敵邦人民處貴國束縛之下萬般事業日見退縮而惟勞農之發展出於天演沛然有不可遏者蓋他國人民之移殖于外者皆藉政府之用武糜財而敵邦人民毫無所藉能以赤身披荆斬棘移住新地在中俄領者數百萬在美領者殆至一萬而忍辛耐苦能做事業教堂學塾隨處相望皆勞農之力也夫勞農之發展如此保守國性又如此則謂我二千萬均有政治思想可也豈樂爲受治於人者哉此不可合併者五也以大局之關係言之現白人之勢力囊括全球而在東亞惟貴國獨任保障爲其唇齒者莫敵邦若也使兩國人民互相提挈人莫間焉則其爲保障尤不鞏固乎若使敵邦人民偏抱苦痛惹起不平則蕭牆之禍最難防止必爲他人所乘此不可合併者六也以時勢之動機言之今全球人類之思想皆憎惡專制嫉視強權自由平等之風潮將易世界而新之大勢所驅孰能抵止此乃天意之自然人道之大同也敵邦人民豈其獨安於牢獄生活而不求自由平等之幸福乎此不可合併者七也凡此諸種皆確係實際毫無虛飾來頭結果必不外是貴政府盍亦三思而改圖乎今貴政府怒敵邦人民之奮呼獨立直以強壓政策慘施戮半島江山怨血漲天雖得一時之帖然而人心之不服由此益深烏有殺其父兄而親其子弟者乎徒播惡聲於世界而種禍孽於無窮鄙等愚陋誠未曉何以出此也竊聞貴政府有言曰朝鮮現無實力而若許其獨立則必轉依他強致啟外衅難保東洋平和云此但據既往而言耳今敵邦民智之程度非比曩時必不以既得之獨立移授他人復蹈覆轍而亦能講究大勢審於擇交矣在昔專制時代當局之貪於政權者

要挾外勢以固其位故朝秦暮楚恣其劣行僨誤國是者有之今之有國而爲治者必合輿論而爲國是則國際交涉當以大局爲重以國家之利害爲決案豈容有徇私而顛倒國交者哉貴國於今日還我獨立則敵邦以明日握手永以爲好卽人民之一般心理也但以一獲自主厄於羈絆之故咸思脫離決死血爭貴政府指此爲排日行動而獨不知其爲真正親日永遠親日者耶且敵邦人民不挾武器徒手以奮而能得獨立者孰謂貴國力絀而與之哉必認此舉斷斷乎出於正義也神人胥悅山河重新光照四方澤流萬世豈不休哉豈不盛哉乞早施廟算幸我大局福我同種千萬祈祝之至

第十一章 上海之臨時政府議政院及各機關

吾族爲脫離日本羈絆而有革命運動宣佈獨立于世界發表自決主義矣夫革命事業方在發軔未到結局也則必有臨時政府之最高機關爲國民之標準占國交之地位亦世界革命史之慣例也三月一日以後各處獨立團均有此想而非有相當之地點則不可而在內地未有片土之占據以在外者而言之中領之東三省俄領之西北利爲吾韓僑最繁之區域而現居日軍駐屯之衝非安全地也在美領各地者距本國絕遠亦不適於位置也惟中國之上海爲東洋交通之要點雖非十分安全而比他處爲勝由是我獨立團以三月下旬多趨於此李光洙自東京鮮于懋金激徐丙浩玄植崔昌植自本國呂運亨自俄領呂運弘自美洲來曾在法租界寶昌路置臨時事務室玄植爲總務對各國而發宣言書適自京城獨立團本部派遣李鳳洙議以臨時政府之必要于時李東寧李始榮趙珣九曹成煥金東三趙英鎮趙鏞殷等三十餘人俱來協議四月八日自京城獨立本團更

派人將閣員名錄及臨時憲法草稿而來又有李春塾李奎甲洪濤諸人之來者十一日以孫貞道李光洙提議開各地方代表會設臨時議政院而李東寧以議長被選國務員由內地本部合議選舉李承晚爲國務總理安昌浩爲內務總長金奎植爲外務總長李始榮爲法務總長崔在亨爲財務總長李東輝爲軍務總長文昌範爲交通總長十三日安承源金秉祚張德權李元益趙尙燮金九梁濬明李裕弼高一清金弘敏李奎瑞等繼至於是我人之集於上海者千餘人乃制定議政院法由地方會選舉議長及議員而孫貞道爲議長

四月十四日在美洲費府之韓人得合衆國之許可開會于華盛頓獨立紀念館舉行獨立宣言者三日徐博士載弼以下諸人均有演說米洲人士亦多來參深表同意仍電子巴黎平和會要求承認大韓政府

五月二十五日內務總長安昌浩自美到滬擔任職務製定臨時憲法及聯通制頒示內外置史料編纂部歷述韓日交涉由來及今回獨立運動之狀況日人虐殺之蠻行以備國際聯盟之提出焉既而自漢城國民會改組閣員李承晚爲執政官總裁李東輝爲國務總理李東寧爲內務總長李始榮爲財務總長盧伯麟爲軍務總長申圭植爲法務總長金奎植爲學務總長朴容萬爲外務總長文昌範爲交通總長柳東說爲參謀總長安昌浩爲勞動局總辦於是李東輝李東寧李始榮申圭植安昌浩均就任推李承晚爲大統領而金立爲秘書長李圭洪爲內務次長尹顯振爲財務次長金義善爲軍務次長申翼熙爲法務次長李春塾爲學務次長鄭仁果爲外務次長金澈爲交通次長又改文昌範而任南亨祐爲交通總長既而鄭仁果辭職赴美而申翼熙爲外務次長安秉瓚爲法務次長于時吾族在滬之機關有新韓青年黨及居留民團而呂蓮亨爲團長有愛國婦人會與本

國及中俄美領各地之婦人會互相聯絡而金元慶爲會長有赤十字會多內外國人之贊成而李喜做爲會長安定根爲副會長亦有內外各團代表之協助政府者言論機關有獨立新聞新大韓大韓民報新韓青年雜誌教育機關有武官學校仁成小學校等

蓋漢城國民會爲組織政府而立者以此案件而會員金玉玦張彩極李鐵金思國等被逮受刑處三年役安商惠韓聖五處二年役李憲教處一年六個月金圭李敏台李容珪處十個月而孫晉衡韓南洙洪冕臺李孫永稷李圭甲等竄走海外而得免李中業亦脫逃而日人逮其家屬投獄加刑

第十二章 日人蠻虐之殺戮

日人對吾族之文明舉動加以極野蠻極殘虐之殺戮此世界各人自擊真相激發公憤爲我灑同情之淚者彼雖多方巧諱而庸得揜乎吾輩之爲其親屬者若不能繼續其血而貫徹我獨立目的者將何以謝我兄弟姊妹之忠魂耶余每念及此五內如割欲語而淚先零欲書而手已顫者屢矣然而我二千萬之心血爲莫強之武力世界之新文化爲莫大之應援而彼之軍國主義已迫崦嵫矣傳曰天之假助不善非助之也厚其兇惡而降之罰今彼之惡貫既滿天之降罰不遠伊邇我輩敵彼仇血以謝我兄弟姊妹亦將有日敢不勗乎

一個月間死傷者

自三月一日至四月一日韓人之被殺傷者以彼努力於揜匿不宜故難得其詳細實數而據京城通信員所記大約如左

獨立運動自一日至月末愈形劇烈日人乃加以不可名狀之蠻虐鎗刺劍擊若刈草管即死者三千七百五十餘名受重傷歷時日而死者四千六百餘名而死於獄中者探知不得而蓋被捕入獄者數十萬而亦有陸續死亡之報也彼既恣行虐殺而亦不許被傷者之醫藥救療村閭之負傷者擔至市中醫院輒加防遏令其致斃乃已如彼殘忍暴虐豈世界人類之所曾有者乎據外人電報云大約有千人會集而爲一回運動也被害者至七百名又云在一小部落而一週間當慘殺者一百七零教會堂之被毀壞者十五處也在十年前長谷川好道爲鎮壓韓人之反抗而用武虐殺者一萬五千云

水原堤巖里之虐殺

倭虜在吾國各地無處不虐殺爲吾族萬劫不忘之紀念而至若水原地方之慘劇尤何可忍言哉四月十五日午後倭中尉一名率兵一隊入水原郡南方堤巖里稱有諭示人民之事召集耶穌教及天道教徒三十餘人于教堂仍堅鎖窗戶縱兵射入堂內有一婦人出其所抱孩兒于窗外曰我即死矣乞活此兒倭兵即槍斫兒腦而殺之堂內諸人幾盡死傷而倭兵又縱火焚教堂有洪某被傷而跳出窗外倭兵射殺之有康某之妻以衾裹體匿於墻下倭兵以劍斫之以衾覆之而火之又有洪氏夫人爲救火而來即被射殺幼兒二名亦死有一少婦爲救其夫而來亦被殺在堂而死者二十二人死於庭者六人而尸盡被燒倭又縱火焚采巖里三十一戶延燒八面十五村落三百七十七戶死者三十九人更於其傍近村落加以累日之射擊焚燒毆打而死者千餘人時男女老幼奔竄山谷哭聲徹天被刺血衣伏于巖穴搆木藉草風餐露宿有一少女負其老母而走母以病臥草中而

飢甚女乃取磁器之碎片採草根以餉之或有以草裹孩兒而置之巖間者此外國人爲之攝影而傳播者也
同郡龍珠里有夫婦兩老僂偻鵠形涕淚滿面適逢西洋醫士而自言我今七十一歲婦七十歲有三子三孫乃
於四月中旬頃倭兵突入我家喝三子三孫而出卽以大索縛之以去故我隨往而見之將行殺也我跪伏于地
千萬哀乞則乃怒而逐我併殺六兒於目前以槍刺腹及喉亟請併我殺之而不聽乃以草覆尸而燒之手足耳
鼻無一遺者云而老人氣塞不能復言

狩川及花樹里之慘殺

四月六日味爽穩寢未醒猝有砲聲撼屋宇乃倭兵入水原狩川地方縱火焚教堂及民家三十四戶村民欲救
火而被砲殺者一人重傷者不知其數四月二十一日朝飯未畢猝聞砲聲倭憲兵巡查等入水原花樹里縱火
以焚發鎗以射男女老幼奔避登山倭兵追而射之死傷甚衆該村宜於農產素稱富盛至是而邱墟所儲糧穀
盡入於火飢死者亦多有乏

西洋宣教師視察該地遇一村人詢其彼虐之故答以該村人未有呼萬歲之事但吾韓人以市日在市中呼萬
歲而間多耶穌信徒也其爲獨立示威運動也秩序整齊毫無紛亂之態而乃倭巡查一人發鎗殺我人則衆怒
如火擊殺巡查至有圍燒分遣所之事然而該村在分遣所二十餘里之外初無關涉於此事何必獨罪此村人
乎

定州之虐殺

定州之城村人民約以市日開示威運動而倭兵偵知其機以先發制人之計將耶穌教會牧師以下諸教職亂行毆打作爲血塊而民心愈激當日會集者二萬五千冒敵砲呼萬歲獨立軍五十人及觀光者七十餘人并被殺彼又縱火焚城內耶穌教堂天道教堂及其學校毀壞李昇薰李明龍趙衡均三人之家又毀五山學校打破各種機器焚五山中學校及耶穌教堂損害額至一萬五千元

孟山之虐殺

孟山郡多天道教信者爲獨立示威運動而亦有耶穌教徒之參加者韓人之爲憲兵補者不肯干涉故得以無事經過幾日後倭兵來到假一教師名義使之集會倭兵乃捕該會之指導者一人牢囚憲兵分遣所加以酷罰衆人激憤爲求放釋至憲兵分遣所倭兵引而入于內庭卽堅鎖其門開砲殺六十餘人而有氣息未絕者連加槍刺其中三人得以脫逃倭兵追索不及乃窮搜其本第與近地而竟未獲焉倭人對耶穌教人則曰棄却耶穌崇權對天道教人則曰拋棄信條彼於信仰自由而強壓如是故有今日教團之絕對反動也

江西之虐殺

江西郡是台面沙川教會三月二日開示威運動而教人六名被逮翌日大同郡院場教會之獨立團二千餘名赴沙川面役所倭憲兵補助員三名突出鎗射尹寬道玄景默等六人卽斃餘多重傷於是獨立團不勝忿激以徒手搏戰殺倭憲兵及補助員而我人卽死者四十三人重傷者二十餘人瘡入病院而死者二十餘人又同郡甌山面斗滿里耶穌教堂之女勸事及其孫十六歲兒被一刀斬殺

大邱之虐殺

大邱郡獨立團二萬三千人而被倭兵之射擊而死者一百十二人被傷者八十七人死者之親屬欲收尸體倭兵輒驅逐之故不得斂埋有陳醫士要救療傷者倭兵槍擊而捕去團員金鎔海剛直有氣節其父爲運動之主謀朗讀宣言書倭兵突入擊之鎔海捍衛其父徒手抗敵而倭兵揮劍亂刺血肉糜爛父子俱入獄數日而死

密陽之虐殺

密陽郡獨立團一萬三千五百人而死者一百五十人而該郡附近有一山峽村落形如馬蹄只有山口一路倭兵扼此亂射老弱婦女併被殺死

趙氏一門之慘禍

咸安郡綠東面趙聲根以獨立團主謀者被倭兵砲殺趙氏諸族激而齊起續行運動倭又率衆亂射趙氏一門七十餘人俱死

陝川之虐殺

三月十八日陝川郡江陽面人士會集市場開示威運動倭警卒始以鐵棒長鈎亂行擊刺而猶不解散乃發砲射之三人卽死數人重傷

十九日同郡大井面紳士及勞動黨集于古縣市場宣言獨立倭警卒揮劍突擊而衆猶不退主謀者五人被縛押交晉州法院而聲色自若顧謂衆人曰我等固以熱血求獨立者今日得死乃所願也二十二日上栢栢山佳

會三嘉五面人士再舉運動乘至三萬餘名有青年數人諭以此舉宜取平和步調不可有亂動也衆皆應諾秩序齊整而倭兵七名發砲亂射死傷者僵仆道路腥風血雨光景極慘翌日倭兵三十餘名橫行各處逢人輒射之打之即死者四十二人重傷者百餘人同日草溪面儒林及學生舉行運動者八千餘人倭兵發砲射之即死者五人重傷者數十人冷墟面人士及海印寺僧侶等以同月十六日舉行運動合萬餘人以主謀被捕者十餘人上栢面儒生孔四謙以六十三歲老人被敵彈即死子文濠亦被縛入晉州法院處八個月役

同郡佳會面龜坪里尹少君十餘歲少年也參加運動斃於敵彈妻鄭氏年今十八成婚甫數月遭此變乃忍死含冤竭力喪葬之節有舅姑年老悲憤欲死鄭氏盡誠慰藉曰人皆有一死而死於國事男子之榮也婦當爲死者而終養舅姑成就聽叔維持家庭幸勿過感損生也晨昏問安甘旨供養極其誠篤遠近稱之

南原之義士烈婦慈母同日殉國

四月三日日人所謂植樹紀念日也南原郡德果面面長李甕器計以此日爲獨立運動先期告十九面面長一律辭職托以植樹招募人夫至數萬乃揚旗呼獨立萬歲倭憲兵疾驅自動車來捕主謀諸人衆不爲動整隊入城沿道三十里羣衆雲集倭憲兵乃多請援兵發砲亂射即死者十一人重傷幾絕者不知其數有房氏死焉而其妻聞之即持木棒來擊倭兵以勢不敵而被擒乃拔刀自決其老母聞之仰天歎曰天乎天乎胡至於是耶惟願我同胞益奮忠勇恢復獨立以慰吾子吾婦之哀魂也遂於邑以死

天安之慘殺

四月一日天安郡人士在並川市開示威運動倭兵欲刺獨立軍之旗手而旗手以赤手抗刃流血淋漓倭兵乃連刺其腹而殺之主謀者金求應與倭警抗論而倭警理屈辭窮欲以鎗自殺忽向金求應而射之即斃撲碎其頭腦亂刺其四體金之老母撫尸昏倒倭警又刺殺之

京城十字架之慘殺

三月九日倭兵捕縛男女教人置之京城日本獨立教會堂排列無數十字架縛懸男女其上倭兵羅列前後毒施笞擊死傷甚衆

義州之慘殺

三月二十九日義州古甯朔面永山市開示威運動而被倭兵砲殺者六人親屬昇其尸致之憲兵駐在所而哭之慟曰獨立成功以前決不葬埋也倭兵亂打會衆而逐之

江界之慘殺

平壤神學校學生朱夏龍持獨立宣言書入江界郡與鄭僑韓奉民金京河等以四月八日開示威運動而男女會者數千倭兵馳來射擊鄭僑金秉贊孫周松韓夫人即死被捕受刑者三十餘人而卓昌國金明河竟以刑毒逾月而死鄭僑之入壙也遠近人士會葬者衆有吊其妻而爲之泣者妻曰殉於國事男子事也吾夫死得其所吾何恨乎聞者嗟嘆

郭山之慘殺

郭山郡人士以三月六日開示威運動而朴志協以五十餘歲老人被倭撲殺被逮入警署者百餘人而死於惡刑者大半當地耶穌教堂被焚而損害至一萬六千圓倭兵以亞鉛彈丸砲殺韓人所謂鹿兒島派兇惡無比之蠻種也彼用此爲消防隊在京城竹山龍仁安城平澤平壤義州等地以撲殺野狗之鐵鉤殺害韓人者數千

朔州昌城渭原各郡之虐殺

據朔州郡報今年十月六日倭警等突入天道教教區室押收文簿聲言盡殺天道教徒及中流以上之青年自七日至十四日暗殺砲殺繼續不已而韓德瑤死於仁豐江李俊禧死於鴨綠江李海昌金仁澤兄弟二人李之白之子及牛商一人死於九甯浦卓成龍死於延平嶺而韓炳元於發射時跳入江中免死卓彩龍幸以輕傷伴死逃走兩山水豐兩面之農民十餘人以接應獨立軍之嫌疑併被砲殺九曲面水豐洞青年三人被拿入草幕谷去而聞三發砲響莫尋其踪朔州面青年九人被縛入九曲面新安洞而亦無踪跡所謂刑事監督高秉殷亂言曰九曲面之當暗殺者尙有三十餘人倭警鈴木突入九曲面李乃華家盡燒家產強奪金十八圓其餘各地之被暗殺者不知其數云

龜城郡參事朴啓洛與從者二人來義州府被殺於義朔接境二人逃免楚山郡獨立軍一人在朔州郡九曲面延浦洞明致信家前白晝鎗斃

據昌城郡報境內人民被倭警之檢舉者三百七十人而突入鳳城洞農民崔氏家數以接濟獨立軍而當場撲

殺

據渭原江界兩郡八月三十一日報駐在對岸輯安縣之倭警四十餘人帶同中兵二十人脅驅蘊和堡致和堡之農民及山砲四百餘名包圍搜索家產沒燒者十三戶被亂打重傷者數百人而有七十歲之老翁四人獨立軍朴云錫獨立團總支團總務林文瑛任員韓炳基被暗殺於江邊樹林中經十餘日未覓屍體同時被捕者五十人而十八人賴輯安縣知事之奪還李義貞金仁國押送新義州其餘三十人不知下落崔敬化張亨道姜萬年崔齊弘林奉益等九人被撲殺或砲殺投鴨綠江中江界渭原兩郡之獨立團員被捕者金樂胃田亨洛田園燦金以文金大健等四百八人其餘去處不明者數十餘人而江邊樹林間往往有屍體之發現者蓋吾族爲獨立運動而流血者舉國一致而至若平安北道沿江各郡義州龍川朔州江界渭原等地之同胞犧牲其生命財產及爲冒險行動者實居多數故受禍至此

據右記如水原之虐殺爲西人之視察而公傳者故其真狀擲著於天下矣若夫西人足迹未及之地村里之撲滅人命之殺傷有甚於此者固多而無從以彰其實也且是役也天道教徒之行動爲烈故受禍極慘而尙多漏報也

全國獨立團員之被殺者固罄竹難書也茲據報紙所載得若而人而錄之

京城桂洞居具洛書年二十一歲參加三月二十八日之獨立運動而倭兵以劔割其左耳刺其面部具詰之曰爾何故欲殺無罪者耶倭兵又加猛打亂刺認其已死捨之而去具乃突起歸家血流如注同學諸友欲擔至教

會病院而救療之倭警稱以檢查故使遲滯俾不即達於病院逾數時血液盡出而死

文容基督教信徒也爲全羅道羣山港永明學校義務教授四月初旬在裏里驛聚集男女萬餘人開獨立示威運動倭兵數百名突來揮劍發砲而容基演說自若倭兵乃擊斷容基之右臂所執國旗則容基即以左手轉執而猶疾呼萬歲倭兵又斫其左臂容基乃以徒身踴躍促會衆呼萬歲倭兵乃刺其胸部而仆之容基大呼曰諸君乎諸君乎我以鮮血陰助我大韓新政府使諸君爲大韓新國民矣言訖而逝

趙永信咸興郡人年今二十歲以獨立運動主謀者被捕而連呼萬歲倭兵刀割其口鮮血淋漓而呼聲不絕入獄受刑逾數月而死

車鎮夏宣川郡人基督教信者慷慨有志節恒言曰男兒生而奏凱旋歌不若死而歸葬忠壇也三月一日獨立運動以後決死進行奔走各方血餐淚飲乃以四月七日爲其祖母誕辰故乘夜歸家暫間起居鷄鳴倭兵七名突入射殺加以亂斫血肉糜爛

洪成益郭山郡人基督教信者平壤崇實大學畢業生也以暗殺寺內陰謀案之連累被逮受刑出而修學至是爲郭山及隣郡獨立團之主謀以指血書大韓獨立萬歲六字以激衆心日人欲捕之乃脫身走上海受臨時政府交通局通信事務之命回住安東縣而日警如林張網四面乃日夜踴躍或蛇行林間或露宿巖穴不避風雨俾通信無滯積瘁成病入秦誠病院乃與同志三人被捕入獄二日而死

三月下旬日倭兵欲燬義州郡水鎮面金斗萬家中路入安東億家午飯喝安之女婿問金斗萬家則答以我爲

客來者故不知倭兵卽砲殺之有張石山者啞聾也耳不得開口不能答亦被砲殺

平澤驛有二十二歲之學生將火柴匣畫太極旗被倭兵砲殺

平壤有一極貧之婦人販賣果實及食物以糊口一日在南門路傍置筐而坐乃有倭警之過者無故足踢致其胎兒墮產兒死母傷情景極慘

第十三章 日人惡刑之蠻行

日人之不法蠻行旣彰彰于世界公眼而亦有輿論之求公理解決者然而斯世界有公理乎如其有也則豈容此殘忍極惡之蠻種恣睢跳踉於人類社會而莫之膺懲乎嗚呼天下孰無父母兄弟姊妹妻子乎今彼之虐我父母兄弟姊妹妻子也奇刑惡刑慘殺虐殺爲世界人類歷史之未曾有者則可見彼之性質爲奸毒之特種不可與他族人類同處共活也古昔殷紂時代有所謂炮烙之刑斲人之心者而此猶一夫之爲虐耳今倭人乎許多法官警官軍人等均有此種惡行則其戕害人類容有旣極乎滿世界具有良心之人觀此情況宜皆髮豎眦裂血沸膽掉之不能已也如彼蠻種豈獨我韓族之血怨骨讎哉實世界人道之公仇公賊也况彼爲長蛇封豕荐食未已則受其受害者必不止於韓族而今中俄兩國人民亦旣稍嘗其毒矣凡有父母兄弟姊妹妻子者豈其無戒心之切迫者哉

一 對於婦女之蠻行

咸從郡之海濱有一貧家少婦以販魚爲業倭兵指爲獨立軍而刺殺之兩歲孩兒呼母哀啼情景甚慘倭兵夜

入同郡範五里強奸女學生燒燬民家

宣川郡有一老婦以五月五日演說愛國主義倭兵以利劍割開其口觀者血沸

三月七日在平壤之倭消防隊五六名入平壤病院側韓人之家捕女學生二人將鐵鉤引其頭髮縛之電柱請倭警捉去又將臺峴禮拜堂主日學校女教師避倭兵急走而被消防隊鐵鉤擊折肋骨遂爲廢人

三月下旬京城女學生三十一人出自監獄證其受辱之實狀如左

初次被囚時被無數亂打後逼令裸衣赤身結縛手足棄置馬廐中長夜嚴寒糞草不蓋倭虜竊取美貌者幾人輪行強奸曉則挈來目腫如桃四肢皆繫痕訊問時排列十字架而言曰汝等信者當受十字架之苦難女子高等普通學校盧永烈以裸體仰臥十字架上後列置炭爐于架傍將鐵線煉赤亂刺乳頭三四次解其縛也以刀截斷四肢分切如爪血滴如雨又移他架併頭髮縛五處懸空仰臥以膏藥鎔火粘之頭髮及陰門與左右腔冷却後以猛力猝扯髮膚並脫鮮血滿地倭虜大笑爲樂所謂長官者問曰汝尙敢呼萬歲乎答曰獨立不成抵死不休不得已更拘原處數日不與飲食第三日再刑倭兵二名在左右一緊握女學生之手一以竹針叢插于頭而猶不服激烈者反怒罵之倭兵愈怒欲以佩刀割唇長官止之曰表現之面貌則勿傷也不得已還擲衣服嚴加警責乃許釋出

北間島局子街朴東完之婦人懷孕屆產期而倭兵突入其家踢傷婦人腹中兒落產卽死

釜山港日新女學校學徒林雲伊崔福連金培綺李台煥文福淑金順伊等皆處女也參加獨立運動被拘入獄

慘刑羞辱不忍形言

同港三十里外有一村落倭兵突入人家欲奸處女及新婚婦新婦之母代而受辱處女登山逃走倭兵橫行各家搜索不已婦女之不卽逃匿者多被污辱

漢城二十五里外有一村落不堪倭兵之劫掠強奸而男女自殺者三十餘人

平壤女學生之被拘入獄者倭虜以煉鐵烙其陰戶間有夫幾人加以惡刑及難言之辱

元山港有一女學生年十九歲係沈某之無男獨女遊學日本以三月歸國乃被捉囚於京城監獄當無限之惡刑遂至失眞打破琉璃窓及房內器物惟呼大韓獨立及其母親而其母至獄門外聞其女之呼聲而呼天大哭曰請釋無罪之吾女倭兵叱辱而毆打之

五月十七日大邱各村續開獨立運動倭憲兵巡查等橫行各村蠻行極甚甚至於奪朝夕之飯脫去婦女衣服加以難言之羞辱

凡大韓愛國婦人會驪州支部四百餘名誓以不達獨立則不止齊呼萬歲倭兵來襲恣其獸行

女士李慈敬以四月五日在京城被捉於倭刑事而述其滯獄時之情況如左

凡女子入獄者必令裸體而立於訊問塲先以竹針亂刺全身及指爪間殆無空隙俾無收拾精神之餘地倭官等加以口不可道之侮辱唾洩顏貌拔去頭髮以其餘髮掛于足趾重踏項部以機械納于兩股間一次運轉苦痛之極不可形言一日受此慘刑而歸于獄也有大韓青年男子見之大呼野蠻自此以每夜訊問而其題目不

過一言而卽西洋人之隱然干涉甚麼云也在獄時必令跪坐飯以極少予之謂以沐浴而令脫服出門外俾多數倭人男女見之謂以檢査而檢視陰戶加以無狀之凌辱也

對於老弱之蠻行

儒林代表郭鍾錫柳必永河龍濟等俱以八十歲老人入獄受苦因以病死

天道教職員梁漢默以六十餘歲老人爲獨立宣言代表之一被逮入獄不勝惡刑而死

三月五日有八十歲老翁(失其姓名)揚平郡豆毛浦人自大漢門至鐘路與男女學生共唱萬歲至警察署之前日警叱曰汝老妄矣卽退去老人曰吾可憐之男女幼兒盡受惡刑且死而我忍獨去乎若釋此者吾卽退不然吾願同死涕淚如雨辭甚悲切而乃拘入于獄而斃之

三月四日倭兵突入咸從郡範五里槍刺老人李老根及其幼孫而殺之同里裴善禧亦被砲殺

三月七日江西郡十二歲兒來平壤病院治病而值倭兵之搜索病院欲出避倭兵射之彈丸自背後穿腹部卽死

鐵山郡獨立運動之日有一寡婦之獨子時年十四被倭之三發彈丸數十槍刺臨死謂其母曰我往上帝之前矣我胸部之刺痕爲幾乎我當告于上帝矣燒之哉燒之哉我胸之熱血點點爲熱火燒彼島國矣言訖而逝
義州加山面金某之七歲幼兒被倭砲殺以金之爲耶穌信者故也

四月二十八日倭兵在釜山港東北二十里外捕十四歲兒詰問汝之呼萬歲非受汝兄之嗾囑者耶兒對曰我

呼萬歲以我自由也倭兵欲以強制受降脫去其袴以竹片毒打陰莖至於死境而兒猶不服云
三月二十七日京城寺洞有七歲兒揭大韓國旗呼獨立萬歲倭兵以劍刺其口而殺之

掠奪金錢之蠻行

咸鏡北道穩城郡人崔基哲爲獨立運動之主謀者被倭兵砲殺同郡崔禹吉爲救恤其家族謀及于衆釀金六十七元倭人捕其人而奪其金

倭人在甌山郡斗滿里附近稱以補助員治療費而強取民間金錢

黃海道信川郡人金大成帶金一萬五千元將赴上海至定州驛倭警拘而奪之

倭憲兵數十名乘夜突入於定州郡葛山面李昇薰德達面李明龍趙衡均之家亂打婦女兒童破碎家具盜去各種物品

天道教會以二十萬元金貯置於京城第一銀行矣獨立運動後倭官即行押收該教大道主朴寅浩被捕而搜索其家盜金七十萬元又搜教人金尙奎之家盜金三十萬元

女學生徐範植鄭益泰自京城赴上海被捉於平壤之倭警而所持金一萬八千元被其搶奪倭兵之在俄領雙城者夜襲當地韓人各家時人皆解衣就寢門且扃矣乃以斧斫之突入內室婦女驚起未及取衣赤身被倭亂打金指環與各佩物盡被盜去於是俄領輿論沸騰以爲彼在歐人領土敢爲此蠻行者況於韓國內地乎

對獄囚之蠻行

三月一日獨立運動以後宜川信聖學校生徒十人被囚於新義州裁判所備受惡刑入于美東病院治療七日杖毒入腹而死者三人病廢者六人

京城專修學校生徒洪致學張基濂死於京城西大門監獄載寧江東村教會長老朴河東死於平壤監獄而倭人以每日撲殺三人囚人墓地之木石日見增加或被囚者之家族及親知爲給其衣服要下而會輒以歐打爲事獄舍不過二坪有半而被囚者爲三十七人氣窒不通不許沐浴汗流遍體臭腐觸鼻言語不通瀆於死境殆若犬之仰首而被屠漢之棒打則吞聲垂頭也

投毒害人之確證

自四月以來倭人散在各處對於飲料水魚鮮食鹽雪糖各種投以毒藥害我韓人平壤商人發見鹽一升有四勺白色結晶之藥而分析之則鎔解石質之藥也鷄四首吞之卽死龍川楊市見各井水之有油浮上而汲盡其水則有以布片裹一藥塊者適見一兒行動殊常卽捕而訴于警官則反擊逐之更詰於其兒則以倭人命我一回投藥授以十元故爲是也倭醫以爲此非卽死之毒藥而特發痢疾者云而以目觀者之證據則并蛙盡死云定州郡人民以獨立運動而被殺者一百二十餘人而醫師申某以治療傷者而被捉囚病院亦被毀壞三月二十一日晉州郡人民以獨立運動而被倭兵之射擊而死傷甚多其傷者入于教會病院受其治療而倭長官多方沮之期逞其撲滅主義有一病者其體熱達於百三度者請願放釋而不許

上海西報所記之日人蠻行

據大邱通信該地監獄囚徒之充溢令人可怖以十人難容之房置四十人余到此之日百八十名韓人移囚太田翌日又移二百人道長官對余言挽近在獄人之最多時爲二千六百名云而此除警察署拘留者而言也且請視察該獄而被拒絕且問其虐待韓人之事則答以此乃中傷日人之言而決無是事云然以韓人所當之痕跡觀之足可判斷其實狀者有之據每日所來之報道則日警官訊問時對於婦人而有野蠻行動義城郡有里名馬谷而新婦當日兵之強奸往訴于憲兵隊則反喝退之余在安東郡目擊慘狀日軍殺韓人一名其妻驚慌伏於其夫尸上背負孩兒日軍又刺殺其母及兒又有韓人之負傷者一名喘息奄奄臥於路傍而日軍以劍刺其腹而割之在於山村日兵對於韓人砲殺之自由特甚而不許外國人之投足該地故余見全滅之村里矣雖有外人之往者而恐畏憲兵隊之鞭撻不敢出言外人既還之後則憲兵隊縛去婦女嚴訊外人之有何言且何里事件有揭於新聞者該里受罰邑落則有十人同行者必被捕去處一個月以上之監禁無訊問而但受笞刑余留病院時見無數老弱之傷於槍劍者連日深至可知日人殘酷之甚也日本於講和會議居救護小弱民族之位置排斥獨逸對白耳義而在北佛行動者非耶願不許言論自由出版自由宗教的自由現今世界民族中最受壓制者韓人也官立小學以強制入學而世界歷史無一冊之教者教會學校非用總督府教科則開校不得受業不得故韓人之受完全教育不可望也專力於全滅韓國國語以我所見則不過幾年教會學校亦當韓語之禁止矣然而如此之同化可知其必然失敗韓國民族有長久文化之歷史日本自身多受其影響者而遽欲其滅亡完全不可能之事實也

平壤宣教師會所報之日人蠻行

在留朝鮮平壤之宣教師會記朝鮮獨立運動之真相報知于在朝鮮境外之人士而英文之繙譯也。今次朝鮮之獨立運動極爲重大而因日本政府之嚴酷取締難以傳達於世界不得已以間接托於貴報冀令世人周知也。駐在京城之美國總領事對於本事件即時發電於美國政府然日本照其電文而打送未可信也。所以發此長文通信（中略）下所記載之幾項可證日本對於朝鮮之嚴酷也。此爲彼我所共知之背戾正理公道之事實也。

一 朝鮮之受專制政治爲世界第一總督判決之案更不得控訴于帝國議會則總督者獨裁的暴君也。下所列舉者即非認朝鮮民族二千萬之天賦人權者也。

二 日本之對朝鮮而統治者斷定其爲野獸的殘虐外無他可名也。無一分顧愛之朝鮮民族當極慘之毆打此非無一分顧愛之野獸的殘虐而何。

三 政府不許朝鮮人民之控訴權利若有論辨其不公平而提起控訴之行爲者即爲國事犯親知間暫時談話因數多偵探當一個年監禁者有之。

四 朝鮮民族一系統的民族也。言語同一有相當之文明有信馮的四千餘年之歷史然而日本勿論公私立學校力禁朝鮮語之使用力圖滅絕朝鮮歷史特欲毀破韓日間過去之差異點牽強附會要關係之密接阻遏朝鮮人之文化的事業以其使用不同日本之言語維持朝鮮固有之思想也。

五 韓日間人種之差別特甚不許韓人與日本人修業於同一學校自政府制定之教育令已有區別學校種類亦異朝鮮人之卒業於初等學校之兒童不許入學於日本人中學校卒業於朝鮮人中學校之青年不許入學於日本高等學校

六 朝鮮人非無若干高等官而其部下主要事務必置日人官吏執行凡百實權朝鮮人無代議士人民無提出要求於議會之途總督以自己觀察之要點報告於東京議會而已

七 關於土地有大不公平者舊韓時代以國有未墾地貸附於人民者併合後自政府憑藉國有而奪收之賣却或貸付於移住朝鮮之日本人由來佃作之韓人一朝失其耕作地而呼訴無處也

八 韓人之外國旅行券有特別節制之多大者有請求則以旅行理由不充分之口實爲拒絕其他十年間種種虐政許多然而自政府對如許爲政者無懲判之正圖反爲贊成日本求自己利益外無有爲朝鮮人利益而施行者朝鮮人在不能堪忍之束縛下騷擾之將來不可不繼續而破裂乃已混汞及同化作用已告一段落矣

日人對獨立軍之蠻行通例

一 小學生被捕時猛打痛毆殘忍既極且毒

二 韓國婦女界成羣呼萬歲時任意發砲轟擊

三 對十歲小兒發砲亂擊背部

- 四 六十餘歲老人無何等抵抗而毆踢無數俾不得行動
 - 五 女學生數十名以從容態度出自學校由公共道路而行日兵疾追槍擊足踢行其強奸
 - 六 消防手輩以鐵鉤勿診男女老幼輒行擊拿
 - 七 指揮鹿兒島派對於呼萬歲之村民亂行毆打
 - 八 婦女及幼兒等會集時縱其兵馬亂跳橫行貽無數之傷害
 - 九 有一韓人罹麻木症入醫院治療而消防隊以鐵鉤破斫其頭部
 - 十 被重傷而不能行動者縛而載之木車拋置獄中
 - 十一 韓人百餘名以滿身血污之衣被縛入獄血流成渠
 - 十二 獨立行動之傍觀者皆被亂打
 - 十三 美國人士之在自家觀望者均當逮捕
 - 十四 對於婦女用槍打倒踢入溝中
 - 十五 關於今回運動雖稍有疑點而難於執罪者畢竟何時憑藉清潔調查而無數亂打
 - 十六 二三人作伴在街路上談話者不問曲直以鐵棒亂打夜間則必擊而仆之折其兩股對於老年夫人
 - 十七 青年婦女等以革帶係其頸拿行於鐘路上終乃拘囚於警察署
- 世界上第一殘忍無道之野蠻卽倭之無賴輩而警察署利用如此之凶惡者分給鐵棒鐵鉤尖鐵刀

等凶器縱其任意殺傷

日人在監獄之蠻行常例(放出者口證)

- 一 對於受訊之人先脫其衣一腕向于背上一腕納于腋下使其兩手相接于背上後以麻繩緊縛其兩拇指懸之於天井之鐵鉤引其繩之一端則其人懸於空中者逾三四分兩足拇指觸地兩手指天井如此則全身流汗或放大小便所謂審問官吏或讀書或圍棋或就睡而置之度外全身之血逆流頭上筋肉卷起四五時後舌垂氣絕則有醫士來使之更甦在二週間每日如此過二三日則兩拇指皆皮剝肉斷骨露矣
- 二 將受訊之人納入於木箱之內而箱則以銳利之洋釘插於三面而其高四尺使人半屈其身而立于箱內者逾四五時間而置若無觀

- 三 受訊之人以裸體立於審問官之前而以三稜木棒自頭至足加以亂打全身如被蛇咬盡紫色紋也
- 四 對於婦女以繩結其頭髮懸于天井而大足指垂於地面似着未着也
- 五 縛兩臂在背後而翻其面部向背作為直線以熱水灌鼻孔
- 六 以裸體伏于地面而以棍杖及竹鞭猛打至六十度
- 七 以鎖鑰鐵納入于手指間結指之兩端後俾巡回之以為快樂
- 八 限十五分間許吃飯過限則必罰
- 九 不許飲水故囚徒以自己小便止渴

十 或不給食料者至二三日或給大豆粥少許

十一 在獄中必令跪坐不勝苦痛有動撓者則捉而出之納棒于脚間數時間跪坐于地上故有失神昏倒者

十二 房僅一坪而囚者至十人以上不得成眠爲狂人者半數

十三 以數寸之油紙插入於陰莖之尿道而燃火

十四 以鐵棒煉火亂刺男人之陰莖及乳頭

十五 憲兵等圍坐四面以所吸卷烟之火向赤身人之面部及陰莖而炙之左偏人不勝其熱欲向右偏則

右偏人叱之一時間致有五六處之火傷

十六 婦人等每日一次以赤身出立于獄庭憲兵加以猛打者一時間

十七 或稱放釋而出送也每過一門倭卒持棒伺之過則突擊雖不傷頭面而打傷肩背僣強步僅至外

門嘔血倒死者有之

十八 每於訊問時有強硬態度者卽行撲殺

十九 韓人女子入于監獄則必令裸體而行訊問已受判決之女學生必當日人之奸淫暴虐

二十 警察署對女學生之被捉者日巡查辱以強奸後問汝爲處女乎貞女乎若無對答者輒以拳猛刺女

子腹部

二十一 拿入於審問場者必先以拳以足行一場毆打

二十二 以銳利之竹針刺瓜及肉之間一指二指至左右十指

二十三 以手弄受訊人之陰莖使之勃起後以細竹條打之

二十四 女子以裸體二三時間立于鏡前而若少屈其身則亂打之

二十五 使女子裸體臥拔其腋毛陰毛或以膏藥鎔解灌女子之陰部而冷却固結後猝然拔之其毛盡落

第十四章 日人諱惡之巧譎

三月五日在平壤府之日官吏招集市內有力者十九人出書狀一張示之曰三月一日宣言事倡自下流幾個人之淺見而非以朝鮮人之代表爲者此書自京城製造而京城人士舉皆捺章將此書送于平和會而前者發表之獨立宣言書既經取消則速即捺章也云云強制壓迫出於萬端然而無一人之捺章者

三月五日總督長谷川有諭告曰日韓人間密接融和之實態既已明麗現其良好之成績矣在留海外不知半島實情之不逞徒輩傳播流言盡惑衆庶所謂民族自決問題與朝鮮民族全無關係而妄爲捉來招致列國之嗤笑豈非可誡者哉敢爲此非違者無一步之假借而嚴重處分云

三月以來日軍之放火教堂學校者不可勝數而日官乃曰此反對運動者憎惡教人之所爲也定州郡耶穌教堂學校與天道教堂之被燒出於日軍暴行者全郡之所共知而反謂韓人所爲而捕縛之毆迫之總督府機關每日報記之曰此朝鮮人之反對獨立者所爲也

四月二日定州郡二萬五千之獨立軍被日兵虐殺者一百五十餘人而日人乃曰此皆以金錢所買而犧牲其生命乎者只一人云噫數萬餘名之二三次運動豈盡爲金錢所買而犧牲其生命乎

日本陸軍省公佈韓國各地方獨立運動事件曰自三月十五日至四月五日韓國全體運動發生之場所有五十一而參加運動者除咸鏡道而他七道爲十六萬九千名云以咸鏡南北道言之參加運動者數目其人死傷者千餘人被捕者八千餘人而謂除咸鏡道者何耶

在京城之西洋新聞記者質問日本當局之對於韓人而施酷毒之笞刑非人道的行爲則答曰笞刑不施則韓人現其不滿足之狀態多有困難之事故從其受支配者所願而施此刑罰云

日本政府對於朝鮮獨立運動而施其武力之蠻行者大彰於世界皆以東洋之獨逸指斥而嫉視之故爲欺世人之耳目稱以改正官制令總督長谷川提出辭表而海軍大將齋藤實男以繼任者被薦則亦軍閥派也從前所設之各隊各所兵員均仍其舊但改其名稱與服裝而曰新朝鮮主義云者豈非羊面而狼心者耶

日本所謂宗教派亦皆虛僞狡猾而無真實道德者六月初一日日本牧師村上唯吉來上海對韓人某某以慷慨之態度說明朝鮮獨立運動爲文明的攻擊總督府之暴行且曰余即朝鮮兄弟之友表滿腔之同情此行爲對於日本及世界傳播朝鮮之實情也最終曰余與諸兄弟更不得入朝鮮之亡命客也總督府之對余憎惡無異於諸兄弟也滿面微笑緊握韓人之手而作別矣彼去後二週日投書大阪每日新聞曰余受當局之囑托調查在上海不逞鮮人之狀況云云而發表其調查報告矣

日本組合教會頭領原田助者六月十五日在美洲羅省之日本人會席說明韓國獨立運動之現狀曰三月以來人民教會等各團體與公私立學生等聯合而有如干運動諸英字報謂韓國新政府組織而發布閣員之列名皆無根之說但依平和會議提議之方便也且今回數千名之死亡者虛言也據總督府實地調查則死亡者三百二十名負傷者二千名云彼以狡誑之性質做虛偽之言詞欲掩世界公眼大抵皆此類也所謂教會頭領者如是遑論其他乎

三月以來日本各新聞均謂韓人先行襲擊憲兵駐在所故不得已以武力待之此爲掩護其虐殺而韓人手無寸鐵豈有先行襲擊者乎

日人之詭譎誠不可測也獨立運動以後有所謂反朝鮮獨立團者彼之偽造也其警告書曰頃者流言散布稱以巴黎會之承認獨立煽惑民心無根之事也主謀者大部分方囚獄中而正在悔悟之中也尙以強奪金錢之目的妄稱朝鮮獨立團誘惑同胞停學廢業若如此而度歲月則朝鮮之滅亡不待再言我有志之士以決死之心組織朝鮮全道反獨立團多派密偵于樞要都市嚴重警戒則彼輩不出數日而撲滅矣吾人民勿惑於不逞徒之流言而安業焉我反朝鮮獨立團以保護良民爲職志對於不務本業不上學校妨害他人事業者必加以生命上危害特此警告云

在平壤之日官吏巡行城村威脅人民組織自衛團或自制團而加以毆打強其入團擦章後若違反於團規者處役云也

上海大陸報云挽近日本新聞記以韓人先用武力故勢不得已以武力待之對於外人打電而日人輒爲改譯原電文曰韓人自山上奔下呼萬歲而日人以槍擊之而日人改譯曰韓人自山上而下亂擲大石云也

朝鮮每日申報所載或某宣教師之談某貴族之談某社會之談云者均捏造虛名說明反對朝鮮獨立而實無其人

四月十五日日兵撲滅水原各村焚燬各教堂者已彰著內外激起輿論而每日申報乃曰當日軍兵下去無數羣衆猛烈攻擊當生命之危機故爲正當防衛不得已武力行事云又曰以日憲兵一名致死之故爲報讎者堤岩里與水泉里憲兵隊相距二十餘里何獨越其近境對耶穌教人最多之村而爲報讎乎俄領老人同盟團代表五人誓以殘軀殉國入京呼獨立至有流血之舉而每日申報乃曰該老人等老妄失性被青年輩之嗾囑而

有此駭舉云其亦誣之甚矣
京城獨立運動時日人數百名着韓服橫行各處破壞家屋及電車乃欲歸罪於韓人而適以日人一名被捉之故其事大白矣

日人暗投毒藥於韓人之井水者在龍川及義州古館面中端洞既有受賂行事之兒童自白其事實而特於耶穌教人之村投藥爲多日人乃曰此反對獨立而憎惡耶穌教人者所爲云也平壤獨立運動時日人將以軍隊出動而爲得其憑藉着韓服參入於運動行列投石打壞警察署及他官廳之玻璃窗嫁禍韓人而對於赤手空拳之獨立軍加以武力殺害多人

日人之無賴輩均着韓服假裝獨立軍貌橫行各處討索酒食行惡莫甚

第十五章 我代表在巴黎和會之請願

謹白

(一)大韓民族有一定之國民的生活及文化者四千二百餘年爲亞細亞歷史的國民重要之一國家過去四十二世紀之間維持大韓之獨立國家

經承認之大韓獨立

(二)以日本合衆國英帝國其他列國與韓國修好及通商條約中承認韓國之永久的獨立主權

一八八二年五月二十二日韓國與美國在漢城締結條約明確記載曰萬一兩國中有一國受別國之不公平或壓制的行爲之時該國訴其事情于他一國則他一國爲表兩國間之友誼爲得其有利之解決而盡力焉
一八九五年四月十七日之馬關條約日本要求中國確認韓國之完全獨立自由又一九〇二年一月三日第一次英日同盟協定日英兩國承認韓國之獨立最後一九〇四年韓日攻守同盟條約日本擔保韓國之獨立及領土完全

韓國獨立爲國際的信認

(三)此等條約不僅認證擔保韓國之獨立而依於國際的原則及公認而成立者則有何單獨國家欲其侵犯之時列強不能不干涉者也

日本侵犯韓國獨立

(四) 乃韓國獨立之侵害爲日本之手自犯行日本以詐欺暴力一九一〇年八月二十九日締結韓日合併條約使韓皇舉全韓國之統治權完全讓渡于日本皇帝置一千五百萬以上之民族於日本之手下

韓國人民之反抗

(五) 如是而犯韓國之主權以韓國作日本之領土故韓國人民強硬反抗且繼續其反抗也

(六) 此種反抗日以增加日以強烈以日本之統治方法肆其殘虐故也其殘虐壓迫之慘狀實倣效普國之治東邊諸省及脩列斯維何倫斯坦(此爲德國前奪自丹麥者)暨阿爾薩斯鹿林者而行之無所寬容不遺餘力日本不但以名義上而實地上以韓國爲其郡縣實施其政策也使用最甚之殘虐手段韓人之有愛國主義者力圖滅絕卽爲撲滅其愛國心國語歷史之榮譽而置兩種機關卽制限財產及教育者也

日人管轄下之韓國財產及教育

(七) 勿論如何種類之科學而苟有超越於一定程度而或有帶寺內總督所謂危險思想者全被禁止或有教授之機會而加以非常壓迫韓國學生有以自費欲遊學於歐美者絕對禁止

(八) 一切韓國富人殆皆逼用日本支配人在其家中管理其財產及其收支而國內銀行皆日人所設也韓人存款於銀行者非將用錢目的報告官廳則不能提回存款中之巨額

日本與基督教

(九)日本當局設種種方法使基督教在韓國之傳道事業陷於失敗斷望是認基督教爲反對彼等之利益者而用警察力尤多蓋彼等不得不敵視基督教者日本之韓國統治方法果然如何而其殘忍暴虐爲其推想故也

日人之韓國觀

(十)日本當局自言改良韓國然要其記憶之事實不無各種改良之價值而此種改良當於流謫殖民地見之其全數皆以韓國人工及韓國納稅人之財力爲日人之利益幸福而爲之但使韓國作日人歡迎之殖民地也

(十一)日本之統治韓國全爲宗主國的統治而謂爲私利的政策尤明確矣如人視其奴隸及家畜者以其爲其主人之財產而圖其利益而已至若他人之公安並不置意也

無視全世界之日本

(十二)以上所述固爲韓國人民爲要求脫離日本之束縛有取消合併條約之直接理由而卽世界有最必要之關係特法國之東洋利權英美兩國之在亞細亞太平洋之利權問題也

(十三)關於商業貿易日本人欲破壞外國人根據而收諸般利權盡歸日本商人手中此日本無視外國人在韓國通商條約規定之利權也如此政策卽日本之多年繼續者以過去之日本歷史見之排外風潮已甚而現今日本之輿論排除西洋人在遠東之勢力範圍所謂東洋之門羅主義爲其適用者也

日本之大陸政策

(十四)日本之大陸政策實長遠永久的政治上計劃而合併韓國既爲事實之顯示英美法諸國不可看過也對於日本以外之世界而英美法三國之危險無不在於日本實行其無際限之大陸政策也此政策之根據地自征服韓半島始而管轄中國之人力富力以携取亞洲霸權且獨占太平洋之權利對合衆國及濠洲求送其無際限之移民也

大陸政策之實現

(十五)日本之大陸政策既實現者如左

(甲)日本以兩大戰役之成功成爲東洋之最大武力國恰似普國再戰再勝而爲歐洲最大武力國

(乙)既合併韓國

(丙)在南滿洲東蒙古排斥中國而擴張日本之勢力

(丁)在和會中求得承繼德國所有特權在山東省之青島包在其內

(戊)藉稱政治上必要蠶食中國併其未開發之人力富源歸於日本管轄諸般政策一一循用從前所施於

韓國之方法

(己)以赤道以北之太平洋羣島歸日本領有因以接近於濠洲二千英里且日本艦隊占有太平洋之制海權得其根據地

韓國之獨立運動

韓國獨立運動之血史 下編

(十六)韓國人民反對日本之合併其國及日皇所委官吏壓制政治而爲抗拒遂有此韓國獨立運動之表現三月一日午後一時大韓民族宣言國家獨立此三百萬之大韓獨立團代表國內及中國西伯利布哇美洲之韓族一千八百七十萬之意思而宣言曰爲我民族恒如一之自由發展而主張焉基因於人類的良心之發露順應乎世界改造之大氣運而提起焉宣暢舊來之抑鬱擺脫時下之苦痛芟除將來之威脅爲我可憐之子弟勿予以苦恥的財產者惟確實我民族的獨立爲最大急務也

獨立運動之進行

(十七)韓國代表接受海底電信卽爲革命運動之進行及獨立而盡力者韓國獨立團之發電經由上海來着巴黎而其中一部如下吾人以三月二十六日開最大示威運動於京城高懸國旗於漢山之上被捕者二百名兩方各有死傷三南地方之示威運動日盛西伯利及滿洲亦行大韓人示威運動

大韓民國

(十八)同電又報告大韓臨時政府之組織其中包有總統副總統國務卿內務財政司法軍務各總長政府中有朴泳孝公及李承晚安昌浩李東輝各氏朴泳孝者韓國急進黨之領袖甲申革新之首動者合併以前經內務大臣李承晚者美國哈華大學之學士布令斯頓大學之哲學博士一八九四年彼爲獨立協會之引導者已曾入獄被械繫安昌浩爲新民會之創設者一九〇五年已爲青年愛國黨之首領現爲國民會中央總會長李東輝爲故韓國陸軍參領爲滿洲及西伯利國民黨之引導者亦曾被日本政府械繫者也

日本之壓迫

(十九)四月十日復接電信曰自三月一日至今日繼續示威運動全國一時奮起我代表者(指本國獨立團代表者)不依武力惟以演說及宣言進行而女子之活動尤爲劇烈敵人工場商店等雇用之韓人現皆罷工吾人之教會學校商店等皆被閉鎖男女被囚者三萬二千人重傷者十萬人其中有老人及婦稚內地運輸及通信杜絕敵人之行動殘虐教會現正以真狀布告天下

四月十一日續電備述日本之蠻虐曰三月二十八日日本開始大虐殺在京城三時間示威運動之際無武裝之韓人被其慘殺者一千人鎗射鞭打鈎刺之殺戮遍施全國教堂學校及首領之家屋均被破壞婦人被赤裸受笞於羣衆之間而首領家族之婦女尤甚其囚者皆加桎梏醫生視察傷者亦被禁止吾人求外國紅十字會急來相助吾人爲自由以最終一人之必戰決心信上帝之保佑也關於此項一切消息已見歐米各報有難枚舉而惟據最近倫敦泰晤士之東京通信卽已足矣同紙十七日號其題目曰韓國之權利而內言曰此獨立運動爲韓人之一致行動者不可不認定也日本政府之增兵方策致輿論之興奮而已依現今輿論撤退軍國主義於韓國而設施民政府之爲可合者不可避之事實也東京日日新聞曰獨立運動之原因由民族自決主義及宣教師之煽動也報知新聞極說韓國政治制度之改良其他新聞雜誌評韓人非常等民族者多矣

廢棄合併條約

(二十)大韓民族要求一九一〇年八月二十二日所締合併條約之永遠廢棄其理由詳述於此請願書及說

明書而尤其重要者如左

(甲)該合併條約以詐欺暴力而締結者故設謂韓國皇帝以一千五百餘萬之人民四千二百餘年之獨立主權的國家有讓渡于日本皇帝之權利而在法律與國際公法已失其有效性矣

(乙)大韓民族及國家否認傀儡韓國皇帝有締結該約之權吾人非獸類知承諾之如何尊重者對此決不予之以承諾也

(丙)該合併條約關於韓日兩國政府之由來條約及他強之條約而侵其主權及領土保全爲國際公法之直接犯也

(丁)在韓日兩國與其他各國間所定多數條約及日本與中國英國俄國所訂各約韓國爲獨立主權國已經明晰承認其政治上獨立及領土保全亦有多數明白保證或某種條約中承認韓國獨立之同時依列強間使用之原則有何一國特別如日本將該條約提出於如今日平和會之國際大會而得其改正之前不敢侵犯而致損韓國之獨立爲其規定也

(戊)現今講和會議依威爾遜大總統之十四個條而調定列國間關係者也一九一八年一月八日大總統在國會朗讀敎書而該書中明確言之曰民族及國民不問強弱在他民族間均享其自由平等之權利受其生存之安寧而予以公平之機會爲解決國際上葛藤之原則云云

夫日本以聯合軍之一不拘此十四個條實行之約日皇之政府乃侵犯於此繼續韓國主權之執行不惟不

待韓民族之允諾而拒逆其意思使用其暴力所以講和會議將合併條約宣言廢棄或報告取消爲其當然之權利及其責任也

(己)吾人依國際公法有可獲得之權利依諸國民訴其苦痛之新原則曾於一世紀間在壓迫分割之下者波蘭復活半世紀間受德國之壓迫者阿爾薩斯羅林回復焉則此正義之原則可以適用於韓國者吾人足以有要求韓國恢復之權利矣日本併吞韓國者十年當歐戰初起與中歐一國要結同盟此日本爲政家特別注意之聯合也故講和會議放置韓國於日本武斷政治之下不可也是則違反於法境戰場數百萬軍士殉於正義之原則也

一九一九年四月日以大韓民國臨時政府之名義責任在韓國國內及中國西伯利布哇合衆國墨西哥之一千八百七十萬之代表及爲正義而俄德單獨講和前參戰於東部戰線之五千名韓人之名義統合此大韓民族及國民之代表新韓青年黨正式代表金奎植署名

第十六章 各方面之呼籲聲

儒教徒呈巴黎和會書

韓國儒林代表郭鍾錫金福漢等一百三十七人謹奉書於巴黎平和會議諸位閣下天覆地載萬物并育於其間大明之照大化之行其道可知已自夫爭奪之覺起而強弱之勢分兼并之權用而大小之形懸以至毒人命而恣其威竊人國而私其有嗚呼天下一何多此也此天之降大仁武於今日奉若天地之心照大明而行大化

一天下而歸之大同俾萬物各遂其性者也於是同仁一視四海咸安而如或有聞風而不獲實德紆寃而不徹公聽者豈諸大位之用心獨於此爾殊哉抑別有以也則其所以瀝血陳腔仰首鳴號者亦出於至痛迫切不容自己之意惟諸大位試察之嗚呼我韓國固天下萬邦之一也域三千里人二十萬維持保全四千有餘年不失爲半島文明之稱亦萬邦之所不能廢也不幸爾來昊天不吊國威不振賊臣內訌強鄰外伺憑其武力挾其私智脅君而鉗民勒成盟約從而攘國土廢天位而無吾韓於世界矣噫日本之所爲概可舉矣爾子之與鄙邦大臣盟于江華也乙未之與清國大官約于馬關也皆以我韓之自主獨立爲永遠之案暨癸卯之宣戰於露國也通牒於列國斷斷以鞏固我韓之獨立爲聲明此萬國之所共悉也曾未幾何機詐百出內脅外欺獨立變而爲保護保護變而爲併合諉之以韓民之情願圖免萬國之公議是不惟無韓於其手分實亦無萬國於其心計也未知萬國羣公其真以日本所爲我韓者爲無傷於公義耶爲不失信於萬國耶鄙邦臣民極知赤手空拳不能自奮以有爲然謳吟永嘆猶早夜於吾國吾民曰尙上天之鑑我大運之好還包羞忍恥艱辛顛倒于茲十年所矣自聞諸大位之設平和大會寡邦人民咸踴躍奮激以爲苟萬國而平和也吾韓亦萬國之一也豈應使之不平不和平既復聞波蘭諸國皆能獨立則又復羣聚呼萬歲曰平和之議已定矣彼何國也我何國也一視之仁亦若是矣天其有時而好還矣諸大位其從此舉其能事矣吾儕其從此有吾國矣吾其卽死而顛乎溝壑白骨且不朽矣莫不睚眦肝肝以袂好音而遷延之頃天又不吊一夜倉卒寡君卽世舉國洶洶痛徹穹壤無地籲寃乃於國葬之日各教各社個人男女猶唱獨立之聲奉慰吾君之靈雖捕縛鞭戮交加於前徒手爭先就死而不悔

此可見冤鬱之衷積久必洩而抑亦諸大位之啟其機而鼓其勇也然而因循歷月尙不見劃然之區處則又且疑且駭嘆寡邦之無由以自達而中間用事者之反覆欺詐有以惑諸大位之視聽也請更有以辨明之天之生物也必有是物之能力小而鱗介昆蟲皆有以自由活動人之自爲人國之自爲國固亦有自人自國之治理能力吾韓雖小環三千里二千萬人歷四千年來其能足當吾韓事者自不乏人初何待隣國之代治哉千里不同風百里不同俗彼謂吾韓之不能獨立而欲以彼國之治理加諸吾韓之風俗則風俗之猝不可變而所謂治理者適足爲成亂之階此其不可行明矣治理之猝不可行而韓民之自爲韓民不惟其疆域風土之已定抑亦所得於天性者然也是以寧屈於一時而受威脅之權而其心則固將歷千萬年而不失爲韓國之民也本心之存焉可誣也心之卒不可以誣而欲用萬國所共廢之威權以壓萬口一辭之公議此於日人未爲得計也鍾錫等山野廢朽猶自爲舊國臣子依先君之遺風從事於儒教之門今當大界維新之日國之有無在此一舉與其無國而生不若有國而死與其自桎於偏陬孰若獻身於公聽並觀之地一以自暴其鬱悒以俟其進退之也顧以海陸迢絕關禁嚴急恐裹足未達而疾呼不聞朝夕之命無逮於穹壤之痛則此世此懷永無望於自暴雖以諸大位之神聖聰明亦安望其必算及於不見不聞幽眇抑鬱之我韓情事哉茲敢以咫尺之書合一部同情之辭具十年生受之實奉便風於天涯萬里之外誠悲劇迫切不知所云惟諸大位憐而察之益恢公判之議使大明之照無不遍大化之行無不順則不惟鍾錫等之無國而有國抑亦道德之幸甚於一世而諸大位之能事畢矣如猶未也鍾錫等寧駢首就死而誓不爲日本之僕隸二十萬命獨不關天地之所育而憾調暢之和氣乎惟諸

大位圖之是時全國儒林因太皇因山集于京城而有各教會之獨立運動於是李中業金昌淑郭大淵金丁鎬權相道等相議曰吾儒林獨後於此耶但茲事體大非有儒林重望之人爲之主持則不可昌淑遂往居昌郡見舊韓臣議政府參贊郭鍾錫議團結儒林派人赴法致書萬國平和大會聲明我舉國一致之義郭曰老夫今日得死所君其勉之昌淑再入京與諸人協商派人各道聯絡儒林而前承旨金福漢派其門人林聲百赴京而力贊之於是昌淑齋書赴滬郵送于巴黎和會既而日人逮郭鍾錫以下一百三十七人投獄郭鍾錫柳必永河龍濟金福漢等俱死獄中其他諸人或刑死或處役而昌淑之妻子被拘囚多月

女學生呈巴黎和會書

巴黎和會人員刻方注意改正人類之正義與權利我輩韓國兒童謹於上帝之前竭誠籲請君等有以扶掖而安撫之我輩不幸以女子身受可羞之待遇迭遭侮辱我人將向誰呼籲以伸冤抑乎我人將向何處乞助乎我人雖望空呼號然而見憐者誰乎刻聞各地之人皆要求自由故我韓國人民男女兒童亦皆起而宣布我人所受之壓制呼籲韓國之獨立矣乃我人竟遭毆擊受監禁被唾罵或被刀斫或被鉤傷或爲刺刀所穿或爲拽髮而行我人房屋多遭毀壞是無正誼亦無人道也我人於禮拜日不得赴教堂集會我人住居國內常被詰問是否爲基督教徒若答曰是卽遭毆打箠擊被殺者蓋已多矣然而我人不抵抗也但舉兩手向天爲國呼籲以求自由與權利而已諸君乎諸君乎亦將憐憫我人而承認韓國之獨立乎諸君亦將阻止日本此種慘酷之虐政

與不公平之待遇乎我人雖知此函或未必能達和平會議然而必有得見者亦將爲我人之慘痛所感動而以
此語之乎我人所作之函或不免於多所錯誤有類小兒所爲乞諸君諒之蓋我人既無權力而又無可告訴我
人惟信賴上帝必能感動君等俯聆我人之言而已有謂我國人民有不能忍受日本現在及過去之暴虐者亦
嘗署名于紙請求日韓合併實則此事非確乃日本之誘計耳大美國總統威爾遜君乎我人視君如父請一聆
我人之獨立宣言而告諸世界各國此我人所切禱者也

元老大臣金允植李容植致總督長谷川書

道貴隨時政在安民故勿論何法則而有實際上活用之時則可謂好法則矣勿論何行政而能保人民平和
之時則可謂好行政矣若其法不適於時機則無可謂實際上適用法矣若其政不保人民之安寧則無可謂好
政府矣日本併合韓國後十年間行政結果非賜韓民以平和者也今爲獨立一呼萬歲全國響應匹婦小兒舉
手熱唱莫不決死爲獨立之戰何故此幾年間受不公正之苦楚者爲心中之結核應此時機而潰出湯湯洪水
溢于黃海懷襄之勢莫能禦之此人心之趨嚮天命之指導也然則當局要鎮壓此運動有二種方針一高壓也
一融和也若以溫和注意有不能即平騷擾之慮則必取酷毒殘暴手段然酷毒殘暴手段適以激起獨立黨之
惡憾增加獨立黨之數而已蓋盡殺獨立黨則到底不可能之事故酷毒手段亦不能解決此問題矣今獨立黨
惟以反正既失之權利得脫奴隸之束縛爲其至願也彼等之兵器但空拳而已寸舌而已欲脫不公之壓迫而

無何等暴行者事實也苟有慈愛之心者孰不表其深情乎今無數良民被捕溢獄受非人道之惡刑死者甚多加以亂砲射殺人民積尸成山而獨立運動漸益蔓延處處蜂起此豈偶然之事哉苟非理解其根本的原因則酷毒手段溫^也和注意悉歸烏有者可以確證也假使盡殺示威運動之主謀者而其肉體雖死其精神永存不滅人人心田深根固着人人自家暗呼獨立萬歲能悉索盡殺乎人命至貴至重不可以草芥待遇也孟子告齊宣王曰取之而燕民悅則取之而不悅則勿取而齊宣王竟於他日後悔者以不採孟子之言也爾之奴隸金允植李容植生丁否連又當末齡合併之日受日本之爵位面目羞恥何敢開口論事哉然今見無罪之子女陷於水火不能沈默我等之爲爾奴隸者亦於寢室恒呼大韓獨立萬歲矣我等處下位階級其言雖無採用之價值而亦吐心披膽之真情忠告也惟閣下將此請願上奏天皇協議內閣焉現獨立問題非可以勸告及命令而解決者又非可以兵力解決者極好方針惟有順天命從人心以公式承認韓國之獨立以至公無私之政策表示世界通知于各條約締結國是也吾儕確信各條約締結國必歡喜承認韓國之獨立苟如是也日食之黑暗影子更復而公義瑞光投射宇宙矣孰不對於日本而譟揚欽慕哉吾儕年老衰弱閉門不出對世界上活動而無參涉之餘力然若此勸告之爲採用者數千萬生靈共享其福否則吾儕必受惡刑者亦所確知也爲吾族屬企圖其生活而卽死何悔老而臨死言不知哉云云

趙衡均文一平等十一人致長谷川書

余等謹掬誠上請願書三月一日之宣言書雖只由代表三十三人簽名實基於全韓國民之心理余等知上帝必嘉納此宣言也余等繼此三十三人而起僉表二十萬韓人發表獨立之志願閣下確認余等非過去時代表之韓人乃新世紀之韓人而了然思新時代之潮流與文明之進路者也文明促進吾人抱此思想故韓國獨立之呼籲與人道相符合與時勢相並行與上帝之命相倚此吾人之所深願也閣下亦知韓國獨立之實關係東亞之和平當韓國被合併時屢次宣言於世界者不曾云韓國國防不足為鄰國之魚肉即因此為亞洲之障礙乎此實日本合併韓國之惟一策也願閣下於此加之意今也新世紀已推倒武力主義而建立人道真理之主治勢力之說已去而平和與真理在吾人之前然乎否乎閣下請聽余等之言余等韓民非欲以武力恢復國家自由訴之於人道此吾韓國獨立宣言之所以為正當遠東之平和全視韓國獨立之成否請以此問中國問俄國問世界誰不曰然閣下仁且智無以請願為輕率舉動而徒加阻遏也余等有二十萬之韓人在為後援以其志願為余等目的與要求之後勤余等無所恃於絲毫之武力但深信正義人道必求到達而後已若閣下以武力制抑余等所持之正義人道雖暫時不得伸獨不能污點於閣下之良心且辱及日本之名譽乎願閣下慎思之

僧侶聯合大會宣言書

吾等七千餘韓人僧侶敬於二十萬同胞及世界萬國之前宣言吾等絕對排斥在韓國之日本統治與主張大韓民國之獨立

佛法宗旨在平等與慈悲反於此者皆佛法之敵也而日本不拘自稱尊崇佛法竟耽溺於前世紀遺物之侵略主義軍國主義頻出無名之師攪亂人類平和甚至恃其強暴侵犯身受教化恩惠之鄰邦滅其國奪其自由虐其民致令二千萬生靈悲聲登於道塗矣自今年三月一日以來大韓民族以極平和之手段行極正當之要求乃日本益肆行暴虐慘殺數萬無辜之男女嗚呼日本之罪惡極於斯矣吾等已不能再守沈默袖手而傍觀之頃由全民族代表三十三人發表獨立宣言時我等佛教徒中有白龍城韓龍雲兩氏曾參加其役此後我佛徒中獻身輸財奔走於獨立運動者實不乏其人而日本並不懺悔前過益且增設軍警以施壓迫政策並於一面以不正之手段驅嚇無賴以欲增加其種種罪惡與二千萬生靈之苦惱今我等忍無可忍夫當不義而壓正義蒼生苦於塗炭之時仗劍而起有所對抗此我歷代古祖諸德之遺風也矧生爲大韓國民之我等哉願我佛之入韓土於今已二千年中至李朝雖不免若干壓迫歷代朝家莫不崇師而擁護之其發達之隆盛冠絕世界佛教史上導入彼日本人於佛陀之慈悲中者亦我大韓佛教也當壬辰之役與其他一旦危急之秋諸祖師比丘犧牲身命以擁護國家此歷史所昭示而實爲國民盡其對國家之義務蓋以國家與佛教之因緣甚深也日本以強暴詭譎之手段合併韓國以來全然蔑視韓國歷史與民族的傳統及文化而欲以日本化政策與壓迫政策全滅韓人種我佛教亦爲其毒手之犧牲於強制之日本化及苛酷之法令之束縛下喪失二千年來由國家保護所享得之自由致令特有歷代祖師之遺風與有榮施之大韓佛教行將陷於湮沒滅絕之慘境國民今已起矣我等韓人之七千餘僧侶以大韓之國民爲完成大韓國家之自由與獨立且爲救出二千年有

榮光歷史之大韓佛教於日本化及滅絕而結束共起矣夫此矢死報國之發願與重義輕生之義氣孰能沮止
遇住業經一次結束奮起之我等於獻修大願成就之大齋以前惟有前進而血戰哉

韓國耶穌教代表金秉祚孫貞道等告中國耶穌教會書

基督真理光溢四表環球人類卽勿論種族殊異勿限邦國畛域勿拘文野差別得聞福音大道皆旋踵於死亡
之坑日趨於生命之途者難以悉計矣我韓僻在東亞一隅自歐美來傳福音較遲各國之後距今三十餘年前
英美宣教師涉重洋冒萬險傳播吾主之真理使久處陰翳之人民覩真光而得救者計以百萬則偏彼上帝之
厚眷亦足以自詡於列邦矣在昔暗昧時代基督信徒往往有遭壓迫可質於史冊迨今二十世紀信教自由爲
確乎一定之鐵案則號稱文明之國悍然敢肆蠻行乃絕無僅有之事也噫彼島夷小醜世爲我讎交聘久絕一
自開關通商以後修使相問忘舊日之惡敗將來之新好以其忝在鄰壤有輔車唇齒之勢故也彼所謂古代文
明何莫非我出而以其吸收西歐之文化差早於我巍然自處以東洋之霸主哉我無備利我衰微煽弄權奸甘
言以誘之逞強以脅之全國利源如礦山鐵路森林漁採無一不爲彼所占其壑欲尙此無厭若通信若警察若
外交次第占據隨以解散軍隊使我莫能措其手足然後遂至於併合則其聲明各國保證我韓獨立只爲欺瞞
列強之狡滑手段而勒成七條五條之約朝盟夕改顯無信義貴邦人士亦已諒解矣當併合之初其宣言中信
教自由一條只不過紙上空文而由來十年之間嫉視韓國基督教會日甚一日其壓迫政策愈出愈幻或與誣
獄株連教會內教役者教育家慈善家青年學生三四百人用前古所無之淫刑鍛鍊成獄死亡過半經年未決

或取締宗教學校使日人監視教科及教授毫無自由種種以陰譎之手段沮戲壓迫撤廢宗教學校爲政策上唯一之目的或制定布教規則傳道集會講說一切拘束使韓國教會期欲撲滅則彼之設心做計誠極巧且毒矣

今年三月一日自韓國京城獨立宣言以來全國響應以至海外僑民亦同聲而奮起其首腦之人物卽基督教儒教佛教天道教等各團體首領也此輩爲國民之先覺深切感觸獨立自主之爲必要不忍見二千萬無辜生靈以陷於塗炭供其魚肉故乃率先宣言獨立也是盡個人之責任履行爲國民一分子之義務決非基督教會個體獨爲倡施也彼日人以此爲撲滅教會之一機會首先囑彼機關報指斥基督教爲邪教且謂獨立運動乃教會所主倡使憲兵警吏撥銃騎馬一如臨敵橫行各郡肆行虐殺少無顧忌其迫害之事實殆有過於古昔羅馬時代尼魯皇之所爲當二十世紀今日此等蠻行非夢想所料而自許以東洋先進國之日本敢行此非人道的殘行對手無寸鐵之人民毒彈長劍任意射擊所過無不殘滅死傷過十餘萬人拘繫於牢狴者爲三十餘萬人日以拷掠求死而不得死其慘忍景况雖木石亦感動豈圖此等無理之殘酷生於文明今日之世耶各國報紙概有所傳不能寫其真狀之萬一彼日人則亦指以誣報故茲錄其一二以證之

四月十日日憲兵中尉率兵一隊來到水原郡堤岩里有所訓示會集人民於教會堂卽爲封鎖使軍兵包圍射擊無一逃生仍以放火邨落爲丘墟家屋燒失爲千餘戶人民死傷爲三四百人流離失所者爲五六千人若婦女幼孩肆行刺殺其殘忍慘毒有非筆舌所罄孤兒寡婦奔竄山谷之間風餐露宿棲屑彷徨哭聲徹天不爲凍

餓而死者幾希矣四月十七日日憲兵又到水原郡狩川里放火教會堂因焚燒附近民家數百戶若男女老幼或自火燭中欲有逃生者卽爲射擊哀無辜宛轉相抱就死於火焰之中間有得存其生命者貯蓄一空將何以謀生兼又農務方殷東疇西郊雖有耕作之施設彼無人道之日警從以禁遏百里一帶成爲草萊人烟已絕矣且定州郡示威獨立運動之日日兵猝到肆行射擊死傷爲五六百人教會堂及學校全部入於灰燼之中撤毀家屋數十戶使老弱流離失所有一醫士施療於被創垂斃者因以破壞其病院同郡五山學校彼無道日兵亦爲放火全校器具付之一炬其近教會堂亦爲燒却一無子遺慘不可忍言也至若宣川平壤義州甌山江西釜山孟山朔州谷山全州益山咸興安東元山清州晉州密陽南原等各郡或焚燒教會堂及學校或射擊人民或刦辱婦女或強奪財產種種暴虐手段如出一轍其餘全國內窮鄉僻村無處不當其慘毒之禍雖連編累牘不能盡其慘酷之狀也天平冤哉我韓人民有何餘孽遭此歷史上所無之酷禍也教徒等妻子流離兄弟就囚同胞或死於銃劍或亡於桎梏義當同死頑而逃命非惜此區區之一縷耳環半島三千里山河成無底之深坑驅無辜二千萬人民盡入於其中慘絕悲迫之狀無以暴白於天下故萬里間關來寓滬上舉此事實紹介於歐米之各報館今以罄陳於中國教會各位兄弟姊妹已於一主之內同受一洗則雖在異洲異族亦表同情之淚況同文同族素有痛癢之關哉唯願鑑此苦衷同聲切禱於全能之主救此濱死得享自由幸福血祝不已願吾主基督之豐恩上帝之深愛聖靈之感化恒與共在

第十七章 各國人之同意

中國人之請認韓國獨立

四月五日中國廣東省國民議會康基鎬等三百三十一人以承認韓國獨立勸告北京政府電報于巴黎專使請將此重要問題慎重勘辦其概曰

中國依往時條約承認韓國獨立固明確矣韓日合併決非以公式承認者韓國將來與中國有多大關係孫逸仙曰韓國東洋之巴爾幹此問題解決之前永久的平和不能來也日本之對中國政策如二十餘年前朝鮮黨禍之始作矣滿洲蒙古山東揚子江流域之將來皆與韓國問題有密接之關係此重要問題也韓國極讚中國欲脫日本之壓服的支配若韓國問題爲巴黎之舉論者中國庶幾有望矣不然則中國之危殆不遠矣東洋之將來尤極暗澹矣若當今日而世界許持續其壓迫韓國者所謂條約也盟約也不足爲信賴矣故依前日之中日條約承認韓國獨立有再次肯定者云云且提四種理由而論之

一韓國問題有世界恒久和平之關係如白耳義之殘虐待遇招致世界戰爭若對韓國而繼續其暴待則因此而將來東洋起世界的戰爭非可知者乎

二韓國之今日境遇因不忠實之條約而成者若巴黎會議許持續韓國之今日現狀者將來條約勿論如何併無價值矣

三韓國問題卽人類問題若韓國之數千萬民族續受如此之侮辱待遇則新世界之精神安在乎

四韓國問題與中國有絕大關係中國數千年間與韓國原有密接關係今彼二千萬民族之權利爲日本之永遠無視者滿洲蒙古山東爲其延情中國四億萬民族在共同之危地矣韓國民族古代民族之一文明民族之一聰明不下於日本民族請問對於平和會議而知彼等之聲叫切論與活動乎

爲韓國近事正告國人

景梅九

馬關會議日人要我確認朝鮮之獨立經兩方認可載在約章之首條朝鮮因之改稱大韓帝國列強皆予以承認日俄之役日人猶以確保韓國獨立爲宣言不意勝俄之後竟以武力挾制韓皇取消自主之特權歸其保護卒成韓日合併之局顯然背約食言置公理公法於不顧當時我國及列強未能提出抗議實爲國際之大辱自合併後日人虐待韓人極無人理韓人不堪其酷烈相率去國至於遼東之野願受塵爲氓者歲以萬計在吾人視之皆顛連無告之兄弟也邇者歐戰旣罷公理用彰美總統提倡民族自決之議以促進世界之和平愛爾蘭完全獨立菲律賓要求自治波蘭新建民國猶太謀復故邦於是久呻吟於日本虐政下之韓人聞風奮起聯合大羣共懸義幟以極文明極壯烈之舉動宣布獨立昭告友邦冀復宗土起義以來三韓之志士義民爲日本野蠻警吏捕殺凌辱禁錮者日有所聞而全體始終堅持會無屈撓之態旬日之間血潮瀰滿於八道其事可矜亦可敬也居遼韓人遠聞義警紛起援應固情理之當然者奈何竟有吉林延吉屬警兵鎗殺韓國義士十數人之慘劇而吉林官吏熟視若無覩者是何心肺腑眞令人無從忖度矣夫中韓爲唇齒之邦日人之併韓也豈固不獨

在韓觀其併韓，亟亟焉築成鴨綠江之鐵橋，直伸展兵力於我東土，志在包舉滿蒙，以遂其吞並中原爲東亞主之野謀。誠如韓人宣言中所謂：中華人民夢寐不忘之恐怖也。今使韓人一旦恢復自主之權，則日人必將翻然改圖，不敢復以亡人國家滅人種族爲國是。而亞東問題，自爾迎刃立解。予嘗謂韓人此舉，直接利韓間接利我，並利及亞東全局。而對世界和平之前途，亦與以莫大之影響。是以西人靡不深表同情，遙爲贊助。而我東省官吏，既充耳於韓人之泣籲，不能慨賦同仇，已有忝於舊德，乃復縱容警兵鎗殺義士，是何爲者？嗚呼！我中華國民，素以富義俠心聞於世界。今竟昧扶弱抑強之大義，而甘爲強國之狗馬，以侵乘弱邦。斯實中華民國全體之羞也。已中情激憤，不能自己，因寫此篇，正告國人曰：韓國具有四千餘年之文明歷史，八萬餘方哩之肥饒土地，二千餘萬之愷悌國民，其獨立之資格與自治之能力，皆於今回義舉暴露於世界。已博得友邦國民大多數之同情，多爲之仗義執言，深願我國人自今以往，對於可矜可敬之三韓同胞，亦各勉盡扶持援助之責。庶幾稍盡蠻蠻之前愆，一平義民之公憤，俾韓國早日恢復獨立之原狀，於東亞建立第二共和國，不惟韓國國民之幸，我中華四百兆人亦與有榮焉。

各界聯合會援助韓人通電全國

全國各界聯合會評議會由呂志伊提出援助韓人議案，全體通過，發表通告國人書，詳述援助韓人之理由，由國人猛省其書如下：

全國父老兄弟諸姊妹均鑒：朝鮮倡言獨立迄今兩載矣，其再接再厲百折不回之血誠，固已負絕古今轟動

萬國以故歐美輿論極表贊同近聞國際會議亦有以朝鮮獨立作議案之說世人對朝鮮問題之研究可謂已甚囂塵上矣乃吾中華民國之國民自去歲三月以來冷靜寂寞對此昔日同隸一版圖之同胞鮮有主張正義協力援助者吾民族以當仁不讓見義勇爲見稱於世與朝鮮又義關唇齒暫屬兄弟當此民族自決之新潮震撼寰宇凡爲異族壓制之國民莫不乘此機緣奮其天賦之本能以爭人類應有之自由幸福韓人獨立亦緣此千載一時之機會其勢莫可壓抑其事終必實現凡有理性均予樂助吾國人若猶不同心協力擁護公理人道以贊助三韓同胞之義舉微特吾民族之奇恥大辱抑又自陷於滅亡之危道也謹就吾民對於朝鮮獨立應積極援助之理由撮舉如左

(一)中日條約之關係 甲午中日之役日本宣言曰爲完成朝鮮之獨立甲辰日俄之役日本宣言曰保存朝鮮之獨立而中日馬關之約其開宗明義第一條卽爲確認朝鮮爲完全無缺之獨立國信誓旦旦中外咸知嗣後強迫合併對於朝鮮爲不義對於中國爲違約對於世界各國爲失信其合併條約在國際上當然不生效力故以中日條約及日本信義言急應共認朝鮮之獨立

(二)人道主義之關係 自歐戰告終威爾遜總統民族自決之宣言風動全球歐和大會開幕後遂產出斯拉夫族許多共和國此種民族均夙昔受異族之逼迫不克自由者也甚至對波蘭亦復國對猶太亦允其重新立國此種興滅繼絕之精神均本人道而宣洩夫對於瓜分或覆亡代遠年湮之國亦本此人道主義而力助其立國豈對此爲強鄰鯨吞僅十餘年其全國上下受日本之荼毒忍無可忍舍身以謀獨立之朝鮮民族而獨忍作

壁上觀耶故以人道主義言亦應促朝鮮獨立實現

(三)世界和平之關係 中日俄兩戰役均以朝鮮事件爲導線今韓人崛起歐美動倘不令朝鮮爲今日之瑞士比利時則他日之朝鮮或不免爲前年之塞爾維亞若一隅發難牽動亞洲大局擾及世界和平證諸日俄日德諸戰爭受禍者又在吾國也故欲維東亞之安寧免世界之大亂尤當力主朝鮮獨立

(四)朝鮮民族之關係 朝鮮爲日本併吞含垢忍辱嘗膽臥薪十年於茲矣幸值公理昌明之際急圖真正人權之恢復而通都大邑窮鄉僻壤均徒手呼號以赤誠爲白刃遇日本則懼怒不形於色一往無前甘死如飴其舉動之文明爲亘古所未聞其堅忍不拔兩年來如一日在革命史上洵足開一新紀元矣回溯其獨立宣言猶不責日木之無信不罪日本之不義而曰「責勵自己未遑尤怨他人急於圖救將來未遑懷仇夙昔實以建設己國爲務不敢以破壞他人爲能本悲苦之生涯開維新之運會理性作用非感情作用」其愴惻不忍卒讀其誠懇令人心折而以證諸事實又若合符節是真泱泱大國民之氣度亦不逾正義人道範圍之確證也威爾遜所謂民族自決者第一在有自覺第二在有自治力今朝鮮人之舉動其自覺心爲何如其自治力爲何如故以朝鮮人本身言其獨立已有充分之理由

(五)中韓利害之關係 朝鮮爲檀箕故邦原與中國血統數千年之歷史與中國均有深刻之關係甲午而後吾國與日本雙方既認其獨立其向來對吾國之貢獻典禮及凡有礙於獨立者始廢除之乃不二十年竟併於日吾民回首前塵胡能愜置且朝鮮與滿洲僅隔鴨綠一江與山東半島隔黃海相望故自來朝鮮有事必牽動

滿洲滿洲有事必影響蒙古及關內日人併韓後已蚕食滿洲動搖蒙古今且經略山東又狡焉思逞於黃河流域叻禹域不自拯救行將爲朝鮮之續矣向使朝鮮仍維獨立則日欲逞野心於中國如明時壬辰之故事假道於韓亦不可得他何論哉此吾民與韓人所以同病相憐又抱無窮之感慨也故以地理歷史種族及人民之感情言並以自衛自保利害之關係言尤不能不表極端之同情於朝鮮獨立也

總之吾民對朝鮮獨立均有援助之必要且有積極援助之義務須知朝鮮獨立非排日問題乃生存問題非朝鮮一部問題乃東亞及全世界之問題當此正義人道之聲浪瀾漫寰球即使朝鮮在歐美與中國素無關係吾民亦不能不本良知主張公道況有上述之種種切實理由乃竟自安緘默甘同寒蟬吾四千餘年之文明上國無乃自外於主持正義人道之人羣乎敢請全國父老兄弟等對朝鮮獨立事一致主張或著論鼓吹或奔走呼號或陳請於國際聯盟會議或力陳於駐華各公使務使世人公認朝鮮之獨立且力促其實行以除遠東禍亂之源植世界和平之基礎促人類平等之實現則受其賜者當不僅三韓民衆東亞與全世界之前途實利賴之中華民國全國各界聯合會謹白

孫中山唐少川之外交主張

▲以扶持韓人獨立爲第一事

上海通信社記者訪孫中山先生談起山東問題之救濟法孫君稱該問題余（孫君自稱）始終未嘗表示何等之意見惟現下照余個人觀察所得則此時似不必用獅子搏兔之全力盡注於該問題之上實應將目光放遠

一步專行注力於滿洲高麗兩方面其第一步辦法應先要求恢復馬關條約扶持韓人獨立以緩其衝第二步辦法要求取消二十一條賣國條約以鋤其擻取山東之根因養成今日之局勢者皆此二十一條中承繼山東德人權利一條有以釀成之也該兩步辦法如能辦到則吾國藩籬已固山東問題亦即可以連帶解決故余意目下殊可不必汲汲於山東一隅之問題也記者曰兩步辦法極佳惟如何實施之法可得聞乎孫君曰目下似宜先行造成一種強固之輿論以博各國之同情後日列強如有大半表同情於吾然後再定實施之法或直接向日本要求或提交國際聯盟會公判公道自在人心勝算卽不難預卜云

又山東外交協會職員於十月二十六日往訪唐少川叩以對於魯案之意見唐君謂此次聯盟會議英法日居重心提交恐不易達目的且吾人須擴大範圍爲東亞永久和平着想不宜僅爲局部提案蓋局部提案予各國人利己之誚未免目光大小苟爲東亞全部計則扶助朝鮮獨立最爲必要因朝鮮獨立則中日間一切糾紛均可解決不特山東一隅已也云

美國人之大韓獨立後援會

徐博士載弼在美洲之費府與美國諸名士組織大韓獨立後援會宣言如左

韓國過去四千年間享有絕對獨立而萬國承認韓國之完全主權

韓國有長久之歷史特殊之言語文學文明及標準的道德之國家也約四十年前韓國與外國開始通商世界列強均與韓國締結條約承認韓國之獨立且各國締結修好條約表示友誼美國一八八二年締結韓美條約

若有他國加壓迫於韓國者及爲正當行動之時則必爲援助者堅有誓約矣韓國迎接美國宣教師盡其諸般禮節現今各國各教會派遣宣教師于韓國者合男女至三百人以上而各宣教師之勞心結果過去二十年間基督教徒達於百萬而天道教徒約二百萬矣一千九百十年日本以不法手段侵害韓國主權勒行合併而合併後日本對於韓國人民恣行其不義悖道之行動矣

去三月一日全韓國人奮起宣言獨立組織共和政府參列者之多數爲基督教徒之具有高尚性格及學識者也

吾等欲公佈此事情者非但爲韓國而併信其爲美國之幸福且信其爲韓國之親舊矣弱者與強者併有生存權而弱者亦有自由發展之權利此主義依美國而日後益以維持者亦吾等所信也

若輕視此主義之日也則必有第二次軍國主義對民本主義而發生戰禍矣然故當此危險於目前者吾等美國人組織一團體有防止此等危險而以仁愛與正義傳播世界之義務矣當此世界改造之黎明時期吾等之急務在於喚起美國輿論擁護極東之民本主義也吾等對於韓國日本中國問題不願容喙於政治上而爲人道及基督教而有關於道德上之義務也美國輿論不可不以偉大主義表其共鳴若認此爲等閒則吾等爲回避其義務者故也

目的

一 本會以援助韓國之自由獨立爲目的

二 本會以保韓國基督教徒之信教自由爲目的

三 本會以永久防止韓人所受之日人惡刑爲目的

四 本會以傳播韓國之真相于美國之一般公衆爲目的

於是該會之支部設立于紐約、華盛頓其他各都會者日形發展諸名士之有力者多以會員誠心贊成而前西伯利出征軍司令官陸軍大佐裴婁宇斯亦其一也會員之演論韓國問題屢登報紙而今不盡錄頃接徐載弼書信以爲若繼以一年之進行則全美人士悉爲吾人之親友云

徐載弼之夫人美國女士也爲韓國獨立大發願力合婦女界之有力者爲一團與後援會一致而印出祈禱文萬部散佈各教堂以每日祈禱韓國獨立又有一婦人雄辯家也曾遊歷韓國觀日人虐待之狀大發悲憫遂獻身於韓國獨立遍行美國各都會激昂演說喚起公憤聯合婦人會提出請願于巴黎和會求認韓國獨立

在韓美國宣教師致威總統書

余以美國一個公民資格關於朝鮮獨立事實致陳于總統及美政府人民據四月四日巴黎電謂和會將不許朝鮮問題之提議以我總統竭力主張之民族自決主義適用於歐洲民族以戰事關係而被其壓迫者云余極疑此說之不可信矣頃接電信自和會聽受朝鮮人之呼籲云實獲我心矣巴黎和會之態度勿論如何我總統及美國人民愛自由與正義無異生命對於韓人之陷溺於水深火熱之中而決無不顧之理矣總統以三月三日寄書于裴律濱獨立請願團云使小民族前進安穩爲和會重要事件余認此義必適用於韓國矣余寓居遠

東多年在朝鮮日本兩地能解日語韓語者也當韓人獨立運動時余適在韓國目覩一切情形與韓人交談洞悉韓國之實相者多全國各地獨立運動之進行一月有餘尙無止息之狀況蓋韓人此舉極表其材能與勇敢之組織令人驚異日人之處理此事極其野蠻殘酷毫無情理者屢次顯著非余親見難以准信也蓋韓人之運動純以和平的抵抗其所對付者宜如何審慎小心而乃日本官員與兵士等行動無異於無法律之蠻人也捕縛老人幼兒加以兇毆一般婦人與女學生至僅十歲之幼女均被侮辱可恥可痛莫可形言又加身體上酷刑彼其罪名不過手執紙製國旗高唱萬歲和平表示愛國熱心籲求日本莊嚴保證朝鮮之獨立而已三月一日以來目覩朝鮮全國之如此事情者有牧師教師及數十人之公眼而被日人百方設法不知其真相也頃得一報告在某城之教士大受日人之迫辱倘或教士再有傳出則即被其驅逐云此間有一美國人被捕下獄又余所目覩也略記日人之虐行如左

- 一 學校小學生被日兵之打倒痛毆殘酷達於極度
- 二 對婦女之呼萬歲者發鎗轟擊
- 三 十歲之幼童背部被鎗擊致死
- 四 六十五歲之老人初無抵抗之事而日兵加以交打亂槍
- 五 女學生二十餘人由公共道路安然以行而日兵追趕以鎗擊之以足踢之其暴虐無道令觀者血沸
- 六 日本消防隊持長鐵鈎追擊男女幼童

七 一韓人以麻木症病臥醫院而日兵以鐵鈎打破頭部

八 日兵對重傷幾死之男女鎗擊背部

九 韓人二名被重傷不能行動而縛載板車擲入獄中

十 韓人約百名被日兵毆打衣之全體盡裂汚血遍身而細縛以繩投入獄中

十一 初不參預於運動而傍觀者皆被日人亂打

十二 美國教士在自己住宅向外觀望亦被逮捕

十三 對於婦女以槍打倒踢入溝中

以上所列不過略舉數端而已其餘他人所見尙多尤惡之事今日本代表方在和會論人道正義與種族平等而在韓國之舉動如此自其警察署及獄中所行之私刑尤極黑暗懸人於十字架亂行毆打亦曾見之此等酷刑爲何而設乎韓人併無暴動與抵抗不帶兇器而呼籲獨立運動紙旗而已日人以捕風捉影查講獨立運動之結果乃謂教師之發起日人偵探均著韓服潛入韓人會集之所使韓人奸詐入外人住宅勒行搜索而捕去余家之廚夫與韓人書記種種詰問加以毆擊使韓人之爲獸教者作其爪牙彼若無可報之事則輒爲誣報無辜之被捕者亦多警察署則以先毆打而後訊問爲恒例日本之威力顯著基督教徒之受辱尤重獨立運動之倡起以後余視察數處日人之非法暴行如出一轍韓人牧師有言曰吾輩亦人而日人打我如牛羊是可忍乎韓人爲和平的運動而日人以野蠻的手段加以刺激目下韓人忍無可

忍一切形勢不遑顧及矣以後形勢之如何不能預言而目下形勢決不可長久任置使人人受其影響卽其事實也

美國宗教界及教育界之同情

五月十九日美國芝嘉古監理教特開牧師會爲救韓國慘狀決議提出請願于政府以委員長奇麟牧師之名義發宣布文現今韓國之慘酷情形歷史上初見之事也彼屠戮韓國甚於壓迫阿瑪利亞之國逼迫耶穌教用獨逸之暴虐者也三千教會有三十七萬教徒而日本以殘酷手段燒燬教會學校捕縛傳道師教師婦人兒童等加以惡刑殺戮據芝嘉古長老教會宣教師書記四月通信則致死者及濱死者之數達於萬人以上此美國政府之所已洞悉者也吾人爲保護韓國民族之自由與生命及公義對我國政府勸告其使用可能的諸般權力可也

同地長老教會亦會集決議如左

現今日本對於韓國教會加以空前絕後之逼迫無所不動矣韓國耶穌教會實有可驚之長就以其公義之感化力與高等文明驚動日本之奸譎政治家故彼等之壓迫教會絕無餘地燒燬教堂學校亂打教役者加以惡刑屠戮野蠻的行動尤甚於獨逸之行於白耳義者故我等決議以至誠祈禱上帝從耶穌救世之義爲忠良之韓人提出抗議書經由政府使日本當局絕棄其野蠻政策且以決議案藏置于長老教會圖書館可也

六月十四日美國美少利州烏克羅馬州策斯少州婁伊斯亞羅州金沙斯州等五大學代表者會集于美少利

州基督青年會館相議爲韓國獨立提出請願書

既又自美少利州巴克大學韓友會講定決議案提呈于大總統及上議院外交委員長美少利州選出上議員

美少利區域代議員

決議案

- 一 吾等對於韓國情形至何等強硬反抗而不能默見者以害於美洲人民之名譽爲大故
- 二 政府之最大義務在世界何處必保護公民則在遠東美國公民之權利絕對保護事
- 三 政府以如何方法對於日本之反對軍力派當然勸獎事
- 四 韓國人民之政治上獨立思想得美國人民之同情及援助有絕對的價值則當然援助事

決議之理由

- 一 日本人壓迫韓國人全乏人道之待遇之能力韓人絕對排斥日人故
- 二 日人妨害耶穌教宣敎事業毀破數多教會故
- 三 日本無教育韓人之誠意故
- 四 韓國內諸般法律事件以韓人不能了解之日語裁判故
- 五 日人輸入娼妓及鴉片於韓國內者無數破壞人民之道德故
- 六 韓人爲自國之天權獨立行平和的示威運動而日人砲射之火燒之劍擊之槍刺之棒打之殺戮五萬

以上之無罪韓人故

美領夏威夷農主等之同意

先是日本勞動者在美領夏威夷傭作於美人農庄者殆十萬人自吾族獨立運動以後該農主等特予韓人以同意排斥日人改用韓人予以三四倍之雇金且謂之曰爾等自決獨立主義何不以韓字英字發行報紙宣傳內外耶即以印機及資金助之即今發行之韓美報是也

俄國民黨之聲言援我獨立

自俄人之佔西伯利而與我國北境爲鄰國際上已有密接關係而民族携手尤爲暱近蓋自七八十年來吾族之移住俄境從事勞動者逐歲增加達至五十餘萬而同井接屋生活與共於是吾族之青年有入學修業而占高等學位者有爲官吏及軍人而服務者至歐洲大戰而從軍同袍者七千餘人矣然而在俄帝制時代不許吾族之自由教育及書籍之輸入而但課以俄語俄文爲其順僕而已乃自民黨革命推翻專制改建共和以後對於吾族除軍事外交外併許政治教育言論之自由於是吾族之集會設校辦報等事業稍稍發生矣且該黨之廣義主旨不限於一國家一民族而期使全球人類歸於大同平等故認日本爲人道之公敵而憐吾族之被人羈絆思有以脫之第力有未逮耳至是吾族以徒手奮呼獨立而俄民全體均表同意聲言援我獨立矣今年四月二十五日列寧之五十誕辰也吾國革命黨代表朴鎮淳與中國勞動黨中央執行委員日本革命黨代表同陳祝賀而鎮淳爲俄國師範學校畢業生而年今二十五歲云

五月頃接莫斯電報謂近聞朝鮮代表李永福與勞農代表在瑞士會見磋商互相協助各問題其議決之條件共有四項(一)勞農政府對於朝鮮之獨立運動應予以相當之援助倘能恢復其獨立國家建設新政府勞農政府並予以首先承認(二)朝鮮與勞農政府當另訂攻守同盟條約共禦日軍行動(三)朝鮮所需軍械糧食均應由俄分部接濟並予酌量供給臨時所需各項物品(四)朝鮮軍隊當由俄軍官指揮惟軍權應屬朝鮮司令部主管云云

此條揭于中國某報而未有直接通信尙難徵實惟全俄人民之同情于我則確信之事實也

英國議員之韓國友人公會

英國下院議員紐約門爵士等四十餘人組織韓國友人公會期扶助韓國得達其自主而由泰晤士報記者麥聖西之提倡也往在丁未之歲吾執大韓每日報之役麥君委訪曰吾等雖東西洋之各產而宜有同業者之情也因偕拓影而別且赴我關東地方察義兵情況云時麥君有韓國慘劇之著以公佈之至一百二十八人大獄之與也麥君詳述日人不法虐刑之情揭之泰晤士報今回獨立運動之起也又著一書曰爲自由戰爭之韓國而大博公衆之歡迎矣

法京人權會之韓國問題

在法京巴黎之韓國宣傳團以今年一月八日請邀巴黎大學教授歐樂發起人權保護會開講演于地理學會場宣傳委員長黃玃煥(韓人)華工工會書記夏雷(華人)巴黎大學助教教授沙萊(法人)法國下議院議員穆

位等演說以遠東和平之受壓問題參會者約千餘人而大半法國人其次爲中國韓國人而亦有日本人之參者韓法國旗交揭臺上有法國婦人三四人將小形太極旗分配會衆歐樂教授首述開會辭曰大戰既終全世界共謀永久和平以更不見慘禍爲祝矣乃日本對於韓國及中國恣肆蠻行使世界和平呈一種受危之現狀者實意外也此本會特請諸先生之深解東方事情者與諸君討論扶持人道之被人破壞者也繼以沙萊助教授之長時演說而精通東方事情言言切實衆大歡迎黃玘煥起述謝意且陳韓國事情衆皆鼓掌更以幻燈演韓國風景及重要古蹟因以獨立運動之日被日兵亂刀慘死之遺骸無頭無臉之慘狀次第演出衆皆不忍正視憤慨嘆息歐樂更起而言曰吾儕好友受如彼之侮辱摧殘以吾素愛自由平等博愛之法人決不可袖手傍觀云

捷克勇將卡耳大之爲韓宣傳

捷克國卡耳大將軍者一九一八年爲西伯利軍司令官爲同國陸軍總長年今二十八歲以西伯利革命運動之不利而退歸本國經上海留數十日對吾韓人安昌浩呂運亨李光洙諸人極表同情曰余之祖國蒙奴隸之恥辱者數百年而復活於今日矣貴國之獨立宣言爲歷史上罕見之勇氣與愛國心世界各人固皆驚嘆稱賞而最多感動者我捷克國民也余深望貴國前途之赫赫而尙在日本壓迫之下然世界大勢已非容許日本軍國主義之時期貴國民苟以統一忍耐勇戰三者而進行者獨立完成之日不遠也余以最親之友國一人而欲告貴國民者內以固其結束外以力於宣傳爲最后勇壯之一戰準備可也余到歐洲之日當以筆以舌宣傳貴

國之獨立運動以同一復活之國民情誼爲人道之自由人類之義務而行之願貴國民認余爲同志共享彼此獨立國民之榮光也

萬國社會黨之認我獨立

四二五二年七月萬國社會黨在瑞西開大會而韓人趙鏞殷以代表赴焉由該會提出大韓獨立承認案經一致通過至今年四月萬國社會黨本部對國際聯盟及列國要求承認大韓民國政府大韓獨立國

第十八章 婦女及兒童之愛國熱

中美新聞社大陸報云有一西國女教士近往高麗調查日人對待韓人情形頃甫回滬據述日人對待韓國少女非常酷虐無禮此女教士之姓名未便發表但其人夙有資望故其情形之確鑿毫無疑問據彼云目下韓國儼然在暗黑時代道德學問極高之少女輒被投入獄中加以不可形容之虐待致心理上及生理上均受破壞者甚多然韓民獨立精神非常宏偉百折不撓雖死不悔故對於日兵日警既已無所畏懼日人每誣外國教士從中唆使實則毫無根據韓人之求獨立全出於自動該女教士得有種種文件證據內有一件係一日官審訊一女學生之案由記錄其中述該女生不遵師長之教在街上持韓國國旗高呼自由獨立日人捕之褫其衣服縛於一木架面門下以竹板撲之其他種慘刑不勝枚舉此等女學生均富於愛國心學識優裕亦有能撰英文論者彼等之揚旗高呼不過一種消極的愛國舉動與上海罷課之中國女學生無異而日人則待之如寇讎有一女學生之名馬利者在法庭就訊時日官問之曰汝思想高麗獨立已幾何時矣馬利答曰吾心中無時不思

獨立日官曰汝何以欲與男子同運動獨立馬利曰世間萬事之成功者皆由於男女共同爲之好家庭須夫婦同造好國家亦須男女協力作成之間汝何以信獨立爲須要曰我乃高麗人自望要高麗獨立曰汝既受教育當另有特別理由試盡言之曰我不願盡以我之思想告汝日官曰汝既爲日韓合併與日本政府之政策若何馬利曰高麗決不應合併於日本至於汝政府之治韓全不公道正與德國待其屬地無異日官曰汝欲高麗獨立究另有理由否曰我有三理由一爲謀高麗之幸福二爲謀日本帝國之幸福三爲謀世界之平和第一高麗與日本歷史風俗言語完全不同日本決不能同化之我前皇與人民均不願合併前皇之署合併條約係爲日人武力所迫使十年以來韓國國民謀獨立前仆後繼備受一切痛苦至死靡悔男女老幼全國一心無一人不願獨立者二則韓民既不願受日本之控制無論汝日本如何壓制叛亂終不能免則爲汝日本安全計亦以許韓人獨立爲宜三則韓日兩國時衝突即遠東無和平亦即全世界無和平故爲世界和平計亦應令高麗獨立也日官問汝所說語或誤第汝何所憶以求得獨立者特美國乎武力乎抑和平會議乎馬利曰我特上帝我不特美國亦不特武力當時日本併韓亦非由征服乃由會議故我亦望與汝政府以情理談判而恢復獨立日官曰汝既無把握何以敢如此鹵莽行事馬利曰事由人爲成敗則在天我雖荏弱無能亦必爲國家出力日官曰汝既受教育當拋棄此項褊量與偏見勉力與日人同化馬利曰我不能我爲高麗人必望高麗獨立云云此外尙有一鄉村女子名張雪者居於內地一小村中聞得獨立運動之風聲彼即信此說必係確實遂不告人知自做葬衣一襲一晨着此赴警署之前大聲高呼獨立萬歲日警立捕此奇女詢以何人教汝如此張雪謂無人教

我日警謂既無人教何以汝知呼萬歲張雪答曰鷄至天曉則啼果誰教之乎我國獨立之日已見曙光故我自由呼萬歲耳一二日後日警將其兩手加拷投獄彼又咬破被縛之手指以血於衣襟上書獨立二字其家人知之送飯入獄張雪不欲食此較良之食物願與獄中人同甘苦且願作種種苦工全無怨言至於前述之馬利其運命如何尚未探悉然如此高尚奇偉之女子其不容於日官可斷言也然而高麗已在復活女子之英傑無殊於男子惟種種奮鬥如何繼續支持令人思之不寒而慄現各牢獄已有人滿之患女子之禁錮期自三月以至三年不等有一少年女教員謂人云彼不怕流血但願繼彼而起者能和平快樂而生活云噫亦壯烈矣哉

大韓青年外交團與愛國婦人會互相聯絡宣傳獨立不幸被日人偵知青年外交團員李秉澈安在鴻金演祐鄭叅榮宋世浩李鎬承尹宇榮安佑璿李炳奎李炳浩等十人愛國婦人會員吳玄洲吳玄觀辛義敬張善禧黃愛施德俞仁卿金英順李誠完李貞淑金瑪利亞李瑪利亞白信永朴順福朴寶奩朴德實李有喜李今禮柳寶敬李惠卿朴仁德金泰福金熙玉成寶慶等二十三八併以四二五二年十二月二十八日入大邱獄矣

先是延秉吳宋世浩兩人渡上海贊襄臨時政府四月頃復與趙鏞周歸國入京城與李秉澈安在鴻等密議組織青年外交團一爲激厲同胞之獨立精神也二爲臨時政府活動之應援也三對於世界各國而求其同情也四派員日本政府要求獨立也安在鴻京圻道高陽人耶穌教篤信者始學於萬國青年會館之學部更渡日本畢業早稻田大學校政治科爲留學生之學友會長對於教界學界激發愛國思想甚力故爲吾國青年界有數之志士也與李秉澈爲該團總務多印國恥紀念警告文及外交時報密佈各界李秉澈又爲大韓愛國婦人會

顧問由是兩團聯絡協力調查獨立運動之參加團體及被害義士被燒家屋之數報于臨時政府派外交研究員于上海者三回矣婦人會從李秉澈提議置支部於平壤開城大邱晉州機張密陽居昌等地得愛國金三百元送于臨時政府十月自美領布哇韓人愛國婦人會遞送補助金二千元會長金瑪利亞以此遞呈臨時政府會員李貞淑爲赤十字會長醜集義金白信永擔婦人會決死長之任四月頃又有血誠團愛國婦人會之組成者蓋三月一日獨立運動以後耶穌教人多被逮入獄者於是吳玄觀吳玄洲李貞淑等爲恤其家族結團醜金置支部於會寧定平羣山木浦金州光州黃海道與水院等地更擴其規募獨立義金以助臨時政府至有剪其頭髮賣其結婚式之金銀指環者遂與大韓獨立愛國婦人會合爲一團至是與青年外交團同時遭難

五月七日江界郡公立普通學校女教師以參加獨立運動而被囚該校長日人也因教授乏人百方周旋俾得放釋女教師大聲揚言曰獨立運動我之天職舍此更有何事即以自手開獄門還爲就囚又該校學徒之一幼兒以指血畫太極國旗揭示于衆因此全郡人民大爲激奮齊呼獨立決死進行

全州郡女學生林永信鄭福壽金功順崔愛敬金仁愛崔約翰姜品純咸義善咸然淳崔錦岫宋順義吉順實金信熙鄭月初等十四人以三月十三日開獨立運動而被囚該學生等以必死決心絕不飲食者四日而日檢事欲以威壓取服嚴行訊問學生等均以和平之氣象膽大之言辭對曰我等豈服於爾之判決乎爾等乃全奪我疆土虐殺我父兄之強盜也反以吾人之爲三千里主人者爲不法乃非法之判決也日檢事大怒拔劍割學生之左耳盡脫諸學生之衣而使之裸立加以嘲弄學生林永信舉手打日官曰野蠻日檢事又訊曰爾朝鮮無軍

艦兵丁大砲鐵道則完全獨立決不可能學生答曰自今以後軍艦兵丁大砲鐵道等物行見盡汰而爾以此爲問可知其愚蠢也檢事曰誰教汝等而爲此耶學生答曰以上帝之感動全國仗義而起齊呼萬歲而指囑何言耶爾等眞暗昧於世界的眼光之島人也日官等受此痛棒遂停訊而還囚之

公州郡女學生金有實畢業耶穌教永明女學校而年方十五以參獨立運動之故被捉於倭兵受無限之惡刑而少不爲屈聞者感歎父鳳仁不勝痛憤自刎而死

平山郡金女士（失其名）爲効忠獨立運動從事通信事務晝夜奔忙其夫止之女士慨然曰吾寧無夫而生不可無國而存卽決離婚益勵盡瘁特以銀粧刀一銀指環一金貨五十圓送遞臨時政府

成川郡金溫方夫人耶穌教信者年少而寡以參獨立運動而被捕入獄備受惡刑母爲之泣夫人曰使夫子在世則當參於今日義舉而不幸別世故婦乃代焉是卽慈母愛子之義務也雖死何恨願母千萬保重不以婦爲念也

于時晉州固城海州水原各郡有妓女獨立團均當六個月懲役

京城有十一歲女學生以獨立運動而被捕日警嚴訊曰汝何故執旗而喜樂耶女兒答曰吾有失物之復得者故喜爾日警曰汝失何物乎女兒曰我大韓民族世傳之三千里錦繡江山也日警厲聲曰汝小兒何知而樂此耶女兒更以溫言答之曰爾實無知識矣向日吾母失一小針竟至半日乃得而喜形於色況三千里錦繡江山復爲我有何樂如之日警亦爲之感而落淚云

京城獨立運動之日有一幼年女學生右手執國旗呼萬歲倭兵以劍斫其右手墮地女學生更以左手舉旗呼萬歲倭兵復斫之猶連呼不已倭兵乃刺其腦而殺之有西洋人欲攝影其狀被倭兵捕去

水原郡女學生朴善泰芳年二十爲京城徽文高等普通學校四年生自上年三月獨立宣言以來爲繼續運動糾合同志者李鍾祐(年十九爲基督教青年學院生徒)林孝貞(年十八爲梨花女子高等普通學校三年生)車仁載(年二十二爲三一學校教師)崔文順(年十七爲梨花女子高等普通學校二年生)李喜卿(年十八爲京城女子高等普通學校三年生)等在水原密組救國團朴善泰爲團長彥集會員擬爲臨時政府後援派送李喜卿于上海定以本月九日出發乃爲水原警察之破獲入獄受訊云

今年十月下旬日本警察巡邏隊在鴨綠江左岸遇韓國女子五人察其行色而疑之詰問欲拘而同往其駐在所韓國女子齊出其懷中手鎗射擊日警日警亦開手鎗殺韓女子軍三人其餘女子軍二人逃入森林中不知去處日警恐爲其狙擊不敢復追而退云

十一月上旬頃平壤耶穌信徒大韓獨立婦人會員一百六十人以有軍資金募集之說被捕入獄

北間島學生光復團幹部六人在大教洞(距龍井村約二十里)被日警搜捕各種書類發見而中有女子一人名應淑年二十爲龍井村耶穌教病院看護婦者也

江西郡新興面新里書塾之學童十餘名聞有獨立運動也卽不請於父兄師長而自意贖錢赴數十餘里之市中購白紙製國旗而手之齊唱大韓獨立萬歲該里人民見此而大發激奮遂倡示威運動

全羅道聲山小學生張某以三月五日發布宣言書被囚全州監獄被日警酷訊自嚼其舌而死

京城破洞普通學校學徒年可十一二歲者四人四月十日突然打破校舍琉璃窗日警捕而訊之即昂然以對曰此乃聚大韓兒童造成奴隸材料之地寧不可憎耶此我等所以破碎之也日警酷施拷刑而少不爲屈

馬山郡獨立運動之日有十二歲小學生被日兵砲射閉目而臥日人醫師欲救而摩之兒覺而視之即踴而却之曰吾雖死而不受倭奴之醫治也

安岳郡學童自八歲至十五歲以下者百餘名各揭國旗呼萬歲行示威運動日警捕而致之警署疑其由長者之嗾使出新聞弊紙命畫太極旗學童等怒喝曰豈可以神聖之國旗畫於弊紙乎持一幅綢緞來日警笑而與以白紙學童卽一揮畫之日警乃驚諭而送之

慈城郡學童數十名揭國旗呼萬歲進向日憲兵之駐地有補助員欲捕之學童等厲聲曰爾非檀祖血孫大韓國民乎若不速悔改者必受天罰日憲兵所長村田膏之曰當加嚴刑學童等愈怒曰若以我爲罪人而罰之則違反人道者無罰乎村田不能更詰而送之

今年七月二十七日平安北道博川郡突有獨立萬歲之聲分四隊巡回四方熱唱不已皆普通學校十五歲以下生徒也日警多名勒令解散逮其首謀者二十餘名嚴重取調云

九月二十三日咸鏡南道德源郡元山港小學校生徒七八名作韓日交戰之戲其結果遂爲韓勝日敗故一齊高唱大韓萬歲在傍之人亦羣起和之瞬息之間會者數千歡呼喜躍巡回市街日警多名出而打之縛之韓人

益怒擊毀警署並殖產銀行支司東洋拓殖支司與郵便局等日警拔刀亂刺放砲亂射佛教學校之生徒忿其蠻行遂出其衛身之手鎗向日警射擊無如赤手空拳與鎗劍相觸遂至四散韓人死者二人重傷者二人日兵之重傷者亦二名日人尤肆其暴虐追捕韓人六百餘名云

第十九章 姜老俠爆擊齋藤

彼殘忍蠻暴之日人欲以虐殺政策鎮壓吾族之文明舉動而吾族之抵抗愈烈世界之輿論激昂彼乃更試謫策聲言政治改良且曰此韓人反對長谷川之個人而非反對日本統治也欲以此爲解於輿論而併欲緩和吾族之熱情乃遞長谷川職而以齋藤實男代之則吾族於此有如何對付耶於是姜宇奎（燦九）之爆彈一聲代表吾族心理更震世界耳目矣若於此際無此一舉者彼必曰韓人歡迎新總督而確信新政改善也若是則數月間全國民之流血光采幾被掩飾矣

姜宇奎字燦九平安南道德川郡人長身豐貌氣宇軒昂質直勁毅勇於爲義以貧故中歲移寓咸鏡道洪原爲耶穌教傳道師倡設學校以教育爲事國亡義不爲仇國臣僕乃移住中領之吉林延吉縣而往來西伯利各地對我同胞鼓發祖國思想甚得青年之歡心乃被日人所忌再遷饒河縣設光東學校以教子弟至四二五二年三月吾國民有獨立運動我父老之在俄領者組織老人同盟團而宇奎以六十五歲爲團員乃代表該團將入本國京城決計殺倭總督密購鑄鐵製爆彈置之懷中經元山以八月五日到京城新總督齋藤實男以九月一日着南大門驛先是有暗殺黨入京之風說故彼之警戒十分恭嚴日軍司令官及各官吏衛以軍警齊出歡迎

復有各國領事及吾國官民之觀光者擁擠左右于時齋藤夫妻出自貴賓室乘車宇奎突以爆彈擊之乃中其後車火着齋藤戎服幾危其命警務總監水野微傷悞走大阪每日新聞特派員山口滿鐵理事久保重傷其他傷者合三十餘名於是吾國人心爲之一振而日人大驚極力搜索此際宇奎闔眼默禱上帝待警官之來捕而彼詎意俯首老翁有此激烈行動哉宇奎乃徐行回館從容自在者數十日而無如青年男女以嫌疑被捕受惡刑幾死者衆宇奎慨然曰豈可以我之故而累及無辜多人耶乃自首就捕入獄受訊而舉其謀刺總督之理由侃侃說明豪膽自若聲色俱厲滯獄多日嚴責日人之蠻行彼亦屈而從之我青年之同囚者莫不壯而歎之時復自作詩歌以死爲快至今年三月十四日自彼地方法院開第一回公判崔子南許炯吳泰泳三人以連累入庭宇奎以被告着席目光如焰叱獄吏曰吾有腰痛不堪踞床更持椅子來因對審問而抗辯曰日本以不義併吾國爲世界人道之所不容而我以大韓臣民豈奴服於爾耶乃放浪海外從事於宗教及教育啟發人心養成人才以圖光復決心以死而後已日本無統治韓國之能力而所謂同化尤係癡夢長谷川亦知難而退矣齋藤不顧天意人心而貿然來韓爲攪亂東洋平和之戎首於我爲不共戴天之讎此余所以謀殺也至十八日第二回公判而宣告宇奎死刑崔子南處役二個年許炯處一年六個月吳泰泳處一年而四人俱不服至二十五日而宣告判決我人之傍聽者大激悲憤一時市民之集合者數千餘名疾呼獨立萬歲宇奎亦和而唱之聲震遠近殺氣滿城日兵乃強令解散先是十四日之公判也平壤市民開示威運動自西門至南門及大同門羣衆雲集呼萬歲爲宇奎表敬祝各商戶皆撤市神學堂爲之罷課者兩日

第二十章 義親王與大同團

大同團者三月一日以後新組之大團體而全協爲其主幹者全協京城人光武八年爲一進會總務任富平郡守慨時事大去遂解職隆熙三年與其友人移住中領之海龍縣至是歐戰告終平和開會各小弱國胥以民族自決宣言國家獨立而爲吾族活躍之機會乃與同志擬渡美見李承晚十二月至滬與金九金重浩李一元諸人面談遂止渡美之行亦無留滬之必要以今年二月初歸國居京城鳳翼洞與一進會員崔益煥努力於獨立運動合全國各界之諸團而組成一大機關貴族官僚儒林學生義兵僧侶婦人負袂商各派均總括爲一而達至數百萬購辦印械托以營業密刊大同新聞及各種文字鼓吹人心聯通脈絡矣

義親王李垺常好遠遊而王妃之弟金春基亦曾渡美求學中途罷歸常懷再渡之志屢懇於王而以資斧難辦而不果居常鬱悒全協乃見春基具言滬上情況而計令義親王及貴族之有重望者相機渡滬擁護臨時政府擴張獨立勢力而王可之前法部大臣金嘉鎮爲該團顧問乃以王旨作書寄臨時政府國務總理安昌浩說明其渡滬目的

一 日本人符同我邦之幾個奸臣弑我父皇及母后故欲訴此冤于列國

二 三月一日以來我舉國人民以徒手叫呼獨立而噫彼強敵終不改悛恣行虐殺然而我民以百折不屈之氣要求獨立之熱血愈往愈沸以我國民之精神決不同化於日本者宣布天下

三 日本對我韓國十年前後以諸般條約合併國土乃利用奸賊脅迫而強結之決非我父皇之肯許者予

所確認也欲公佈此情於世界

四 我亦韓國民之一我寧爲獨立韓國之庶民不願爲合併吾國之日本皇族必就我臨時政府成立之當地與政府諸公握手同心死生間竭力於光復欲補同胞苦心之萬一我之決心一爲自家復讎也一爲祖國獨立與世界平和也

是時王及金嘉鎮以下三十餘人代表該團有宣言書之印出者蓋將渡滬後發佈也然而多人伴行不可能也於是金嘉鎮先發弊衣破笠扮裝藥商與子毅漢步出一山驛乘三等車至安東縣改乘英船抵滬而年七十五歲志氣矍鑠不避艱險政府及各團均以誠心歡迎矣王以十一月九日夜出宮潛行從一僕至彰義門外洗劍亭與全協鄭南用等協議王遂與鄭南用韓基東兩人步出水色驛著弊衣乘三等車韓基東至開城驛下車回京王與鄭南用抵安東縣日警等已接義親王潛行之報搜查嚴密王遂被擒回京蓋王之此舉出於彼之不意而關於人心者甚大彼乃大驚自其政府紛議多端乃決置家政監督尤加束縛更欲致之東京迫其啟行首相原敬等又以書招之而王誓死拒絕於是全協楊楨金國煥全東震韓錫東韓裕東李在浩鄭南用鄭必成洪宇植韓基東董昌律宋世浩李達河金春基楊濟民義王篋室金興仁看諺婦崔孝信車夫金三福等悉入于獄酷受刑訊嗟乎全協崔益煥等非一進會員乎一進會非賣國奴李容九之黨乎乃有此等人蓄志隱忍沉機觀變至于今日現此非常之大活動其膽勇與策略爲彼之驚嘆不已者則是舉也非但個人之立地成佛而吾族全體之心理一致反本者尤大著矣彼之察養一進會也豈意其爲今日獨立黨乎其夢想同化者亦可愈覺其妄

矣

第二十一章 北韓義兵團之活動

數十年來我義兵之死於敵鋒者以十五萬計其流血之慘固已極矣全韓三千里無寸鐵之遺者則彼之防杜亦已周且盡矣然而義兵者吾族之國粹也故吾國可滅而義兵不可滅也嗚呼我忠信壯烈慷慨磊落之士以義當殉國不計成敗已濺無限之血而萬死餘生志猶未已或投身於勞動或從事於射獵草澤巖穴撫劍泣髀者固大有人在矣

余頃遊中領俄領之間周行各處訪問同胞而其射鹿於山賣薪於市種諸以爲糧賣餽以糊口者皆故義兵將領也靡室靡家飢寒切膚而略無憾憾之色惟謳吟祖國寤寐祖國酒後慷慨相與歌哭至若世俗所謂名譽功利視之若浼而惟其滿腔熱血發於忠憤決心以死而後已斯豈非真義士哉吾甚敬之甚愛之矣

且以吾國西北方言之卽古肅慎扶餘高句麗渤海女真之地風氣勁厲人民勇悍耐勞成性勤儉成俗以鞍馬爲家以射獵爲生有天演武藝故渤海時代有三人當一虎之語女真初興完顏太祖以卒二千五百破敵數十萬此其強武之風實特過於各族者也據吾今日之目觀我同胞之男女皆體格壯大意氣活潑有騎射之特長使吾人有訓練之自由者不出幾日可成天下之勁旅而惜乎其未也然吾竊有希望於將來矣

乃以四二五二年三月一日我國民之獨立運動起而我義士之潛伏於山澤間者更演活動矣上年八月我獨立軍有甲山惠山之戰十二月獨立軍義勇隊長洪範圖朴景喆李秉琛等有喻告同胞文今年二月九日據華

盛頓電我獨立軍二千假道吉林夜襲日營日兵死者三百其餘四百潰走云

三月據北陸通信我獨立軍八十餘人進擊鍾城之日憲兵隊函獲小鎗五柄又襲擊穩城米山之日憲兵隊殺二名其餘傷者八會寧病院我軍函獲小鎗七柄金七百元而無死傷者云四月據日人報紙所揭總督府警務局發表者我獨立軍首領洪範圖具春光徐一崔明錄梁河清等在穩城茂山等地有前後八回之奇襲云又據彼報我獨立軍在吉林地方有軍政司少年團決死隊樺甸軍政司等各團體云

同月據軍政署總裁徐一報告臨時政府略曰自四二四四年有重光團之組織卽爲經營光復而糾合同志努力於精神教育上年三月獨立宣言以後改稱正義團發佈綱領增募團員發行報紙激勵國民之獨立思想八月遂編成軍隊購入武器教養士官十二月改稱軍政署爲軍事機關地方各處置警信分局其他設備均皆着手而遠近人民皆有決一血戰之思想云

六月二十日據延吉來信我獨立軍大將洪範圖崔明錄等率七百餘人向汪清縣鳳梧桐猝遇敵軍三百餘名急行射擊殺敵一百二十名餘皆潰走我軍乘勝追擊云

十月頃據日報所載日兵六百餘名在和龍縣頭道溝西北二道溝與韓黨千餘人激戰日兵死十餘負傷亦多韓黨死二十負傷亦多戰鬪尙在繼續日兵死傷更多又云三道溝韓黨與日兵開火日兵死者三負傷者四韓黨遺棄十六死體又在三道溝與蜂蜜溝中間激戰日兵死者三負傷者十一又云韓黨洪範圖金佐鎮兩人之所屬部隊最爲有力多有新式武器如機關鎗等兵力約三千現在密林中以安圖縣爲根據地著著準備尙有

十分活動之能力云又獨立團大隊長李源益分隊長崔文鳳等率部下十三人自俄境到清津與富寧郡獨立團相通氣脈擬舉大事九月三十日鏡城郡日警部探得警耗即率兵至某山谷激戰良久崔隊長及部下二人戰死日兵亦有死亡云十月十日韓獨立軍在茂山郡延社面四草洞與日警長遠藤及部下遇而開鎗亂射兩軍互有死亡韓軍越南雪嶺向鏡城地方云有同月十一日朔州郡獨立軍與鴨綠江岸日警兵隊應戰致多死傷云

頃接延邊通信云延邊日軍前在延吉縣屬萬兩河上流與韓軍激戰傷亡日兵多名十月二十四日有韓獨立軍司令金佐鎮部下六百餘名正在和龍縣屬二道溝集場子地方大道兩傍深林內潛伏適有日軍數百名攜帶機關鎗砲列隊行過韓軍在林內窺見即下令備攻擊日軍入其防線以內不知埋伏正進行間韓軍突出如飛將軍從天而下乘其不備開鎗夾攻日軍亦列隊拒敵激戰數時卒被韓軍奪去機關鎗一架日軍陣亡一百餘名受傷二十餘名停戰後即電告延吉龍井村商埠兵站當由該站調去大車十輛二十六日下午六時將受傷日兵載往頭道溝龍井村兩埠赤十字會醫治韓軍方面一人未傷又聞此次戰鬥日軍尙被韓軍生擒三十餘名日軍近來迭受挫折恨韓黨更甚擬大張撻伐以報前仇而韓軍亦早有預備誓與日軍血戰以決雌雄大有甯爲玉碎不爲瓦全之概

十月二十五日和龍縣三道溝青山里所駐在韓獨立軍司令金佐鎮部下三百餘人爲日將東乙彥支隊包圍韓軍佔據高地以機關鎗隊射擊支隊三百餘名盡行殲滅云

又韓軍司令洪範圖率軍五百餘人會合安武部四百人民軍五百人光復軍二百人在距青山里四十里地點大爲活動現尙繼續戰鬥云

韓軍司令洪範圖所駐和龍縣二道溝附近森林地帶爲日兵包圍放火於各要路埋伏機關鎗隊欲乘洪出圍襲擊洪已知其詭計暗渡巧脫森林盡燒渺無形迹日兵一隊（中有中將陸光觀所率六十名）進入中心地帶始覺更向他方適爲日人埋伏機關鎗隊發現誤認爲洪軍互相發射日兵死者無數中兵全沒洪軍更爲追擊連勝二陣此役日兵死者總計一千二百人云

據日本東京來電自十一月三日以來延邊積雪已至四尺餘交通斷絕韓黨之活動異常靈巧軍用電綫處處毀斷其勢不輕况兼天候嚴寒用兵困難日軍頗形憂慮云

第二十二章 呂運亨之渡日宣傳

四二五二年冬日本政府派基督青年會幹事藤田九臯來滬訪呂運亨致當局請邀之意交涉經數月西洋宣教師亦有爲之介者運亨遂以十二月十五日與崔護愚申尙玩二人乘船渡日是行也人多危之蓋以彼之巧譎莫測必貽不利於我而況我絕無所藉只憑三寸舌投彼虎狼之窟能保其得勝乎然而盤根錯節乃別利器呂之專對之才可於此卜之矣

二十一日抵東京日本當局拓殖局長官古賀陸軍大臣田中政務總監水野司令長官宇都宮內務大臣床次遞信大臣野田其他閣員等與之接見二十七日因新聞記者團平和協會之幹部其他五十餘名之招待而往

帝國飯店遂開演說舉獨立運動之真相及國人之主張盡情披瀝熱辯滔滔逾一時二十分其辭均揭于日文英文各報而綜其大要如左

一 世界的運動

余之此行目的爲見日本政府當局及其他識者說破韓國獨立運動之真相且求日本當局者之意見也今幸與閣員及識者諸君得無間隔而以意見相換此余最所愉快而深謝者余卽關於獨立運動而自初從事之一也歐洲戰亂之起也余惟韓國不能以一獨立國參加此大戰而蹲坐東洋一隅呆然取傍觀之態甚爲遺憾也然而我韓族將來占得一頁於新世界史者其期必至余所自信也余是以飄然離國旅居上海至昨年十一月大戰終了上海各寺院有平和之鐘聲余輩思之以爲天之使命降于頭上也於是開始活動先派同志金奎植赴巴黎三月一日自內地果有獨立運動之勃發絕叫獨立萬歲則大韓民族全然覺醒矣飢者求食渴者要飲爲自己生存之當然要求豈有阻止此者乎日本人有生存權而我韓族獨無生存權乎日本人之有生存權爲韓人所肯定者而韓人以民族的自覺要求自由平等神之所許也日本政府對此而有妨害之權利乎現世界以小弱民族之解放婦人之開放勞動者之解放等絕叫世界改造遭此世界的潮流而起此運動非單純爲韓國而已併含有日本之世界的運動也夫神惟欲以平和幸福予我人生者故今懲於過去之掠奪及殺戮而改造新世界神之意也吾等惟依神之所命開拓世界而改造之形成平和的新天地卽吾等之使命也我等之祖先固以劍戟相交殺戮爲事而此後我等非以相扶助而並進則不可也基督教不許世界之互設牆壁矣

二 大韓獨立及日本

今日本對於韓人之高唱自由者純以自己之種種利害的見解認併韓爲必要者曰日本爲自己防衛不可不併韓也然而現今俄國既如斯潰裂矣則此等見解不成理由而韓國獨立然後東洋之真正團結可以謀之此實爲日本之利益也且曰韓人無實力不能維持獨立而我固乏於兵力然韓族今覺醒矣愛國之心如熱火十分充滿則以赤血及生命足以復祖國之獨立而維持之且日本承認韓國之獨立者更無敵國於韓國矣西隣之中華民國持其親誼之關係者確實也日本率先承認韓國獨立之日韓國對於日本尤當結其親誼之關係矣我等建設之國家即人民爲主人而人民治理之國家也此民主共和國不特爲大韓民族之絕對要求而世界本勢之要求者也

夫爲其平和也形式的團結不能爲功今日本雖日以喋喋於日支親善而究有何益惟精神的團結爲必要而現東洋之特別要求者此也我東洋人當如此境遇而互相反目豈其福耶苟韓國獨立問題之解決者對華問題容易解決也日本曾爲韓國獨立而有清日戰役俄日戰役然而日本無視其聲明自食其約束此豈非韓華兩族怨恨日本之原因耶韓國獨立似與日本分離者而其釋仇恨之念而取同一步調與之并進則反爲真正之合一此實確保東洋平和維持世界平和之第一基礎也我等戰而後方得平和乎不戰則不能得人類享有之自由與平和乎惟日本人士深思之

與古賀廉造問答

古賀曰余對於朝鮮憂國志士諸氏而誠心同情者然望其爲有實效之活動也換言之朝鮮要得獨立或自治者不可不先求其要素而要素者富強是也富有民富國富強有智強體強而改良教育增進實業爲其必要余惟朝鮮民族之富強可以誇張於世界爲朝鮮人之要事也雖其方法不一而宗教的實業的教育的均與總督府一致協力可也余以個人反對合併者而兩政府既行合併則個人意見自歸消滅然而朝鮮人未及乎實力充分而欲與日本併立或要求自治者非余意見之所及也要之朝鮮在今日先圖富強爲最要也且日韓合併如會社會併一會社之實力不足一會社之實力充分則有爲雙方之利益而合焉者共有其同一權利而持此合一之名義對抗他會社而有競爭之力日韓合併亦類於是非爲雙方之利益者乎但從來事實上不平等者是遺憾也

呂運亨曰余對此意見有絕對不合者茲以我等獨立運動之主張者先言之

獨立運動之四大主張

一 爲我民族之福利即朝鮮之富強也我民族建國以來半萬年未有一次受異民族之內政干涉者常以自主治理自主發展對東洋文明而貢獻不少所以豐富於自主性而他族之干涉勿論而亦不願其扶助也且異族統治異族之境遇自然有政治上經濟上衝突而不能容納者歷史的社會學的經濟學的證明昭然者也我等於過去十年間自由發展之損失不少至今我等爲繼承過去之歷史且以現今之發達貢獻於世界文明永續子孫萬代之幸福爲吾獨立之主張者也

二 爲日本之信義也人而無信胡不過死非古人之咀呪乎個人無信亦如是而况國家乎以歷史上觀之日本對朝鮮而爲文化之負債者日本之文學美術工藝其他種種文明非皆自朝鮮而學得者乎然而日本對此而常以兵役回謝矣且日本於日清日露兩役稱爲朝鮮之獨立且以保障朝鮮獨立聲明於世界乃其結果以詐欺合併朝鮮所以我二千萬人痛入骨髓而世界各國亦皆唾罵日本之無信義而猜忌之只今支那全民族四億萬仇視日本而排斥者何如其甚也日本但以廣大其國土爲喜幸而實處極危險之地位所以日本之承認朝鮮獨立不惟爲日本之信義而併爲日本將來之國利者也

三 爲東洋平和也東洋者日本中國朝鮮三國爲首先屈指者矣若要維持日韓合併之形式者兩民族之相爭勿論而支那之排日熱無終熄之期者明白矣支那之排日謂其因於山東問題及二十一條約而其實因日韓合併而忿怒心恐怖心敵愾心起矣中國與日本締馬關條約承認朝鮮之獨立而日本不詐欺中國乎所以日韓合併爲破壞東洋平和之根源也然則朝鮮獨立非保障東洋平和者乎

四 爲世界平和併爲貢獻世界文明也世界者合東西洋而稱之者若東洋之有爭亂者西洋雖平靜而不可謂世界平和也且一方之勢力弱焉則必致他方勢力之泛濫者公理也若東洋之相爭不已則畢竟結果不惟自滅而西力之東浸日急矣所以爲東洋自體之平和爲保世界大勢之均衡由東洋之團結而爲貢獻世界文化惟朝鮮速得獨立而後可耳

對於日韓合併有類會社合併者絕對否認矣蓋日韓合併決非由我民族之意思而不過少數當局者即賣國

者之所爲亦非當時主權者之真正意思也日本人固謂合併由兩國民之好意而朝鮮國民對此而怨恨徹骨此爲強制政治的不公正而非合併也實併吞也日本人以此合併爲韓人之幸福東洋之平和而實爲韓人之殃禍與羞恥也東洋之患亂猜疑由此而生所謂標榜善政德政之總督府政治對於我民族要求之獨立運動而加以何等壓迫乎苟壓迫民族之希望者自由何在平等何在善政德政何物耶勿論何等事業而有利於日人而運動者予以援助有益於吾族之運動者加以沮害但以利害言之朝鮮因合併而大不利益全不自由精神的壓迫對於世界而陷於鎖國受此切痛之損害矣會社專爲謀利成立者而國家則不然古人不云何必曰利亦有仁義乎國家者社會之實體也歷史之長成也道德之存在也司法之實體也且非一時的而永久的也永久之意味指子孫萬代也個人有死而社會永續者也故改良社會而發展之爲吾人之義務也國家爲社會之社會故因而有愛國之義維持國家改良國家即對我先祖及我子孫之義務也所以爲國家者義務也非利益也亦有爲國家而犧牲其利益者矣且以兩會社合併言之小者必被大者之損害如美國之石油會社以商業政策併合無數小會社而致富者亦其實例也日韓合併既爲大不公大不正者若以東洋團結東洋平和認爲必要者朝鮮獨立爲第一最重最急之問題且實力養成以自由發展爲最大要件亦認其爲最速成功者也古賀曰因日韓合併而世界對於日本而生猜疑者余亦知之故最初反對於此而既已合併之形式成立焉則余之意見歸于消滅矣今但維持其形式期將來之發展不亦可乎朝鮮人之要求獨立余亦認其爲相當者然獨立而得其結果能如其所想像者乎余惟仍存合併之形式而互相一致團結爲有益也然此爲將來問題而

入於現今實地問題獨立之要素自防之實力也若無自防之實力者對於歐美列強併吞東洋之陰謀而何以防禦乎平和之保障厥惟實力而日本以單獨對於西洋列強不可能也故日韓合致爲平和之根本也只今暫有平和之風而果然爭奪之終熄爲一大疑問現在美國亦覬覦東洋者事實也然則朝鮮無自防之實力而獨立者豈不爲東洋平和之害乎且自由發達爲實力養成之最大要件最速成功余亦認定者也然而以人爲助成其發達亦有必要之時也朝鮮無防禦力而放任其獨立則不類熱帶之草木移植寒地而不加何等保護者乎日本之發達以五十年不息之努力也今使朝鮮獨立也則有日本三分之二之兵力乃可而納稅之能力能許此乎且英美之同情於朝鮮果真正之誠意乎觀於英之對印度美之對墨西哥可知也歐美人之對東洋政策置東洋於歐美化則其迫害之續起不明白乎以缺乏於自防力之朝鮮而獨立者無破壞東洋平和之慮乎所以日韓一致團結防禦西勢爲莫重問題也平和事業不可專信神之威力神之使命與政治之事實到底難合要之保障平和惟實力爲第一故爲實力養成而望其同力而已

呂運亨對此東洋平和及實力問題而痛辯之曰不合於現實之理想止於空想無關於理想之現實不過死物故論政治者必要實際的細密而不許空想的概括也從來日本人之誤解謂合併由好意謂韓人之同化可能謂韓人悅服善政至於今日猶迷夢未覺唱道日韓一體主義同化主義是不合於現實之空想也請以合於實地之細密者論之

平和之真髓精神的融和也一切爭鬥猜疑忿怒怨恨等不平洗空淨盡而有鳥鳴花笑日暖風和活動的自然

自由之氣像者決非如死海之平靜也。平和在於生存之希望喜樂自由平等尊貴之中而決不在於危虞絕望壓迫差別之下者也。

以東洋平和論之一對內的東洋平和即東洋各國互相平和也。二對外的東洋平和即防禦西勢之東侵而保障平和也。立國於東洋者固多而若朝鮮日本中國互相不睦則不可以言東洋平和也。若無對內的東洋平和則不能維持對外的東洋平和者事實也。然則以強制併合人國置其人民於自國統治之下而望其滿足非空想妄想而何。

以我民族之豐富於自尊心獨立性者忿恨於國家之被併悲嘆於身爲亡國民包羞隱忍者十年矣。至於今回而舉國一致開始民族的獨立運動此其自尊心獨立性爲人格之要素進化之根本對此而欲壓迫之消滅之者非人類之罪惡乎。今以武力欲鎮壓我自尊心獨立性民族的自覺之獨立運動武力果能併其精神而壓之滅之乎。

且以日本對於中國之政策觀之假東洋平和之美名實行其帝國主義侵略主義略無餘地是使四億萬中國人均以一致仇視日本者此非破壞東洋內部之平和而何以內部之分裂爭鬥而不能團結者安能當西勢之東侵乎。然而日本之聰敏政治家暗喜中國之內爭認爲奇貨雖力說東洋團結之必要而其實對於中國逞其野心貪慾權謀術數等種種手段者不已明瞭乎。此其實行於吾國之慣技也。要之東洋無內部之平和而期待對外的平和決不可能也。且韓國不得獨立也則無望於東洋之平和者明矣。吾輩之主張韓國獨立實由於此。

而望日本之悔改者也

且謂朝鮮無自防力而放任其獨立則其結果同於熱帶植物之移植寒帶而不加保護者大是失當之譬喻也原來朝鮮之周圍無日本之侵略則不見何等危險者設有不幸見此者而竊謂國家之實力足以不仰外他之保護而自立且發展也熱帶之草木移植於寒帶者在玻璃室內水蒸汽中得維持其暫時生命然已失其生存之價值與意味而就自然之空氣享受雨露之恩者更無機會之可得寧其處於寒風冷雪十死一生之困難而較諸依他人保護失其自己生存之意義而苟且爲寄生的生活孰爲可樂乎

古賀曰朝鮮無自衛之實力而承認其獨立則不被第三國之侵略乎日清日露兩役卽爲此而日本不反覆其如此犧牲乎

呂運亨曰以歷史上觀之日本明治維新以後吾國青年改革家金玉均朴泳孝徐載弼俞吉濬諸人欲與日本一致迅速輸入新文明而維新其政治此時頑固黨或通於袁世凱及俄國而反對日本所以金朴諸人欲借日本之力圖政治革命者歸於失敗矣

日清日露兩役由韓國問題而有多大之犧牲者事實而其得勝利在日本之優力者亦確論也然而此時韓國之助力亦頗不少者不可不認也當時俄國勢力之擴張爲歐洲各國之憂慮獨逸誘俄國移其勢力於東方英國猜俄國之獨專東洋霸權勸日本之抗戰日本之得勝於此役者勿論爲日本自身之幸福而同時韓國喜之列強賀之此時未嘗無同情之機會矣然而合併有幾種理由云者其結果何如現狀何如且維持此合併之形

式也將來有如何禍亂生於雙方者或加之念乎最初日本之有誠意者以何爲證據乎今時代變遷日本亦覺其舊日之惡夢可也強權時代既屬過去而平和之神吹正義之喇叭此非吾等爭鬥之時而爲和睦之期也朝鮮無武力而獨立則有破壞東洋平和之危險云者不過口實也現今俄德無覬覦朝鮮者勿論而歐洲國民受今回大戰之教訓者必不許幾個主權者之侵略矣萬一有此等之危險者吾等益處公平之地位爲政治上對立而隨其必要謀其團結不亦可乎

且謂合併由朝鮮之弱也故爲充實其武力富力使第三國不敢侵入也然則合併以後果有何等充實其武力富力者乎吾國以合併而武力富力其他各種衰弱之極比前益甚防禦外勢之力亦愈減退而已今後兩民族之爭鬥日甚而無終息之期者可斷言也

今以歐戰觀之德敗於法決非德弱於法也因白耳義之血戰而法得保全因捷克之內變而德遂敗焉與其置敵於牆內而置親友於隣近過較好云者可以深思也韓國無實力云者非但古賀君之言而卽日本人之公言也然此豈正當觀察乎請暫言之夫實力者一政治的實力二軍事的實力三經濟的實力而分此三種而言之

一 政治的實力以內治外交而生者以內治言之我民族有半萬年國家生活之繼續者自治之能力豐富而道德的訓練亦強其他言語文字風俗皆完全統一地方人口不甚繁雜決無如中國內政之紛擾且以亡國之經驗易於一致團結而至若新進青年等其忠義之淬礪理想之新鮮較諸日本青年居數倍以上者可以自信此卽日本學者之公評也所以吾等自認其內治力之充實也二以外交言之吾族無侵略的野心者確立於正

義人道爲世界平和之先鋒惟欲以文化雄飛世界而無他慾望則自無外人之猜疑矣且以地理上軍略上見之韓國獨立爲東洋平和和世界平和之要地故外人之所宜尊重擁護者且吾國人士尊重禮儀恭敬外賓有親切待遇之特性則政治上外交勿論而國民外交亦綽乎有裕矣

二 軍事的實力此非古賀君所言之要點耶一爲內亂鎮定而要軍備之充分必需財力智力人力者當無異議也二爲防禦外敵而準備軍事者必隨敵國之軍力如何而爲之假使我之敵國爲日本乎中國乎英米俄獨聯合或軍獨乎若日本若中國爲我敵國則東洋平和之破壞也若英米俄獨之爲敵者非聯合我三國則不可也韓國現勢之不能獨當強國者事實也然而以政治上關係而軍事之準備不同今則保障東洋平和爲政治上大關係我韓國與日本中國爲同盟聯合最爲適當且吾國獨立而後爲二三十年之準備亦有防禦強敵之實力者可以確信也

今韓國之實力比諸日本固認以微者然一旦日本與外國開戰亦可認其爲微者乎吾國現在與日本戰固無得勝之武力然而以消極的分離日本之勢力妨害軍事行動則必有偉大之力者日本之不可不念也欲維持合併形式者破壞東洋平和也韓國無實力而承認獨立則危險平和云者不過杞憂之言也此時語調激烈令人動色於是日人知其不可以辭屈也禮而歸之運亨遂以二十九日發東京回滬乃彼之外交問責同盟會及貴族院彈劾當局之失策幾致內閣之動搖矣

第二十三章 日兵虐殺俄領韓僑

彼日人之殘忍暴虐對吾族之平和運動加以砲殺劍殺刑殺撲殺爲世界人類歷史上未有之慘劇故西洋人之目覩其狀者謂彼蠻行雖亞弗利加野蠻人種亦不忍爲者也彼在中國之東三省亦蹂躪主權而虐我韓僑者無所不至今入俄領又燬我學校殺我良善無辜之兄弟尤極蠻暴矣蓋中俄兩領之開拓多韓僑之力而勞動求業勤儉忍耐至今生產之根據教育之狀況大有不可悔之勢力矣乃日人乘中之弱俄之亂欲攫此兩領爲己有而吾族之發展爲彼所深忌者故乘機肆毒至於此極矣茲據吾族移住俄領之歷史大略如左

蓋吾國舊代領國綦嚴在豆滿鴨綠之沿岸有越境之禁犯者必殺無赦故吾民不敢投江北一步者久矣乃天隔吾族爲天然之移殖紀元四一九七年甲子春茂山人崔雲實慶興人梁應範二人冒禁潛渡經中領之琿春至俄領之烟秋着手墾荒爲吾族拓殖之先導至己巳歲饑六鎮尤甚於是人民拚命潛渡抵烟秋等地而無家無糧叫呼饑寒崔雲實率貧民三十五戶轉至秋風墾荒六月又有六十餘戶來住該地俄官予以耳麥而救之矣至庚午我民又以饑驅渡江有雙城之開拓蓋自甲子至庚午七年之間在烟秋墨河溝等地餓殍累累俄軍官指其軍糧每人予以耳麥一斗而僅得暫救剝樹皮採草根猶不能繼父子相離夫婦生別至有烹兒而食父母併死者清人以斗穀買我女子故有姑婦兩人同賣而活其家族者有饑民九十六人乘清船向秋風地至海參威觸礁二十二人溺死餘人賴俄人之救而上陸一日僅行十里八日始抵雙城借俄兵之土窟而居之此雙城開拓之始也辛未四月貧民七十餘戶男女三百十五人隨俄官指導沿與凱湖經花發浦至黑河乘船至沙曼里下陸曠野無際森林參天俯仰上下罔知着手乃一夜落雷森林大燒於是構造家屋開墾荒蕪雖有俄人

之給糧若干而恒乏於食乃捆屨織筵鬻諸九十里外俄人之村賴以活焉以淚播種收樂之實至今人口繁昌家產贍足求學俄京爲高等人物者亦多有之甲戌有海參威之開拓始有草屋五男女二十五人此所謂舊開拓里也至今新韓村均以洋製建築人烟櫛比爲內地勞動同胞之出入口爲愛國志士之策源地教堂學校及報館次第崛起而俄人之軍事上商業上設備隨而完成乙亥八月安炳國金求三諸人有黑頂子之開拓名羅鮮洞土利肥沃不過數年成一大部落是年慶興人洪錫仲開拓鹿屯崔鳳俊開拓香山洞癸未羅鮮洞住民二百七十餘戶被俄官之強迫驅去開拓刀比河甲申金錫甫金正運二人開拓南石洞是年六月韓俄兩國締慶興開市條約因以解除江禁我民始以自由移住俄領丙申三月金光成金景五二人有蘇城之開拓自此俄領各地韓人村落日形繁暢人口達至五十萬以上而衣服飲食風俗禮儀言語文字皆不失祖國之舊加之年來多數志士奔走各地鼓發思想提倡教育儼然有新韓國之氣象矣嗚呼吾族之移殖於此而若是發展果誰之力耶卽以淚汗血三種而得之者惟我子孫其可忘諸舉其一事而言之慶源人蔡某率家族十口渡江至昌營有俄兵之守關者對其處女欲恣其獸行而力拒之九人被射殺一人僅逃至地新墟而住焉至今遇其鎗斃之日行一夜九次之祭噫吾族當日之慘狀尙可忍言哉

以該地社會歷史言之始以勞動團體有色中廳作義派之名目人文稍開思潮漸進紀元四二四〇年丁未有大韓青年教育會之創立是年李相高李僑以密使赴荷蘭海牙府萬國平和會而李僑殉國蘇城金永俊慕僑之忠烈有共進會之組織蓋繼僑之志事也旣而與青年教育會聯合改名曰大韓青年教育會蘇城學校之踵

起多此會之勞績也。四二二年十月義士安重根射殺伊藤博文於哈爾濱，被囚旅順獄，將開公判而俄領吾族組織公共會，購集義金數萬，留聘俄英荷蘭三國律師赴旅順法庭，在美韓僑亦鳩萬餘元而助之。至四二三年八月二十九日，日本勒締合併條約而五千年之祖國遂亡。於是柳麟錫、李相高、金鶴萬等集于海參威新韓村，組織聲鳴會，馳書于日皇，極陳其背信棄義，必致兩國人民流血之慘劇，且聲討日人發電子各國，而署名者數萬人，欲募義兵大舉渡江。因日人交涉俄官而李相高以下二十餘人被囚，嚴加警戒，故遂不果行。既有國民會，爲鄭在寬、朴公六、李剛諸人之組織，與在美同胞之國民會聯絡，聲氣以赤塔爲中心，自烏蘇里各地越烏拉山至俄京，係韓僑所住地，均有支會之設。焉粵三年壬子，李鍾浩得俄官許可，設勸業會，發行新聞，置總部於新韓村，分置支部於烟秋、雙城、蘇城、永安、坪刀、比河、花發浦。其他各地開發，衆智振興，教育克著成績。同時有婦人會，創立於新韓村，耶穌信徒爲其主要培養愛國精神。至己未三月，獨立宣言以後，改名婦人獨立會。四二五〇年八月，因俄國革命之動機，而有全露韓族會之勃興，刊行青邱報，發揮自治思想。至十二月，更置中央總會於雙城，文昌範爲會長，金立尹海等主其幹部分置聯合會于各地。此時韓人以西歐出戰之教訓而祖國思想益奮，置師範學校于雙城，設勞兵會于花發浦，而金起龍爲勞兵會長，金亞歷山大婦人爲議員，與李東輝、柳東說、金立全一諸人協力進行，與俄社會黨聯絡者也。至己未二月，改中央總會爲大韓國民議會，另派代表赴巴黎講和會，而尹海、高昌一當選前往。三月一日，我國內同胞宣言獨立。三月十七日，自國民議會舉行獨立祝賀會于新韓村，於是俄領各處之同胞均一律舉行有韓人新報，獨立新聞，鼓吹獨立思想，又置軍事教育部于

羅子溝募集義金訓練青年此皆日人之深忌而欲滅之者但以俄人庇護之故未能遽下毒手矣今年四月四日日人以大兵攻入海參威即焚燬韓民學校及報館蓋該校以舊韓駐俄公使李範晉寄金千留李鍾浩捐金五千留而建築宏麗爲韓僑教育之最良機關爲彼之忌嫉故也我人之以無辜被捕者七十餘名同時日兵占領雙城捕我人九十餘名加以亂打酷刑崔在亨金理直嚴柱弼黃景燮四人以四月四日被捕翌日當砲殺而彼陸軍省當局者乃曰此四人爲排日鮮人團之有力者四月四日五日間持武器反抗我軍事實明瞭故爲繼續調查押送于憲兵隊宿舍移轉之地彼於中途窺隙逃走欲逮捕而彼等之抵抗甚焉故不得已射擊云

噫彼陸軍當局之言何其遠於實情也崔在亨六十餘歲老人方日兵之入雙城也人勸之避則曰吾有何罪可避耶避猶不肯况逃走乎彼憲兵隊移轉之所距離甚近而載之自動車疾驅如風則焉有逃走之隙以鐵鎖繫其手足焉有抵抗之力乎彼初無審問而直打之刺之加以砲殺乃誣之以此乎崔於平日救濟吾族甚衆爲當地之有力者金以慈善事業爲我同胞之信用者嚴爲民團長黃爲資本家此皆彼之忌而殺之者也且我人在哈爾濱赤塔等地無故被殺者亦多云

第二十四章 聯通制之大讞案

自臨時政府有聯通制之頒布者其大綱有道置督判郡置監督面置司監等爲臨時地方行政之機關與政府聯絡要除日人統治之羈絆而植我自主之基礎具有各項條例之臚示者則亦政治上一大奮鬥也然而彼之

淫威暴力愈往愈甚大小戰戰罔不懼于非辜則實行此制豈不大難哉乃於今年八月頃有聯通制公判之發表者即發生於咸鏡北道鏡城郡而其脈絡通於京畿平安道各地其組織由官吏學生傳道師等知識階級而非貿然盲動者比故有足以驚世人之耳目寒日本當局之心膽者矣其公判經七回而受訊處役者四十七人

金麟瑞朴元赫李相鎬盧春燮宋衡燮全在一鄭斗賢李雲赫金東湜張昌逸崔鎮南朴斗煥尹秉球崔秉學

崔衡郁崔學南朴仁壽嚴日峯崔宗一李熙馥李致遠姜鶴秉玄昌默林正發李東湖張天錫崔昌岳李庸憲

李庸春嚴春燮朴大郁金秉奎嚴基重李永順石麟濟李揆哲尹台善金河經金龍洛鄭在鎬李炳夏宋玖燮

姜尙鎬李在和石麟旭朴相穆李南載姜俊奎李忠馥洪鍾一

公判之開也各人對於訊問有烈烈之答辨而不能盡錄略摭其數條現其一斑焉

倭裁判官問爾有獨立運動乎曰然問如何意味耶曰爲脫日本統治權而使朝鮮人統治朝鮮也問自何時有此思想耶曰自合併日有之間緣何而有此思想乎曰朝鮮爲朝鮮人之朝鮮則朝鮮人之統治朝鮮爲當然故也我等在日本統治之下各種權利無不被奪乃已則有何幸福之可望乎是以我等爲幸福我等之生活而要

求獨立也問爾對於聯通制之七條目併皆贊成乎曰但有幾部分之贊成而全體則否也問於何條不贊成乎曰關於軍事上者不贊成也問何故耶曰我等非但無戰爭之實力而設使有之亦不要戰爭以吾國之被奪非以戰爭也故今求復國而亦不欲以戰爭也問戰爭爲不可避之境遇則奈何曰此則當於其時見之也（金麟

瑞）

今自法庭指我等爲被告者而據法理言之欲覓其自己所有者非原告而強奪他人所有者乃爲原告乎此案之爲裁判官者英國人米國人可也日本人之爲裁判官則決不可也大抵要求自由爲全人類之共同慾望而我等要求自由何罪耶且我等之要求獨立決非私心而由良心之懇願也日本人獨無此等要求乎三千里疆土盡是留置場也監獄也設使我等減刑而得出其爲不自由之罪人則一也以我等之希望獨立而罪之則二千萬執非罪人耶彼傍聽者亦罪之可也今對我等加以重罪謂使我韓人畏懼更不敢獨立運動而獨不知此等政策益予我韓人以反感決死求獨立耶甲家之物乙家奪取而甲家起訴則裁判官何以處決乎（崔宗一）

第二十五章 大韓光復軍之猛烈行動

吾族獨立運動之第一步純以平和穩健而至第二步遂進於猛烈矣蓋其始也據民族自決主義期以正義人道脫人羈絆而得自由幸福故務要尊重秩序率由正軌要彼反省還我固有之權位共維東亞之和平矣彼乃以殘忍虐殺加之於我兄弟姊妹則吾族遂有與之俱死之志於是獨立運動進於猛烈如軍政署國民會大韓青年聯合會大韓獨立團大韓光復軍總營及各處決死隊冒險團等所在蜂起沿豆滿鴨綠數千里盡爲戰線區域自義州平壤京城至大邱釜山日開爆彈之聲則由彼之殘暴有以激成之者孰謂吾族變其初志而出此乎

大韓青年團聯合會

三月一日宣言以後學生趙在健咸錫殷吳學洙池仲振朴永祐等在中領安東縣組織大韓青年團冒險猛進

期達獨立目的而安秉瓚爲總裁會員至數千乃被日警搜獲安秉瓚趙在健朴永祐等七人被逮入平壤法院處一年六個月禁錮而秉瓚以病甚得保釋遂逃歸寬甸縣弘通溝於是金承萬金時漸等更組大韓青年聯合會益張機關而安秉瓚爲總裁金燦星爲副發行報紙激勵人心募集義勇以備戰鬥聯合一百五十餘團團員至三萬餘人既而平壤青年團長朴履俊團員桂在燮朴日球等十一人組織獨立新聞之機關且以爆炸彈擊警署而被逮安岳郡冒險團員李賢洙被逮而爆藥二十五個雷管二個導火線四個被押收平壤共成團以軍資募集及印刷物頒布而李根培皇甫德三崔慶善李景善金潤基黃炳斗崔仁寔楊濟殷朴基福女學生韓宣善等被逮价川郡共成團員玄基已朴道鉉白啟洪崔尙鉉朴濟鳳張德健李景善吳琬鍾金昌涉朴萬熙等以聯絡安東青年團配布獨立新聞而被捕大韓國民會韓族會秘密青年團等所在糾結矣厚昌郡守桂應奎殷栗郡守崔丙赫及日警日謀等爲青年團獨立團所殺者日多全國大震彼乃認此兩團爲危險勁敵派軍艦四隻遊弋鴨綠江遮斷聯絡線派兵一中隊包圍英人商會怡隆洋行之船搜索韓人而不獲乃給中國巡警謂以逮捕強盜突然來襲弘通溝青年團根據地亂行射擊咸錫股中彈重傷並所持金四百八十元被掠奪安秉瓚朴禮玉吳能莊梁允禮金應七五人被捕而以鐵棒猛打後仍欲掘地埋之適以韓人刑事中國巡警之抵死反對而乃止押交寬甸縣中塗秉瓚等渴甚索水彼投毒藥於水以予之五人不悟而均飲之卽毒發嘔吐昏仆秉瓚尤劇喉腫管閉勺水不入口者十餘日寬甸縣知事黃祖安素重秉瓚之爲人且憐其病甚而釋之宣川青年團長朴炳翼以下金景斗朴根冀嚴承道李元成等男女七十餘人被捕彼施以惡刑以竹針插入于

指端爪膚間連十指穿過兩節結縛倒懸後灌熱湯于鼻孔亦有被鎗劍而死者

大韓獨立團

上年三月頃趙孟善趙秉準等在柳河縣三源堡組織大韓獨立團朴長浩爲總裁白三圭爲副趙孟善爲總團長趙秉準尹昌壽康有常邊昌根金承學梁基河等爲幹部安秉瓚爲顧問置總機關于西間島中央置各支部于內外要地爲戰鬥之準備矣

大韓光復軍總營

大韓光復軍總營合青年獨立兩大團而組成者趙秉準爲參理部長趙孟善爲司令部長李鐸爲參謀部長而安秉瓚金燦星李鐸安同植等爲之發起金承萬吳東振等傾其家產購辦武器聯絡內外置本部于滿洲置中央機關于京城置營于各道郡置隊于各面而以暗殺隊放火隊爲先鋒擊殺日人官吏及親日派賣國賊焚燬各警署奪取武器光復軍渡江之日一齊呼應全國一致開始戰爭爲其劃定者也

義勇團長金錫瓚黃海道鳳山郡人今年五月頃來滬受臨時政府之命回至平壤以病入紀翁病院治療多日陰募同志復入滿洲受光復軍總營之授計不日渡江爲激烈之舉而猝遇日人刑事之搜索卽以手鎗射之刑事重傷錫瓚遂與金明哉林承業等被捕受訊而平壤平原各處青年坐連累拘囚者甚衆

吳學洙郭山郡人池仲振定州郡人以大韓光復軍之先鋒隊欲將武器輸入內地搬置于安東縣之舊鍋七月上旬頃臨時政府特派員李裕弼洪利寬等自上海來抵交通所而有多人同宿日警乘夜突躡吳學洙池仲振

金允浩等受彈重傷而被捕者十七人是日怡隆洋行船主英商喬治夏適以事往新義州日人謂其同情於韓黨而有幫助之證直拘而置獄以致英政府有質問日本外務省之事自此日人在當地見韓人輒射致多死傷八月三日夜半平壤第三部警察署突有爆彈投下廳舍一間并琉璃窗盡破壞日警官二名即死全部警官及應援隊各持鎗劍四出搜索逢着行人輒行取調翌日午后一時警官二名在七星門外箕子陵前遇一青年認爲殊常欲行取調其人猝放手鎗警官受傷而倒又二時在西門外警官一名被短刀刺傷同日爆發之前市內有大韓光復軍最急警告文之發佈者獨立團員洪植金時馨金宅昇金宅泳金泰嘉高鳳俊白義範鄭贊篆等在鴨綠沿岸與敵抗戰而死

十五日新義州車站有爆彈投下破壞待合室之窗壁多乘喫驚

宣川郡警察署於九月一日晨突有炸彈暴落壁壞窗碎該署警吏等大驚即派巡查六名分路搜索又署長以下宿直者三人亦同出發連續放砲而投彈人已烏有矣該署有無數彈片之散落又有書類四十五枚之墮在者曰最急警告文而略曰我等顧念天下之大義國家之危急而告于諸君第一告于爲敵國之官吏者我等今爲國家之危急而冒死奮鬪爾等乃爲仇虜之鷹犬而害我同胞乎爾等若不及今速退踰仍如舊則無私之霹火落於爾等頭上矣爾等刻即注意一以保爾等之生命一以保爾等之子孫須速辭退也其次以請捐財產家爲題目而曰我等爲國家冒死作事而爾等但欲爲守錢虜乎宜隨其財力盡誠義捐援助我等之光復事業也又其次以速速舉義爲題目而曰我等今以共同一致而起矣當此危急之時義當共事不可苟且生活亦不

可坐而待死云云而未乃署之曰大韓民國光復軍總營印

既而信聖中學校生徒朴治毅光復軍決死隊員李學弼金應植三人被逮受訊云自今年夏秋以來各處獨立團均取猛烈行動道廳警署多被投彈襲擊

八月十五日據日總督府警務局發表三月十二日台山面長及面書記被砲殺奪去公金八百餘元同日義州警察署刑事被暗殺其妻重傷同二十日新義州警察署刑事在義州古館面受傷二十四日同郡水鎮面平安北道道廳之日人獸醫一名被砲殺四月七日有人被殺其妻重傷九日鐵山郡餘閒面事務所被燒十八日昌城郡新昌面憲兵補助員一名被暗殺六月十二日朔州郡九曲面巡查駐在所被襲巡查一名殺死二名重傷六日江界郡文玉面事務所被燒八日碧潼郡松西面事務所公金七百餘元被奪巡查一名重傷十日昌城郡大昌面長被砲殺十五日渭原郡大安洞公金八百元被奪同日碧潼郡觀會面事務所被燒同郡警察署巡查被傷同日江界郡小貴面事務所被燒七月六日江界郡文興警察署巡查一名被砲重傷自此物情憤懣所謂官公吏及其他有力者非有警吏之保護則不敢出門一般富豪皆貯金額以爲應給獨立黨之準備或有避往他道者宣川龍川義州龜城各面長等併皆辭職

據日憲兵司令部調查自今年三月至九月一日被獨立團之殺害者二十九名負傷者二十三名官公吏死亡者十九名負傷者十五名而其中大部分由平安北道管內而起被害者爲憲兵巡查刑事面長等其武器種類大半六穴砲或小槍短刀與木棒也警察署之被燒者兩處面事務所及憲兵隊爲五處云

獨立團員金仁俊膂力絕倫今年十一月頃潛入漢城募軍資爲日警所覺欲來捕之仁俊出手鎗射之韓人刑事一名卽死日警一名重傷仁俊超越數家跑去竟被四面圍捕入獄。

各處暗殺團

田一三和郡人年少有奇志入中國爲奉天師範學校畢業生因擔教務甚得學界之同情三月一日宣言以後與同志李鐸李錫(兄弟)申斗湜諸人謀爲激烈行動以擊殺日人官吏破壞官廳爲第一着手製造炸彈數百枚將輸入國內矣九月十五夜在奉天城內大成館所置炸彈一個墮地炸裂田一卽死李錫潛逃至上海從救國冒險團長金聲根之請爲其幹部今年四月十三日入銅鐵機器廠欲購物品乃以炸彈嫌疑者被英警拘致日領館引渡平壤警察署矣城津人李容石端川人趙學吉義州人吳興三等輸入爆藥發覺被捕

平壤人林鍾英鄭正協李昌敏江西人朴冕河金仁華李承斗金京斗等自上年秋密組韓民會內置通信警告暗殺進滅救濟等各部廣募會員鳩資金以其半送交臨時政府其半助給由外入國之獨立黨員且密募軍資金及行暗殺計劃乃爲日警偵捕入獄

江東郡居李致漢李錫敦崔仁澤李竹水李得馨諸人組織秘密結社農民團多方援助獨立運動先從穩和繼以猛烈着手投炸彈江東警署爲其炸毀故日吏窮搜該團員被逮者共十二人年紀多在二十一二歲云今年四月八日日本軍輸運隊乘火車行經鍾城羅南地點忽軌道爆炸日本當局嚴密搜探而卒不獲其人咸與新民團長金德宣與同志諸人暗裝武器往來日軍警戒綫爲暗殺運動爲日警所偵與同志六人併被逮

鐵山八邱元範爲崇義團長與同志數十人決死舉義乃被日警射殺

四月十三日自日本警視廳特別高等課有日京市內重大事件之發見者韓商金南一中央郵便局員朴某及其他韓人五人被捕而有秘密調查云

又據一報在日京韓人乘日本國務會議計一舉而粉碎之運搬爆炸彈幾乎成事而被發覺日本官憲以該事件付之極秘而乃其上下震駭各報謂如此計劃爲直接韓國問題之重大影響云

七月二十九日由總督府警務局發布尹少龍李成宇黃尙奎郭在曠李洛俊金鉞煥金奇得等七人之爆炸彈案即暗殺總督以下各大官破壞總督府及京城日報社東洋拓殖會社等大建物之計劃也客歲三月獨立運動之起也金鉞煥尹少龍等在密陽郡主倡運動故金鉞煥處役六個月尹少龍處役一年六個月郭在曠金奇得黃尙奎參加運動後與尹少龍入中領吉林省東寧縣小綏芬交結李成宇及其他志士而尙奎任軍政署會計課長管軍資金出納事務組織義熱團決計爲激烈行動先學製造爆炸彈之法同年九月上旬頃在曠奇得兩人來上海欲購爆炸彈以乏資不果還到吉林辦得若干金與成宇更來上海至今年二月始得爆炸彈三個及藥品與趙賢尙協議從中國郵便以小包付送于安東縣某外國人即趕到受取後與尙奎少龍共謀仍留同志李洛俊家以輸入爆炸彈及募集資金調查情况等晝夜踴躍遂經洛俊之手運送于密陽郡青年團長金鉞煥更入京城日易其寓所密查總督府及東洋拓殖會社及京城日報社之情況研究投彈方法乃被日警破獲逮入

獄

慶南決死隊長黃泰益上年三月謁天道教主孫秉熙孫囑曰當此改造世界之大機運宜參加政治方面爲國家擔重任盡力於國權恢復也泰益遂與同志諸人從事獨立運動至今年三月九日在晉州玉降里密組慶南決死隊援助上海臨時政府期達獨立目的修決死隊名簿及排日歷史書以晉州爲中心遍行勸諭于固城昌原泗川山清咸安靈山宜寧陝川等地廣募同志且往來京城聯絡上海繼續進行三月上旬總督齋藤巡視南韓地方故爲乘機暗殺之計而無如彼所到之地警戒嚴密軍警如林遂不果行繼聞以釜山築港式祝賀會而有政務總監水野及其他大官之來者期欲遂其所圖復以警戒之嚴密而止泰益更派同志于釜山身入固城郡九萬面華林里山中與天道教慶南青年會長金義鎮及林台俊盧聖和黃鎬益盧應凡姜在淳姜大規等密議進行乃被晉州日警之偵知被逮入晉州檢事局

六月二十六日夜自大邱警察署召集巡警多名包圍府內南山町嚴密警戒後刑事等突入韓人家逮捕犯人押收爆炸一個火藥二百五十餘枚至曉拘留置警察署卽政務總監水野之至大邱驛也欲投彈擊之以警戒嚴密而不果者也

七月三十日夜駐延吉日領館警察隊探知我軍政署決死隊數名潛伏于龍井村與新洞韓人部落而突入襲擊張鴻國等四名被捕而有爆炸一個之發見云

十月二十五日東京電云各報載稱某海軍工廠有朝鮮工人私藏炸彈二百枚已被查出其人則逃往九州據警察聲稱近來常失炸彈後輒於韓人居處搜得之據某韓人報告前在日本陸軍中學畢業之韓人李某曾

在朝鮮邊界設一陸軍學校現方教練軍官百人警察又稱曾發見下關有一韓人黨而若輩陽在商店服務暗中收集軍械炸彈等運往朝鮮云

日本福島縣古川炭礦所管火藥庫爲韓人金自福(二五)日人北里甚治(三二)兩人所破獲得炸彈八百五十枚及雷管八百隻以助韓人運動之進行金氏因爲日吏逮捕云

第二十六章 徐相漢金榮哲朴在赫三烈士

徐相漢慶尙北道大邱人以高等普通學校學生渡日本東京入明治大學修經濟科更入正則英語學校修業害於學資爲新聞及郵便配達夫之勞役年今二十歲美容貌有奇才舉止端雅志趣高尚諸學生皆尊敬之每語同志曰我爲何等事業決不顧惜生命也今年四月二十八日英親王李垠娶日本芳子女王而齊藤實李完用將來參婚式相漢欲因此機而殺之併破壞日本內務省外務省警視廳以發騷亂惹起世界之注目助長我獨立運動之氣勢身裝藥商寄留本鄉區金耆秀旅館密教日人少年上村安五郎上村欣作兩人購得藥品多製爆彈有韓人中央大學生申某者其友也相漢不知其爲日諜而告以所懷借至王子原試驗爆發得其成績遂決意實行將以配達夫之服入英王邸兼備手鎗二柄以待之乃爲西神田警察署破獲入獄受訊役六個年謂由申某之告密云相漢之兄弟三人皆志士也伯相一以參獨立運動而被囚經歲仲相奎入俄領西伯利與俄民黨得其同意以圖光復云

金榮哲平安北道寧邊人年今二十八歲爲人豪俠勇健而以信基督教之故不吸煙不吃酒早喪父而母寡居

無兄弟姊妹之獨子也舊韓時代暫爲軍人伊藤博文解散我軍隊寺內正毅合併我國家榮哲悲憤慷慨志決光復遂入南滿洲韓僑住地鼓發祖國思想揮其血淚者十年紀元四二五二年三月一日國民有獨立運動聲勢甚烈於是榮哲在滿洲爲光復軍之決死團長今年八月美國議員團視察東洋將由中國來韓榮哲認此爲一種機會乃身裝商人貿取北布裹置爆彈手鎗彈丸等物于其中背負徒行由間路風餐露宿一千五百里得抵京城而平津洞李昇鎮其戚屬也乃投宿焉托言賣布與市人論價謂損害至百餘圓對於主人亦毫不現其幾微也蓋其計趁美議員團入京之期卽以爆彈手鎗襲擊總督府及警察署大起動亂俾美議員團悉我獨立運動之若是激烈也此時國人對於美議員而或投文字或表歡迎陳其衷懇亦有滿洲光復軍警告文之散佈者以此之故日人之警戒十分甚嚴偵察非常周密尋常行旅動被搜檢榮哲乃以奇計無事入京將以二十三日舉事先期一日與同志八人入華人飯店雅叙圍舉盃爲永別之詞時有日警一人之來者顧視室中而出焉榮哲目不少瞬泰然自若俄而多數日警乘自動車各持手鎗馳若迅雷突入捕之榮哲猶笑容滿面九人俱入第三部警署徹夜取調更逮其連累多人榮哲處內亂罪

朴在赫慶尙南道釜山鎮人爲人沉深剛毅爲商業學校畢業生以校長日人福士之介紹爲三井物產公司辦事數月怒日人之無禮而辭退轉爲電車公司之役員又與日人衝突乃棄之航渡南洋造飴糖售之以資生聞吾國民宣佈獨立而臨時政府設於上海遂拋商事來上海許以爲國犧牲遂回釜山以九月十四日要見當地警察署長橋本秀平笑容可掬少爲屈身而置物於桌上忽有轟然大炸聲爆發衝破屋頂白烟滿室警吏皆失

色罔知所措既而烟散有一白衣青年在桌傍亦受傷視之乃在赫也遂行捕縛而橋本傷右膝關節膝蓋骨粉碎矣日裁判廳檢事四人急馳汽車而來將在赫入病院施急救術後嚴行訊問

第二十七章 美議員來韓時之光景

美國上下兩院議員四十九人組織東洋觀光團今年七月初自美發程八月五日抵上海由我臨時政府及各團體爲之歡迎函呈文字表示熱望獨立之誠意其至北京也政府代表安昌浩呂運亨等訪其旅邸具述日本併韓後壓迫之情況及今回獨立運動之理由繼續進行之方針冀以正義爲助該議員團二十三日自奉天發程翌日將抵京城蓋爲觀覽朝鮮之文化及人物制度也

駐奉天之日本軍隊於美議員團抵奉之先盡速城內外居住之韓人男子二百六十餘名拘於日租界之日本憲兵營美議員離奉後翌日始釋出蓋日人聞旅滬韓人與當地韓人俟議員抵奉時爲獨立運動之預備並將運動之真相有陳述之事故預先拘捕也

義州市有人力車夫十餘名聚集呼大韓獨立萬歲大起騷擾一時羣衆齊集和應勢頗猛烈日警多名馳來鎮壓首謀者一名被捕

郭山安州等鐵路沿線之韓人男女四五十名或七八十名揭美旗呼萬歲議員團一行及其夫人等均開車窗手揮帽子及手巾以表感謝之意

平壤道廳自經爆炸之警大加警戒府內各街均有數百餘名之警官晝則帶劍夜則荷鎗逢人輒檢其身市民

雖有要事不敢外出至於車站一切行人之往來者必檢其身體行李至他各地亦然美職員之到着也併禁止行人

議員團過開城車站時羣衆幾百名會集大呼萬歲日警即以武力解散之首謀者一人捕縛且該地人士欲於車站歡迎者多而日警嚴禁韓人不得入於車站區內至有被毆重傷者

京城二十三日夜半有大韓中興團警告文之散布市中者略曰此次美國議員之入城也全部市民宜盡行撤市若不應於此者有相當之罰云於是各商店盡皆撤閉雖警官勒令開店而無從之者乃自警察署招其管內之各店主懇諭開店而歸仍不開是日留置監內罪囚三百餘名大呼萬歲

二十四日午后八時議員團到着南大門驛受內外國人之歡迎而沿路警戒則若鐵桶矣翌日赴國際親和會及齋藤之招待後周覽市內及昌德宮景福宮高等普通學校商品陳列館秘苑南山公園漢陽公園總督府醫院醫學專門學校中央試驗所工業專門學校等

此時韓人爲歡迎會使國際親和會幹事日人丹羽清次郎介紹議員團以邀之得其允諾二十五日下午三時半在青年會館爲開會之準備忽於午后一時有國際親和會員日人來告以美議員不得出席之故韓人謂日人之言不可專信派李商在往問於美議員則答以自日警務局以非公式來告曰公等若要赴韓人之歡迎會則隨意爲之而設有危險沿道警戒不欲爲也若是則余等不必苟焉而赴也致孤韓人之厚意甚爲缺憾惟祝韓人將來之多大幸福云則韓人歡迎會遂失望矣惟以紀念品贈與之事協議忽有一自動車冒雨而來身着

黃色服裝胸掛條星旗卽美議員和理思滿也會衆卽下階迎接導升講壇青年會員具禮久(美人)高舉雙手會衆齊應三唱和理思滿立而禮謝表其熱情韓人演以正義人道奮鬥向上之問題和理思滿答演曰朝鮮青年諸君乎我等雖本國水陸數萬里旅行四個月訪問東洋欲以熱誠遊覽貴國然現在我等爲日人之賓不得不隨日官憲之指導雖不能報答諸君之熱誠歡迎而一見諸君欲說我等悵缺之衷情以個人微行而訪諸君也見貴國山水明麗我故鄉加里布亞州之山川入於想像見諸君之面亦如敵國之青年向上之活氣與光彩充滿也諸君務要盡力於學術工業諸種進於向上務以正義人道奮鬥是所切望也余與諸君無張皇說話之時間余雖歸敵國而所得於諸君之印象永遠不忘也衆皆拍手喝采至有感激下淚者李商在答辭曰我等之親愛美國非以其國之富強也惟其順上帝之旨意提倡正義人道故也衆又拍手乃日警察署長帶巡查四十四名突入會館指美議員而命其巡查曰善術此君以去也美議員出館後八百餘名之會衆盡被監禁於館內美議員觀此情況問何故監禁若不解決則余亦不去也詰難良久乃退會衆亦無事散歸於是韓人贈議員團以紀念品每人銀盒一個刻以韓文(美國議員團朝鮮視察紀念)於議員等之家族夫人則以精製之竹器盛以朝鮮式果子又有開城蓬萊社寄贈之朝鮮名山人蔘

第二十八章 日本藉故彈春劫案派兵強佔

日本欲吞滿蒙苟可以逞其所圖者直冒天下之大不韙而皆悍然不顧矣至若滿蒙及西伯利之鬚匪殺越人貨擾亂治安爲積久之鉅患者也乃日本之退伍兵士如小泉等潛入該地勾結匪徒供給軍械指揮搶劫其事

實已證明於世界之公言而亦彼報之揜諱不得者也彼所謂文明國民者乃悍然出此豈其個人攫金之目的乎抑由其本國有所指授乎蓋彼以滿蒙認爲生活根據地而墾荒作業占其多數者爲華民而韓人次之彼欲移殖其民佔取其地而非摧殘此兩族之勢力則不可是以利用鬍匪迫害其產業損傷其人命且欲釀出事變以爲派兵佔據之計已非一日故年來兩族之村落經焚掠之慘禍者在在相望而屢有日人參加之發露者矣今回琿春之遭匪難也彼謂有吾獨立黨及華兵之參加者尤何其誣也蓋此案亦由彼之狡謀醞釀以成而爲其藉故出兵之機會者也先是日人誘鬍匪以擒我獨立黨員而來者酬以多金鬍匪信之擒我義士七人交付日人而砲殺之日人乃食言不酬此該匪等恚恨日人者也且琿城之日領館在北山下華人工兵營之側匪徒欲破琿城非先襲據工兵營則不可也九月二十九日匪首萬順鎮東等各率四百名携大砲二門襲陷琿城先擊工兵營而華兵六十名韓人七名死於此日領館亦被襲擊而無死亡者彼乃藉詞剿匪卽派二師團不行交涉直佔琿城驅逐華官迫退華兵而對於匪徒置之不問無一匪之受討者則其意不在匪明矣一則佔取中領之野心也一則撲滅韓族之毒計也觀其佔琿後一切行動豈不灼然乎且彼謂韓人有參加匪黨者確係誣言若有韓人之參者在琿韓人豈有爲匪所殺者乎

韓國志士全星奎吳濟東金在鎬宋桂元四人於陰歷五月初二日因事過吉林濛江縣海青岡上爲鬍匪長江好部下所擒以去匪等每日施之以砲烙針刺等惡刑要求金錢數萬元全氏等四人被執經四朔至八月初九日與承光宇方成柱玉富潤(此三人亦係韓人而現往柳河縣三源浦者)等七人於臨江縣六道溝鴨綠江

上森林中俱被匪等所鎗擊六人即死獨吳濟東受傷至十一處而幸未至死匪等散後爲韓人蔘商所發見六人屍體卽埋葬於該地附近吳被救得生

據該處居人所傳述則八月初八日自六道溝鴨綠江邊森林中砲聲連發三次繼有黃色服裝之日人四名搬載彈藥箱五駄渡江向砲聲響處而去既而該四名中二名回去二名卽留與匪等同事云

且據吳之所述則伊與六人俱被匪等槍殺之時日人以快鎗數百柄每柄附以彈子數百枚交付匪等又據匪等所漏出之消息云日人所交付之快鎗約五百柄而彈子則每柄爲二百枚云

其後長江好與其同黨僂子在濛江縣謀投順官廳擬以其所得鎗彈返還日人請求金錢日人大怒拒之復以計誘長江好入韓地捕之以漏泄秘密(卽交付鎗彈之事)及背約無信責之示以欲殺之狀長江好既入樊籠中無計可施不得已通信於僂子及其部下極力搜殺韓人履行日人之所要求云云從此在西墾島一帶多數韓人之生命爲贖長江好一人而皆將慘殺於日本鎗刀之下矣

美人大陸報北京通信云有一外人熟悉琿春情形並於琿春動亂(卽引起日本軍隊之佔領延吉全部及朴西脫海灣)之時適往該地者頃對通信員述當時情形云攻擊琿春之盜軍實爲中國人但係由日本人加以訓練供給軍械並維持其用費此日人雇用之盜軍其總機關部在俄境之尼古爾斯克前曾屢次攻擊在滿州東北部之韓人村落但並未成功因韓人皆有準備臨時又抵禦極力故也有兩次攻擊時有日軍隨行以壯盜兵之膽一次隨行之日兵共五十人又軍官五人至攻擊琿春時是否有日兵在內言人人殊故無確證當攻擊

之前數日當地華人接有警告書信謂即將來攻此警告之用意蓋欲使華官懼而求援於日人果然如其願望當地華兵司令請日軍援助日人派小隊兵前往商量防禦之法決定日軍及華軍共守一城門迨攻擊實行之際乃發生糾紛蓋日人雇用之盜黨到該城附近時適遇真正鬍匪一大隊此隊鬍匪併不願爲日人効力但恰巧亦欲搶劫琿春兩方經再三協商後乃決定日人之雇軍攻日兵防守之城門鬍匪則攻華兵所守之城門雙方同時進攻在日軍防守之門僅放數鎗彈日兵即許彼等之同盟盜軍入城不復抵抗在別一門之華兵則奮勇抵敵亦將鬍匪逐走後知他門之盜軍入城大劫一切已在盜軍控制之下乃不再抵敵盜匪搶劫之中並攻劫日本領事館並未殺人不過日兵曾退往該處而已搶劫既罷兩盜軍又合而協商其中一黨亦決計不再爲日人所用當遇日兵即力與爲難迨會寧方面之日本軍馳來援救兩盜軍合而猛擊之兩方死傷頗衆此一役也即予日人以口實佔領延吉全境矣

據路透社十月十八日電信云日政府已派遣戰船駛赴朴西脫海灣又出兵佔據中國琿春以及延吉全境查日人占據西伯利亞之海濱省與夫海參威俾日軍得以管轄延吉區域並因此而得管領由西伯利亞至高麗之海岸全綫實足以大壓慾望自本年高麗起事西伯利亞又復多故該兩處避難人民充斥於延吉一地而日本屢以彈壓土匪爲藉口故現實行出兵佔據該地云又中國人士均確信此項土匪實係日本暗中鼓動以便日兵佔據時得以諉爲維持秩序云云

第二十九章 我義軍四戰四捷之奇功

我軍政署在吉林和龍縣訓練士官整飭戰具人人有決一死戰之概而因兵力不敵給養難繼不欲速戰惟汲汲焉先事準備而已乃九月旬間有中國軍人之干涉令我撤退即迫於日人故爾我乃不得已以九月二十日組織旅行團而士官畢業生二百餘人新募軍隊二百七十餘人司令官金佐鎮旅行團長李範奭領率發程向安圖縣先期有西軍政署之代表洪範圖之代表來議聯合約以會集于柳樹河而決定之該署軍隊爲備冬服滯留十餘日而有琿春事之發生矣我軍以十月十六日到三道溝十八日聞日軍三大隊自茂山襲來我軍遂入青山里據要隘伏於森林之中敵果以大隊趕至我軍突出猛射敵即死者四百五十餘名傷者六十餘名後隊亦懼而退却我軍雖獲勝乎而以兵寡難敵即由山谷間遂向二道溝乃失路迂回數十里以致不能直達乃敵軍料我必往二道溝而先已馳至分路搜索左右巡回忽彼與彼遇認彼爲我交相發砲死者一百八十名傷者七十名以我軍衣帽與彼同故也二十二日敵又以一聯隊一大隊馳入二道溝而斥堠隊五十名全沒敵以密集隊呼突擊三次而我軍猛烈拒鬪敵之死傷者數百餘名遂不支而却我司令官金佐鎮慮彼先據北山率一隊先登而敵之大隊隨而登焉當日軍號敵以白旗爲之而我亦白旗也故我軍疑之以韓語呼之而敵以日語答之故我軍遂行射擊敵之死傷者二百五十餘名餘皆退走于是我軍從林中潛逸至三十餘里麻老溝而憩焉敵之援隊增至而不悟我軍之已退也即行包圍縱火南北兩方稍存隙地伏其大隊而伺之不見我軍聲跡乃彼兩方之伏兵不通知而分路搜索又復自相衝突致斃二百餘名我軍之鹵獲者速射砲五門騎鎗三十挺子彈五千發馬二十疋軍刀二十柄雙眼望遠鏡五對腕掛時表二十個軍用地圖六枚也據我司令部查

報曰敵軍死傷一千六百餘名中國官廳調查曰日兵死傷一千三百餘名日領事秘密報告曰二道溝戰役加納聯隊長大隊長二名小隊長九名下士以下并軍兵死亡者九百餘名云而青山里之死亡未有確報也彼斬死者之馘載而運往者爲十六車亦多衆之目擊而公傳者也蓋是役也敵衆十倍于我而皆訓練有素習於戰鬥挾有各種器械之精良者其加之于我奚啻泰山壓卵之勢者我軍大半爲新募入隊不過五六日或三四日最久者不過二個月而亦飢餓數日不堪疲憊者也所持不過小銃機關鎗而已乃四回激戰殲敵千餘名而我軍無一人死者只輕傷者五人是以我韓人勿論而華人歐人莫不爲之歎呼如雷詫爲世界未有之奇功雖其終也以食盡彈絕至於退却而其強武之氣實現珠里珠申之本來面目可謂雖敗亦榮者矣

第二十章 倭賊虐殺我良民之大慘禍

嗚呼世界民族爲國捐軀者何限而豈有如吾族男女老幼之慘被屠殺者乎歷代戰史縱兵殺掠者何限而如彼倭賊之凶殘暴虐者未之或聞也白起之坑長平四十萬項羽之殺新安二十萬爲殘忍不道之極而尙皆戰鬪員也如彼倭賊之虐殺我西北間島之良民同胞豈歷史之所曾有者哉蓋吾族或以凶殘之飢驅也或以喪國之恥辱也扶携渡江毫無藉人庇護能以赤手披荆斬棘自成部落忍辛耐勞漸形發展乃悟人類之不可無道德也子弟之不可無教育也教堂學塾隨處相望窮林荒野野弦誦洋溢華人歐人均稱其有仁厚之俗亦爲韓僑最有希望之地乃彼倭虜陰懷忌嫉而欲乘機除之者久矣乃於今年十月藉故揮春劫案陽言剿匪調遣三師強佔琿春而撲滅吾族爲其決行所謂將佐指揮多兵將各處村落人家教堂學校及糧穀數萬石付之一炬

將男女老幼加以砲殺刀殺杖殺縛殺拳殺踢殺磔殺生埋火燒釜烹解剖穿鼻穿脇剖腹斬首鑿眼刮皮斬腰釘四肢斷手足人類之不忍觀者爲彼娛樂之事我同胞或祖孫同殺或父子併戮或殺其夫以示其婦或戮其弟以示其兄或喪人抱魂魄箱而逃難者遭兄弟俱斃或產母懷襁褓兒而避禍者被母子併命其外許多罄竹難書我人及華洋各方之查報猶不能悉其慘狀耳

西北間島各地倭賊蠻行及我人慘狀調查表

▲自十月五日起至十一月二十三日

琿春縣各地

地名	被殺人數	被捉人數	強姦人數	被燒家數	被燒學校	被燒教堂	被燒穀類	備考
金塔村	一〇			七〇				
電綫村	五			二三			九二〇	
烟桶礮子	一〇			一四			五八〇	黃炳吉家搜素安義士文書押收
大荒溝	七				一			
頭道溝	一七五			二九三			八三二五	

東溝一帶	四二			五七					
計	六處	二四二	八	四五七	一所		九八二五石		

延吉縣各地

局子街西溝	八	六		七	一			金昌根王金鵬被捉
倒木溝		四		二				許相勳許件煥 姜義權被捉
陽九河				一〇				
小營子	六〇	五〇	二五	七	一			
九水河東溝	一			二				
八道溝	幼兒 四			一〇	一			
依蘭溝	六〇	一七	二	一五四	三	四六二〇		許取權李松金在亭金 熙金海寬李南極李鍾 彬金淳被捉當強奸之 閨秀一人自盡
銅佛寺北溝		六						
灰幕洞	六		四	三〇	一	四五〇		許靈瑞金剛被殺
岔頭溝	一			二三		六九〇		
見長溝	三	三						

藥水洞	許門	大教洞	六道溝	救世洞	完樓溝	二道溝	寬道溝	蜂蜜溝	細鱗河南溝	柳樹河子	九戶村	神仙洞	瓮城磗子
二七〇	四五	四三	三五		一三〇	二二〇	二	五	二五				三三
									七				
	八	六	二		五	二〇			四				
五七	二六			一		三四〇		二	五〇	九	九	二〇	四〇
一	一					二			一	一			
一	一					一	一			一			
一七二〇				三〇		一〇〇〇				二七〇	二七〇	六〇〇	一二〇〇
				韓大震家被燒		梁亨植家被燒 九歲女兒強姦	許東奎之弟被殺		著名砲手孫某 被殺老幼燒殺				李大河金光德被殺

和龍縣各地

松墟市	四六			一一五		三七六〇	許益根朴道勳被 殺青年三人生埋
計	三五處	一一二四人	一〇人	七六二〇九四戶	一九所	七所	一五五八〇石
大母鹿溝							五六
獐岩		七五		六一	一		一八〇〇
九龍坪				二五	一		七五〇
慈仁江		四		二七	一		九五〇
漁郎村				三〇			三二〇
土門子				三八			九二〇
會寧村				五九	一		一八二〇
大廟溝			一四	四			一五〇
小廟溝				一			五〇
南溝			七	一	一		
小五道溝				二			

章洞	東良	勝岩村	馬牌	厚洞	三東浦	石峯	柳嶺	高麗炭子	三道溝上村	西洞	德化社南坪	南湖上下村	西里洞
五		四	一五		一	一〇						一四	八
	二七	一		三	四	五	一二	四	全燒	四	二	五	三
													一
八〇〇													
			教員曹健植被殺										

琵琶洞			三					
鳳梧洞					全燒 六七			一九〇〇
大洞		三〇						
菜營溝	三六			一七				六七〇
計	八處 三四七人	三人		六四二戶	五所			五〇七〇石

寧安縣

海林	一七							
----	----	--	--	--	--	--	--	--

西間島各地

興京縣 旺清門	三〇五							李時恒池夏永李鳳奎 李載允李瑾真被殺
柳河縣 三源浦	一二 一二五							安東植韓重建金世鐸 崔時明方炳杰被殺
柳河縣 孤山子	一							小學校長郭 鍾穆被殺
寬甸縣及附近	四八〇							尹昌壽被殺(光復 軍參理部參事)
湯子溝	一			全燒				康龍五康乘善康秉 軍參理部參事)
長陰子	五							基文世湖田某被殺

右表現據緊急查報而未得全數之詳確者故更有待於後日之續報也

英文京津泰晤士報云本報在遠東雖與日本之方針立於反對之地位然所持之理由亦甚正大故對於日本在華種種舉動大抵不畏其強暴竭力攻擊今晨復接得確切之報告言日軍在間島種種橫行無狀真切詳明亟爲披露想閱者讀此當無不爲髮指者夫日本藉口保護僑民生命財產貿然侵入中國之疆土本報前曾推源其始實由於中國之疆吏因循貽誤知日本之處心積慮而不爲設備以致釀成國家之大患故中國之疆吏實不得辭其咎再則揮春事變以後日本迅即派兵深入華土雖生命財產略有喪失而獲得實行侵略計策之良機事實種種雖非日本之故意構造要亦日本所一致歡迎日盼不得者也惟日本之陰謀尙未完全敗露與論尙持柔和之態度以爲日本之派兵侵入中國之疆土完全爲剿匪之用者然則日軍在間島之行動實乃證明其反此讀者所不得不震駭而切齒者也

前月本報曾將日本兵入間島時種種野蠻行動一爲揭載今復承深知實情者之陳請將日本種種殘酷之狀略爲揭載庶他報所不敢揭載者亦得公諸世人之重人道者

第一報告中所述爲一老者彼係泊家枯(譯音)教堂之領袖平時亦未嘗與高麗獨立份子有所來往及與他同等無罪之六人於夜間一時爲日兵自彼等家中曳出屠殺並洞穿兩耳而死並謂其家人若敢以手觸其屍者立即鎗殺又有一外國教士欲向日軍司令官領取護照藉以保一身之安全日軍官謂之曰吾人正在憤怒之時雖見英國人亦必殺之汝若欲外出汝自負其責可也云云由此即可見日軍態度之一斑矣

本報今復將日兵之罪惡史略爲臚列如下惟人民之被殺大半皆不問情由不加審判於黎明時行之而被所謂高麗獨立軍者其聚集之處距此天昏地暗處尙有七八十英里也(地名均譯音)

(一) 枯塞洞 教堂均被焚

(二) 南姆 教堂學校均被焚

(三) 鍾山 教堂學校均被焚被殺者一百人婦女則被焚死

(四) 漢拿浦 教堂學校均被焚

(五) 瓦落溝 教堂學校均被焚

(六) 屋爾托溝 婦女慘受虐遇

(七) 雷馬苦覺 教堂學校均被焚

(八) 烏窮鐘 學校被焚

(九) 塞本苦兒 房屋被焚

(十) 土覺麥塘 房屋被焚

(十一) 所乾洞 鎗殺十七人

(十二) 沙克苦覺 焚斃者五人

(十三) 鐘塘 殺十一人大學教堂被焚

(十四)沙立泊苦兒

殺死多人

(十五)蒙塘

大學教堂被焚

(十六)長苦兒

學校被焚

(十七)惠景海

所殺自五十至百人房屋悉焚

(十八)三姆本

鎗殺五人

(十九)正柴溝

鎗殺三十六人房屋被焚十九所

(二十)瓦鐘加

鎗殺數人

(廿一)所可兒溝

夜中曳出鎗殺者六人

(廿二)頗加溝

被殺多人

(廿三)依蘭溝

槍殺十人

(廿四)南洋村

房屋被焚

(廿五)可揚宮

房屋被焚

(廿六)色溝

房屋被焚

以上罪惡種種俱係外人所目覩者一至夜間火光四起村落成墟景象悽慘不忍目覩有所干洞者日軍於該處各村捉得十四人牽至曠野之地於該處挖一巨壕復命其他村民供木柴煤油之屬於是將此十四人鎗殺

焚燒枯骨擲之壕中人亦無從別其父子焉在鍾山則全村被焚者三聞男女被殺者在三百人左右云尙有多人係在家中被燒殺者日人心猶以爲未足於二號日本元帥回任之時復強迫所有韓人悉懸彼日本國旗復有一老人年已八十目覩其二子爲日兵所殺已室被焚復將二子之屍投入火中此老人亦遂躍入火中一同焚斃可謂慘酷矣

復有一報告其中所云尤爲慘酷茲爲節錄如下距龍井村四十里有某村者日軍於夜間一時到該處即勒令各戶居民離室而每人甫離室即放鎗擊斃每戶殺死二三人不等於是悉集其屍縱火焚之復焚去房屋教堂十九所外國某教士親見其慘狀數其新墳共得三十且見孤兒寡婦繞其左右啼哭甚哀此等死者俱是良善之民即彼空言革命者於日軍入村之前早已遠颺所被殺者悉老弱無能之輩而已某教士復云彼親見拿配(譯音)教堂被焚之時有韓人六名手足反縛擲諸火中而在高麗蘇旺(譯音)慘殺事則先將教民閉諸教堂之內然後縱火焚其教堂云日軍之凶饑似專對教徒而發凡有教堂之村落無有倖免者云云(下略)以上所載俱事實之彰明較著者本報以維持人道起見特爲登載任世界各文明人種之評議日本政府之行動既如此日本人民中當不乏具有人心具有明見之人未知彼等對於彼政府之舉動有所表示與否也

中美新聞社譯英文日本廣知報云日兵在間島慘殺韓人大燒村莊一案頃本館接到當地英國教士若干人之署名證明書多通該教士等皆素有聞望熟悉當地情形此等證明書皆先經親身調查而後爲之茲彙錄於

後

第一書係駐在榮城（譯音）之坎拿大長老會教士馬丁醫生所作彼於十月三十一日親往拉璠巴威村視察即出事後之兩日也其書云「日本於中國極強抗議之下派兵一萬五千人至中國境內之間島以掃滅耶教徒尤注重於少年人爲目的日日逐村焚燒槍殺少年村人目下周圍此鎮之村莊盡在焚殺之中以下所述事實絕對真確爲記者及一英友所目擊吾等於十月三十一日破曉時離榮城而往璠拉巴威村該村在一小流域之項距此間十二英里是日爲日本天皇誕日故途中日兵日警均不干涉吾人既轉大路忽見遠山濃烟四起是即吾人所欲到之處也茲將許多目擊者所述該村於二十九日所遭實況錄下是日破曉日本步兵全體戎服圍此主要耶教村莊即於流域上部起縱火將一大堆未打穀之麥穀焚毀繼令屋中居民出外凡男子不論老幼立即鎗斃其人尙未氣絕即將着火之草撥上其身此將死未死之人都痛極跳躍流血模糊余等曾目擊此等血跡至於屍體則瞬成焦炭不可復識僅有殘肢散見灰燼中當作此殘酷舉動時迫令死者之母妻或兒女作壁上觀同時縱火焚屋全村瞬付一炬烈焰冲霄遠見十數英里外一村畢再燒殺他村沿山谷直達大路各村盡遭此劫日兵乃回營慶祝天皇御誕當吾等到附近各村時僅見婦孺與三數白髮老者婦女抱兒沿途狂哭吾等最後見一韓式大屋尙在焚燒其四周焦黑一巨堆則三年間存積之食糧之灰燼也一婦人背負一幼子手携一八歲之女孩偕一老翁老翁戴一新製之喪冠同在三新墳之旁席坐余詢知此老翁係耶教徒其兩子均被鎗斃地上灰燼中屍體衆衆余等翻撥之見一老人屍體中鎗彈數處體已焦枯僅其首未焚着耳吾等攝影數幀再往流域之顛時距放火時已三十六小時然尙有燒屍之惡臭及屋頂崩墮之聲路上又見四

婦女各負一孩各坐於一新墳之旁哭聲慘極余旋又攝殘屋十九所之影彼時皆見有老翁痛哭老媪少婦則在灰燼中撥取殘肢斷骨及未焚盡之什物余旋請村人合而祈禱同時余助彼等移一屍體出灰燼中覓得其斷足斷手安置原處亦爲攝影彼時余怒極竟不能握固攝影器攝之四次始成當祈禱時教外之韓人華人觀者甚衆無不垂首流淚村中之禮拜堂與小學堂均成瓦礫一堆計全村新墳共有三十一此外被燒殺之村莊爲余所確知村名者共有三十六村殺死居民共一百四十五人房屋焚燒時有婦孺一併燒死者在蘇能屯地方有十四人同時鎗斃復以火油木柴燒其體云」

第二書爲駐在漢城之坎拿大長老會教士曼斯非爾德氏所作彼於出事後十二日到該村其言云「余自十一月十二日到瑤拉巴威村見在其教堂與小學校之四周約有住屋三十所皆耶教徒所居已均成灰燼在一屋中所有穀一堆尙在冒烟余在村中留二小時除自行視察外又聽村人講述余曾於若干死灰中覓得人體碎骨若干據余所目觀之種種情形似皆能證明馬丁醫生所紀述者均屬確鑿也」

第三書爲駐在榮城之坎拿大長老會教士福脫氏所作係述別一村中之情形其言云「余於十一月四日到奴路八維村周察村中村人示余以日兵於十月三十日鎗燒村人三十一人之處余目觀住屋九間及教堂學校之灰燼一切情形皆與余前此所聞者相符據村人自述日兵燒殺三十一人之次日又有日兵十七人日警二人又韓人警察一人同入該村村民驚極然不圖逃各出而就死男子既死日兵然後呼死者寡妻出考問死者之歷史一一記之於冊又令諸婦簽字然後再召集大衆對之演說告以所以加此嚴罰之故又詢自昨日行

爵後有無外國教士來此作何舉動與村人有何問答繼又令村人將諸死體搬集一處先是村人有已將屍體掩埋者至是乃不得不復將殘骨掘出日兵乃布置燃料將屍骨安於其上縱火焚化日兵視其已燼然後示意欲去但謂必須帶一犯人同去一老人自言願行日兵則指定老人之長子（年二十五歲老人向有二子一兄已被鎗斃焚歿矣）迫令同去全村之少年於是盡矣揣日人之意顯然以爲老人不足副彼等之目的故必挾其子去後知該少年在獄中火至次晨尙未熄云』以上諸教士復以各處情形列爲一表送與本報其語云『報紙中皆載三星期前日兵之來意在撲滅有礙日僑之五百盜匪疑係韓人與俄人而大半則爲中國人彼等在彈春摧燒日領事署爲勢甚張故日兵之來也吾等與韓僑皆不爲意日兵在此間勾留可一星期乃復出發前進旋據報告則日兵竟有入崇奉耶教之村鎮燒毀學校教堂情事吾等初未敢信然事實具在鑿鑿可考觀下表所列即可見兩星期間日兵行動一斑矣十月十九號在南谷塢教會領袖之住宅與學堂皆被毀教堂被燒惟損失尙不甚鉅同日在鼓西塘（譯音）一耶教徒之居屋被燬十一月二十六號在烏土谷耶教徒之居屋四所被燬同日在蒙塘（譯音）有一十丈長之磚造校屋被燬并燬一教中長老之住宅又同日在努北（譯音）有一可容三十人之教堂被燬學校亦及於火十月三十號在江長巷（譯音）教堂學校並住屋九所被燬被日兵鎗斃者二十六人尸體投火中焚之以上諸事由回教士與一稅關員於兩日間詳加考察并與各該地住民談話極可憑信以下所述則爲韓人目觀之事似亦可靠吾等不日亦將前往查問據云日兵在鄭山（譯音）焚燒學校教堂屋一而作兩用者此外住宅被燬數所死者三十人其二十三人死於彈七人死於火其在

恩東開(譯音)猖獗尤甚教堂學校既被燬鎗斃者八十人凡此皆耶教徒聚居之村鎮此外不遑舉慘死甚衆日軍所過由一統領率之每至一處未嘗與其地住民有所接談卽爲慘無人道之舉旣畢事則匆匆向前其過努北也統領跨馮爲導至一教堂之前立命兵士停步舉火燬教堂與學校揚長而去惟在鼓西塘則曾破例宣布其燬屋之理由日兵僭一韓人通告民衆謂彼屋中主人因集資供高麗作愛國舉義之用故燬其屋以儆果使受日本慘虐者皆爲犯罪之人則雖韓人亦不與反對奈其間多爲無辜與貧苦之人亦一一處死欲申辯一語而不可得在江長庵一帶率爲窮苦婦女憂寒冬之將至無以自贍并贖其兒女而此等家庭中之男子皆爲日兵鎗斃其住屋與所有一一器物均爲所燬其田中收穫業已採割貯積者亦盡焚之此等婦女多有不襪不履者其貧苦可知日軍破曉入村從鄰村中挾六男子來卽與江長庵所捕諸少年並列一韓人屋前不加鞠訊盡鎗斃之又從一屋中捕得一父一子另一屋中捕得兄弟二人並一子逐戶抄搜合得二十五人俱受刑旋以諸屍堆爲二積掩以木柴舉火大燒間有傷未受死者掙扎欲起則刺以刺刀卒至焚死而後已吾於此等人知之甚稔彼等聚居之地爲一幽僻之山谷工作勤劬以圖生活心地亦仁厚未嘗有過惡所知者惟上教堂聽講而已爲政者於此苟尙有仁心存者自不應使此種殘暴不仁之事繼續不已也』又榮城坎拿大女教士潘爾索女士亦有日軍暴行之記錄其語云『十月念九清晨有日兵一隊約四十人至榮城五里外之蘇企爾古村中捕販賣聖書之商人葉公錫時方在鄰家閑話此鄰家主人與其他三人亦均被逮細縛而去初執至臨時陸軍司令部亦未訊問卽送入領事署獄中數月來所捕政治犯皆禁錮於此夜旣深卽有兵士一隊來執諸人

至浦企爾古村附近一小山上其地去榮城可三英里山巔有一巨穴街中不能見其一面係鬆土兵士等至此卽令諸囚坐穴底以刀亂刺之據目覩者言因擊之甚力刀竟斷其二最後則以刺刀刺諸人死是時血肉模糊非有心人所能卒觀事後則以鬆土推墮而下遂將殘尸掩沒矣次日葉公錫子携衣服數襲赴榮城日領事署省父署中人初不語之以實第謂乃父不在是葉子百方探詢終不審老父所在厥後村中有人在山巔發見穴中殘尸始知其死而葉公錫亦耶教徒也嗚呼慘矣』

大陸報社論云日本齋藤中將頃代日本陸軍省發表一宣言措詞甚奇其目的在減輕日人在間島（中國土地）殘殺韓民之責任然而日兵之罪名殊不能因此而未減其所招世人之輕視誚責亦不能因此而緩和誠以彼輩濫殺基督徒焚毀基督徒之家宅其罪實不可道也且此宣言實不啻自承其罪彼企圖以殘殺之罪加諸教士決無人信之反使人對彼之全部宣言十分懷疑也齋藤中將之言曰『彼指日兵殘暴之教士實卽爲此慘劇之源韓人不明真相不知反抗彼等之真正怨家余實憾之』又謂『日本固准許完全之信教自由但不能容許叛逆舉動以危及帝國之基礎』雖然此次慘殺之事固行於中國境內齋藤中將因自言日兵因華官請其退出中國境彼乃不得不趕緊從事殺戮於是耶教徒之生命大危綜言之凡此兇劇日人乃當中國抗爭日軍在其境內之時實行之日人固自認之矣此豈正當之舉動耶至於當時之事實則據駐在榮城（譯音）之坎拿大長老會教士馬丁氏所述謂日本駐在間島之兵共一萬五千人當時此等兵士將韓人耶教徒盡行殺戮焚其住宅毀其食糧對於村莊則按村焚燒而此等村皆在中國領土上也茲將彼報告中關於瑤拉巴威村

之一節錄下『天破曉時日軍步兵全體戎裝圍困此主要基督徒村莊即從山谷上流起放火焚燒麥穀堆繼令屋中居民悉行出外無論老幼男子遵令走出即行鎗斃其人尙未氣絕即將未熄火之草撥堆其體上此將死未死之人都跳躍以圖離去火燄以致流血模糊余曾目擊此等血跡至於屍體則瞬成焦炭不可復識僅有殘肢現於灰燼中由作此殘酷舉動時迫令死者之母妻或兒女作壁上觀旋復縱火焚屋全村瞬成焦土日軍乃再往他村焚燒耶教之住屋從山谷直達大路各村盡遭此劫然後日軍乃回營慶祝日本天皇之御誕』馬丁氏言被燒殺之村莊爲彼所確知村名者共有三十六有一村中共殺死居民一百四十五人中國國力孱弱固無力以反抗此種從來未有之暴行然彼豈不能向幾全由耶教國組成之國際聯盟會控訴乎彼駐在當地之耶教教士又豈不能上書於國際聯盟會求申冤苦乎

路透社二十七日上海消息云路透社得滿洲可恃外人方面確實消息據云十月二十三日日軍步兵五百人携機關鎗與野戰砲由奉天起行向東而去後在撫順下車整隊東行二十九日行抵興京遍發請貼邀興京附近之韓人三十一日齊赴興京慶賀國慶節屆時應召而來者內有黃新門基督教堂之領袖等九人迨行至東昌太(譯音)距興京東二十一里時竟爲日兵拘去而幽禁之大半日兵留駐興京該處行事適因公赴奉天全縣安置軍事電話三十一日舉行慶祝十一月一日清晨日兵出城而在東昌太被拘之韓人九名則移之數里外然後置諸死地不聞其有無罪狀也或斫其頭或刃其胸被殺者內有教堂耆老三二人學校教員兩人是日境內有一韓人教堂被燬越數日又有一教堂被搗毀日兵欲燬之幸華人出場干涉謂縱火焚燒禍將延及全村

無辜華人十一月四日復有一教堂被焚聖經等書悉付諸一炬並拘去八人內有三人一係教員二係教堂耆老已在教堂殺死其慘狀與前述者同查被殺之朝鮮教徒既與獨立運動無關尤無政治上之成見其遇害之地點與被殺之情形爲訪員所深悉地係華境日人如此行爲全不顧及中國主權華人對之感情如何自無待言

中國東三省旅京學生聯合會接汪清來函歷述日人在琿之暴行及其侵略野心其略云按延琿和汪四縣內共有入籍韓民七八十萬內中暗行組織獨立軍者固亦有之日人頗以爲隱憂欲除之而不能但又恐釀成大禍故要求我國檢查其信件以杜絕其獨立音訊我國無法只得允許在各郵局由當地公署派員到局檢查日人仍不自足復要求進兵延邊我國未允不意鬻匪於十月二號攻入琿春焚其領署傷害日人十一名日人即借口進兵張大其詞目爲尼港第二借題發揮不可理喻故於琿春事變之後朝鮮總督即派兵進我國境琿春約有萬餘名係由海參威而來延吉和龍六道溝各進千餘名汪清亦進七百餘名按汪清縣內並無日本僑民又無日本正式領事只有一領事調查辦事處內有日人四五名其進兵更屬無理已極所有進兵各處日即代我國人執行站崗之權午後過九時即不准行人往來又安設軍用電話於各處日軍雖名爲剿滅獨立軍而來但其垂涎延琿和汪四縣已久日人間島之名稱至今未忘無非欲得此而後快也按其九條要求中內有一條云「天寶山銅礦須另訂章程」查琿春之事與天寶山有何關係其居心叵測可知而知天寶山銅銀礦出產最富現由中日合辦日人欲獨得之以絕我國富源聞島到手即可直窺內外蒙古吉會鐵路一成直將三省入其

掌握中此次交涉關係非淺實乃我三省存亡之秋也再日本所進之兵全往村落山溝中搜查獨立軍真獨立軍早已望風而逸遭殃者無辜之韓民也僅就汪清一縣而論據各處報告韓人之被殺者已約千餘名不知者尚不在列日兵每至一韓人宅中即行翻查箱櫃若有一字一紙稍涉獨立之性質立即將其全家人口一律鎗斃並焚其宅舍及糧食汪清東大狹子大荒溝托盤溝大汪清各處韓人受害尤深其嚴苛之手段慘不忍聞有鎗斃者有活埋者女人多以刺刀刺死彼韓人數百戶之村落能逃出者只十餘人耳韓人之學校教堂亦一併焚燒於十一月二十號由汪清北捉來韓人十餘名用繩由手心穿過牽之而行亡國之人真不如喪家之犬此次韓人之生命財產損失不可勝數表面上雖爲韓人之損失實則亦即我國之損失因彼韓人皆入我國籍之墾民也日人強使主權侵我主權目無中國實屬已極現在日兵不但不撤且又加添辱我國體可恥孰甚此次雖形式上中國未受何損失但無形中間接受之損失亦不可計算商業蕭條行人不自由大道行人日兵強行搜翻見有金錢即行持去人皆敢怒而不敢言農民房屋被佔雞豬被偷者不可盡述言念及此心痛如傷此地音信阻塞內地多不知詳情以上所述皆爲切實之事日人之橫行越俎非與之決一死戰不可不然吾國無升騰強盛之日矣(下略)

第三十一章 西報對於韓日戰爭及日軍罪惡之評論

▲日人大敗死亡二千人

▲華兵誘日人協捕韓人

▲華人須知間島問題不亞于山東事件宜提議于國際聯盟

夫吾族之獨立運動爲世界各族之均表同意者豈不以正義人道爲人類良心之大同故耶至若中國以地理乎則有唇齒之密接也以歷史乎則有數千年治亂興亡之聯帶也至于今日尤有死活與共之關係使吾國而獨立乎則滿洲山東各問題自歸根本上解決而得堅固之保障矣則中國人對於吾族之運動而袍澤之念宜非他族比也況在東省之韓僑多係華籍者則中國官吏與軍人之保護宜與華民同也乃客歲三月吾族之在延吉者宣言獨立口呼萬歲而華兵出而干涉射斃韓人十九名此固華人全體之引而爲恥者也今回我獨立軍之在和龍縣者不欲與日人輕戰而惟努力準備爲乘機進取之計矣乃華兵起而侵導日人節節迫逐我獨立軍進退無路不得不拚命死戰斃日軍二千此西人之目擊其狀而揭佈各報者也至若日人進兵琿春虐殺無辜韓人大恃人道該問題不亞于山東事件宜提議國際聯盟者亦西報之公評也中國人獨恬若無視乎字林報北京解爾脫氏八日通信云頃得可靠消息日人韓人在圖們江以北之頭道溝地方交戰甚劇此事已發生多日京中纔得報告奉天兵奉張作霖命令正在協助日軍剿滅滿洲境內之韓人所有調用之中國騎兵均在奉吉兩省之森林內及山間節節驅逐韓僑向東逃走日軍即在該處守候以此項策略之結果近有武裝韓民三千人聚集於頭道溝附近與一人數略衆之日軍開戰韓民既無退步又知投降則必遭慘殺故屢次拚命死戰其結果則日軍大敗此敗耗日人秘不宣僅遼東日日新聞曾載大略云日軍陣亡二千人團長一人被捕韓人奪獲槍械一千餘枝機關槍若干尊當此戰爭之前韓僑中之長老曾嚴切告誡韓人不得與日兵衝突

因恐日兵藉口侵入中國領土並命所有欲逃之韓人均匿在森林之內迨華兵起而助日人相逐韓人乃不復能靜匿故此戰事大半爲華兵所迫成目下韓人極爲窮蹙日人可由奈拉米（譯音）及會寧等處調派援軍而韓人則進退無路呼籲無門苦之至矣現在被華人從奉天境內逐出之韓僑避居吉林城內者又被警察拘捕甚多云

中美新聞社譯密勒評論報云日本之軍閥果不出他人所料現已實行其所下之決心欲將間島境內之高麗人無論男子婦人或小兒一一殲除之即荷重之獸畜亦在不能逃免之列間島在吉林省內蓋中國之疆土也以下諸語出京津時報記者手其人初無偏見頗作持平之論其於日本人在間島所造成之慘怖情形在社說中頗能撮其大要言之其語云「間島日本佔領軍之所爲與合并高麗時之所謂日本義軍正復相同其行事之慘無人道震動世界往往全村皆爲毀滅其受酷刑而死者即不以數千人計亦必數百人其對待遺骸之法尤狂妄無度直與高麗人民以一種最深刻之惡感日本軍隊之在該處殆以行竊施劫爲其職務之一即田莊中所有牲畜亦多有被焚至死者全部之人民咸驚極逃竄當此東北嚴寒之天其所被苦痛殆非吾人意想所及基督教堂中人俱覺日本人疾恨已極故見待愈嚴此次間島之事尤足證日人之深惡耶教主義傳布於其所欲統治之地爲不可掩飾矣此中詳細情事無可駁斥述者爲外國人士誠實無欺富於責任思想則於彼等所述自可深信不疑也」日本兵士之作不人道事也即在其軍官左右此等軍官遵率上命一聽兵士所爲不加抑制苟彼狂悖冷血之日本人恣行其野獸食人之舉無人起而止之則吉林省內數萬高麗人將不能保其

生命以訴說日本人殘暴不仁之歷史矣日本於一方面以監野蠻之手段待無辜之高麗人一方面復竭力設法圖將間島歸之日本數星期前本報曾於社說中論及其野心之計畫觀於今日間島之事則所說一一驗矣據間島方面可靠消息日本人已設立民政署設承審彈春東甯彈河及其附近諸地之民政案件日本警察已徧地皆是非爲保護秩序也第欲與中國警察相抵觸而使未死之韓人心中大起恐慌之念日本政府現已要求間島特關日本租界日本人民似已預有安排立時如潮而至似又新發見一土地者然日本以此多數人移入間島其後果挾有何種主旨東京知之世之人皆知之預料東京方面見局勢上不必復隱時必將宣布其主意而不諱曰日本又自中國得一領土矣今日日本兵隊之長驅入中國境內剿平所謂盜匪殺害高麗人與高麗耶教徒設立日本民政署設置日本警察大遷日本人民入境凡此種種舉動皆爲間島并入日本帝國之先聲並爲對於中國第五條要求重提之前步此項要求而一旦允之則中國即爲高麗第二矣今日本如暫時退兵則其所提案件決欲得一隨時可派軍隊入春彈之特權明知中國不能允許此項要求則彼將派兵入於中國他處而仍以同一條件爲要求卒至中國各地他日俱有日本隨時進兵之權日本蓋即利用中國之拒絕其請假往還爭論之機會而謀於間島邊延勾留以鞏固其地位也中國人民亟應請北京政府向日本提議組織一萬國調查委員會以平心公正之外國人士共同調查間島爭執之點證實日本兵士在中國境內虐害無辜之高麗人與中國人事并根據國際公法以研究日本要求隨時派兵入中國一端爲合法或不合法者苟日本對此提議不表同意則北京政府應提出於國際聯盟以聽公判一方面詳舉日本在吉林之種種行動徧登

歐美報紙以促聯盟之注意須知間島事件其重要正不亞于山東事件如公理正義猶未盡死者則國際聯盟中決不能漠然拒却也吉林學生現已在報端列記日本人在當地所犯之一切罪惡當此危急之際此舉於國家不無裨補也

附世界輿論

論日人之侵畧暴虐及韓國上下之反抗

美人訖法博士 前韓帝國學部顧問今獨立後援會會員

余關於韓國人之要脫日本壓制而舉其幾種事實告我美國國民以韓國獨立要求言之去三月一日數百萬韓人純以平和的方法絕叫者而日人對此加以諸般壓迫之殘酷矣是以數萬名韓人被其毆打惡刑傷害而且多數女子受其凌辱矣

以此可驚之道德的愛國運動究其由來則韓人緣此要求而前途有如何困苦者固明確豫測矣然而與其生爲異民族之奴隸不若死爲自由之魂爲其決心故有此奮起也今要陳述韓國獨立運動之歷史也先將過去日人之對韓政策而略述之

自紀元前六世紀至二十世紀日本對韓國政府而敵對的侵略的無一時之或絕矣一千三百十九年韓國名將有擊破日本海賊使日人不得繼續其入寇者除此時期以外過去二千年間日人恒對韓國恣行其橫暴掠

癸亥一千五百九十一年日本又以巨大之軍隊侵略韓國（壬辰倭亂）此戰役延至七年韓國與中國聯合得以平定而此時韓國人之當虐殺者居全人口之二割後三百年日人止其侵略矣

一千八百八十一年頃韓國與外國開始通商而日本即時加以毒手一千八百八十四年日人誘起韓國之謀叛者以兵力爲後援而畢竟不得成功可憐當時諸內閣大臣當其斬刑矣中日戰役告終後一千八百九十五年日本雖以形式上承認韓國獨立然經濟上商業上及其他各種利權盡以無理要求故當時韓國明成皇后對此拒絕彼乃以此忿怒當時駐劄韓國之日本公使三浦梧樓令其鹿兒島刺客等入于闕內弑殺皇后處之火刑追審其玉體則只餘手指一片而無他餘存者然而日人猶爲不足更脅韓國皇帝組織逆賊內閣處皇帝監禁日人又利用其奴輩脅皇帝廢后詔此日人侵犯他國皇室神聖之標本也

或讀者諸君有疑韓人何故在日本手中而不力於西洋人物之輸入者然而在日俄戰爭之前韓國人固欲以可及的疎遠日本矣

日俄戰爭開始之日日本即與韓國締結韓國獨立永久保障之條約蓋此條約之動機原不誠實者勿論而自初日人不要其履行者故締約不過幾日而事實發露即日本以自己之臣民在韓國內掠奪橫暴惟意爲之而視若不見無一次制裁則日本之所謂盟約不過一紙片也

此時韓國皇帝據韓美條約若韓國有當危機之時則美國予以相當之援助者既有盟約而今日本之壓迫加矣於是告于美國政府特請援助而有皇帝親書其書曰

貴國一八八三年與敵國修好爾來貴國政府及人民對於敵國表莫大之好意及同情矣貴國代表者恒常爲敵國之利福及進步發展而盡力且貴國所派遣之教育家以多大之努力教導敵國人民矣

然而敵國未能如貴國之冀待而無顯著之進步發展者第一諸列強之政治的奸計爲其基因也第二敵國有自身之過失也日俄戰爭之初日本政府向敵國要求締結攻守同盟爲得陸海軍運送之便宜以敵國之領土港灣軍用地之借用請求軍需品之供給而日本爲敵國之獨立及皇室之尊嚴安全康寧而確實擔保敵國以應諾此要求之義務忠實履行若俄國得勝利則敵國以援助日本之嫌疑必當俄國之併吞敵國爲日本而不辭如此之冒險矣

然而背信的日人至今破棄條約且無視一九零四年條約（議定六條）規定之盟約欲以敵國爲保護國然而如此行動以下記之數種理由到底不可也

第一日本緣此而爲背信者從而損傷公法遵行之國家威信矣

第二過去二年間以日本之行動觀之日本對於敵國決不行善政者明白矣過去日人對於敵國人行其橫暴無所不至而日本對此無一次制裁以日本之故敵國之財政狀態陷於紊亂之極點且日本對於敵國之教育進步及文化發達一無貢獻矣一言以蔽之日本之行動無一不出於利己心者也

今若敵國之獨立被日本之橫奪者敵國之損傷究至何境耶自此日人益以自由對於敵國人加以虐待壓迫

矣

朕亦以改革認爲必要所以歡迎日人之顧問且樂於採用彼等之忠告矣朕非不知過去之過失者然而以此書言之非爲朕之自身而全爲敵國人民而送之者也

日俄戰爭之初敵國冀待新改革及新幸運而歡迎日人矣然而日本自初不行真正意味之改革者明白而可憐敵國人徒陷於日人之奸策而已

敵國若當日本之合併者其損害不可一二計而第一損害之大者使敵國人失其進步發展之刺激物也自此敵國人之腦裏獨立可能之希望似乎滅絕矣夫進步發展者國民的意識自認以一國民之資格爲必要若當合併於日本而敵國民沒却其國民性則惟有絕望更無其他也若至如此則其順從日本而盡其忠誠者姑捨而自古敵國人對於日本而腦裏所抱之嫉視心益以增加懷疑及憎惡益以助長而已

或言如斯重大事件之處決也持感情的態度爲不可云而朕惟感情者人類界諸般動作之原動力也且友誼之同情及義俠心在於各個人及國民間未之消滅者朕所確信也

謹以貴國對於本問題予以義俠的精神温健之判斷且考查本事件復對於當此危急之敵國予以適當之援助切望 御名御璽

韓國之自由戰爭 (英人字林報)

麥聖西著名之戰爭通信員前泰晤士報記者也近受該氏編述之一冊稿本足以惹起全世界之注意而其書首之冊名自示其內容之如何矣因日本官憲之嚴密檢閱及去年中世界的問題太多而在遠東之外人對於

昨春發起之獨立運動而詳知其顛末者不少矣麥氏詳密研究於韓國內情者合併前二年著一冊曰韓國之悲劇而刊行之麥氏立證其非盲目的排日僻見而鼓吹者矣

該氏曰日本之國性與成功無有加於余之讚揚者矣以余對於日本人及日本軍人之私誼親分足以爲余之好感矣日本所取之帝國發策必爲世界將來和平之障礙而日本受軍閥派之制裁近者發表之政策修正者關於日本之計劃慾望而無何等實質的變遷者余自信矣若以此信任及表示而爲罪者卽與余同感之日人多數忠君愛國者共負其責矣麥氏又曰韓國合併後日本執政者以同化政策之成功爲目的使韓人言日本之言語行日本之風俗禮節期於達此而使韓國孤立剝奪言論出版身體等之自由韓人之有前進性者盡加拘束建築多數之新獄施其惡刑釀出無數廢人及死屍矣

對於昨春運動之鎮壓而氏之批判尤爲劇烈而以露骨的聲明矣日本之治韓政策對於所謂政治犯初無審問而直加以大規模的惡刑而已略舉其惡刑之種類學生多死於惡刑少女脫衣裸體加以足踢以卷烟火烙其身男子以巨繩縛其母指而懸吊加以酷打至於氣絕多數男女幽閉小獄起居自由姑捨而呼吸亦不可能此等事實之證據皆確實也

以韓國臨時政府之通信類來我社而各處韓人之活動漸入佳境者見之日本天皇之勅令及總理之諭告對於韓人不能予以何等滿足者足以確認矣

美國上院之韓國事情報告書

此書以美國基督教聯合會之決議提出于上院由上院委員麥克密之動議而一致可決登載于上院第六十六回議事錄

緒言

三月初自上海天津來電卽韓國獨立運動之盛況及日本政府暴壓之消息也又四月以該電報爲的確之事實重大之真相者有各處書信之來者此等書信及報告爲免日人之嚴密檢查以外國傳道局幹事之名義秘密傳之其他在韓宣教師與在美之親友親戚間所送書信亦由傳道局幹事之手而傳之皆異口同聲以爲救出韓人於日人之暴行虐待者惟美國之盡力爲必要也

四月中旬加奈多長老教外國傳道局幹事廉斯透魯牧師目擊現狀自韓直到紬育而曾爲視察該局傳道狀況滯留中國滿洲韓國及日本者經十個月及其歸國也路由橫濱中塗接再來韓國之電卽以三月六日更入京城滯留三日尋訪各種團體探其十分的確之狀況回來美國卽時與長老教外國傳道局幹事富那雲博士監理教外國傳道局幹事魯特博士聖書公會幹事惠任恩博士等有商議之結果以其事件之重大自該局委托美國基督教聯合會要其解決矣

四月十六日以聯合會東洋事務局之名義召集會議屢次研究韓國問題且爲討議其對此適當之處理方針至二次會議又請邀有力之日人一團經由此等日人急發詳電子日本者以穩健友誼的方法要得其真正解決者也且輯自韓傳來之各種材料連載日刊新報而先與日人商議認其爲公正態度而實行也然而至于今

日自該局公布其十分的確之報道爲必要也

該局以左項記事充分信憑者以三十人以上之英米人擔任其記事也卽其記事之幾部分爲本局員慎重注意之報告書類其他爲個人之書信及目擊者有捺章之記述也若該局印刷其接受材料之全部則其紙數約達千頁矣就中一報告以細字寫至百十四頁者有之當此世界各國政治的動亂勃發之時若其無實證之記述者必致閱覽者之多大注意者以許多事實每以針小棒大的誇張傳播故也然而左記事實確信覽者之判斷其真假也蓋本記事公佈之爲重要者有兩種理由第一爲救韓國人民於日人之不義虐待而希望其全力保護也第二鼓舞公明正大之輿論卽日本之進步的反軍國主義者使日本對於韓國取公明正大之行動是也本局關於韓國獨立運動政治上問題非有關係者故至韓國獨立承認之可否非本局所判斷也惟本局對於暴行惡刑虐待宗教逼迫虐殺等事當與一切義人至何等限度繼續其抗拒也今聞全韓國內如斯蠻行一向流行者證跡明確矣現時局之解決方法卽對於日本之保守軍國主義者與自由的進步主義者辨別其思想之差異而爲公正之輿論爲必要也健全公平之批評者對於軍國主義者可知其災難之遍於全世界矣日本卽陷於軍國主義者而亦有以人情持進步自由之思想反軍國主義者矣

吾等亦信彼等之在美國者與其美人親友之表同情於韓國現狀者取同一態度推究韓人之苦痛也

日本內閣以平民爲首相者今日始現而亦名以自由黨者然其實不出於從前內閣之施政方針蹈襲其武斷政治之凶惡而已

勿論何國人有德義上觀念者對於日本之進步的思想反軍國主義的運動者有予以多大援助之義務也吾等特於此時有實行此義之道然不欲以全部非難日本政府及人民而但對於日本自古以來長久間支配於政治家之保守專制主義與現今新發芽之自由主義不可無明確辨別而對於前者爲何等之抗拒不可已也對於後者爲何等之後援不可惜也對於中國及全世界之他國而希望亦然惟根本的破壞日本之軍國主義而許與韓人以確固之權利與自由爲先義務也

報告書之章別及大要

第一章述獨立運動之原因論日本之軍國的殖民政策又依某氏公函詳述三月以後數月間之活劇及各地方示威運動之狀況且及於日本之蠻行及警察監獄內之惡刑

第二章調查委員會之報告者略述同樣之事實而對於天道教而有解釋者

第三章視察日本言論界對宣教師非難之例而枚舉者

第四章述示威運動及日人暴行

第五章宣教師目覩遂安孟山虐殺事件其他班石安州江西等地狀況而通信者

第六章宣教師被囚禁於江景地方而記述者

第七章韓人負傷者受瘡於細富蘭斯病院而陳述者自七十二歲之老人至十九歲之青年二十二名之談話也伊等不過爲自由呼萬歲之故而亦有隨衆爲之者而或背受彈丸或肩脚被劍斫也

第八章訪問於個人之事實而自四月一日至五月間採集者也

第九章記具樂書殉死之顛末者

第十章日人在細富蘭斯病院以強制檢舉患者之事也

第十一章女學生陳述訊問中受諸般惡刑之事者

第十二章女學生之出獄者談蠻刑之實狀而直截記載者

第十三章大邱日人之蠻行狀況也

第十四章謄載宣教師之被誣者

第十五章東倉示威運動時多數老人婦女受日兵虐待之事實也

第十六章平壤宣教師之家宅搜索及日人無知之光景牟理氏被捉之光景

第十七章魚丕信醫師以細富蘭斯病院之患者當訊問引致之事報告者

第十八章關於強制開市之一商人陳述者

第十九章非難日本之暴虐陳述韓人之慘狀即加奈多宣教師之私信也

第二十章詳述水原虐殺事件及村民問答者

第二十一章才扁阿得記事之謄載水原事件者

第二十二章以水原事件分六節而最詳細之記事也

第二十三章黃海道地方某教會堂被壞事件

第二十四章一少女子被亂打之談

第二十五章郭山定州教會堂放火事件

第二十六章關於壓迫蠻行而宣教師之詳細報告

第二十七章至三十一章皆各地私信之種種事實也

第三十二章某英人之通信而論難日本帝國主義之在朝鮮失敗及行政上失策者

第三十三章日人調查獨立運動之原因者

第三十四章五月中在宣川之蠻行事實

報告書各章中特抄吾人聊未知者而譯載如左

第一章 韓國之運動某氏報告

一九一九年四月二十一日富那爾氏調查委員會有重要之調查而現今韓國卽其對象而新時代之動搖及於韓國矣三月一日以來日本軍隊之行爲在普魯西主義之手下而解放韓國之時期至矣在韓國之日兵蠻行幾倍於在白耳義之普人蠻行矣據一新聞韓人之在獄中者六千人此其數字勿論事實而運動遍於全國矣其引導者由各宗教信徒及各學校學生而成立焉在法律及秩序之名目下而日人對於人道之罪惡日以犯行矣

日本之植民政策

總舉保護時代併合時代而言之日人之實施於韓國而有幾何改良者亦事實也然而日本不能得韓國之民心矣日本之政策棄英式而模倣德國以劍爲統治之表象而韓人享有之權利太不平等在韓國內而撲滅韓國語特加壓迫於南方之韓人使之流離於滿洲方面矣

韓國示威運動之始初

韓國運動之導火線即講和會議及民族自決主義也朝鮮總督府宇佐美長官在宣教師會談話而其一節有云某韓國學生見威爾遜大統領而問韓國問題爲講和會議之提出乎大統領曰無戰爭之關係者不成問題也又問曰然則在韓國內起反對日本之運動則如何大統領曰果爾則或爲問題亦未可知云矣

一月二十一日前太皇帝崩逝而許多風說散布京鄉形勢急迫三月一日以京城爲中心而急遽開始其大示威運動於是警察全力檢舉多人而羣衆少無暴行學校盡閉矣三月二日京城無示威運動至三月五日有大示威運動起於東大門附近從此京城及各地地方繼續其猛烈運動職工罷業日人對此而恣行其諸般惡刑之蠻行其實況如下

官憲之暴虐

韓國內之日本警察以亂打拷刑爲其恒常使用者故被逮之人必先受其拳毆足踢矣三月一日宣教師欲救一少女而爲數名巡查所捕受其亂打入獄至三週日而不得出矣有平服之日人在警官之前捕縛韓人加以

蠻行非仁京城而其他地方悉有如此之報道矣

出獄人之苦楚談山積矣對於某學生爲強令其主謀者自白而有裂其手指者有以火炙其指端者有以機械壓榨者有以鐵綫繫其手指而懸之足不着地者女學生之受苦楚尤甚出獄之女學生談話如左遠後幾日間囚之警察署一日官警訊問而猛打面及肩脚矣翌日他警官更來亦如此打之第三日警官加以無數之辱說曰聖經云無罪者以裸身居之汝亦脫其衣服也無數惡刑中舉其一例則令屈膝於板房而手舉重板者一時間臂或少動則又加毆打第五日拿該女學生等入西大門監獄令二少女先入而前記女學生令在外少俟矣已而先入之少女出來而赤裸其身解散其頭髮矣其次該女學生等入焉則有警官一人及日人看護婦一名訊問後令脫其衣服則該少女叫呼抗拒終乃脅而脫之看護婦解其頭髮如此蠻行只是侮辱少女之意也已而該少女赤身入房而中途多有監獄服務之男子看之翌日更又被拿而出焉有日人青年醫師稱以檢查更令脫衣爭之良久僅得掩體而醫師但戲弄少女無所檢查還送于獄幾日後高級警官更來檢查腰及胸也諸般惡刑之消息發佈于外而彼日人報紙之論說乃曰此韓人之虛僞也力說當局者決無惡刑之事某宣教師爲之質問則乃曰勿論惡刑之不無而以公式言之故不得不爾也

第二章 示威運動之概觀

(某調查會)

大皇帝之猝崩及民族自決主義爲有力於激起韓國者矣其三十三人代表者一半天道教人一半耶穌教人而其中有平壤吉善宙牧師宣川梁甸伯牧師亦有佛教徒也三月一日代表者等集于京城宣言獨立開始示

威運動而地方各都會亦以同日同時刻而起矣其示威運動之計劃極爲秘密我等宣教師勿論而總督府偵探亦皆不知也乃爲鎮壓此示威運動而施行其野蠻慘酷之方法男女老幼悉被其毆打射擊矣

教會學校自初參加運動而青年男女盡以熱心支持至于今學校閉塞此教師學生多數被逮故也由是官廳強要開校曰不遵者必令廢校果爾則大問題也官立學校亦只以儀式開校而每日教員有幾次會集云矣耶穌教徒之運動激甚故歸罪于宣教師而各新聞亦指宣教師爲煽動者對於北京某某宣教師而所傳之原稿冀其不發表於中國然已掲載於北京天津泰晤士上海大陸報等矣今日吾等爲避其誤解不作旅行而蟄居中也教會引導者曰今日吾人之運動上帝之命也

日本之對此政策惟撲滅天道教大打耶穌教也故北韓地方教會多數破損於日兵之手矣現在日人陽言曰取消前言不疑宣教師云而以出獄人之報道觀之則彼等爲中傷宣教師欲得其證據嚴加拷刑也吾人職務上決不干預政治而目覩各處無罪之男女被其虐殺暴行實不禁自身之欲狂矣

第三章 略之

第四章 咸興事件 (某氏陳述)

自三月二日深夜至三日黎明在咸興市之教會學校學生數名及教師一人被捕而此時咸興未有何等運動矣三日日曜官憲命撤市因此而多數羣衆集于市街突有喇叭之聲於是羣衆隨之三唱大韓獨立萬歲高揭大極旗而各校學生被多數捕縛矣此時消防夫等各持消防火鐵鉤出動而無重傷者三月四日零時三十分再

開大示威運動於是乎日本消防隊各持鐵棒消防火鈎木椎鐵斧等突入羣衆之中左衝右突擊刺韓人頭部霎時間重傷者無數消防夫等拿其流血被面之韓人入于警察署而其中有崔奎瑞者青年學生而其兄巡查也該青年頭部重傷流血如注而被拿而去猶放聲大呼也又一人被消防夫之拿去兩頭有鐵鈎之刺痕面被重傷流血狼藉不可辨其爲誰也又一人傷其左足不堪苦痛發呻吟之聲卽五十餘歲之老人而爲信教者其姓名曰蔡學聖也又朴彝珍者爲某校學生而頭骨破碎經數日幾死乃放送其友人之家此日男女之拿致于警察署者約七名矣此時警官憲兵不以直接捕縛人民而但監督消防隊使捕縛也韓人無一言一動之反抗無一石之投無一棒之揮對日人無一辭之詬罵者至六日咸興全市尙閉因而羣衆更集于市街牛場近地續開示威運動又消防隊突入擊之致傷多人有邊應觀者頭骨傷於鐵鈎幾死入警察署數日不許治療此日韓人亦無投石揮棒辱說等事數日後又據可信之報道距咸興三四里之市場亦有此運動而警官諭散之新興地方以三月十三日呼萬歲而警官發砲致多死傷而有汲水女子之慘死者韓人因此憤激向憲兵隊投石崇德地方有韓人四名之死亡者于時韓人之被捕者衆而教人居多數

第五章 日人之蠻行

(某氏署名)

遂安事件

三月示威運動之初黃海道遂安郡人民赴憲兵隊駐在所宣言獨立且請其撤歸憲兵等答以自京有命令乃可也羣衆散歸經二時後更往他所請其撤歸憲兵等乃發砲殺五名餘多傷者亦多入獄者有一老人抗議其

蠻行即被殺其妻在屍側痛哭憲兵又刺殺之翌日又有二娘子赴憲兵所亦被劍刺入獄經數日彼對獄囚只以飯少許予之而不予以水故不勝渴甚致有飲其小便者經二日拿至于憲兵所而其中數人入于鑛山病院而亦不加以治療故壞而爲疽一人腿重傷而潰一人臂斷以不即看護故也入于病院者有六十歲老人二人

孟山事件

孟山郡以三月初旬有示威運動而憲兵五十六名招致村民往即囚之門內放砲射之而命不即絕者以槍刺之即死者五十三名有三人之得逃脫者此教會婦人報告于宣教師者也

安州事件

安州人民以三月二日夜行萬歲運動無何等暴行而警察發砲殺六名致多傷者警察又搜索各家捕捉人民而毆打婦女摔其頭髮一婦人有齒牙破碎者又傷者之母往于警察署而言曰吾兒若死則必有報讎也警官大怒更往其家劍刺其傷臥者

斑石事件

三月二十九日余訪問斑石村即五十餘戶之村落而有教會及學校去七日有一次示威運動日兵馳來即破碎鐘燈扯毀聖經讚美歌等男子五人女子一人並脫其衣以槍及鐵鈎亂打之男子一人被燒殺學校長之家宅及衣櫃並皆破壞而衣則焚之被捕者數人而有六十歲老人拿至平壤而亂打致斃二十四日又一隊兵丁馳來欲捕教會長老而適不在家乃拿其婦人及二歲孩兒往于附近墓地喝問其夫所在而婦人實不知之乃

脫其衣而亂打之是日余與其婦人談話而尙叫其痛苦也

江西事件

三月三十日牧師某氏與某婦人偕往江西是時村民未及待牧師之到着而上午十一時會於主日學校同行祈禱者五十人突有日兵馳來槍刺窗戶捕縛會堂主人及男女四名

第六章 宣教師亂打 (某氏陳述)

三月十九日水曜日余通電于江景之韓人牧師約以翌日往該地余之目的爲檢查東洋宣教師會之所有物也

翌日午後三時頃余共通解日語者爲助手到着江景休息於日人旅館夕飯該地韓人牧師先以余等之來通知於官憲矣午後四時檢查牧師之宅及教會又得調查該會所屬地段而出焉適有少年五六人揮國旗呼萬歲由山路下來更不見其何往故余對此事不加考慮矣已有荷鎗之日兵及巡查等馳來捕余等打之踢之不要說明拿致警察署中路余以十七日自京城發行之旅行券出示之巡查初不閱視直投之地故余欲拾之則巡查又踢而打頭此時韓日人多數集合而有一日人突出其中以大棒擊兩人又被亂打余獨被拿入一室見韓人巡查請覓取旅行券而未久來到矣已而日人署長來而以韓人通譯談話發幾多質問終乃謝以失錯命回旅館而余乃拒絕已而韓人巡查對余言四少年既經取調而彼等答以不知宣教師之來此也乃自旅館覓來行李經夕飯後署長更來謝罪而出書類二張請余署名出署余以該書類爲日文不知其內容故拒絕未

幾韓人助手二人來言自己既爲署名而請余署名余又拒絕八時三十分汽車發程日人以人力車附警官二名載車至停車場乘太田行列車是夜余經宿於太田矣

第七章 病床追憶談

三月二十九日

一 李仁玉安州學生而十九歲左足傷彈丸安州以三月二日人民四千名會集示威日憲兵士官七名發砲射之八名即死二十名重傷云

二 盧正允安州城外農民而六十一歲傷右足其陳述與上記同

三 金南山二十七歲坡州商民也與同商者偕往市場參加示威運動而會者約一千人日本憲兵六名補助員二名發砲射擊但據伊所知死者四人傷者三人此日韓人無何等暴行云

四 高冕滿二十五歲黃海道人三月二十三日往海州在官廳前行示威運動日本憲兵巡查等持劍鉤鎗各種武器馳來射擊死者三人傷者二十餘人云

五 李突釗二十三歲蠶島人村民三百名行示威運動至日憲兵駐在所之前揮國旗呼萬歲無何等暴行自憲兵隊交涉以解散之際自京城憲兵十五名乘自動車馳來向羣衆發砲據伊所知死者一名傷者十二名而多勞動者伊足傷入于京城細富蘭斯病院

以上五名均無宗教關係者

六 李開東二十七歲居住上同陳述亦無異足部重傷

七 廉篤昌三十五歲居住上同陳述亦無異腕及腰部重傷

八 宋榮伯二十一歲居住陳述上同上唇負傷

九 康容禮三十六歲居住陳述上同足部破裂負傷甚重

十 頭部重傷者不能陳述有反意識狀態

十一 車五健三十六歲高陽郡人左腕負傷伊所住之村旣行撤市日憲兵迫令開市而不聽翌日老幼七十五名登山呼獨立萬歲憲兵一名補助員一名馳來發砲傷數人此日韓人但國旗二三個外更無所持亦無何等暴行云

十二 安東完五十四歲高陽郡人臂傷於劍再傷於鐵鈎當日約五百名行示威運動包圍憲兵所呼萬歲日本士官一人始以短砲威脅而不卽解散騎馬巡查五名武裝憲兵五名私服巡查十五名突入擊之而韓人無何等暴行云

十三 金光彥七十二歲參加安岳溫井之示威運動而會衆約五六百名日憲兵隊長亂打羣衆強制其行於是羣衆包圍憲兵所詰問其歐打捕縛之故憲兵出而發砲殺三人傷二十人衆乃憤激投石憲兵在牆後續行射擊伊乃肩傷欲向京城中路爲日警所拘受辱極甚長老教人也

十四 宋潤福羶島人二十一歲面傷於彈丸腺骨後方有彈丸之出者

十五 具樂書被慘酷之亂刺入病院不過二時卽死

十六 李南基二十一歲坡州人重傷於鐵鈎不能談話入病院翌日卽死

十七 成永十六歲三月二十三日夜十時頃集合老幼行示威運動日兵約四十名脅令解散羣衆且欲解歸之際被日兵砲射手傷而更有一兵鎗刺其腹傷處入四五寸

十八 李漢東三十二歲京城東小門內人三月二十二日頃數百名會集呼萬歲手無所持而日兵射之伊喪一目

十九 馬善明三十三歲坊者也有五百名行示威運動而憲兵四名發砲射之死者一名傷者八名伊無宗教關係者一彈丸穿過兩脚矣

二十 鄭永熙三十四歲坡州人彈丸穿過其項部矣三月二十八日午後一時韓人四百名行示威運動憲兵砲射之死者八名

二十一 俞永健四十二歲坡州地方新山里教會長老而頸部傷於彈丸矣當日約一千之衆以赤手呼萬歲被憲兵之射擊死者三名傷者三名

二十二 貝銓菟三十四歲廣州農民而頸中丸全部皆落矣四月二十七日有五六百名之會集而憲兵發砲死者三名

第八章 十二人之談話

一 宋始雄四十七歲頭蓋骨頂傷彈丸陳述上同

二 成明理三十二歲脚部負傷無意識故無何等陳述

三 安善南二十七歲脚部重傷參加寶川山面先達里示威運動會者二百名日憲兵禁之不聽乃發砲射之死者九名傷者無數

四 朴雲樂二十五歲高陽郡四面教會信徒三月終各村民會集呼萬歲無何等暴行而日憲兵自京城來脅令解散五日憲兵更來搜索民家捕縛多人驅入於京城總督府被無數亂打云而余見其傷處其受笞爲六十六度其他多人皆如此左記三青年之證言節節符合

五 鄭興鳳

六 李田瑞

七 張佑相

八 朴車古四十一歲伊川郡人頭部重傷入細富蘭斯病院以應急治療始保生命者參加當地市日之示威運動會者甚衆無一暴行而憲兵射擊致多殺傷

九 金錦童十五歲忠清道人其父負而入病院類及前腕重傷其父代爲陳述曰四月一日開示威運動至夜舉火呼萬歲日憲兵突出發砲死者一名傷者十三名

十 方準浩二十五歲居住陳述亦同脚部負傷

十一 朴聖均四十四歲居住陳述上同被撲重傷

十二 李福潤二十六歲水原數村人民之集合者三百五十名整列至面所面長亦參加向警察署有韓人警官一人大叫曰余以警官服裝之故不得與諸君參加運動然以余心通於諸君惟諸君熱心呼萬歲獨立有望矣乃日兵發砲致二人死傷四十五人被縛此日人民無何等暴行但舉旗呼萬歲而已

第九章 第十章 併畧之

第十一章 一少女之獄中苦楚談

五月五日余與數友絕叫母國之自由參加東大門外示威行列向鍾路權呼萬歲進到德壽宮日人巡查突至摔余頭髮而倒之加以毒踢幾乎氣絕又曳頭髮拘至鍾路警察署巡查之列立于警察署之前者二十餘名足踢我身拳毆我頰加以劍刺即時昏絕不省其爲我之被打或他人之被打手足流血渾身皆青點如此蠻行豈可堪忍者乎

被囚入室亦爲如前暴行之餌彼輩摔髮曳之以拳打頰又以刀擊之投之室中一隅此後不能記憶其形狀者氣絕故也更開眼見之青年男女滿室而臥矣彼所謂訊問之方法亦不能一一明記也縛兩腳而跪坐之其問答也依例打頰打面甚至以賣淫女鬼懷姙非處女等辱說悻談無所不至勒令露出乳房不應則裂下衣加以人所不忍言之嘲弄乃結縛手指猛力拿引余乃氣盡昏倒則彼輩怒吼更令跪坐攫執乳房又加亂打叱曰爾願獨立在監獄中獨立也爾之生命盡於一刀矣更摔頭髮而搖之執兩耳而引之猶爲未足以大棒亂打頭部

因以昏絕良久更捨精神匍匐入室所謂巡查等見余膝行大笑爲樂余於此時默行祈禱耶穌予以無限之安慰於隱然之中者爲顯著此其恩惠之感謝不已者也

如此經過五日押送于西大門監獄乃令全脫衣服經過多數男子目觀之中被囚一小室之內如此冤情有呼訴之機會乎哀哉痛哉幾日後無審問無罪目而放出矣

第十一章 出獄之女學生談

三月三日余在平壤被捉入警察署已有男女之先入者多矣日警訊問我等以飲酒吃烟與否及信教有無後除監理教人女子十二名長老教信者二名天道教信者女人一名外皆施輕刑而放送監理教人中三名賣書人也

在多數男子之中令我等十餘名女子脫衣後訊問而我等罪目只呼萬歲而已彼輩亂打全身流汗則曰熱乎以冷水洒之更縛兩臂向背後再加亂打全身流汗以冷水洒之又以捲烟火炙之以熨斗煮之被亂打昏絕者亦不少一少女在月經中不肯脫衣乃裂其衣而亂打之如此經四日後押送監獄納男女于一室有一老人死于獄中同室之女子(賣書人)要求傳監而不許乃徹夜守直屍體一女子結縛兩手枷鎖兩足矣彼輩奪去聖經禁止祈禱加以諸般惡罵誹言此日人所爲而朝鮮巡查則不爲是也彼輩凌辱基督軀詰外人之有何言受學於教會學校者有宣教師之交際者尤加暴行以被打重傷而貌不可辨者有之女子一人有死獄中者

第十三章 大邱之蠻行情況

韓國獨立運動之血史 附錄

三月八日示威運動時第三教會助事之子金鎔海被捉日人毒打其頭部及頸後流血狼藉此有目覩者之立證也在二週滯囚之中又以大鐵鎚打其頭部苦痛激甚若失了頭之半部者精神迷亂大呼不已十日而死醫師證其死因以頭部重傷也記者目覩其屍體頭蓋及頸後遍有青點鎔海爲有名紳士其父亦在獄中家族中一人亦有瀕死者某市以示威運動而三人被射死重傷者多被捉者四五十名而重傷者一人談話如左

示威運動之夕我等十五人在酒店之前而有被傷者幾人日兵三名巡查八名來喝解散我兄詰其殺傷無罪之良民彼即以鎗打之余又責其無法則日兵即射之丸貫腰部赤血湧出而余猶抗詰不已頸部又受一丸此則當地日本商人之所爲而其他殺傷亦多出於彼之平民也彼之公佈死傷者減數太多則死者及暗埋者之數無由知得也

四月十日自法庭有七十餘名基督教徒之裁判而余傍聽矣其中幾個人但隨行於示威行列而不呼萬歲者彼乃處之以六個月役未知日人之法律如何解釋也

第十四章 略之

第十五章 東昌示威運動

東昌三百餘戶之村也三月二十九日市日以兒童之先倡爲示威運動被捕者衆而有女子五人會衆聞日人審問女子必令裸體而怒欲擊警察署以耶穌教會助事之勸告遂無暴舉乃選代表二人詰責其脫女子衣服之不法者警察署長答曰君等誤解矣此日本法律之所許也代表曰不脫男子及老女之衣服而獨加於青年

女子何也署長無辭可答於是代表之抗議漸強羣衆之形勢益烈署長乃只留四人餘皆放釋然而衆怒未解幾乎生變以助事及外人之忠告而止未久運動再起數人被殺餘多負傷

第十六章 日本之警察方法

此章述平壤宣教師家宅搜索及牟義理牧師被逮之顛末而前已述之者故略之

第十七章 濟衆院長魚不信博士報告

四月十五日上午前日憲兵部長井上來院審問在院之病者數人因要移送于大和町憲兵所而此須有外科醫柳得魯博士之許可也關於該博士則答以此等移轉有害於病者在院內審問爲好云井上曰然則審問以秘密爲之每人當要一時間也當日午後長瀨憲兵部長與憲兵九名更來提出審問者七八名錄則柳博士指摘其病甚不能移床者任其在床審問乃其審問經五時半同部長要求七人中五人之携去而餘二人退院前二十四時間必通告于警察署呼柳博士問該病者等之移院與否博士曰此病者等益要治療則移院不可憲兵部長曰憲兵隊亦有醫士當行相當之治療柳博士以其中三人絕對不許其移院則竟留二人而携去下記三人 廉明錫腹及臂傷鎗彈宋永福面部鎗傷取出彈丸李明智腰及股傷鎗彈餘四人爲院監督委托於斯特夫娘以退院前二十四時通告于警察署李開東右腰及左膝傷鎗彈康容伊腰傷鎗彈一部裂落金一男腰及頰傷鎗彈柳順明兩腰傷鎗彈

第十八章 第十九章 畧之

韓國獨立運動之血史 附錄

第二十章 第二十一章 第二十二章 詳述水原虐殺事件

第二十三章 新溪事件

四月二十日日曜午后黃海道新溪郡龍德村有下記事件之發生者面長(日人)與巡查二名同來搜索該地方傳道師宋昌植之家宅而昌植及夫人適往他村教會巡查亂打其老母恐喝其幼兒破碎水瓮器皿各傢伙焚其書籍又當地教會牧師青年之秀也家頗不貧畢業於京城聖經學院三月一日在他地被逮巡查馳往其家亂打其祖父頭部重傷又毆打其學校教師破碎諸教人之家具猶爲不足破碎教堂之窓燈煖爐搜索講壇之聖經讚頌歌等書籍而焚之且喝曰如耶穌教人之鄙賤者無生活此地之權利盡行逐出云

此村無示威運動亦無參加他村之示威運動者數日前該面之非教人行示威運動六人即死多數重傷

第二十四章 官立小學校少女之談

三月一日下午二時吾等自塔洞公園過大漢門光化門西門法美領事館更自大漢門向半井洞無數呼萬歲有憲兵等出遮行列而猶突前通過向總督府有一高等軍官拔劍衝入衆中亂刺余背受劍刺而倒則敵又猛打頭部約二十分間昏絕不省更提精神而見之齒落鼻裂唇破全身爲血塊肩被劍傷三寸兩股遍有青黑點矣

第二十五章 郭山及定州

郭山教堂四月二十五日被燒教人之欲救火者皆被打至若在定州而對於被捕者之蠻行雖亞弗利加蠻人

而亦不忍爲之事也

自二十六章至二十九章併畧之

第三十章 英國宣教師之私信

父主前

據此地之近狀而略奏者今番獨立運動也有宣教師之參涉云者全然無根之流言耳主動者中多有牧師故謂有宣教師之煽動然運動之謀爲既熟而吾人宣教師等全然不知矣以某某牧師之參加而有最大之影響彼日本官憲反疑宣教師也今番運動其方法也處辦也精神也純以韓人式而且彼等表示其特性者也

其有力之牧師長老學生及教人之多數現在獄中者見之可知彼等之平時影響在韓人間之如何矣彼等置宣教師於暗昧之中而於最親近者毫不現其幾微矣無一柄之鎗劍無財政之後援無利用之友邦而欲抗世界之最強軍國其自信也勇氣也吾人宣教師中無一人者可知也蓋韓人之決心與其苟生於現象寧死之爲愈者確實也民族自決或民族自滅恐爲今次運動之精神也

示威運動至今晝宵繼續矣特利用數百數千會合之市日而全國學生一致罷課或幾個人有以強制上學者而心不在書商人亦皆罷市而以鎗劍之強迫或有開市者交通杜絕鄉曲形便不知其詳細而以示威運動繼續二個月尙不停止者見之可知其示威村村皆行勿論全國何處無一不舉行其示威運動勿論貧富貴賤耶穌教佛敎儒敎會學校公立學校無一不高呼獨立萬歲者彼等不畏死亡被捉毆打而但望彼等之冤聲達于

仁慈之天神援護其自由與正義也

然而日人之鎮壓方法殘忍無道不惟鎮靜之不能而反爲火上添油矣其逮捕也必以棍棒鎗劍鞭笞毒拳爲其伴行不問有罪無罪向羣衆亂射加婦女老幼以酷烈之暴行耶穌教人不關其呼萬歲與否而爲惡行之餌多數教堂盡被燒失二週前在某處招致數十人于教堂後亂行虐殺火燒教堂脫衣爲韓人女子之最忌者而日人以恣行裸體訊問爲惟一之娛樂也(下略)

臨時政府法律顧問美國人透兒波之報告

自民國元年三月至二年九月末日以大韓問題美國各新聞之記載達於九千度以上國會議案之提出達於二度收集日本在韓暴行之狀態由國會委員部出版以無料郵便物頒布于全美人民者達於八萬部以上純以外國問題而成績若是爲前古未有者云

世界上酷受壓制之韓人 (上海西報)

最近消息以郵以電都未受得故在外地無何等通信所以有謂韓國獨立運動自然消滅而人心更無何等生覺者然此誤解耳記者於最近三個月間旅行於韓國內部方面而躬察之韓人之決心於要求獨立者永遠不變矣韓人所受之虐待惡刑與凌辱婦女等事均爲對於日本而懷抱怨恨者矣此等感情深印於婦人之心理故新時代之青年以甚母親之影響而憎惡日本厭薄日本者多矣

許多村落被其全滅者余見之矣婦女等皆有非常恐怖之狀態對於外國人亦畏憲兵隊之毆打而不敢發言

也外國人既去憲兵隊從而捕捉婦女詰問其有何言詞勿論有答無答必行毆打若一洞里之事爲何種新聞之報道則一洞里受罰所以新聞但以一地方載之而不敢以其村名露出也現今視察韓國者不可不認定其國之在恐怖中也

大邑有十餘人之聚集者輒行捕捉或無訊問而多日囚禁亦無何等之證據而放出之時必毆打而遣之人之被捉者勿論有罪無罪而毆打乃已也舉余多知之例而言之韓人等皆於一個月以上極不健康之狀態中爲其囚獄初無何等訊問也但被打而出矣獄中之最近狀態更欲說明而余適不幸在病院逗留而亦見日本人之殘酷者多傷於鎗劍之無數老弱受其治療矣

由內都各地方而報道之來者尤極悲慘軍隊以無外人之眼目爲其幸也私行法律待遇韓人極其野蠻慘酷見慶南釜山地方之報道強奸婦女之事實種種矣韓國婦人等以慎重不言之故以直接執其證據難矣然而據余所知有一醫師之告及而其爲確實之事實分明其他報道亦多然矣

今日則文官退步而諸般權利皆操於軍人矣大郡則憲兵隊長有法律私行之權而文官輩不敢干涉若對文官而問收監之數及待遇韓人之狀則必以往問於憲兵隊爲答也

東京政府自三月以後對於韓國事有確實知得之理由勿論各地方示威運動之起者及爲鎮壓之策謂有軍隊增派之必要然而彼等以此軍隊不知其如何使用對於韓人而爲野蠻行動慘酷者亦不知矣

日本政府例於地方事情從其駐在代表者之報告而知之而已然爲其暴虐之責任者豈有告自己之不善買

其不面目者乎

此則勿論不得已之事也然而今日如此重大事情發表於世間若在他國政府則能想像其事實後關於獨立而覺其有派送員之必要矣既認總督對於教會堂會集之韓人而有無數鎗殺之報道若非日本而在於他國則必輿論蜂起政府必使其責任者辭職矣

日本新聞除一個外國文報無有掲載關於韓國事者以此之故民衆之輿論不能盛起也

日人之多數對於外人之報道認之以論難一個日本及日本統治者故不爲信用矣乃於不幾日覺其責任者之爲慘酷行動特以武斷政治爲不信用也

日本於講和會議居救護小弱民族之位置排斥獨逸在北佛而待遇白耳義之行動假裝模樣者而對於韓人不許言論自由出版自由政治的宗教的自由矣

現今世界民族中酷受壓制者韓人也官立小學校以強制入學而世界歷史無一冊之教授者教會學校非總督府教科書則不得使用以故韓人不得受完全教育

日本以全滅韓國國語爲專力以余所料不過幾年教會學校必使用日語矣然而余認其同化主義之必敗何也韓國有長久文明之歷史日本自身受其影響者多對如此民族之生活而使之滅亡者完全不可能之事實也

又有一白耳義乎

日本以陰謀征服韓國而被征服之人民受無前之非人道野蠻的強制之統治矣前者在紐育城有擁護日本之演士言曰日本恒常以畧守約條者自鳴而此言非真正也日本以無視誠實破壞自己誓言爲其連統者日本人等在國際關係上不親切不正直以其暴露自己之行動觀之爲自己所言之正反對者非一非再以韓人與中國人之實際上經驗而知此也日本政府派送軍隊于韓國時爲何言明乎不曰韓國以內亂而請願日本以友誼的援助乎然而以此國內亂爲其口實以日本人之煽動紛亂韓國秩序而已

伊後置統監模倣英國之對於埃及政策而經由皇帝主管韓國統治皇帝實不過一個囚人矣

終末合併韓國爲日本之附屬一郡有所宣言然日本每於如此強盜的事業現出之時對愛國之韓國人力爲拒絕而韓人隨其能力所及絕叫正義公道及世界同情然而惡毒無匹之日本粉碎如此之愛國事業以多數志士處之終身懲役宣告死刑加以慘酷殘害矣

最初日本干涉韓國內政之時爲何言乎不曰日本政府決無征服韓國廢止韓國政府之理由耶亦不曰韓人達於自立能享幸福之時則日本即撤退其內政干涉爲其誓言以固守此誓言公佈于世界萬國耶

至于今日日本軍隊放火韓國內村里鞭撻人民加以鎗劍爲無理之殺害是何罪耶敢問二千萬生靈依民族自決主義建設共和政府宣言獨立之罪耶

縱火城市及諸村落火燄之閃光遍于三千里江山紅染天空手無寸鐵之人被傷於鎗劍之下二千萬生靈之死際叫苦聲在巴黎平和會席上若霹靂之墮落而耳聾目盲之諸君不聞不視無抗論無同情是何故耶

幾日前各新聞以歐洲之白耳義佛斯聶斯等小邦國粉碎於軍國主義之下爲其供饑而不氣高千萬丈高聲大嗚乎謂韓國人當日本之虐殺而不覺其苦痛者耶美國之軍力爲受如此壓制之民族自壓制之毒手救出而脫奴隸之名義享自由而使用者不有相當之理由乎

當此爲自由而改造世界之時間如此慘酷而持正直之良心者其能忍耐乎

但知有一個白耳義而不知又有一個白耳義者巴黎講和會之處事能完全乎

朝鮮之獨立運動 (細育報)

朝鮮之獨立運動既成重大問題中國各新聞及英字諸報屢屢記載決非單純的暴動與些少的騷擾明矣以直接蒐集可信憑之報告可取信之書信又親所目擊者之報道而觀之吾人非誇張非反駁也今番朝鮮騷動因日本在過去十餘年間對於朝鮮而以軍國的帝國主義極其壓迫威嚇之計劃而不躊躇於起此一革命矣若謂現世之國民有受殘忍虐毒一暴君之惡政酷治者朝鮮民族是也日本在於彼土移殖其民而已開發財源而已朝鮮民族之怨乎喜乎亡乎興乎非其所關而惟利其自己民族而已朝鮮人對此狡猾可憎之日本統治而思欲脫離控訴于文明之世界期待渴望歲已久矣此心理的瞬間風靡全地球之進步與民主主義之波濤使朝鮮人爲其自由而驟然奮起矣

是以不數日而廣布全國之獨立宣言決非由幾個不逞之徒之一時的感情而生者確實矣上而對於上帝下而對於人類爲正義自由而熱叫者朝鮮民族二千萬之聲也日本之對於朝鮮如獨逸之對於白國之武斷政

治不得不因此而除去也不甯惟是有一通信員向記者而所言如下

一 朝鮮人自己中無議員選舉之事而納稅則依例

彼等提起控訴而無大審院 恒常在最殘虐軍人之專制政治下 彼等之大希望在於更爲自主的國民而持自由權利享自由生活而從願言論之自由且彼無法之軍人不日速離於半島之內者其願也 吾輩對於日本之朝鮮統治無重言復言之必要而惟日本帝國爲其打朝鮮人入於靜穩歸順而更取一層如何手段者仁見而已

特法國乎英國乎美國乎爲此可憐之朝鮮民族予以一顧乎對於日本之待遇朝鮮問題自國際聯盟特下公平之判斷乎

一言以蔽之今次朝鮮獨立運動以日本於自己本土外在朝鮮又在亞細亞之何地方不可以相當之指導者信賴不可以相當之管理者信任將此理由表示于全世界即可謂之確實證據也探尋其理由固不難而亦全世界各國民通悉之事實也

日本以不義之手段國債與租借及其他同樣之政治的經濟的利益榨取於中國而又鴉片以無限之輸入貽害毒于他人者全世界之所熟知者日本之政策勿論何種表示其利己的而已稱以弱國民之保護者不可而稱以一暴漢可也

今日對於日本人而歐洲人且置凡亞細亞人不以猜疑對之者無一人也日本固無與其隣邦維持同情

之資格而無他活自活之單純的理想者也

吾輩斷言矣日本持續其侵略主義軍國政策之期限則全亞細亞之混雜爲漠然之通景而其結局滅亡而已然故在大西洋諸共和國極力啟發之民主主義之前宜乎先取者不啻對於歐洲而然者對於亞細亞可能取其斷乎處置也亞細亞之平和不在乎武裝及武裝解除也其實在於經濟的產業獨立令其人民結合也今乃日本證明其自身之全然無力且濫用權利及特權也

韓國之真相

(上海美人大陸報記者費波著)

第一概論

今世界各種問題之紛糾錯綜者惟日不足於解決而乃更加以一重要之新問題即韓國問題是也蓋此問題亦如巴爾幹半島土耳其及中國問題之不能即時鎮靜其以平和的手段武力的爭鬪或其他如何方法而不得其相當之解決者終不能止矣

過去三月一日獨立萬歲之聲如疾風迅雷勃發於半島江山現雖未遍於全世界而其反響之震動全世界者必長久也

勿論何人而有一日之視察韓國者對其顯著之印象必覺其決難平靜矣去三月爆發之運動至于今日尙非已熄而乃始作也今後亦有繼續而已去月有一次計劃而愈演流血之慘劇也今韓日兩族當此惟一關頭而俱非打勝則不已韓人欲脫日人之羈絆日人欲支持現局者莫論其曲直不問其原因而毫無容疑也

余往韓國滯留於各都會及村落者約一個月餘而在留之外人獨立黨之首領舊時兩班階級之貴族殷富之實業家小商店主鄉村農民耶穌教牧師佛教徒男女青年學生以今回運動而入獄者無有不悟談者日本官憲自齋藤總督以下多數官吏亦皆會見矣

余以如斯之各方面各種人物之觀察而描寫其現在狀況也余之入韓國也不特無何等僻見偏執而惟以不偏不倚之態度將余之觀察及其理由而報道而已關於余所觀察之事實及其原因披露余之所信以韓國問題之展開眼前者發表于世界兼以日本官民之答解而敘述也

然而以余之見聞而敘述也固當純然持客觀的態度而其結論不得不偏依一方者以余之目親耳聞不得不懷抱何等確信故耳

余確信矣苟有不偏不倚之外人暫留韓國者自然與韓人同情而日本之統治韓國極其不正不義者爲其信念矣日本政策之將來如何勿論而以過去實蹟證之日人之統治韓人也其不適不堪之明確者既完全表示矣蓋日人非但韓人而對於異民族決無支配之能力者且在中國而目視過去數年間事狀者必有深感於日本對華政策同轍於滅韓政策知韓國爲中國之好個殷鑑也余之此言非論斷將來日本政治之適否也今日本以公式發表其政策之變更而亦事實也於是日本及世界見此發表而或曰韓國問題終了或曰日本懺悔或曰韓人以此滿足或曰此後永永無事等臆斷有之然而此等臆斷可謂全無根據者勿論外人之稍解韓國事情者雖日人而有事情上正直之觀者必無一人之容疑矣

一 所謂此等改革不過無力之言質也

二 余觀日本官憲之態度其爲此等改革實不欲以根本的除去今回運動之各種不平也

三 韓人不信日人之心事與誠意者確係存在之事實也

四 中心問題是也兩族間怨恨太甚無妥協之餘地日本之改革與否非關於根本問題而亦太晚矣

今韓人之心對於日人莫不有刺膚徹骨之痛恨而其痛恨因合併後過去十年間之壓制而發生增長今以赤手空拳爲平和的示威運動而日人之鎮壓手段尤極殘忍苛酷故益永遠牢固不拔者矣

至今日人覺悟前非實行改良未可知也且韓人以此等改良爲多少滿足看做自己之勝利亦未可知也然而人種的見解出於天性者今日韓人之行動亦其天性之發揮也故韓人不求辨論不要論理矣韓人之仇怨深刻腦裏凝結於血管此仇怨之不冰釋也雖有如何改良而必無何等效果矣

今韓人之所願者惟一獨立而已彼等於當場或於數世後或於永遠期間不得獨立則不止或以公然或以秘密而至於人種全滅必奮鬥不已也是以法理上韓國獨立之可否現時國際道德上日本許與韓國獨立之可否又韓人有獨立資格之與否併非今日問題也韓人於此等問題固無考慮之餘裕而亦不欲考慮何故此非理論問題而爲關於本性問題故也以第三者而對此亦不能以理論判斷其可否也惟其根本的中心的事實爲其結果者爲了解之必要矣

然則其仇怨因何而有如是之深刻徹底者乎探究其原因固爲非難而亦枚舉之不遑也

然而讀者勿誤解也韓人之決心雖其出於本能而其實行方法決非盲目的行動也現今韓國於表面雖若平穩而裏面實有盛大之活動矣月前上海設立韓國臨時政府決非一場滑稽劇也其組織極爲周到緻密而自其裏面有行使權力於全國者日人亦知其存在而公然談論而對其人物位置活動維持之機關而亦無如之何矣彼如蟻羣之偵探隊無何等效果而一時數百數千之株連被逮者大半無辜之良民也日人雖有如何之逼迫與逮捕而此機關乃依然進行也韓人亦於自己所管以外無由知其秘密者日偵亦有以名義服從於日官而內實暗通於此機關報告日本情形者日人亦非不知此故有時乎檢舉此輩人者不少矣噫此非所謂傳奇的零圍氣耶故今日之入韓國者不禁其可嘆可笑一喜一悲臨淵履水之感矣其究竟將如何乎必也歷史特筆演出一大悲劇矣

以上所述現勢之大略而一言以蔽之曰爭而已其爭也雖非壯絕快絕而必殘忍刻薄矣非古來恒用之武力爭鬪也韓人無寸鐵尺刃而在日本嚴酷注示之下雖欲得其武器而亦無方策與機會也加之三月運動之經驗已知其無抵抗的戰鬪法之有效矣其判斷與手續惟時間問題可

二 韓國東洋之白耳義

韓日兩國之仇怨遠自古代發源一閱兩民族之歷史可知其決無維持隣誼之一日而蓋韓國東洋之白耳義也其疆域恒爲異族之戰場人民之爲無辜犧牲者屢矣古來數百年間蒙古滿洲漢族及倭族無不角逐於半島而未知其偶然乎故意乎抑宿命乎韓國被倭人之慘害者最多矣彼有名之豐臣秀吉入寇之日韓人所受

之刀痕血跡至三百年後今日而尙鮮然矣此時韓國全土歸於荒廢人民盡爲魚肉矣入于近代有甲午清日之爭霸而勝利歸於日本其後有露日之角逐甲辰之役達於頂點而日本又獲勝於是日本無忌無憚勒締保護條約至一九一〇年遂斷行合併矣

以今觀之合併前數十年間日本之行動專出於惡意與無信者可以看破矣方露日之宣戰也日本殆得歐米列強之同情而韓人亦有愛交之傾向蓋露之帝國政策不啻威脅韓國而其空慾無厭倨傲無道則寧欲親近日本理勢之使然也當此之時露國不屈不撓無慈無悲謀蠶食韓國而日本締結屢次協約保證韓國之安全此等條約非但韓國而併與歐米列強締結者有之

因是而露日戰爭之時韓人對日本深厚之同情與以多大之援助乃戰爭未畢日本置韓國於掌握表示其籠絡之野心而其巧猾太甚錯雜太多亦世人之所周知者故茲不贅述惟知其最近數年間施諸中國之策略出於同軌一轍則足矣即擁護其國之腐敗分子以沒能無爲伴食者流配置顯職利用此等偶像侵害其國之主權及獨立而有諸般行爲之頤使矣噫國必自伐而後人伐之人必自侮而後人侮之賣身亡國之韓人固罪不可追而不法無信之日本行動豈可容恕者哉勿論若何而合併爲已決之事實而其成就不過形式也

然而日本官憲對於韓國皇帝及其大臣以長劍加之以大砲向之所謂勸諭及諭告之口授形式曾誰稱許者乎縱非長驅遠征攻城略地之城下締盟而其使兵藉威欺弱凌小爲非心服而力服者無可容疑也

然而此時日本得韓人之同情不無機會也蓋韓國之庶民貧寒太甚惡政之腐敗已極奔競成俗冗職太繁則

其沒落非朝卽夕迨此之際施以德政俾得衣食之道予以若干自由及公正之待遇則不出幾年人心之悅服不期而至且使同樣垂亡之中國可緩和其排斥日勢滅却其恐怖日人也乃不幸不出於此而開一大難關則日本非逸失此好機者耶無乃欲自誇其不期的征服之虛榮心乎心醉於帝國主義的夢想乎或愚蠢蒙昧而然乎日本非但逸過其過去好機而到今亦不要捕捉也日本之對韓施政與物質的發展專爲其殖民而於韓人無秋毫之自由少許之公平矣

要之日本統治韓國之政略遠取歐洲中古時代之模範其土地則認以封疆其人民則待以農奴也今其結果生矣此則勿問洋之東西時之古今而不可避不可免之論理的因果也今韓國醒矣起矣決不更受壓服卽其決心矣

余以韓人之境遇比之農奴非過言也大抵韓人無一毫權利政治上無選舉權間有韓人之爲官員者而其背後必有日人顧問及次官譖般權力全歸其掌握且在經濟上對於韓人以多般手段差別待遇而各種特權盡歸日人嘗其餘瀝者絕無僅有各種富源盡歸日人而各種獲財之好機必先告知于日人也

言論全無自由而以社交上目的不得三人以上之集會而遑論出版自由乎二十萬人衆三千里江山韓人編輯管理之韓字新聞無一枚之得見者矣

以學校論之其數固增加於舊韓國時代而其教育之內容至一事一物皆以不正之手段移植日本之習俗及文化而已各校之校長全部日人而教科書皆日文教授用語全以日語或幾時間課以韓語而此與歐洲文學

語之修羅句語東洋外國語之課英佛語者同一意思也

吾人知得日本政策之要諦者惟同化策是也。日本要望韓人之同化而且公然聲明是日人對於韓人欲以強制忘却其歷史根絕其古來之良風美俗廢止其國語破滅其文化若其絲毫有害於同化者欲併其根柢而掃盡則其同化策可謂澈底的也。吾人欲了解其對韓政策之要訣則同化二字盡之矣。然而日本以同化爲惟一目的之期間或以他方面假定其有滿足點而其爭鬪決無終熄之日矣。日本聲明或種之改良而關於根本的問題無何等發表獨不見曾在埃帝國羈絆下之諸民族有勃興之活歷史乎。徵諸人類歷史其有特殊之民族性者不至滅種則萬無滅絕其民族性者若加之以壓迫制限則其民族性益以顯著其感情益以激烈執着益以堅固。況韓族有半萬年久遠之歷史與光榮之文化者乎。

以上積弊勿論而最予韓人以苦痛者官吏也。普天之下官吏之橫恣無有如韓國者亦無如韓國官吏之萬能國也。彼所謂總督府法令條例之浩瀚煩瑣其壓迫目的者韓人以外令人有滑稽可笑之感矣。彼可憐之韓人無官廳之許可則喘息亦不敢矣。當此等法令之實施也非但一點一畫之莫敢如何而至於意不害辭者實有令人口呆無言舌舉不下者矣。舉其一例而證之在某郡發令各人均置捕蠅器一具更欲檢查其實施與否有憲兵巡查之出張者巡視各家而民有一家五口者即其父母兩人孩兒三名而其中一兒生才十朔也。乃其捕蠅器只有四個而十朔乳兒未及準備彼乃以此爲違反法令而罰其家主噫此非道聽途說而乃正確之事實也。

大抵官界者勿問東西不能無多少弊害而若朝鮮官場之可憎可惡者世無其比也蓋日本之在韓官僚別無高尚人物而十之八九皆劣等者流也憲兵在法文上雖曰廢止而巡查皆凶暴猛悍人面獸心者雖微官末吏對於無告之良民行使其無制限之權力何等頑冥卑劣者可以想見矣彼輩以狂人行爲恣其暴虐虐政於無愆之民衆者皆小小暴君也

彼上級官憲時或有善意而實現其執行者此輩也設使日本熱望治道之改善而實行者非此輩乎不知此輩因一場訓辭一紙訓令而足改其性格乎求有糾彈之方便而此輩以自發的減削其權力乎總督及各部長官雖有如何之更迭而其奈下級官吏之以直接而接觸人民者依然不變何哉又有文武之軋轢滋甚文官有時乎欲順應時勢發良法明令而武人即時阻止對此而文官不能誰何蓋彼軍閥之跋扈不止於韓國而支配於日本故也

或有辨護日本者曰此皆今年三月以前之狀況也自後統治方針必有一大革新之斷行者東京政府亦以除去諸種不平之素因聲明意向云者未知其若何而設使有此聲明而其所謂改良不過別無關係之些少事件（如墓地屠殺場規則等）以外無他實行則其前途之漠然誠有不可看過者矣實際上韓國之情狀今年三月以後固如是合併以後亦如是而已且夫齋藤新總督果有實行其宣言之意思者不更迭現今官吏之全部而能行改革固難預測而彼其對於改革之觀念深信其效果之有及於韓人者亦未決之疑問也然而關於彼之所信詳述於下之面會記中矣勿論如何而使韓人激發其動亂必至於惹起衝突者已著之事實也余爲明確

其故舉其不平之原因分各題而詳述之

三 國史燬滅

余以日本壓制政策之最好標本先舉其教育政策而論之即日本表現其對韓政策者莫明於此故也據最近總督府年報一九一六一一九一七其教育目的在於注重日語普及獎勵勤儉之風養成國民之性格而已此即所謂韓人教育之三大目的今欲就此而次第考察也

第一日語普及而其實行方法極其周到且徹底矣普通學校之每週教授時間爲三十二時間而日語占八時間則韓國兒童以全數學習時間四分之一費於外國語之日語較他課程日語居其倍矣

第二獎勵勤儉之風俗果以日人之真心獎勵者良足賞讚也蓋自古韓人之最大惡習惟優遊怠惰也然此惡習不基因於貪官污吏之苛斂誅求乎蓋人民終歲辛苦獲得錢分僅支一家露命有多小蓄積之餘裕者所謂監司使道輩抓而奪之如此之世雖望其人民之勤儉力作而得乎使日本以真心獎勵予以活用此美德之餘地則所謂獎勵勤儉詎非韓人之一大福音哉然而日人關於經濟界不公平之手段惟以強奪韓人發展之機會爲之則所謂獎勵勤儉反使韓人之經濟陷於衰頹而已

第三養成國民之性格者以表面觀之亦可賞嘆然而其所謂國民性云者日本國民性也此決非爲韓人養成其後日自立之能力及統一的精神愛國的思想者而惟欲其作成日本之忠僕而已今其目的之實現也其方法之周到殘酷不特令人悚然而其非道不義實爲曠前絕後矣韓國歷史之傳習爲絕對嚴禁合併即時沒收

韓國歷史之記述書籍付之一炬又不問書舖及私家以組織的爲家家戶戶之大搜索關於記述韓國史蹟者隻字半簡必行焚燬敢有藏置韓國歷史之一卷者卽爲犯罪余在韓國之日韓人以讀本國歷史之罪當三十日拘囚之罰者甚多而余親有所接談矣

今韓國兒童得國史學習之容許者卽以總督府之編纂插入於日本教科書中之若干史蹟也然其全部盡以巧妙之捏造使韓國兒童發其輕蔑祖國之思想而對於日本發其讚頌敬仰之觀念者也

有曰韓國建國非四千年而爲二千年日本之後進也又曰韓日兩國皇帝最初兄弟又曰日本恒常保護韓國又曰日本因韓國之情願而合併云云以此等奇怪荒謬之說爲教育之材料各種事實惟以粉飾韓國之侮蔑與日本之威嚴盡智竭力且韓國史蹟不過九牛一毛而餘皆日人之杜撰之日本史也若依此史則全世界皆認韓國以日本之苗裔一時分離今乃返本歸依於萬民父母天皇陛下之膝下也所謂歷史教育乃若此乎

且所謂地理教科書亦然就日本地理書中抽幾部分而捏造者故其所謂地圖極可怪異全部皆係日本人編纂其使用於官公立學校勿論而至私立學校教會學校盡以強制使用矣尤其教育方針之徹底者歷史地理之教授非日人則絕對不得也日本據此規則至於京城延禧專門學校爲美國傳道局之捐金維持者而亦以強制使用也是以韓國兒童絕無接觸於世界消息而所謂受教育者除日本之祭日慶祝日外紛起四圍之要聞大事絕無聞知則實皆盲聾學者也不惟此兩課爲然學課之大部分用日語教授而猶爲不足自明年使用全部日語云矣然則感情問題與道義上問題姑舍莫論以其強制而有外國語不得不學之境遇就此一點而

觀之韓國兒童之情狀果何如其可憐耶且以教師言之日人居半數以上而校長全部皆日人也至私立教會學校教師亦不得不聘用日人也

舉其實例年前自京城南大門外濟衆院有醫學學校設立之請願而學務局長顯以不悅之色謂其設備者之不充分終新許可故問其何等不足之點而無明答更問設備臻於何等程度方爲適合乎又無指示而但云未安千萬而不得許可也

於是自濟衆院爲講究善後策開職員會而有一員精通於日本殖民地之事情者提議曰吾等以直接訪問學務局長謂自本校聘用日人教師而請其指定何如衆議均以此爲妙策即時着手實行而果然不出於預想且學務局長不惟快諾教師之指定併爲前塗而不惜囑望故更問設備以何等程度而充分乎學務局長慷慨良久乃曰更加再想則設備止此足矣於是開設學校以雇聘日人教師爲條件而彼乃滿意蓋學校之聘用日人教師即以明文規定之必要條件也且自學校毫有違反於法令者指爲大變而提出要求即教師以日人改定而二人或三人加聘等是也若其有不從者沮戲妨害無所不至矣此等規則之行於官公立者勿論而至以私財維持之私立學校一律施行總之全韓國內公立高等學校只有五處而日人教師爲八十二名韓人只十九人觀此思過半矣

以余觀察所謂韓人教育之實質內容不過假飾的虛僞的而且其不完不備之點亦有默過不能者矣蓋學校之數比諸舊韓時代固爲增加而其教育費皆韓人之負擔者也加以韓日兩族間特設差別日本住民三十萬

而爲容三萬七千學生之設備。盡力擴張而對韓族二千萬而教育機關不過容六萬七千之學生也。且以學制言之。韓人年限四年而普通學校高等普通學校醫學工業農業三種專門學校而已。所謂高等合全國男女學校不過四處而其普通教育日本兒童爲六年而韓人兒童爲四年亦差別待遇之一例也。

四年學期之內日語課占四分之一。既有前述矣。其餘四分之三亦因難解不慣之語課而進步遲滯比諸他國。減殺其效果勢所必至。況自明年一月以後一層尤甚者乎。蓋年前發布之命令自明年一月以後韓國內各學校以專用日語教授爲其規定。此其實施之日在各教會學校教師英人米人雖鍊達韓語而不充分於日語者。不得不中輟其教授而學習日語。不然則全廢教育外無他道也。

然則韓國學生以其殘餘教授時間習得學問有幾乎。除日語時間而二十四小時中五時間算術五時間漢文五時間體操三時間手工二時間農業二時間習字一時間唱歌一時間所謂修身（純然日本人之言行及崇拜天皇等類）爲其課目也。然則韓國少年男女之教育百人中九十九不出此道矣。

然則韓人脫此有名無實之教育而要受相當之教育有何方便乎。質言其全無可也。使學齡兒子入于教會非教會之學校而一則費用不少二則私立學校之課程亦皆總督府之指定者而日語課程以強制的自明年全用日語矣。加之私立學校之取締日甚一日。隱然或公然爲驅除之計也。

然則青年學子之欲修得學問者離本國而留學海外可乎。噫此亦有旅行規則之制定者。韓國學生有欲往英美求學者不許旅行券之給付。或有一二勇往邁進之青年變裝苦力乘夜逃走若被發覺則不免重刑且韓國

學生有往學日本者而一則非彼等之甘心願欲也二則此亦要有本郡之身本保證書而以教會學校私立學校之卒業生圖得此保證書極難也若無保證書之攜帶者雖有高等之學歷而爲無資格者不再學於初等小學則不得也孰肯受此侮辱哉

然而韓國教育界受日人之壓迫拘束不止於此彼苛酷煩瑣之官僚輩干涉無須臾間斷之時學校之萬事萬物一動一靜甚至於教員之族譜及白墨一個之品質代價無不報告于官廳受其檢閱聘用教師及解職必要官廳之認可而各教師之履歷書其落地以後一年一月無或遺漏若無官廳之許可則至雇人之俸給不能自由予之一打之刷子亦不能購入也頃接延禧專門學校以午前九時之課物理學十時之課化學有交換之必要而無總督府之許可故不得爲之矣且有所謂視學者自三月獨立運動爆發以後稍爲減少而在於前日所謂視學官無日不巡回且教師之時間大半虛費於報告書之製作而校長無開眼之隙矣以上諸項無非束縛壓迫的教育而又有其一種特色之表彰者自數月前日人教師等被其制服而佩長劍對於七八歲之兒童所謂先生者鳴劍闊步入于教室示其無理之威嚴此等幼稚的手段豈非尺童之所嗤笑者乎可憐哉韓人以其金玉貴重之子女入于學校受此強制其愛重之國語被其唾棄神聖之歷史被其撲滅傳來之文化被其蹂躪暨於世界大勢被透於一切知識界矣

現韓人之叫呼者曰教育乎教育乎爲何目的而教育乎養成奴隸材料爲日人之耕田奴汲水夫采樵者而最優不過爲停車場驛夫補助員日人小使等也學校之所教只日語故輕蔑其先祖忘却傳來之良風美俗而惟

崇拜大日本帝國而已我等寧守舊式使子弟學於漢文書塾且寧爲目不識丁之人而不願精神之中毒此其爲言誠極慘痛孰有責其無理無根之不平者乎

四 物質上壓迫

韓人非但知識界文化上發展之全受阻礙而物質上開發進步亦被其掣肘妨害無所不至矣

或外人之旅行韓國者及日人之言謂韓國歸日本統治以後生活經濟比前大爲良好云者吾人亦嘗累聞矣此其至於如何程度固有事實而亦不可謂全無日人之功也大約言之道路之改良排水事業之發達橋梁之進步鐵道之敷設電信之架設荒地之開拓與植林事業等是也此等發展固依日人之努力而亦韓人之自認者也然而韓人因此而受若干利益實不過附隨的偶然的也其物質上開發實非爲韓人而爲日人者可直言也彼當局者之此等開發專爲日人之利而或慮韓人橫得其利陰加挫折者歷歷可指也設或韓人有露其小惠餘澤者實由於偶然而決非出於日人意思者也

試爲之轉眼於韓國物質界之發展則掌握其實權者全部日人也以農業言之比前可謂進步而良田沃土盡官營之東洋拓殖會社所有也殖林事業固爲發展而最大之森林皆日人之組合所有也荒地開墾之每年產額不少而悉入於日人銀行之金庫也漁業爲有利之大產業而沿海幾千里難見韓人之設網者時或有之而僅供一家之日用而已都會等地從事貿易者不無巨商大賈而其店主皆日人也究其原因勿論韓人以因習的懶惰性缺乏企業心及資本不足之故被人佔奪固爲事實而亦有基因於日人之差別的待遇也假令今有

新墾耕作地之分配移民者政府必行公告而惟揭載於日本新聞及警察署之揭示板純以日文公布則普通韓人莫知其爲何公布也讓一步言之韓人亦或同時聞此消息先於日人而提出土地下附之申請而必經由郡廳道廳乃得申請於京城總督府假令韓人有先申請者經數三月而無日人之申請者則待日人之申請及其日人有申請者則先報于京城韓人之申請者雖多而日人以先願者得之故其土地歸日人矣假使總督府不必弄此等奸策而有國有林之讓與漁業權之讓渡新墾地之下附者則預先漏洩于暱近之日人故韓人未及聞知而已行處分矣

以商業情況觀之國中中市如大邱等穀物價高則韓日兩商必買穀於安東縣等地由鐵道輸送乃日商之穀物不逾時刻即爲卸貨而韓商之貨物必延拖三四日矣輸入物品尤爲忒甚日人之商品不出一兩日通過稅關而韓人或外人之商品自一週至二週三週之停滯依例也此等事例決非假想的臆測而乃無日不有之的確事實也舉其一二而例之

去年春旱魃太甚農作不振穀價暴騰於是韓日巨商爭先恐後就穀富價廉之滿洲地方各買數千石委託運搬于南滿鐵道會社乃日商之穀物迅速搬得其暴利韓商之穀物積置于鐵道倉庫自歸陳腐歷幾多時日到着該地則穀價已暴落矣

且貨物到着宜川驛停車場而該物主融通金錢於銀行之期間自鐵道局爲予其便宜特設貨物積置所然得此利用者惟日商也韓人例不得銀行之融通而卸荷機之使用亦不得不私設也且以各停車場觀之人力車

夫之排立於下車近地者全部皆日人車夫而韓人車夫迺在數十步外而苦待之日本車夫御其乘客而有餘者韓人車夫方得乘客此亦大不易得者也勿論鐵道銀行運輸會社及稅關而握有實業機關之樞要者惟政府而政府皆日人也然則政府之勢力不限於大事大物而至些少事物無不以徹底的行使矣

且余在京城晤某外國商人得聞其實歷而其言曰余嘗以自動車一臺賣却于韓人爲其運搬營業也既成契約且受先金故注文于外國而自動車到着商店該店主通知於韓人則韓人有答函曰余以自動車營業請願而得許可矣然而欲提存款於銀行則警察署不許云云蓋韓人雖自己之欸而非得警察署之許可不得提回故也如斯之際韓人之營業許可狀歸於無効而日人之自動車獨擅營業矣此等奸策非但施之於韓人而對於西洋人之居住日本及滿洲者頻頻使用矣然而西洋人離却其地而移轉他方固可自由而可憐韓人無此自由矣噫韓人不堪日人壓迫之苦離親戚棄墳墓失其錦繡江山之樂園而漂泊于風雲荒野實人生最苦至難之事由此不公不平之競爭淪落海外者殆至百萬而近來韓人每年移住滿洲者達於十萬也韓人雖自己之欸而要提回于銀行非得警察署之許可則不能者既述於前而自三月獨立運動以後稍得緩和然而一時要千圓以上之提回者必詳記其用途及理由提出明細書而若有小毫不滿之點則必當警察署之呼出矣且富豪之家必置日人顧問監督其支用報告于官憲而若非監督及當局之承諾者雖一錢一分莫可得用也

由是觀之韓人商業界金融界之不能振興何足怪也彼雖有企業熱與勤儉力而在如此境遇何可冀其隆昌乎彼雖有技能有經驗有資本有熱誠而無往不受日人之阻害則何可希望產業之發展乎韓人欲開何等營

業非得官廳之許可則不能而所謂許可延拖又延拖畢竟歸於日本主管或參加矣又以故意顛倒請願之次序或憑藉身分調查極其苛酷煩瑣或其事業必須之原料品在日人手中者必沮害其購得使日人原料商獨占暴利日人尙且無壓全部物品必令其全用日本品也余在韓之日得聞此實歷於多數華商也北韓有一富豪告余以實情曰我韓人之營業只設置些小商舖隨日人定價販賣日本製品而已雖有何等事業之正當經營而其致富之好機必爲日人所奪有何等有利事業之發見而其決局必歸於日人掌中我雖先得其門而不得入於其室也是故爲吾韓人者惟日人之命令是聽是從而已不然則守其父祖遺業無所事爲以度歲月以外更無他道也余幸以父祖遺澤衣食自足才過四十年富力強固活動時節而在日人壓迫之下措手不得故早已退謝於實業界云

且日人扼韓人經濟界之咽喉者尤有最大之證據所謂東洋拓殖會社是也該會社一九〇八年依日人資本圍而創立一株金五十元總資金爲一千萬元之大會社也最初發起者利用統監部之勢力強令韓國政府應募株金六萬元此時韓國政府乏於財政不得以現金應募又被其強迫乃以國有地驛屯宮土納於該會社以代株金加以土地擇取全任於日人故國中第一膏沃地爲其所取而韓國政府但受其紙上空文幾枚株券而已二年後韓日合併成立日本政府繼承韓國政府之權義所謂株券亦歸其引繼於是日本政府合其本來應募之八千二百株而爲大株主故其支配權亦歸政府之掌握矣乃總督以自己經營之會社又假補助之名目有每年三十萬元之之支給者噫該會社以韓人之膏血而成立者彼乃以此籠絡全韓之經濟界矣勿論其詐

取之驛屯土占國中第一位之良土而猶復竅慾無厭益恣橫奪陰險狡猾之手段方法無不用極不盡奪韓人衣食之資則不已也茲舉其二三而言之則或彼所流涎之土地必以狡謀低落其價格終乃占奪或以灌溉必要之水源故意變換使韓人田地不得一滴之水或韓人有資本之窮急者乃給以借債未及還償之期而造虛偽之口實以強制執行其土地或該會社以高價購人土地後對其賣主以至廉之小作料予之則韓人農夫雖有小作料之若干支給而糊口之資無異於放賣之前也於是隣人農夫從而效之賣其所有土地于日人願爲會社之小作人然則該會社所欲之土地既完全詐取矣乃猝然暴騰其小作料於是韓人自絕於耕作而散之四方雖悔何及此即驅逐韓人之策而東洋拓殖會社之設立主旨也以此之故該會社日以擴張真有冲天之勢無限之補助金非常之驅逐策狡猾之差別待遇未及十年已有三千五百餘戶日本人之移殖矣然而日人之一戶渡來則一戶之韓人被逐非日人之開拓新地而乃橫奪韓人所有之良田沃土者也且驅逐韓人移殖日人方法極爲簡單自會社對小作韓人而直以一言命之曰退去則便皆退去而日人代之矣加以東作已始幼苗方茁之時與夫西成漸近黃熟滿郊之日亦命韓人小作之退去彼其爲移殖日人之必要也韓人之餓死凍死毫無顧念矣然而日本之移民何事不如願何業不着手成功乎韓人之不能生意者彼則容易以廉價購得日人雖無現金而以十年間年賦爲償還之計能得會社所有之土地此豈韓人之所能企望者耶余固信讀者諸君不待贅述而亦可看破日本之蠶食政策矣略記其概則(一)日本令東洋拓殖會社買收占領其土地(二)日本欲以移民爲無限之輸入(三)驅逐本土韓人(四)土地以廉價讓與於日本人(五)日人永久住居

韓國(六)逐出韓人於滿洲方面等也。但以南韓大邱方面爲中心而觀之。被日人之逐出者不知幾十萬觀此而韓人在過去十年間當日人之逼迫如何可以推想矣。勿論何地方爲東洋拓殖會社侵入之地者韓人必當逐出故(東拓來韓人退)在韓國便成一個公理矣。余離韓數日之前在北韓地方邂逅鄉村豪農而得聞其說。伊有幾頃水田在山麓下灌溉甚好。突有日人占有其傍近水田矣。後自東洋拓殖會社強要賣渡者屢次而伊於金錢無慾。故終乃不應矣。幾日後有小作人慌惚來言曰。田無一滴之水而枯矣。乃大驚往觀。則彼狡猾之日人改易其水道。使我良田作爲焦土也。記者聞而憤慨。更問曰。然則何不告發于當局乎。該地主徐徐笑答曰。告發告發何爲此不當之言乎。余有平壤親舊數月前當如此之事。而告發即日入于監獄。受刑幾死。不知其構何罪名。而以告發受禍明矣。余尙有糊口之資。何必取辱於彼乎。雖所有田地被奪無餘。而安坐默過爲第一上策云。

此卽韓國之現狀也。且非但農業界而至商工各界勿論。如何種類無不有被其染指干涉者。要之東拓會社以其莫大之金力無上之官權。不惟壟斷全韓而總督府亦受其指使者也。余西人也。未見西洋有如此之事。則大會社與資本家幸勿誤解也。金權跋扈。非但日本之時有現狀。而不問東西營利會社自營利會社也。故不正之競爭非道之虐使。日見常聞者也。然此東拓會社特爲日本帝國政府之會社。每年自政府予以莫大之補助金。而其資本之大部自國庫支出。而經營之人物皆政府之任命者。則謂之政府卽會社。會社卽政府。可也。政府以政府之會社。恒常指唆幫助。則政府對其會社之行爲負其責任。不要多辯也。乃政府靦然精巧。其年報張皇。粧

撰廣布于世曰韓國在其統治之下得繁榮之幸福謳歌聖代之至治云也

然則日人之教育韓人所謂以勤儉之風諄諄教之懇懇導之云者何用之有而且在日本經濟之下勤儉之美德有實行之道乎設使實行而有何所得乎雖其道路如何其改良溝渠如何其浚濬橋梁如何其架設其他物質如何其便益而果爲誰乎於韓人無何等關係也

五 精神上壓迫

余既以韓人歸日本統治以後享有所謂自由範圍者大略論述矣大抵自古以來人民享有自由之程度最其明白表示者觀其言論自由出版自由而決定矣今日人所謂韓人自由果有如何性質者尤可明白理解矣第一以出版自由言之如基督申報記載美國威爾遜大總統罹病之報即被發行禁止勿論韓人之文藝雜誌現無一種而或國際聯盟等字樣之發見者則必被禁止而編輯者逮捕矣韓人之新聞雜誌原來無有而如欲其發行者必以其編輯之原稿受總督府之檢閱而雖無碍於其眼者不許即付印刷而送于當該官廳則該官憲字字點檢節節解釋關於世界重要之事情窮極吹寬若有絲毫之關聯於政治之嫌疑者輒當禁止或幸得發行之許可者經三四日或七八日還投原稿得付印刷及其出版後官憲毫無不穩反覆攷究方許發賣此即韓人之出版手續也且韓國內出版物除日人發行者外無有不經總督府官吏之精查細閱者矣至於傳道書類聖書宗教書類等出版非受其繁酷之許可則不能得也

韓字新聞由韓人經營者絕無一種余既言之矣其以韓字發行者只總督機關每日申報而已然而該報記事

絕無新聞之價值而純係日人宣傳之機關且其舞文曲筆成人姑舍雖三尺童子不可得欺矣。余在韓人會席試問其何不經營新聞乎則彼等皆異口同聲捧腹幾倒必是余言對於彼等爲可笑且沒常識也新聞雜誌非不屢提請願而官憲初不一顧投之概中至於純然傳道團之刊行者如講和會議之開始及閉會之事實莫敢揭載如此世界可得新聞之發行乎

年前基督申報社說載新春辭一篇蓋以新年祝辭之例套謂舊年已盡新陽復生萬物重新山上喬木將舒新榮野中枯草更吐新芽人生亦當此時改心革慮精神一新云云此不過對景抒情之一種韻詞而乃總督府檢閱官覽此社說怒氣大發目眦發電手筆戰栗良久乃曰新春復生萬事更新此鼓吹韓人反對總督府建設新國家煽動叛逆者可殺可殺即命禁止

又自聖書公會發刊一小冊子其中有韓國兄弟各自擊退其心中惡魔之句語大觸檢閱官之怒即當押收且拿編者呵之曰爾所謂惡魔非指日本人耶擊退云者非教韓人以反抗日本耶特發嚴令自今不許教會一切書籍及雜誌上更現魔鬼字樣矣然故余問韓人以何不發行新聞而受其嘲笑無足怪也噫其對於時事及政治而稍涉近似者亦當重罰而若以真正發表則遭如何變故耶

且以言論自由言之今韓人無官廳之許可則集會不得設有許可而非有警官之出席則開會不得也自教會有牧師幾人集會議論而偵探必來禮拜時間亦有刑事來矣言論自由勿問可也余在韓國聞若是之言矣監獄教會牧師一人主日以天國問題講道禮拜未了即被逮捕受其峻責若日後更有如是之講道則必處嚴罰

云云加以無數脅迫更發嚴正之警諭曰天下惟有一國即大日本帝國也豈有別國乎此只今韓人之傳爲奇談者也

平壤高等學校爲畢業試驗也有一學生偶記羅馬英傑喀查之事乃遭大變筆紀冊與教科書盡被警署之押收教員全部受其調查謂教長容許校內之浸染危險思想嚴加譴責矣又自平壤某學校組織文學會每週一回會演而血氣旺盛思慮未熟之二十歲內外青年以多情多恨自豪自雄之心事試其論戰矣一日有一青年以純然的抽象問題演說而其中一節有曰精神到處金石亦透吾人勿論何事惟以專心專力爲之豈有不能成就者乎以此一言之故該學生與其外三人及該會任員均被逮捕文學會即當解散免其教員二名以日人代之而日人謂其演說趣旨若韓人決心爲之足可顛覆總督府者如此凶惡之會不可放置云也

且余聞於一牧師伊曾視務仁川教會之日組一宗教會以每月集會講演一日請邀有名韓人之宗教家而開講演其人纔下演壇即被警察署嚴重取調翌日早朝始得放還翌日又當例會先以演士姓名及演題揭示教堂門外方待開會時間而猝有警官等攔入教堂不許講演故不得已往見署長千萬哀乞終無效力而無何等理由之說明該會遂永久停閉矣

不寧惟是余有過去三個月間之親自目視者以此等近似之理由數百數千之無辜良民當逮捕毆打監禁者陸續不絕故要舉其實例而一一言之則無限矣然而有不能確信者余爲其明白證據非但韓人自身而併西洋人亦可立證矣

然而余欲舉其實例者非但言論自由出版自由而尤有關係於重大問題者即因過去十年間韓人對於大小暴君之日人官僚輩當如何之橫暴蔑視者而爲示其例也噫使今日韓人惹起若彼之激烈反動實日人大小官僚輩之跋扈拘束干涉爲其原因也

彼日人以無窮無盡之苛酷煩瑣有名於世界者所謂條令所謂檢閱而無限之逮捕譴責也被人面獸心的官僚輩之跋扈軍閥派之橫行也韓人在一年十二月間無何日何時之不受其虐者矣噫孰有韓人絕叫獨立之原因歸之韓人之愚蠢蒙昧者乎孰有以韓國動亂之原因歸之韓人好事的天性者乎

且余在韓國之日京城附近某村有一少女死亡而其兄往于警署申請埋葬而許可之出也其名乃生者之名也其兄更往警署請求改正則曰不可不可猶哀乞不已曰此乃我名我則不死豈可以生者爲死者乎警官猶曰不可不可該女子泣而更請曰此真錯誤也警官曰錯誤錯誤豈有錯誤之理速即退去不然則必宿於監獄矣噫此可憐之女子揮涕歸家不待已以自己之名代其亡弟則民籍上爲死者已矣噫一家之內生死永別固爲悲哀而況親兄弟間乎彼對於不堪悲哀之人從不表其同情而豈有加以殘酷之必要乎除非惡獸忍爲此態耶噫讀者諸君證此一事可以理解韓人生不如死之境遇矣何故過去三月獨立運動時日人加無限之苦楚於韓人乎何故日人以棍棒打殺韓人乎何故韓人語及日本官吏不勝戰栗乎何故在韓國內日探之監視嚴密十倍於俄之帝國時代乎此其理由皆可以諒知也故欲理解韓國之現狀非先理解日人官僚界之現狀及心理則不可者以現今韓人呻吟於惡政之原因在於日人官僚輩故也如在韓日人官僚之無能而苛酷

且戀戀於地位者求之世界實無其類也蓋在韓日人官僚皆欺瞞行虐之一團耳非但小官僚輩而上至總督及日本之內閣大臣無不盡然矣日本官吏勿論事實之如何而萬事萬物非以有利有望而報告則不可也不然則保全自己地位不可得也若下官對於上官而有批評之辭或有言其錯誤則無有不當峻責矣

余在平壤聞若是之言矣平壤附近之郡普通學校學生等有同盟休學之事當地學務委員即時報告而兼以善後之意見書提出于道廳自道廳命令曰報告之或有改正者未可知也有他不書字之用紙署名捺印以送也學務委員依其言而從之厥後追聞則道廳主任將該用紙填書之曰本郡日以發展中也普通學生日以增加耶穌教學徒厭惡讚頌歌轉學普通學校者多數云云是以該學務委員揣知上官之意嚮更不爲如是之報告矣

去春早魃太甚農民阻飢不能納稅警官多數出張巡行民家督納稅金而沒收其家具器皿以充稅額乃報告道廳曰本郡農形大段良好農民租稅早已完納云云彼官僚之欺瞞策固如上述而決非限於下級官吏者也頃者二月間獨立運動爆發之前留日本東京之韓國學生有提出陳情書于日本政府者于時總督府高等官一人有滯留東京者自日本議會調查會招請其人而質問曰統治朝鮮既經過十年之長久歲月至于今日有此等事件之發生者其原因安在而鮮人有如此反抗何故耶請問其理由則其人少不遑巡應聲即答曰此等學生只感染於海外不逞學生之惡思想以煽動爲業的不良少年也朝鮮內地非但決無不逞學生而人民皆謳歌善政不聞有絲毫不平之言也所以如此重大問題沒於有無之間不起何等反響而即時消滅矣然而該

高等官還任京城不過二日獨立萬歲之群震動全韓天地叫呼自由予其反響於全世界矣以上即最近十年間韓國慘狀之記述也現今韓人勿論男女老幼各階級各團體而舉國一致犧牲無限而少不辭讓絕叫不得獨立則死實其原因在於日人也

六 三月一日

嗚呼三月一日即久被蹂躪之正義久被勒奪之自由久失光彩之人道在韓國而凜凜乎發其新芽矣嗚呼此日乎十年間在異族壓迫無道苛酷之下血淚長流胸膈焦煎怨恨生涯之韓人勿論政治上經濟上教育上宗教上社會上各方面失其發展之韓人我敬慕之父母被奪我所愛之兄弟妻子親舊被奪而幸其不絕之生命懸於朝夕之韓人長久忍耐之憤怒怨恨遂以一大爆發而發洩積年失却於暗黑裏之太極旗更以此日發現其光彩矣

大韓獨立萬歲……大韓獨立萬歲……大韓獨立萬歲

此歷史的紀念前一日全國各地早已上京完定計劃造成獨立宣言書一日夕大韓民族代表三十三人在京城太華館宣言獨立舉杯祝國民健康宣誓盡忠復國因以電話通告於警視總監自願被逮於是警官等聞此天外警報周章狼狽派武裝之警官以五六個自動車疾驅而來該三十三義士談笑自若手交獨立宣言書以泰然之態度整然之秩序分乘各車萬歲聲中和氣裏馳入現世之地獄日本監獄于今十有一月三百餘日爲闡明萬邦萬代平等之大義啓誥民族之正權者乃以一人一室堪耐寂寞甘嘗拷掠其中有宗教界之道主

牧師禪師及學校教師儒林碩德亦有富厚之實業家而曾於八年前以有名的百二十人事件入于監獄備嘗排日價值之如何者亦不少矣

翌日全國各都會均開大會朗讀宣言書飛揚太極旗義士之演說辭灌耳刺胸億兆之萬歲聲震天動地由是以往邑邑村村坊坊曲曲示威運動行列無不以平和秩序而進行者嗚呼讀者果以此爲動亂乎如此動亂亘古未聞絕世一見之事也其以不可避之境遇而偶發者只一二事件外未有一處之表示其亂暴行動者矣夫韓人團集其民衆唇乾舌焦聲破喉裂高喊絕叫其萬歲大韓獨立萬萬歲整然肅然巡回通街大道如斯而已此決非由何人之煽動而爲之者惟其各各自心忍無可忍以良心之號令本能之激動身上不被片甲手中不持寸鐵對日人消防夫鐵鉤之投引憲兵隊鎗劔之亂刺騎兵隊鐵蹄之蹂躪而無一石塊之投者矣彼等固不欲爲抗拒者雖欲抗拒而原無武器以合併當時日人押收韓人武器無一遺者故也然此赤手空拳之良民發揮其勇氣勝於戰士者十倍百倍矣人夫之衆殺到警察署之前自求捕縛男女學生露胸仰頤突進於鎗刃之口而日人巡查兵丁等狀如餓虎眼放赤燄拔劍放砲刺之斷之蹴之殺之然而民衆益益猛烈高唱萬歲

大韓獨立萬歲……大韓獨立萬歲……大韓獨立萬歲

前列既倒於鎗劍鐵蹄之下後列繼而猛進若不見鎗劍鐵蹄火鉤棍棒之當前者并不怕毆打捕縛劍傷鎗斃而前隊或散後隊即繼突進於巡查之劍端兵丁之鎗口中萬歲手裏太極乾坤騰躍於萬歲坎離回翔於獨立壯哉偉哉夢耶醒耶

吾儕西人恒言東洋人種缺乏於勇氣矣今既無抵抗之方便亦不要抵抗之行動鐵鉞當前劍戟迫頭而目不逃膚不撓無畏懼無悔恨泰然坦然超越死者扶起傷者前進前進而已噫此迫於危境陷於死地而決死一隊寧爲義鬼豈作虜奴劍折鎗破頭觸手搏壯哉勇氣世界何族更有較此高尚之勇氣乎噫此等勇氣等於世界實無匹儔矣

噫此實可驚可慄慘極駭極之孽業也自今而往日人雖有如何改過如何贖罪而對今番獨立運動而加以殘虐凶暴之蠻行者永遠印刻於韓人之腦裏千秋流傳萬代遺臭矣

且彼對於數千數萬之無辜良民加以亂打惡刑如彼其凶極酷極慘絕絕者不可以人耳信聽不可以人意思諒其爲人間對人間之行爲也然其證據無待廣搜博訪之爲也凡外國領事宣教師商人及婦人等立於自家總內目覩八旬老婆十歲小兒之洞貫於軍刀者少年學生係縛於大樹被棍棒之亂打而瞑目吐舌者二八少女蹂躪於馬蹄而踢其腹部猝其頭髮而去者

噫此等獸爲蠻行古來歐洲戰場未曾有也彼五年間全土被敵軍之占領不見日月之白耳義人亦想像不得也過去時代被征服於土耳其之民族間或有嘗其近似之辛酸者矣且此等行爲或因互相衝突之方激而夢裏霧中以感情逸走而敢行者則雖非可忘而不無可恕也然而韓人之今番運動不取對應絕無衝突況且彼之凶行十之八九不行於示威運動時之街上而逮捕後在警察署審問室內以冷靜之頭腦深思熟考而行之者此決非以一時的衝突或一時的感情之激動餘波而偶然爲之者也日人以此充分之凶暴蠻行猶爲不足

而恨其更無加此之苛酷方法也

大抵去春以來被逮者爲幾十千人而被逮者絕無不當其惡刑者矣彼其加此等惡刑者非以有罪決定後課罰而爲構成其罪取其口供而施之也故不辨其事之輕重不問其罪之有無而同受惡刑而已噫似此殘忍慘酷之刑罰在歐洲中世暗黑時代或有其比之可見者乎以其惡刑方法觀老幼吊懸其兩手於天井而置之終日雙肩幾斷兩眼直墮終乃淚涎橫流知覺全失或以赤煉之鐵線炙其手指赤脫其全身以鐵針刺之或以赤鐵烙之或以鐵筚拔去其足指或投入於狹小之箱屈曲其身體或以熱湯灌鼻孔或以苦草水灌之或以竹針刺入指爪之隙加以鞭笞無限種種致斃或以天幸僅保生命者不爲幾日間極善治療者不可救也以杖毒極甚之故入于病院而割去其大塊之疽肉巨片之腐皮者無限其他殘忍惡刑之方法真有耳不忍聞手不忍記者矣況且此等惡刑不止一二次而幾日幾夜每次四五時六七時間繼續爲之非取其自白則不已也然故莫論其事實有無莫知其曲折如何而只答曰諾者十之八九也在平壤之美國宣教師牟理氏之事件亦如此構成者其所謂證據謂韓國學生二人以牟理之指導參加運動而該學生等不勝惡刑審問之下只答曰諾乃以此爲證牟理氏被逮入獄及其裁判也該學生等否認其爲自白曰吾儕不勝惡刑無可奈何只答曰諾也然而此乃彼等之辯明也余於是試問於不偏不倚公明正大之人士夫日人爲如此之虐待而能免韓人之憎嫉乎可期其親之和之不嫉不惡乎若以公平論之日本自總督及數部長官幾個小官盡行更迭免職差可爲自服其罪惡也然故追究其既悔之罪惡而重言復言反爲狹量及宿感者未可知也且往事不諫哲人之明

智君子之仁心也然而悔改非以實行表示則不可以日人之現在行爲觀之謂其真正悔改者絕無一事而此等慘狀及惡刑尙如前繼續也記者十餘日前在韓國時目覩其自監獄出者體無完膚血痕尙存然日人之過失萬不可以前過而默過也且以韓國現狀及韓人態度觀之與過去三四月頃少無異點而反愈激愈烈日深日固也

且讀者關於今回運動有特加注意牢記者有兩種事實而其一獨立運動爲舉國一致全族合心真個是民族運動也其二背後有畫策指導之異常非凡機關組織團結運用方略神算妙策靈活機敏也余非謂陬邑僻村匹夫匹婦無不理解其獨立運動之必要義味也但余謂韓人全部之多大多數對於獨立有天性的強烈要求者不可否認之事實也蓋民族與個人由其天性而作用者一也更讓一步設謂三月運動非國民的運動而今日則不可否認之明確事業也日人做得如此矣前之闔眼者今則其心已醒矣前之隱忍強從者今則顯抗抗拒矣韓人果如日人之所願而爲愛國者然爲韓國之愛國者以此點觀之日人對於韓國而有多大之貢獻矣初不知何許事由而隨衆呼萬歲乃被捕入獄彼不學之村農夫沒覺之幼年男女學生及其放出也後悔姑舍而反覺獨立之真義而爲熱心於運動者矣

余在韓國與纔經出獄之多數男女相晤交談其備嘗苦楚者真可灰心斷氣而乃告余曰吾等既嘗獄裏生活杖下刑罰矣卽此當日苟有少補於國有益於事者不辭再拘再監甘心樂爲云而此非高言壯談也其談話之頃言辭斷續有左顧右盼之態乃其懷中衣裏有書類之藏置故也蓋此書類之一片一枚爲日人所發覺則例

處六個月懲役矣然伊等決非日人所謂不逞之徒亦非知識階級之人而單純質朴之小賈也農夫也閭門生活之母若妻也異哉日人如彼其激動人心惹起衆怒而不解惑耶

且今回韓人之獨立運動有卓異特著之事實其策略完善完備其實行敏速敏活矣彼有極密探偵機關之日人官憲有親密情意之西人宣教師等併未有探其內情之毛頭外兆之毫末者矣當時不安之空氣澎湃國內者人人皆知而其裏面之疑結者無人知得矣雖獨立黨員而非其主謀與實行者則莫或知其秘密矣印出幾千幾萬部之獨立宣言書而分播之製造幾千幾萬個之太極小旗而散布之各地大會之召集也會期之時日也演士之推選也均已預定不惟國內而至於海外亦皆密送矣余在上海大陸報社三月一日獨立宣言之日接得其宣言書及韓族之地位陳述書矣且伊等發刊獨立新聞家傳達如前此大戰時白耳義報之發行也且一大中央機關發生於事情錯雜警戒嚴密之中坦然進行意者韓人爲如此舉國一致之團結者嚆矢於今日矣伊等之所當危險與危害實想像之外而少無爾躊躇畏怯着着進行此豈非偉業豈非奇蹟耶其機關之依然活動精神之隱然旺盛既已略述矣韓國有秘密政府之組織聯通制之實施頒布法令多由婦人少女深藏衣裏而秘密執行且在上海英國美洲等地敏活聯絡募集資金送達外國既有數百萬元之越鴨綠江而往滿洲及中國者亦有數千元之輸送者被日人之押收矣舉事以來男人女子有久時不見一朝忽現者獨立新聞繼續發行此以騰寫板印刷者而散布全國各處而人莫知其從何來落於案頭也其騰寫版從何處購入在何處藏置何處印刷者全部秘密日人如迷路行客東西搜索茫然不聞不知矣

且秘密政府之背後有國民會而聞某氏之說明者此會宗旨爲鍊磨國民之獨立資格自主大義基此而生教導以各種責任及義務也該會存在非何等秘密而會員之誰某活動之如何非但日人而會員亦於自己擔任之職分外不知其他以此會之干連嫌疑數百無辜之人當逮捕監禁而其進行依然也

今日韓國之逮捕一種例事也或於家中或於街上猝然被捕無何等理由之說明而拘留之但令吐實拷之打之或處罰或放釋而無論何人一次以獨立運動之干連而被逮者無限被打及其放出後變而爲真獨立黨員也

今以新聞上之無記事報道而思量韓國已歸鎮靜平穩者大不可也余在韓國之日平壤及其他四五處示威運動又起且其十月中旬如去春三月之爲者全國有大大的示威運動之計劃爲警官所探知即以先期羅列軍隊顯示暴威不得已變計以國恥紀念日全國人民舉行哀悼亦因事情而變改者也且其時各學校同盟休課學生拒絕從前規定之日語課而主張其爲一種外國語科者余見之矣

京城某學校學徒以早朝會集時間違校規一齊整立對日人校長請廢日本教科書日人校長氣塞良久乃曰從此依諸君所願而善處之姑此願從於規律也於是學徒潛入教室將日本教科書全部破棄出而語校長曰日本教科書不廢則決不上學矣學校事善爲之吾儕去矣一齊敬禮後即退只今如此之事無日不起且過般停止運動實非停止而乃延期也此抵抗的運動必早晚間更續而益形其激烈性矣然其戰略實學得於日人者也若韓人以武器抵抗者日人早已處之鎗殺者久矣但幼兒等扯其教科書壯者只呼萬歲而日人真氣塞

矣彼加如何之惡刑而民心益益鞏固獨立運動益益激烈而日人亦奈之何

七 所謂總督政治改善

日本對於世界聲言韓國政治之改善矣且對歐米韓人之宣傳運動者而答曰當許韓人之要求使韓人益得自由不遠間實施相當之自治云又爲辨明白吾等懺悔前過方加改良中也吾等許與韓人以自由也吾等從歐米諸國殖民地之發展程度漸加改良也吾等廢止軍國政治撤廢憲兵制度也且早晚間更有他改革也然則韓人之騷動真無根據而不可理解其本意云云

世界各人驟聞此言易信其爲辯明者然而韓人自身決不信此對於所謂改良者置若罔聞伊等對於改良及如何政策而有日本屬邦之意味者少不表其滿足以過去經驗極其辛酸故也且韓人之滿足姑舍而所謂改良全不信之故改良之說貽韓人之嘲笑也

日人聲言政治改善者已三個月而亦有約束者然關於實施之期無一言一句之明言而所謂改良之實施如此

一 憲兵制度撤廢

日本撤廢憲兵制度矣然而其實憲兵非免職而亦非自日本國召還也但其服裝以巡查變更而已從來以諸般苛酷殘忍無道之行爲吸收韓人之膏血者悉仍舊矣

二 共同墓地撤廢

韓國獨立運動之血史 附錄

日本撤廢共同墓地矣然而韓人對此而冷笑不已曰不許生者之所求自由而乃許死者之自由乎共同墓地未嘗不善而古來埋葬法之弊害吾等之所知也

三 韓人校長登用

日本從此以韓人日人校長之一律登用聲言矣然而事實上被登用之澤者只十三人之少數而畢竟轉任於窮鄉僻村也

四 官吏俸給均同

日本對韓人官吏予以同一俸給云也然而除少數例外歸於虛言而已或以例外不無同一俸給之受者而查其內情其人必當黜職日人之月給仍舊以此問於日人則曰韓人之技術不及於自己故也然故事實上所謂官吏俸均同令歸於空文已也

五 教育改善

日人以普通學校之年限延長六個年且其學課與日本小學校同一者既爲聲明矣然而驟見似好而其實對於根本的問題日人無可容喙者矣日語仍舊爲學課中重要之課目學校用語亦仍舊限於日語教科書亦仍舊日語冊而已此日人所謂改善者也噫韓人指此爲空文空言而冷笑之誰能責其爲酷評乎勿論新政之實施必要相當之時日而況韓國問題大非容易者然故余對齋藤總督之施政將來而爲希望之一人也然而所謂改善以何爲意味而其實施之期爲何時乎彼其無明確聲言者疑點也若總督府對於此點有多少注意者

則過去聲言免於如彼之許多訝惑矣不寧惟是總督府之此等曖昧模糊態度終以口舌謂之改善而惟貽永遠訝惑而已所謂改善非以事實上表明則所謂新政直以曖昧模糊者看做可也

以公正之眼目觀察韓國之現狀所謂改善者何耶誠難理解矣以上所言之惡刑如前繼續雖日人否認其事實而舉其證據則無限也京城大邱宣川平壤仁川及其他各處之無辜良民無日不當逮捕者而以無可罪之證據故加無限之惡刑捏造其自白乃已自數日至數週監禁終無確證之現出者不得已放逐而無何等說明無何等未安之說矣余目親身當惡刑者無限而在韓國一都會親聞其實歷之談且余目親其傷處疹處及捕繩之痕笞刑之腐肉以巨索緊縛之以三條竹猛笞九十度矣此以口舌傳之者則或有爽實而余以目親而驗之決非過言也此傷處豈為欺瞞一時新聞記者而自作者乎

數千青年男女當此嚴冬寒節而呻吟於囹圄中者只有萬歲一唱而更無他罪也大赦姑捨而無減刑之一辭伊等之當惡刑虐待去益甚矣某都會有女子團製造多數草鞋為送交於女囚有所請願而即被拒絕所以彼可憐之女囚當此嚴冬晝夜跣足行于至冷之監獄板廳也不問證據有無而必行逮捕因如何說而必行大搜索矣在京城者不顧有罪無罪而有捉一個人者大有所得也是以輿論謂日人以前此陰謀事件而為其蠻行者今又再加反覆云也且非但政治犯也實無如何犯罪而若日本人少認其為不利於自己者輒加內亂犯之名目沒數逮捕矣是以多數之商人企業家學者牧師等入于監獄者連續不絕也對於獨立運動不問其關係有無而少現其頭角者必不免日人之毒手所謂陰謀事件會如是也

且以官僚之態度言之依然是古我今我少無變態也彼所謂慶節日矮小傲慢之日警擔鎗佩劍橫行市街威脅人民以強制懸日旗於是韓人不得已以白紙名曰日旗而懸於門戶者以鎗劍之可怕也

是以勿論何人而理解人類之本性如何且稍具常識者對彼日人所持之態度其予韓人以平和尙矣反益予之以苦痛怨恨者可以明知也於是韓人舉其反旗矣乃橫暴無道之日人致此可憐人民之流血剝肉此日人益買韓人之憤怒怨恨者也日人於如此之時以最賢明之方針努力於放任主義者全然不識也苟欲稍緩和韓人之怨恨者則不知懷柔手段爲必要耶以強制懸其日旗此所謂政治改善之行動耶此所謂一視同仁之態度耶余非以日旗問題爲重大問題而但觀此一事可知日人盲昧於時勢之推測而尙陷於官僚政治者矣

設謂日本之真意如何善良而現今總督官吏非全部更迭而足以改善韓國政治者實是疑問也雖有如何訓辭訓令之頒示者而彼官僚輩不能一朝變爲名官者明若觀火矣自齋藤總督及其他高官雖有若干改良之計劃而在下之下級官吏一無實施之想此乃官僚政治之本色也且以上級官吏言之果以實心謀其改善乎真欲實行根本的改善乎亦屬疑問者也設或伊等謀其改善而東京政府真實許之乎更進一步而日本之對韓策稍許韓人之自由乎亦疑問也

然而改善云改善云者其時代已過矣韓人之要求惟一完全獨立也且韓人對此問題而併不要論難何也以日人雖有如何之言而全不依賴故也而此非無理也余與韓人會談不止一二次而皆異口同聲言之如此

問君等若日本予以自治又更進而益予以自由之政治者則滿足於意乎

答日本予以自治乎何乃提此不當之說乎

聞然而設使許之則如何

答彼必不許矣

問設使許之則滿足乎

答滿足乎滿足乎未可也但仇視日本人或稍減輕

改善改善何者爲改善乎認日人真有改善之意者乎日前吾親舊三人入留置場受無限之惡刑今日又有被捕者明日亦當有之吾等亦知其不免矣以教育言之何者爲改良以經濟言之何者爲有益於韓人生活乎憲兵只變更其制服其他官吏亦只變更其制服者非事實而何彼帽子之皮相雖百萬番變更而何用之有審其內容如前則彼輩之心理寧有毫末變更者哉是以彼憲兵與日官不盡撤廢則所謂自治萬無施行之理日人不盡撤退則吾國萬無與日本結和誼之理日人與吾韓人間有永遠之牆壁矣吾等決不冀其改善也名曰改善而其實使吾人益不聊生而已彼等曰改善改善而極其囂張然而此等之言非今始有而過去以口舌爲之久矣蓋其目的不過欺瞞世界耳目彼於合併當時亦爲此言而不出二年有所謂陰謀事件之殘酷惡刑厥後亦口言改善者屢矣然而改善姑舍而益以改惡而已今日彼等又以改善爲言則必於來年益有改惡吾等所確信者也吾等與彼多年共活故識破彼等之內容熟矣故後雖有如何指天爲誓之言而盡不信之矣

嗚呼讀者勿以此韓人之言爲偏僻而誹笑之勿以爲憾情的言論而誹笑之余認韓人之不平決非無理者以事實證據矣

八 齋藤總督之談

余自韓國出發之日訪問新總督齋藤而其目的一爲新施政之方針以直接聞於最高當局者爲第一明確也亦爲日本帝國版圖內之韓國地位新施政以後有如何向上進步者欲以直接明知也

余爲避其誤解先期二日錄其質問事項而提出且會見後將筆記之草稿更加校正而提出焉所以記述之與總督談話決無一言一句之誤錯且決非其出於一時的偶感而由久久深思熟慮者所可確信也

余訪問總督於其本邸于時在席者通譯今村重藏及余三人也總督曾漫遊歐洲而能通英語然而語及重要必使用通譯常例也伊本以海軍將校數年前經海軍大臣之職蓋日本仕宦界之有數人物而且比較的有進步思想者聞於其親近者之所言亦謂其有改善之意者若自上級官廳無別樣干涉而在其部下者爲之協助則有幾何間改善之實施云也然而伊對於如何程度而有進步的思想者有待於將來則未可知也且以余之一時間半會見時之印象言之伊於職權行使不無多少拘束之態也所以伊之言辭不無多少間虛飾之分子矣伊於實行上無何等要點之特別說明者又有觸於何等根本的問題者不肯披露也何如問伊對於余之質問而答辨如下

第一余關於同化問題而質問者以同化政策之繼續與廢棄爲最要根本的問題故也

余對總督問同化政策之變更與否即以新施政方針關於韓人之言說風俗習慣宗教其他固有之文明而保存之乎以韓國爲日本帝國之一版圖如前看做乎此余之劈頭質問而總督之答辯如此

不幸同化之語惹起異常之聯想故自來對韓政策多受外國人之誤解矣吾等固希望韓人爲帝國之忠良臣民者然吾等決非破壞其民族性者是以日本對彼固有之文化不惟欲其保存而益以獎勵使之進步發展也吾等希望韓人使用日語者故使各校學生學習日語彼等原有語學之技能而日語構造與韓語同一故學得爲速但長成者之學習新語困難故不以強制命之然而雖不解日語者而至於文字凡公文之以日文爲之者解得不難以日本及朝鮮之使用漢字同一意味故也且日本之假名與朝鮮之國文別無甚異且言語排列之順序亦同一也

是故吾等恒獎勵韓人之自己言語而又希望其漸次通解日語也

又曰吾等不欲變更韓人之傳來風俗習慣而未有一次強制爲之者且新定法律及規例之時必酌量其風俗習慣而俾無違反背馳爲特別注意又爲研究而置特別調查機關也以宗教言之日本憲法有許信教自由之條目使韓人充分享有其宗教上自由也

又引日本維新前例而證之曰此時日本國內有數多小國而方言各殊矣維新後爲統一全國以標準語普及國民而決非破壞其各地方之特色也是以維新後各地方之特色益以發揮而人民愛鄉之心益發旺盛則朝鮮人亦如此同化而傳來之風俗習慣無變更之必要也

此卽總督之說明者噫如此故韓人表其不滿矣蓋韓人以自己神聖之國土與日本之一地方同一看做者毫非其願也今聞總督之說明日本於些少之點否認其同化而乃其本意則如前爲強制同化也日本將來益益使用其武力明也非但余見而人皆預想矣韓人思想雖滅死而決不同化嗚呼此其難點也此其難點也

第一余質問其施政改善之方針如何非但方針而特要其實施期之明答者總督之順序答辨如左

一 出版自由

總督府爲漸次許與其出版自由而方在調查姑不得明言其期日而要之不遠間頒布也

然而舉日本之例而言之曰日本之出版自由如現今之擴張乃經過三階級後僅能至此矣日本之出版始有拘束及阻害者多而漸次解除以至現今程度也余非謂韓人必經過三階級而刻難許其同一於日本之出版自由當分間拘束爲必要現今韓人自國外送達之各種不穩文書甚多若於刻下許其出版自由則是獎勵害毒韓人之出版物也故吾等爲防止其惡影響之感染而漸次從時勢所許而許與之爲考慮者也

二 言論集會之自由

總督府漸次許與言論集會之自由而非謂全無制限之自由也以如何方針取締韓人之集會爲困難問題故非經審查則難以明言也若彼等之希望在於日本語之言論自由者總督府勿論隨時許與而此非韓人之所望也若韓人要求在於自己語之言論自由則不可不置相當之監督故總督府以使用能通韓語之官吏爲必要也是以吾等對於現今而爲準備亦認其頒布之期不遠也

以此觀之總督府所謂出版自由言論集會之自由名曰自由而其實爲有限的干涉的自由明矣

三 教育之自由

余關於教育而問教授用語如前使用日語乎或採用韓語教科書乎全學科時間日語課目占幾部分乎許學科選擇之自由至如何程度乎私立學校之拘束比前有幾何減廢乎總督之答辯如此

以教授用語言之下自普通學校上至高等學校係韓人學校者韓語漢文及作文以全部韓語教授將來亦如此勵行也故教科書之大部分現今使用日語而將來亦如此也

以日語科之每週時數言之今不能記憶而何如問韓人兒童之費用多大時間於日語爲不必要故時數不至太多將來亦無別變動也

以學科選擇之自由言之對於此點而非思量過去之弊害故自後要適合於時勢又要不背馳於韓人之冀待者欲加大革新也是以將來教科書有改良之必要科目者擬爲新編纂也且非但學科之內容而將來要與日本同一也

然而普通學校之學科與日本同一則不可也以韓人兒童於韓語外非添日語一科則不可故也且其爲消耗多大時間者故與日本同一到底不可也然而對於學科則幾乎同一者所目的也高等學校程度則韓人學生亦於卒業後有入學於日本高等學校之恩典則與日本中學校程度無大差也以私立學校言之余姑無確定方針而何如問私立學校之根本方針與公立學校一致之限內比前許其自由也然而對於私立學校而許幾

部分自由爲最注目之問題尤於教會學校亦然矣現依教育法令雖純以教會寄付金維持之學校而自今年後禁止聖經科目學校之程度不可進於現今以上適當之教科書不可任意採用總督府製定者以外不可教以政治時事非有總督府之許可則教員聘用至於役夫雇用亦不可任意也然而過去之數多男女犧牲其全生涯而爲教育事業者早晚間不可不排除其拘束者勿論也

總督詳說教育之方針者如此更括其全般而說明如下

總督府對於朝鮮之教育制度當以根本的革新故現自學務部製定新方針而該方針完成後委托於特設之學務委員會審查討議委員會之審查畢後送于東京政府以勅令發佈爲豫定者也然而要經如此之手續當費如干時日故先自總督府可自意處斷者即欲處斷也從來朝鮮學校獎勵產業而驅除賤視勞役之惡習手工科占領多數時間矣今此等惡習稍爲矯正故手工科之虛費時間者更以英語其他外國語及數學爲其使用也故此等改革當於數月後頒布而擬自明年一月實施也普通學校之年限延長二個年而爲連絡日本學校而有多少增加也

余關於裁判行政而問總督對過去之殺傷數多生命之笞刑將如前繼續乎總督答辯如此

總督府自後欲廢止笞刑現與本國政府問議也然若廢止笞刑則惟有代以罰金及懲役故現自總督府增設監獄爲大至急也然其對於實施之期無何等明言而但其三個月後爲之云者即其所答也

余又問對於罪囚而加惡刑者爲何理由乎總督曰此或因仍於朝鮮古法或出於憲兵巡查之爲者未可知也

而今行嚴禁故若有此等事實之發露者少無容恕責任者處之嚴罰也

余又問閣下就任後亦如前繼續惡刑之事實或有聞者乎總督謂此非事實而若有此事實則處罰云也
最後余問對於韓人而許與其政治上權利乎即不遠間或數年後許否幾許問自治乎總督之答辯如此
吾等欲以可及的從速實施朝鮮之地方自治制也然而現今地方人民之程度雖小規模之自治到底實施不
得故派遣顧問官於各面爲得其自治而教導之如是爲充分之訓練後面郡道之自治順次實施故當局現行
調查也日本經多年月方得現今自治制之實施是以朝鮮亦如日本一旦實施完全之自治制事實上境遇之
不許也

總督又說明韓人郡守及日本郡書記之關係而聞韓人所言則日人名雖郡書記而實指揮監督其郡守事實
上掌握實權故韓人郡守其實不過虛位云矣總督否認其爲明白事實而言之如此朝鮮之郡守直一名譽職
而有勢力之地位也然朝鮮郡守可堪之人物固非乏也而現在韓人郡守中有能力者不許書記之干涉事務
者有之勿論日人書記之無郡不有者事實也且日人書記中事實上知識經驗能力反有優越於韓人郡守者
亦事實也然而以日人書記之故握實權以韓人郡守之故不過虛位者不當之說也或對於日人郡書記而不
無批評亦事實也所以總督府爲相當措處現行調查也於是會見畢矣總督手執余之質問書翻譯而爲一時
間以上之說明及余之辭退也少無厭倦之色然而余於會見別無所得矣總督有許多說明而對於根本方針
無一言一句之說明曰然曰不然而其全部皆豹變之答辯也

曰出版自由之許與而曰無制限則不可能也

曰言論自由之許與而曰警官之監督不可廢止也

曰同化政策之不要固執而曰韓人以日本臣民之一分子享有其個性發展之自由也

曰韓語無廢止之必要而曰日語爲惟一教授用語爲惟一科目而韓語以特別科目教授也

曰私立學校益得享其有自由而曰以限定之範圍內也

曰自後日語科不要費過多時間而於每日全教授時間日語占領四分之一而曰現行學制無何等變動也

曰答刑廢止而曰將次爲之也

曰自治許與而將次以日人之指揮監督也

此皆總督之所謂答辯而更以具體的分析之則如此

一 明年有何等教育上改善之實施而一無根本的改善也日語如前占領多數時間矣日語如前爲教授用語矣教科書如前用日語冊矣韓國歷史國際的關係時事以如何程度教授乎關於此點所答極模糊也

噫韓國學生連續同盟休學以此之故也以齋藤總督所謂改善方針者見之如此同盟休學不止現在而將來未有真實改善之前惟有永遠發生而已

二 惡刑既爲禁止云而今當惡刑之男女出自獄中者無數也若行惡刑者有的確證據之發露則總督固聲言其處罰而總督若以真心欲得其的確證據則遠方姑舍而但檢查於京城內得其證據者無限矣只諮問於

警察局則雖至千百日而不能得也。設或有責任者而警察局必否認矣。

以此總督之答辯分析見之對於根本的方針不啻無一言一句之說明而總督於根本的方針有無觀念者疑問也。伊於韓國真無理解者明矣而亦可謂當然之事。伊對於言論自由而以警官之干涉謂無矛盾背馳以若是之頭腦真無理解於韓國者當然也。

三 若以齋藤總督之所言與過去六個月間日人以巧言利舌聲言於韓人之約束者爲其總合則切勿夢想於韓人之悅服也。待百年之河清寧謂知者之事矣。

嗚呼！日人尙未見自己之過失矣。尙未見世界活歷史的教訓矣。尙未悟同化之爲妄想矣。可憐哉！日人。

九 韓國中國之殷鑑

韓國之現狀一言以蔽之曰悲劇而已。嗚呼！讀者諸君因以上所述而充分理解其理由矣。加之韓國現狀對於目視中國現狀者予以多大之教訓以兩國當此悲劇之原因理由互相酷似故也。但後者姑未至於前者之境。遇謂其差異點而已。故現今韓國予中國以多大之教訓則韓國東洋之殷鑑也。

一 渡鴨綠江踐韓國之土而爲第一感想者吾儕對於過去中國而多有誤解點也。一見韓國者即悟自己對於過去東洋問題而有誤解者也。

余入韓國之日深爲感想者使北京政府派其高官百數赴韓國京城目視韓人當如何境遇則甚有益也。此若不能則致韓人百數於北京在北京當局之目前以親所經驗於日本化者言其性質使之分明解得亦好也。韓

國現狀非但東洋人而於西洋人亦予以多大之教訓矣

據十年前言之韓國境遇幾陷於永遠衰亡文明凋弊民族衰弱愛國思想枯竭而盡朝廷行政腐敗已極所謂希望無一影子矣此時韓國全然無力懶惰只成賄賂一團各方面無一非衰亡之兆朕貴族社會腐敗尤甚宦官買賣官職可憐人民不勝誅求賣渡祖國於敵國充其私腹韓國人民勿論上下皆昏醉狀態彼等於祖國興亡若無關係者對祖國運命若盡斷念者此時韓國之進步發展渺無影子而所現者惟退步而已全世界昔日就月將向上前進而韓國只停滯而已退後而已故韓國固若永遠入於滅亡之塗者矣

所以此時外人之居住韓國者無不歡迎韓日合併及以此爲對韓之惟一希望者以此時韓人少無自力進步發展之故也韓人於生存之欲望殆若全無者所以爲韓人自身而以外國干涉爲惟一之希望點也此時外人之評論如此

韓人事實上無何等能力將來亦似以自力無何等能力之發揮者也設或人民不無進步發展之思想而無奈腐敗政府之不許矣所以此時韓國寧以他方爲必要也若矯正其腐敗引導以正道廓清朝野施行賢明之政治製用適合民度之法律改良道路家屋振興教育爲遊衣遊食之輩開其衣食之路予人民以生活機會不得不以外力爲必要且此時日本有可驚之進步發展俾世人有多大之矚望注目也所以此時日本伸手於韓國者對其殆無不歡迎矣

然而現今外人之對韓觀念無一不懺悔其十年前所抱之誤解妄想者現今外人無不異口同言曰若韓人以

可及的將過去十年間日人所謂改善者欲行其顛覆破壞也

勿論十年前韓國有腐敗之事實然而不可以此之故謂現今所當之境遇爲其相當也韓國之資外國助力固爲必要然過去十年間日本所予之助力毫無必要此爲日本對韓統治之大錯誤點也此爲日本以東洋新改造之精神上指導者損失其偉大權利之原因也所以日本無何等指導者之能力者暴露其本色也所以日本逸失其千載一遇之好機也若日本對於韓國發揮其相當之能力則其爲東洋之盟主事實也何如間可憐者韓國也

在中國之吾人特於此點有深切記憶之必要者吾輩之在中國者或對於中國之腐敗已甚大無氣力而以落心之結果雖借日本之力而一新朝野對於中國而反爲其幸福者不少矣

雖他國而但施行其賢明政治則爲中國之幸福者固外人之觀念然此不過愚想妄想也蓋中國之腐敗達於極度故一新之爲必要者事實也然而受日本之支配爲其必要者無乃太過乎若少有見聞於韓國之現狀者決無此愚想妄想之夢矣

然而日本之貢獻於韓國者惟有一焉此決非日本意識的所爲而亦非本意也然而少解韓國事情者勿論何人可以看取者此點也即日本人對於韓人而予以希望予以理想予以奮鬥的精神予以統一力者也

現今韓國實古今未有之大騷激動也數百年來創爲祖國而獻其有價值之犧牲者也韓人始覺其國家爲如何必要而宇內之大勢觸於眼簾矣所以當此現世而欲保存民族的生命圖謀其繁榮則與世界取同一步調

認其爲必要矣現今全韓國之新氣運來矣實爲韓國將來而可以括目也所以外人前此對於韓國而絕望者或不至絕望而別無囑望者今對於韓人而無有不表其無限感歎者無有不期待其多大之將來者矣勿論韓國當此現今之境遇者未嘗非當者之責任也且以十年前合併當時言之其末路之如何悲慘者皆吾儕之所知也所以此時來外國之干涉亦可謂必然之勢也且以現今言之驟見日本之內政問題他國人固無容喙之權利也然而全世界文明國人對於韓人之獨立運動無有不表其多大之同情者法理上韓國獨立之可否與政治上韓人之能力有無並不爲問題何者以韓人於道德上有可獨立之權利故也伊等得於十年間苦楚辛酸中者此也所以韓國獨立不可謂非當然也且以日本言之已於韓國失其宗主權之權利以如彼之虐政壓迫而支配他國民者萬不可能也

韓國人乎韓國人乎勇進哉極端忍耐哉

論中國有設中韓親友會之必要

(恨人)

吾今爲此文使日人見之必譁曰此華人排日之運動也或曰華人將助韓叛日也其實吾之言此乃吾人分內之事譬之鄰右失火奔走呼救吾居又適當其衝勢不能不拔髮纓冠而往救之蓋吾不圖消滅大火瞬且禍及吾家吾救鄰人亦所以自救也然則吾烏能不言

夫吾人與韓人唇齒相依情如手足四千年來信使往還夙無閒言不幸四千年後忽爲日人所毀國破家亡流離殫尾屈服於日人威力之下受種種慘無人道之酷刑垂十餘年矣幸韓人不忘祖宗血食之地以民族自決

之決心日謀恢復其故土自去歲至今奔走號呼全國響應志士仁人不惜犧牲其頸血頭顱爲東亞歷史上放一綫光彩此誠吾人所當馨香禱祝拍手相慶者也乃日人不解世界潮流所趨仍以其野蠻手段橫加箝制遂使韓國二千萬志士同處於荊天棘地之中橫被摧殘吾人偶閱紙報所載往往不寒而慄憶甲午中日之役日本宣曰爲完成朝鮮之獨立又中日馬關之約開宗明義第一條亦曰確認朝鮮爲完全無缺之獨立國信誓旦旦中外咸知今日既背信而併韓又復橫行其蔑棄人道之慘行則其藐視中國實吾人之大耻大辱近韓人既自知奮振謀所以驅此人類蝨賊吾儕當然不能翊置豈惟以不能翊置尤當予以適當之援助然則中韓親友會實今日應時必要之機關也自歐戰告終威爾遜總統民族自決之宣言震撼寰宇歐和大會遂產出斯拉夫族許多共和國此種民族均夙昔受異族之逼迫不克自由者也今皆得享受世界自由之福甚至對於亡之已久之波蘭亦許其復國可見此種興滅繼絕之新事業皆民族自決真精神以助其成豈對此爲強鄰鯨吞僅十餘年其全國上下受日本之荼毒忍無可忍舍身以謀獨立之朝鮮民族而獨忍作壁上觀耶矧歐洲此次新興之國皆歐洲各大國予以充分援助而成其業豈我中國對於韓人獨不能予以充分援助耶故吾人今日爲擁護公理保持民族自決主義計對於韓人實有幾分扶助之責任故中韓親友會乃爲公理上所應有之機關也吾人今試觀日人最近對韓人之情形則又有令人髮指者即以暉春而論其初不過少數韓國志士被日人壓制太甚憤而與鬪致有當日之事變乃日人小題大做增兵至三四團之多一面實行其侵略之野心一面發揮其凶殘之暴性凡日軍所至之處十室九空據報端所載自十月八日至十月二十八日所燒韓人房屋計八百

餘家所殺韓人老幼計七百餘名所姦韓人婦女計一百餘人甚至寸磔嬰孩焚燒屍骨詳見二十二日北京晨報試思世界亡人國者亦多有誰施此千古未有之慘酷手段者乎是日人已蔑棄人道主義不欲自居於世界文明之列此種人類毒賊國際毒蛇無論何人皆有起而驅之之責況中韓義關唇齒誼似同胞方之古人守望相助疾病相扶持之義在情在勢皆有起而援手之必要否則人道主義將永淪於黑暗中矣誰無父母誰無兄弟誰無子女試瞑目一思此慘狀其有不動於心者乎是中韓親友會又爲人道上所應有之機關也抑有言者日人今日之視吾中國并無異韓人如暉春事件本日韓自身問題也而必牽涉中國入其漩渦中於是大增兵力蹂躪我土地侵害我主權是其藉端侵佔滿洲已無可諱而韓人革命方進行不已中韓既地相接壤後日似此之事必多事變一次即增兵一次我滿洲國土豈不盡被其侵佔乎况報載日軍在延吉一帶殺害華人強佔華人房屋已數見不鮮是其目中已無中國存在吾人寧甘受其辱耶故吾嘗謂韓人獨立不獨韓國國命上問題抑亦中國國命上問題也吾人不欲救吾國命則亦已矣若欲救吾國命則惟有助韓人掃除滿洲日人之軍閥勢力恢復滿洲華人之安寧使其無復窺伺之地蓋天下無論何人無有不愛其國家者即無韓人吾人亦此固有責任臥榻之旁豈容他人鼾睡吾人爲自衛計對於韓人又勢不能不有一種親善表示然則中韓親友會又爲中國國命上必要之機關也

總之韓人本其正義人道恢復其故土實爲今日世界極正大極光明之事業吾人應有充分贊同相當援助不惟吾國即世界各國亦皆有此責試觀美國華盛頓韓國獨立後援會不已成立乎吾國與韓地相毗連時時

有唇亡齒寒之感豈能自居美人之後聞美國韓國獨立後援會會員已達萬餘人前西伯利亞出征軍司令官陸軍大佐裴婁宇斯亦其會員之一則美人激公好義之心已可想見觀其後援會發起文中有目的四條

一 本會以援助韓國之自由獨立爲目的

二 本會以保韓國基督教徒之信教自由爲目的

三 本會以永久防止韓人所受之日人之惡刑爲目的

四 本會以傳播韓國真狀于美國之一般公義爲目的

此樣目的正吾人急起直追之路徑孫中山對某記者談話亦謂中國對日外交第一步辦法應先要求取消馬關條約扶助韓人獨立以緩其衝足徵中韓携手已爲不可緩之勢吾國不乏血性之士盍速起盍速起速起

結論

吾族以徒手奮起以赤血求獨立在世界革命史開一新紀元矣兩年以來奮鬥益烈進行不已以必到彼岸爲的則吾之爲史亦當廣續以獨立完成之日爲獲麟之期而至若光復史則當付諸我友之能者矣蓋吾族以紀元四千二百五十二年三月一日宣佈獨立血飛滄海聲震寰宇使世界各族均認其有獨立資格者此日而吾族之獨立運動實非自此日而始也自甲辰議定六條乙巳保護條約以來獨立運動未嘗一日間斷我義兵之殉於獨立者幾萬我烈士之殉於獨立者千百我志士團之未死者奔走內外呼號獨立以鼓起國魂者又無量數急進緩進互爲繼續者數十年而猶未能惹起世界之注目也乃自三一宣言以後吾族無男無女無老無少

無內無外無遠無邇全體活動一致踊躍赴湯蹈火萬死不辭向之鎗擊伊藤者爲安重根一人而今則有幾百安重根出矣向之刃刺完用者爲李在明一人而今則有幾千李在明出矣於是世界各族始認吾族有獨立資格而胥異口同聲曰韓國有四千餘年久遠之歷史有二千萬聰穎之民族有古代文化爲日人之先導雖日人以一時暴力強行合併而決不能久佔而同化之也半島江山新氣已見其能達到獨立惟時間問題云耳然則吾族之前途結果確係無疑而對於時間問題而爲若何之進行可乎或曰美日交涉日趨險惡必不免於干戈相見此其機會也或曰俄國新黨屢蹶屢奮宣布赤化將與日人有復讎之爭此又其機會也或曰日本內部之社會派日形發展早晏有革命之舉此又其機會也若此之類固皆當然之事實然吾族之獨立當以自力爲之決不可恃此外來之勢而爲投機之事業也或曰吾族之活動徒手而已赤血而已乏於物質之實力何能以自力達到獨立乎余曰惡是何言今吾族既舉獨立之旗矣使無外來之機會則遂已此運動乎苟進行之方法得其當則又何自力之不足耶以進行之方法言之惟精神上事實上兩種奮鬥之力爲可自信者以精神上奮鬥則惟堅忍耐久耳大凡人類立於競爭舞臺而冒險猛進力戰苦鬥得一生於萬死之中成一功於百敗之餘者皆忍耐力之効也今吾族既皆目不逃於鎗劍足無礙於鐵網而爲勇敢壯烈之奮鬥既兩年矣若或三鼓氣竭會又爲中不能繼續以長久進行則天運不能爲其保佑機會不能爲其輔翼矣果能堅忍耐久百折不回十蹶纒之韓悲觀於現狀勿卻步於險塗則最后結果必奏勝捷此精神上進行之方法也就事實上論之若以正式爭乎則我固難乎決勝矣然而我以多方誤之使彼失其統治之力則可優爲之也何以言之昔吾國政界有

酷吏創造奇刑毒打罪犯皮潰血流以致於斃屢幸郡縣威聲藉甚及其爲洪川守也吏校隸卒聞而協議曰
陸雲受刑於此人之手則殆矣盡爲同盟抵制之計乎視事之日故爲不順以挑其怒守暴躁如火叱行棍無
一幸舉以加諸犯人而略不施打守益怒更比他

十四 每三易之如出一轍